



বুদ্ধদেব গুহ

সাঁঝবেলাতে

সাঁঝবেলাতে

বুদ্ধদেব গুহ

ক

প্রথম প্রকাশ

জ্যৈষ্ঠ ১৯৬৫

প্রকাশক

বামাচরণ মুখোপাধ্যায়

করণা প্রকাশনী

১৮এ, টেমার লেন

কলকাতা-৯

মুদ্রাকর

শ্রীমাচরণ মুখোপাধ্যায়

করণা প্রিন্টার্স

১৩৮, বিধান সরণী

কলকাতা-৪

ফোনটা যে ওঘরে বেজে যাচ্ছে। গিয়ে ধর না জগু। কর্ডলেসটা আমার কাছে দিস
নি কেন? অপারেটর আজ আসে নি?

আজ তো রবিবার বাবু।

ওটা চার্জে রাখা আছে?

হ্যাঁ বাবু।

ধরলি?

ধরছি স্যার।

কার ফোন?

আপনারই বাবু। আর কার হবে? এ বাড়িতে আপনি ছাড়া ...

তুই বড় বেশি কথা বলছিস আজকাল। কে? করলেন কে?

শ্রীদেবী।

তিনি কে?

জানি না বাবু। সিনেমা স্টার কি?

বিরক্তির সঙ্গে, দে! বলে কর্ডলেস ফোনের রিসিভারটা কানে লাগালেন
হরপ্রসাদ চ্যাটার্জি। বললেন, ইয়েস।

স্যার, আমি দেবী বলছি। আপনার স্টাডির ফোনটা কি খারাপ?

হ্যাঁ।

তাই অন্য নম্বরটাতে করলাম।

বেশ করেছ। কেমন আছ?

আপনার গাছের চারা যোগাড় করেছি স্যার। আজ অগাস্টের এগারো তারিখ।
এ সপ্তাহের মধ্যেই লাগিয়ে দিন। মাটি ধরে নেবে। তরতরিয়ে বাড়বে। তা'ছাড়া
রাজপুরের মাটি খুব ভাল।

সত্যিই কি বসন্তী নামের কোনও ফুলের গাছ আছে? আমার এখনও বিশ্বাস
হচ্ছে না। শান্তিনিকেতনের পূর্বপল্লীতে প্রীতি আর আলো রায়ের বাড়ি 'আস্তানা'র
কম্পাউন্ডে গাছটি না দেখলে তো ও গাছের কথা জানতামই না। গত বছর
গেছিলাম বসন্তোৎসবে, পঁয়ত্রিশ বছর পরে।

এই তো আপনার দোষ স্যার। বিশ্বাস করতে সব কিছুই কি নিজের চোখেই
দেখতে হবে? না-দেখে কি কিছুই বিশ্বাস করতে তো বটেই স্বীকার করতেও
পারেন না? আমাকেও তো আপনি দেখেন নি বললেই চলে। তার মানে কি আমিও
নেই?

তুমি অবশ্যই আছ। তুমি নেই এ কথা কে বলে! তা'ছাড়া, তোমাকে দেখি নি
তা তো নয়। একঝলক দেখেছিলাম। একটি কালো ব্লাউজ আর হলুদ শাড়ি পরে
এসেছিলে তুমি সেমিনারে। সেমিনারের শেষে আমার কাছে এসে আলাপ করলে।

বললে, নারী প্রগতি সম্বন্ধে আমার বলা ইনফর্মাল বলেই তোমার খুব ভাল লেগেছে।

তা বলি নি। আপনার বক্তব্য ছিল থার্ড ক্লাস কিন্তু বলার রকমটা ছিল দারুণ। বলো নি? তা হবে। দু-তিন মিনিট কথা বললে। তারপর তো আর দেখা হয় নি। ফোনেই কথা হয়েছে বার কয়েক মাত্র। কিন্তু এ কথা ঠিক যে, সেই ক্ষণ থেকেই তুমি আমার কাছে হলুদ রঙের প্রতিভূ হয়ে গেছো। বাসন্তী। আর তাই তো তোমাকেই বাসন্তী গাছের কথা বললাম। তোমার সঙ্গে অন্য দশটা মেয়ের তফাৎ আছে। তুমি একেবারে তোমারই মতো। বয়স কম হলে কি হয়, তুমি খুব ম্যাচিওরডও।

তারপর বললেন, রবিবাবুর ওই গানটি কি শুনেছ তুমি?

কোন গান? আপনারা বুঝি রবীন্দ্রনাথকে রবিবাবু বলেন?

মানে, মা-বাবারা বলতেন ছেলেবেলায়। তাঁদের মুখে শুনে শুনে ...

গানটা কি বলুন।

‘একলা বসে হেরো তোমার ছবি, এঁকেছি আজ বসন্তী রঙ দিয়া।’

খোঁপার ফুলে একটি মধুলোভী, মৌমাছি ঐ গুঞ্জরে বন্দিয়া।’

শুনেছি।

আর কেউই কেন অমন লিখতে বা সুর দিতে পারলেন না বলত?

জানি না।

আপনাদের জেনারেশনের রবীন্দ্রনাথকে নিয়ে বেশ বাড়াবাড়ি আছে।

রবীন্দ্রনাথকে পড়লে, তাঁর গান শুনলে বাড়াবাড়ি না করে যে কোনও উপায় নেই। তোমরা যে যাচাই না করেই বাতিল করতে চাও কি না। অবুঝ যৌবনের অন্ধ ধর্মই যে এই।

তারপর তোমাকে যখন হলুদ ফুলের কথা বললাম, বললাম বসন্তী গাছের কথা, তুমি বললে চারা এনে দেবে। বুঝলে দেবী, বসন্তী ফুল হয়ত দেখে থাকব কিন্তু গাছ তো আগে চিনি নি।

ও গাছের আরো একটি নাম আছে। ভারি সুন্দর।

কী সেটা?

ফাগুন-বৌ।

তাই?

হ্যাঁ। কিন্তু দেব কোথায়? চারা তো এনেইছি। এখন দেব কি করে! শুনেছি আপনার বাড়িতে তো আপনি কারো সঙ্গেই দেখা করেন না।

ঠিকই শুনেছ।

কেন করেন না?

সে অনেক কথা। আপাতত এটুকু জেনে রাখো যে আমার বাড়ি বলতে কিছুই নেই। জগন্নাথ বলে একটা Rogue আছে। সেই বাড়ির মালিক। যে বাড়িতে কোনও নারী থাকেন না তাও কি বাড়ি না কি?

আপনার স্ত্রী থাকেন না আপনার সঙ্গে?

আমি তো বিয়েই করি নি।

সে কি? কেন?

করবার সময় পেলাম কই? আর করবার জন্যেই বিয়ে করে লাভই বা কি? স্ত্রীকে সময় না দিতে পারলে বিয়ে না করাই ভাল। তা'ছাড়া বিয়ে করার মতো কোনও নারীর সঙ্গে দেখাই হল না এ পর্যন্ত।

ভেরী স্যাড।

একটি ঘর বরাদ্দ আছে আমার। সেই স্টাডিতেই, রাতে শেখবার সময় ছাড়া, দিন ও রাত কাটাই, অফিসে না গেলে, নিজের নিজস্ব কাজকর্ম করি, গান শুনি, ছবি আঁকি, গান করিও।

গান করেন আপনি?

ওই চান ঘরে গানের মতো গান আর কি। নিজেই গাই, নিজেই শুনি।

তারপর বললেন, এসব কথাকে 'কারো বিরুদ্ধে, এমনকি নিজের বিরুদ্ধেও কোনও অনুযোগ অভিযোগ বলে ভেবো না, নেহাতই আমরা আইনের ভাষায় যাকে বলি, 'স্টেটমেন্ট অফ ফ্যাক্ট'। কারোকে বাড়িতে আসতে যে বলতে পারি না তা নয়, কিন্তু হয়ত না বলাই ভাল। আমার বাড়িতে তো বাড়ির পরিবেশ নেই। তাই কারোকে আসতে বললে যে প্রকার টেনশান হয় তার চেয়ে আসতে না বলাই ভাল বলে মনে নিয়েছি। এই বন্দোবস্তেই দিন কাটছে, কেটেছে। কেউ ব্যাখ্যা চাইলে বিব্রত বোধ করি। তা'ছাড়া বাড়ি তো স্ত্রীদেরই। তা পরিষ্কার-পরিচ্ছন্ন করে সাজিয়ে-গুছিয়ে রাখেন তো তাঁরাই। তাই আমার স্ত্রীই যখন নেই ...

তারপর একটু চুপ করে থেকে বলল, দেখা করতে হলে তোমাকে আমার অফিসেই আসতে হবে। আসল চেম্বার অবশ্য বাড়িতেই। অফিসটাও অবশ্য আমার একার নয়। সেখানেও আমার জন্যে একটা ছোট্ট ঘর বরাদ্দ আছে বাবার আমল থেকেই। নড়াচড়া করা যায় না তাতে। আর তাতেই কাটিয়ে দিলাম যৌবনের, প্রৌঢ়ত্বের এমন কি বার্ধক্যের বছরগুলিও। আমার কপালটাই এরকম।/আছে সবই কিন্তু সবই ছোট। সবই আছে কিন্তু কিছুই নেই।

এমন হল কেন? বিয়ে তো আপনি এখনও করতে পারেন। বলেন তো পাত্রীর লাইন লাগিয়ে দিই।

এইচ. পি. চুপ করে রইলেন।

তারপর দেবী বলল, আপনার বড় বোকা বোকা অভিমান। নিজের অধিকার কেড়ে নিতে শেখেন নি কেন? এমন দয়া-নির্ভর কেন আপনি?

জানি না। হয়ত আমারই দোষে। কিন্তু থাক সে সব কথা। এখন বলো বসন্তী গাছের চারাটি আনলে কোথা থেকে? গাছটা তো বেশ বড়ই হয় দেখলাম। তবে ঝুপড়ি হয় না। বসন্তেই ফোটে তো। ফুল?

বসন্তী বসন্তে ফুটবে না তো কি শিউলি ফুটবে! আশ্চর্য কথা বলেন আপনি। এনেছি এটা ঝাড়গ্রাম থেকে। সেখানে আমার বড় মামা থাকেন। সুবিমল চন্দ্র দে'র হাটিকালচারাল এরেনা থেকে কিনেছি। উনি হাটিকালচার শুধু ব্যবসার জন্যেই করেন না, পণ্ডিত মানুষ, অনেক বইও আছে তাঁর। এই তো এইবারের

বইমেলাতেই বেরিয়েছে ফুলের বড় গাছের ওপরে একটি বই, দে'জ পাবলিশিং থেকে।

তাই?

তারপর বলল, আপনি এ বছরে বইমেলাতে যান নি?

নাঃ। প্রথম প্রথম গেছি কয়েক বার। ওই ভিড় আর ধুলো আর আঁতেলদের ভিড় ভাল লাগে না আমার। তা'ছাড়া, বইমেলা তো লেখক আর পাঠকদের। আমি না লেখক, না পাঠক। কোন দাবিতে যাব সেখানে?

পশ্চিমবঙ্গে আঁতেল আছেন না কি কেউ? অধিকাংশই তো সিউঁড়ো। তা'ছাড়া আপনি তো পাঠক হিসেবেই যেতে পারেন। কত মোটা মোটা বই আছে আপনার অফিস ঘরে, বাড়িতেও আছে। আমি শুনেছি।

তুমি কি আমার পেছনে গোয়েন্দা লাগিয়েছ না কি?

হয়ত লাগিয়েছি।

উদ্দেশ্যটা কি? কিডন্যাপ করবে? আমার অত টাকা নেই। কিডন্যাপ করলে মেরে ফেলতে হবে।

তারপর বললেন, মোটা মানুষের কাছে কিছু মোটা বই তো থাকবেই।

তারপর একটু চুপ করে থেকে বললেন, কিন্তু ওসবই তো ওকালতির বই। মক্কেলদের ভড়কি দেওয়ার জন্যে। যাতে তারা ঘাবড়ে গিয়ে বেশি ফিস দেন। উকিলের চেম্বারে যত বই থাকে তার অধিকাংশই দেখাবারই জন্যে। এমনই হয়ে আসছে চিরদিন। বেশির ভাগ বই-ই নানা আইনের হাইকোর্ট সুপ্রিম কোর্টের রিপোর্টস্। মামলার সময়ে কাজে লাগে রেফারেন্স-এর জন্যে। তবে বইয়ের দিন তো শেষ হয়ে এল। এখন কমপ্যাঙ্ক ডিস্ক-এ আসছে সব ডিসিশনস। সিডি-রাম। কম্পিউটার। ইন্টারনেট। জায়গার বড় সংকুলান হবে এবারে। বড় আরামে হাত-পা ছড়াবে মানুষ এবারে।

আর বইগুলো? এতদিনের সুখ-দুঃখের সঙ্গী আপনাদের লাল নীল পেনসিলে দাগ দেওয়া, সেগুলোর কী হবে। ফেলে দেবেন?

পুরনো কাগজওয়ালা কিনে নেবে। উনুন ধরাবে ফুটপাথের তেলেভাজাওয়ালা।

তাই? এমন ভাবতে আপনার খারাপ লাগে না?

লাগে খারাপ। তবে আমরা তো সব Obsolete হয়ে গেছি। মানুষই বাতিল হয়ে যাচ্ছে এসব বইপত্র তো হবেই। খারাপ লাগলে কি হবে। মেনে নিতে হবে। ওয়ান মাস্ট রাইড উইথ দ্য টাইড।

যাই হোক, আপনি যে বললেন আমাকে লাঞ্চ খাওয়ানেন একদিন, তার কী হল!

খাওয়ানো তো। যেদিন বলবে। তবে সেদিন কোর্ট না থাকলেই হল।

কবে কোর্ট থাকবে না তা আমি জানব কি করে?

তুমি এক শনিবারে এসো। কোর্ট তো সব শনিবারই বন্ধ থাকে। আমার চেম্বারের কাছেই 'মেইন ল্যান্ড চায়না'। দারুণ চাইনিজ খাবার। বার লাইসেন্সও আছে। দু'টি করে ব্লাডি মেরি খেয়ে তোমাকে হাঁসের মাংস খাওয়ানো নয়তো ক্র্যাবমীট।

চাইনিজ আমার ভাল লাগে না।

সে কি?

যা সকলের ভাল লাগে আমার তা লাগে না। তবে আপনার বেলাতেই একসেপশান করেছি। না করে পারি নি বলে।

আমাকে সকলের ভাল লাগে বলছ?

লাগে বইকি। পুরুষদের কথা বলছি। হাইকোর্টে তো আপনি খুবই জনপ্রিয়। রাখো ওসব বাজে কথা। এখন বল দেখি কোথায় থাকবে?

আপনি যেখানে থাকবেন। কোনও খাবা-টাবাতোও খেতে পারি। খাওয়াটা তো বড় কথা নয়। আপনার সঙ্গে, আপনার মুখোমুখি বসে কথা বলতে পারব কিছুক্ষণ। এ আমার বহু দিনের স্বপ্ন।

হরপ্রসাদ হেসে ফেললেন। বললেন, খাবাতে কেন? তোমাকে তাজ বা গ্রান্ডের কফি শপ-এ খাওয়াবো। পার্ক হোটেলের কফি শপটাও খারাপ নয়। তোমার যেখানে খুশি। কোন ক্লাবেও খেতে পারো। টলি, সুইমিং ক্লাব, বেঙ্গল ক্লাব। তবে ক্লাবগুলো আর আগের মতো নেই। কুচো চিংড়ি আর চামচিকেয় ভরে গেছে।

ক্লাবের দোষ কি? আসলে মানুষের কোয়ালিটিই নষ্ট হয়ে গেছে। কতখানি নষ্ট হয়েছে তা আমার চেয়ে আপনি অনেক ভাল জানবেন।

কিন্তু আমি তো সেলিব্রেটেড লেখক নই, গায়ক নই, চিত্রী নই, আমার মধ্যে তুমি কি দেখলে তা তুমিই জানো! বড়ই বিপদে ফেললে দেখছি তুমি আমাকে। এখনও সময় আছে। নিজেকে গুটিয়ে নাও।

তা হয় না! আপনার মধ্যে একজন মানুষ দেখেছি। সেটাই যথেষ্ট।

তারপর বলল, মীর সাহেবের একটা শায়েরী আছে জানেন?

না। আমি কোন শায়েরীই জানি না। হরপ্রসাদ বললেন। শায়েরী কি জিনিস? দেবী বলল,

‘হিয়া সুরত-এ আদম বহত হায়, আদম নেহি হায়।’

মানে কি হলো? এসব বিজাতীয় ভাষা আমি বুঝি না।

সে কি? আপনি হিন্দি ছবি দেখেন না টেলিভিশনে?

টিভি আমি দেখিই না।

মানে হলো, এখানে মানুষের চেহারার জীব অনেক আছে, মানুষ নেই।

ভাল। তুমিই সত্যদ্রষ্টা। জীবনের সাঁঝবেলাতে তুমি এসে পড়ে আমার জীবনে মহা ঝামেলা বাধাবে বলে মনে হচ্ছে। জানি না, কপালে কি আছে!

জীবনের সাঁঝবেলাতে পৌঁছে গিয়েও বাঁচতে শিখলেন না। হোয়াট আ পিটি! আপনাকে আমি বাঁচতে শেখাব।

কোন কিছুই শেখার মতো মানসিকতা আর ধৈর্য আমি হারিয়ে ফেলেছি দেবী। বৃথা চেষ্টা করো না। তোমার জীবনে এখন সুগন্ধি সকাল। নিজেকে উপভোগ করো। বুড়োকে গাছের চারা দিয়েছো বেশ করেছ, নিজের মহামূল্য সময় দিয়ে নিজের ক্ষতি করো না। যৌবনের মতো দামী আর কিছুই নেই। আমার যৌবন চলে গেছে বলেই আমি একথা জানি। এ কথার তাৎপর্য তুমি আজকে বুঝবে না। তুমি নিজেও একটি চারা। তোমার যোগ্য বাগানে হেঁটে গিয়ে থিতু হও।

আপনি মুণ্ডু জানেন। (যৌবন কোন শারীরিক অবস্থা আদৌ নয়, পুরোপুরিই মানসিক অবস্থা, অ্যাটিট্যুড টুওয়ার্ডস লাইফ) আপনার মতো যুবক তো আমি সেদিন আর একজনও দেখলাম না।

এই টাক-পড়া হতশ্রী বুড়োকে এসব কথা বলে উদ্বেজিত বা আহ্বাদিত করতে পারবে না। তোমার মাথা খারাপ হয়েছে, চোখ খারাপ তো হয়েইছে।

আমি ঠিকই আছি। ইন পারফেক্ট ফিজিক্যাল অ্যান্ড মেন্টাল কন্ডিশন।
দেবী বলল।

আচ্ছা দেবী, তুমি কি চাও বলো তো আমার কাছে? চাকরি চাও? টাকা চাও? ডোনেশন চাও? কোথাও কি ইন্টারভিউ পেয়েছ? ইন্টারভিউয়িং বোর্ডে কারোকে কারোকে বলে দিতে হবে তোমার সম্বন্ধে? খুলেই বলো না।

দেনা-পাওনা, স্বার্থ, এসব ছাড়া কি কিছুই বোঝেন না আপনি? আপনার মনটাই দূষিত হয়ে গেছে। একেবারে পল্যুটেড। আপনার মনের পরিবেশ ঠিক করতে সময় লাগবে। কত সময়, কে জানে!

সময় যে আমার বেশি বাকি নেই দেবী। তুমি রবিবাবুর ওই গানটা জানো?
কোন গান?

“অবেলায় যদি এসেছ আমার বনে, দিনের বিদায় ক্ষণে/গেয়ো না, গেয়ো না
চঞ্চল গান ক্লাস্ত এ সমীরণে। ঘন বকুলের স্নান বীথিকায়/শীর্ণ যে ফুল ঝরে
ঝরে যায়/তাই দিয়ে হার কেন গাঁথ হয়, লাজ বাসি তাই মনে/চেয়ো না, চেয়ো
না মোর দীনতায় হেলায় নয়ন কোণে।”

গেয়ে শোনান না?

আমি গায়ক নই। তা'ছাড়া তোমাকে শোনাবার মতো ভাল গাই না।

হাঃ। আমি কি খুব বড় বোদ্ধা?

যাই হোক, গানটি শুনি নি। আমরা সত্যিই অভাগা। রবীন্দ্রনাথের প্রভাবে বা তার সাহিত্য ও গানের ছায়ায় আমরা বড় হয়ে উঠি নি। আমার মা সব সময়েই বলেন একথা।

তাই? তোমার বাবা কি করেন?

বাবা ডাক্তার ছিলেন। জি. পি.।

ছিলেন মানে?

মানে, এখন নেই। চলে গেছেন।

সে কি! তোমার বাবার আর কত বয়স হতে পারে। ষাটও তো হবে না।

থাকলে বাষট্টি হতো। উনি পঁয়তাল্লিশ বছর বয়সেই চলে গেছেন মোটর অ্যাকসিডেন্টে।

আর মা? তোমার সঙ্গে থাকেন? মায়ের বয়স এখন কত?

মেয়েদের বয়স জিঞ্জেরস করতে হয় না। তা এখন পঞ্চাশ হবে। মা একাই থাকেন। আমার সঙ্গে থাকেন না।

মা কি কিছু করেন?

মা স্কুলের টিচার।

কী বিষয় পড়ান?

বাংলা।

তা'হলে তুমিও একাই থাকো?

হাসল দেবী। বলল, একা কেন থাকব? সঙ্গীর সঙ্গে থাকি।

সঙ্গী মানে? বিয়ে করো নি তুমি?

না স্যার। বিয়ে ব্যাপারটা আজকালকার দিনে সকলের পক্ষে করা সম্ভব হচ্ছে না আর। খুব বড়লোকের মেয়ে যদি হতাম তবে হয়ত বেশ সালস্কারা সুসজ্জিতা হয়েই সানাই বাজিয়ে বিয়ে করতাম। বাবা জামাইকে গাড়ি কিনে দিতেন, টলি ক্লাবের মেম্বার করে দিতেন, বিলেতে বা স্টেটস-এ ম্যানেজমেন্ট পড়াতে পাঠাতেন আর আমি স্বামীর ওপর ছড়ি ঘোরাতাম। অমন চম্ফুলজ্জাহীন আরামদায়ক ব্যবস্থা না হলে বিয়ে করা সম্ভব হচ্ছে না এখন। করাটা উচিতও নয় হয়ত। মানে, ওরকম বিয়ে করাটা। তেমন স্বামীকে তো শ্রদ্ধা করা যায় না। তারা তো ঘর জামাই-এর চেয়েও অধম। আজকালকার খুব কম শিক্ষিত আত্মসম্মানজ্ঞানসম্পন্ন ছেলেই অবশ্য অমন বিয়ে করতে রাজি হবে।

বলো কি? আমার তো ধারণা আত্মসম্মান জ্ঞান ব্যাপারটা আজকালকার খুব কম ছেলের মধ্যেই আছে।

আপনি হয়ত সকলকে দেখেন নি স্যার।

তোমার সঙ্গী কি করেন?

তবে আমার সঙ্গী তো এক জন নয়, দু'জন। মিনি-দ্রৌপদী বলতে পারেন আমাকে। আমরা তিন জনে এক সঙ্গে লিভ টুগেদার করি। এক জন স্বামীতে আজকাল সতিাই কুলোয় না। তিন জনেই কাজ করি যে আমরা।

কেন? তিন জনেই কাজ করো কেন?

নইলে কুলোয় না। কারো রোজগারই তো বেশি নয়।

তারপরই বলল, আপনাকে একদিন নিয়ে আসবো আমাদের বাড়ি। আসবেন? আপনি এত বড়লোক, নামী মানুষ।

আমি যে মোটা মানুষ এটুকুই জানি। আর কিছু বিশেষণ আমার সম্বন্ধে প্রযোজ্য বলে জানি না।

তারপর বললেন, কোথায় থাকো তুমি?

কোনও পশ পাড়াতে নয়। বুঝতেই পারছেন, আমি অতি সাধারণ মধ্যবিত্ত। দমদমের নাগেরবাজারে থাকি আমি। খাদিমের কর্তা পার্থ রায়বর্মনকে যেখানে কিডন্যাপাররা ছেড়ে দিল আমাদের এক তলার বাড়িটা সেই গলিতেই। রিক্শাওয়ালাকাতেও আমরা চিনি। কতদিন দমদম মেট্রো স্টেশন থেকে ওকে নিয়ে আমি এসেছি।

নিজের ফ্ল্যাট তোমার? ওনারশিপের ...

দেবী হাসল।

বলল, আপনি কি পাগল? নিজের ফ্ল্যাট থাকলে কি আর সংসার চালাতে দু'জন সঙ্গী লাগত? একটা ডাইনিং-সিটিং আর দুটো বেডরুম। তাও এক তলাতে।

প্রাইভেসি প্রায় নেই-ই। এই গুমোটো সারাক্ষণ পর্দা টেনে থাকতে হয়। আওয়াজ। ধুলো। গাড়ির হর্ন। সাইকেল রিক্‌শার প্যাকপ্যাকানি।

দুটো বেডরুম কেন?

আমার যে দু'জন সঙ্গী। এক সঙ্গে দু'জনের সঙ্গে শোব কী করে! তিন দিন তিন দিন করে শুই। বদলে বদলে। রবিবার অফ্‌ ডে। আমি একলা শুই হাত-পা ছড়িয়ে আর ওরা দু'বন্ধু এক সঙ্গে শোয়। রান-টাম খায়। টিভি দেখে, বসার ঘরে বসে। মেয়েদেরই মতো ছেলেদেরও অনেক নিজস্ব গল্প থাকে, যা মেয়েদের সামনে করতে বাধে। তবে ভবিষ্যতে আরও একটা ঘরের হয়ত দরকার হবে।

কেন? আরও একজন সঙ্গী জোটাতে না কি?

হেসে ফেলল, দেবী।

বলল, না। আগামী বসন্তে যখন শান্তিনিকেতনে নরম হলুদ বসন্তী ফুল আসবে, মনে ইচ্ছে আছে, তখন কনসিভ করব আমি।

তারপরই বলল, ও গাছের আরো একটি নাম আছে। ভারি সুন্দর।

কী সেটা?

ফাগুন বৌ।

ফাগুন বৌ বা বসন্তী গাছে যখন ফুল আসবে তখনই আমিও ফুলফলন্ত হব। আমার শরীরে বীজ বপন করব। ইচ্ছে আছে। আগস্তুক এলে তো তার জন্যে একটা এক্সট্রা ঘর লাগবেই।

কনসিভ যে করবে তা তোমার সন্তানের বাবা কে হবে:

আপাতত ঠিক আছে বর্তমান সঙ্গীরাই।

দু'জনে?

হ্যাঁ দু'জনেই। তবে আমি সিংগল-প্যারেন্ট হিসেবে মানুষ করব সন্তানকে যদিও সন্তানের দুই বাবাই আমাকে মরাল ও ফিন্যান্সিয়াল সাপোর্ট দেবে। আশা করি। নিনা গুপ্তা আমাদের চোখ খুলে দিয়েছেন। শী ইজ দ্যা পাথ-ফাইন্ডার। বাঘও তো শুনেছি তার বাচ্চাদের সঙ্গে থাকে না। বাবাদের যে বাচ্চার সঙ্গে থাকতেই হবে তার কি মানে আছে?

হ্যাঁ। অনেক বাবা শুনেছি বাঘেরই মতো স্বভাবের হয়। নিজের বাচ্চাকেও খেয়ে ফেলে।

শুনছেন! শুনছেন! দরজার বেল বাজাচ্ছে তো না যেন যুদ্ধ করছে। নিশ্চয়ই কিংসুক ফিরেছে। ওর আবার আজকে বাজার করে নিয়ে আসার কথা। দরজা খুলতে দেরি হলে টেঁচিয়ে বাড়ি মাথায় করবে। আজকে ছাড়ি স্যার। পরে আবার করব একদিন শিগগিরি। পরশুই করব। আপনার সঙ্গে কথা বলতে খুব ভাল লাগে। আপনিও করবেন, যদি সময় পান। আর যদি ইচ্ছে করে। আমার নম্বরটা লেখা আছে তো?

আছে আছে। লেখা আছে।

তারপরে, টাটা! বলেই রিসিভারটা ড্র্যাডল-এ নামিয়ে রাখল দেবী।

কর্ডলেস ফোনটার সুইচ অফ্‌ করে দিতেই কেমন যেন শূন্যতা বোধ

করলেন এইচ. পি. চ্যাটার্জি সাহেব। কলকাতার উঁচু মহলে সকলেই তাঁকে এইচ. পি. বলেই জানে। ঠিক এই ধরনের শূন্যতা এর আগে কোনওদিনই বোধ করেন নি। ওই অল্পবয়সী মেয়েটি তাকে কী যেন এক পূর্ণতার আভাস দেয়, হাতছানি দেয়, অতি শালীন ও সুরুচিসম্পন্ন হাতছানি, অন্য এক জগতে, যে-জগৎ সম্বন্ধে এইচ. পি.-র কোনও স্পষ্ট ধারণা নেই।

ফোনটা বাজল।

তোমার অন্য নাম্বার দুটোই কি খারাপ? এইচ. পি.?

মাথার মধ্যে যে এক ঘোরের সৃষ্টি হয়েছিল তা চুরমার হয়ে গেল। এইচ. পি. বললেন, হ্যাঁ তিন দিন হয়ে গেল।

কমপ্লেইন করো নি?

করেছে তো মদন।

জে. কে. রায় সাহেবকে বলে দাও না একবার।

থাক না। যবে ঠিক হয়, হবে। ফোন একটা যন্ত্রণা। একা থাকার, একটু একা ভাবার কি জো আছে? তবু যদি বুঝতাম আমার উপকার করতে কেউ ফোন করে। সকলেরই তো কিছু না কিছু চাই। এটা করে দাও, ওকে বলে দাও, সেটা ধরে দাও এই আর কি! বিরক্ত লাগে। তিত্তিবিরক্ত।

বুঝলাম। তা কার সঙ্গে প্রেম করছিলে এইচ. পি.?

হরপ্রসাদ অনেকক্ষণ চুপ করে থাকতে ব্যারিস্টার মুগেন মিস্তিরের বউ বাসবী খেঁকিয়ে উঠে বললেন, কি? কথা বলছ না যে।

তাঁর কী যে অধিকার এইচ. পি. চ্যাটার্জির ওপরে তা তিনিই জানেন। বিরল কেশ, কলপ করা, পেডিকিওর ও ফেসাল করা ষাট ছুই ছুই বাসবী মিস্তির হরিপদকে একটু বিশেষ চোখে দেখেন। কিন্তু এইচ. পি. সাহেব রিয়্যালি ডেসপাইজেস হার। নেহাৎ মুগেন মিস্তির তার চেয়ে সিনিয়র এবং প্রথম দিকে প্রফেশনে খুবই সাহায্য করেছিলেন। তা'ছাড়াও বাসবীর দাদা হারাধন বাঁডুজ্জ্য একজন নামী সলিসিটর। মেসার্স ওয়ালটন অ্যান্ড হুইটনি সলিসিটর ফার্মটা ওঁরই, বহুদিন হল। ওয়ালটন এবং হুইটনি ওই দুই সাহেবই স্বাধীনতার কয়েক বছর পরেই ইংল্যান্ডে চলে গেছেন। ওই ফার্ম অনেকই ব্রিফ দিয়েছে চ্যাটার্জি সাহেবকে, পেশার প্রথম দিকে, যখন সাহায্যর দরকার ছিল। আজকে তিনি ব্রিফ যত ফেরত দেন সেই তুলনাতে খুব কমই নেন। বাসবীকে তাই সহ্য করেন ফর ওল্ড টাইমস্ সেক।

অনেক মহিলারই বয়স যত বাড়ে তাঁরা তত গ্রেসফুল হন কিন্তু বাসবী অন্য মেরুর জীব। রাস্কুসী, রুক্ষ, অভব্য বলে মনে হয় তাঁকে চ্যাটার্জি সাহেবের। স্বাভাবিকতা যে নারীর নেই, যিনি গ্রেসফুলি বুড়ি হতে জানেন না, বয়স তাঁকে ভিখারি করে দেয়। একথাটা কম নারীই বোঝেন।

মুগেনটাও একটা ম্যাদামার। মিথ্যে বলবেন না, হরপ্রসাদের যৌবনে বাসবীর সঙ্গে একটু মাখোমাখো হয়েছিলেন তিনি। অবশ্য বাসবীরই প্রবল আগ্রহে। এইচ.

পি.-র দিক দিয়ে সেই সম্পর্কটা ছিল কনভিনিয়েন্সেরই। মহিলা নীশ্ফাম্যানিয়াক ছিলেন যৌবনে। তাই কয়েক বার শারীরিক সান্নিধ্যে আসতে হয়েছিল। বিবেকের কাছে তিনি পরিষ্কার। কিন্তু সেই সম্পর্কে কোন মাধুর্য ছিল না বরং পুরো নারী জাতির ওপরেই এক গাঢ় বিদ্বেষ জন্মে গেছিল চ্যাটার্জি সাহেবের। উনি এমনিতে খুবই সুস্কন্ধরূচির মানুষ। বাসবীর শরীরী প্রেম তাঁর সেই রুচিকে আহত করেছিল। এসব জিনিস বিশদভাবে ব্যাখ্যা করে বলার নয়, নীরব অনুভূতির। যারা বোঝার, তাঁরা বুঝবেন।

সময়ে বিয়েটা যে কেন করা হল না, এখন ভেবেও তার কোনও ব্যাখ্যা পান না।

মনে আছে, দিল্লি থেকে সান্যাল সাহেব এক বার এসেছেন ফুল-বেধে অ্যাপিয়ার করতে। কলকাতা হাইকোর্টের লিফট-এর সামনে দেখা। তখন চ্যাটার্জি সাহেবের বয়স হয়েছে চল্লিশ-বেয়াল্লিশ। সান্যাল সাহেব বললেন, আরে হরপ্রসাদ, তোমার সব খবরই পাই। খুবই তো ভাল করছ হে! ভেরি গুড। কনগ্র্যাচুলেশনস্। তা এবার একটা বিয়ে-টিয়ে করো।

চ্যাটার্জি সাহেব বিনয়ের সঙ্গে বলেছিলেন, পায়ে একটু ভাল করে দাঁড়িয়ে নিই স্যার।

সান্যাল সাহেব বলেছিলেন, এখনও দাঁড়াও নি। তা ভায়া, তুমি যখন দাঁড়াবে তখন তো তোমার ওটি আর দাঁড়াবে না।

লজ্জায় অধোবদন হয়ে গিয়েছিলেন চ্যাটার্জি সাহেব। অন্য সিনিয়ররা হেসে উঠেছিলেন কাঁচা রসিকতার জন্যে বিখ্যাত সান্যাল সাহেবের কথাতে।

কি হল? জবাব দিচ্ছ না কেন এইচ. পি.?

খেকিয়ে উঠে বললেন মিসেস মিস্ত্রি।

কি বলবে বল না বাসবী? কি করতে পারি তোমার জন্যে?

কিছুই করতে হবে না, সাড়ে সাতটার সময় কাল রাতে ক্লাবে চলে আসবে। হাউজি আছে।

কোন ক্লাবে?

স্নিক ক্লাবে।

আমি যেতে পারব না। স্নিক ক্লাবে তো আজকাল একদল সিউডো আঁতেলকে জুটিয়েছ তোমরা। যাওয়াই যায় না তাদের ভিড়ে। তা'ছাড়া বুড়ো বয়সে 'টু ফ্যাট লেডিস এইট্রি এইট' ওইসব বালখিল্য ক্রিয়াকাণ্ড করে সময় নষ্ট করতে আমি আদৌ রাজি নই। রিড্ডিকুলাস। আমার সময়ের দাম আছে।

শোনো, তারপর আমরা তাজ বেঙ্গলে যাব। 'সোনার বাংলা'-তে খাব।

ভাল কথা। আমি রাজীব গুজরালকে বলে দেব, তুমি যাকে খুশি সঙ্গে নিয়ে যেও। বিল সই করে দিও। আমার নাম। আমি কোথাওই যাব না।

সই করার কী আছে। মণ্ড সেন কি দেউলে হয়ে গেছে নাকি? না, সে রাজীব গুজরালকে চেনে না। তুমি আসবে না?

খুব রেগে বললেন বাসবী।

না। স্যরি। এনাফ ইজ এনাফ। তুমি খুকী হতে পারো কিন্তু আমার বয়স হয়েছে। কি করবে? বাড়ি থেকে বেরোবে না তো, শনিবারের সঙ্কেবেলায় কি করবে একা বসে?

মৃগেনদা কি করবে? তাকেই নিয়ে যাও না।

সে কি এখানে আছে না কি? বন্ধেতে আছে সাত দিন হলো। এসো এসো, খাওয়ার পরে আমরা বাড়িতে আসব, নয়ত তোমার বাড়ি।

কি করতে? নোপ্। স্যরি।

তারপর বলল, 'তোমার নাতনির সঙ্গেই হয়ত দেখা হয়ে যাবে তার বন্ধুদের নিয়ে তাজবেঙ্গলের "ইনকগনিটোতে" নেচে-টেচে সেও খেতে আসবে যখন।

তাকে কি? নাতনিদের জীবন তাদের, আমাদের জীবন আমাদের। আমাদের কি লাইফ এন্জয় করার রাইট নেই?

এনজয়মেন্ট নানা রকম হয় বাসবী। তুমি আমাকে বুঝবে না।

তুমি করবেটা কি বলো না?

ভীমসেন যোশীর একটা টেপ পাঠিয়েছে বন্ধে থেকে বকুল, জয়ন্ত চ্যাটার্জির কাছে। ভীমসেন যোশীর নাম শুনেছ কি? মাইকেল জ্যাকসন-এর শুনেছ, পিট সিগারের শুনেছ, কিন্তু ভীমসেন যোশীর নাম সম্ভবত শোনো নি। আগামীকাল জয়ন্ত সেটা আমাকে পাঠাবে। কোর্ট থেকে ফিরে রাতের চেস্কার শেষ করে চানটান করে হুইস্কির বোতলটি নিয়ে ইজিচেয়ারে আধো শুয়ে সেটি শুনব। প্রায় পৌনে তিন ঘণ্টার টেপ। ইমন, হোরি বাহার তারপর পিলুতে ঠুংরী, সব শেষে ভজন। 'যো ভজে হরিকো সদা।' সত্যি! হাজার বার শুনেছি, তবু পুরনো হয় না।

খুব হুইস্কি খাচ্ছ বুঝি তুমি আজকাল?

খুব না হলেও খাই। উকিল-ব্যারিস্টারেরা মাথার কাজ করেন, তাঁরা অনেকেই খান। তোমার বাবা খেতেন, দাদা খায়, মৃগেন তো খায়ই। তবে আমি মৃগেনের চেয়ে কম খাই। তুমি জ্ঞান দিও না তো।

তুমি জাহান্নমে যাও। কার সঙ্গে কথা বলছিলে তা বললে না তো। পৌনে এক ঘণ্টা ধরে লাইন এন্গেজড!

সে আছে। আছে। এক হলুদ পরী।

বৃদ্ধ ভাম। সখ কস্ত।

বলেই, বাসবী মিস্তির জ্বলে উঠলেন।

এইচ. পি. বললেন, তুমি যা ভালবাসো, যেমন মানুষ ভালবাসো, সম-মানসিকতার, তাদের নিয়েই এন্জয় করো। তুমি তোমার মতো আনন্দে থাকো, আমাকে আমার মতো থাকতে দাও।

ওসব জ্ঞানের কথা থাক। এখন তুমি কাল আসবে কি না ফ্যাইনালি বলো।

বললামই তো, আসব না।

ঠিক আছে।

মনে হলো বাসবী প্লেট করলেন? কিন্তু হরপ্রসাদের বাসবীর কাছ থেকে ভয় পাওয়ার কিছু নেই। কোনদিনই ছিল না। জীবনের এক সময়ে যদি কোনো মহিলার

সঙ্গে শারীরিক সম্পর্ক হয়ে থাকে, এমন মহিলারা সেই সম্পর্ক রদ করলে তিনি বাঘিনীর মতো হিংস্র হয়ে ওঠেন বোধহয়।

কর্ডলেস-এর সুইচটা টিপে দিয়ে হরপ্রসাদ কিছুক্ষণ চুপ করে বসে থাকলেন।

বাইরে বড়ই কোলাহল। ভবিষ্যতে কলকাতায় না কি মানুষ আর যানবাহন আরও বেড়ে যাবে। কাগজে পড়েছিলেন। সব সময়ই এত আওয়াজ, এত গাড়ির হর্ন, এত বিভিন্ন যানবাহনের এঞ্জিনের আওয়াজ একটুও ভাল লাগে না আর। হেঁটে কোথাও যাওয়া তো যায়ই না, গাড়ি করেও কোথাওই যাওয়া যায় না। হাইকোর্টে যেতেই হয় সপ্তাহে পাঁচদিন। সেখান থেকে ফিরে কোথাওই আর যেতে ইচ্ছে করে না। ইচ্ছে করে, প্রতি উইকএন্ডেই রাজপুরের বাগানবাড়িতে চলে যান, কিন্তু হয় না। কনফারেন্স থাকে, প্লেইন্ট সেটল করার থাকে, পরের সপ্তাহের মামলা দেখে রাখতে হয়। এত কাছে করলেন বাগানবাড়ি তাও যাওয়া হয় না। তিন জন মালী, বাবুর্টি, বেয়ারা, ইলেকট্রিসিটি, ফোন, ফ্যাক্স খরচা যা হওয়ার হয়ই কিন্তু যাওয়াই হয় না। সত্যি কথা বলতে কি আজকাল কোর্টেও আর যেতে ইচ্ছে করে না। সব জায়গার পরিবেশই পাল্টে গেছে, মানুষজন সব অন্যরকম হয়ে গেছে। না কি, তিনি সত্যিই বুড়ো হয়ে যাচ্ছেন? প্রায়ই মনে হয়, আর বেশি দিন খাপ খাওয়াতে পারবেন না।

শুধু টাকার জন্যেই যে কাজ করেন তা নয়। যতটুকু সঞ্চয় আছে তাতে তাঁর কাজ ছেড়ে দিলেও বাকি জীবন এইভাবেই কেটে যাবে। টাকার জন্যে নয়, কিন্তু কাজ না করলে করবেনটাই বা কি? সময় কাটবে কি করে। অকুপেশান ছাড়া মানুষে বাঁচে? রিটায়ার্ড মানুষদের মতো সকালে লাঠি বা ছাতা হাতে করে বেশি দিন বাঁচবার জন্যে হেঁটে বেড়ানো, পার্কের বা বেঙ্গল রোয়িং ক্লাবের লনে বসে চা খেতে খেতে রাজা-উজির মারা বা মুখরোচক পরনিন্দা পরচর্চা করে বেড়াতে তাঁর মানসিকতাতে বাধে।

তবে আগে 'হেলথ কনশাস' বুড়োদের যতখানি অনুকম্পার চোখে দেখতেন এখন আর তা পারেন না। শরীর নানারকম বেগড়বাই শুরু করেছে।

অনেকের কাছেই শোনে, সন্তানদের মধ্যে মেয়েরা না কি ছেলের চেয়ে অনেকই বেশি দেখে বাবা-মাকে, বুড়ো বয়সে। তাঁর ছেলেমেয়েই নেই, তার বাছবিচার! কত দিন বাঁচতে হবে তা তো জানা নেই। বার্ষিক্যে কার শরণাপন্ন হবেন? জীবনে অনেক যুদ্ধই জিতে এসেছেন, সত্যি কথা বলতে কি, কোনও যুদ্ধেই হারেন নি। হারতে ভালবাসেন নি। কিন্তু ভয় হয়, বার্ষিক্যের কাছে বোধহয় হেরে যাবেন। আর সেই হার হবে বড় মর্মস্ফূট।

অনন্তরূপ, তাঁর সমবয়সী মামাতো ভাই, একটা আমেরিকান অ্যাড কোম্পানিতে বড় চাকরি করতেন। অনেক টাকা নিয়ে রিটায়ার করেছেন। এক ছেলে। সে স্টেটস-এ থাকে, জাপানি মেয়ে বিয়ে করেছে। অনন্তর পারকিনসনস্ ডিজিজ হয়েছে। হাত কাঁপে, জামাকাপড় পরতে পারে না, কথা জড়িয়ে যায়, কি বলে, তা বোঝা যায় না। অনন্তর ছোড়া বলে, খুব কম অনায়াসে তো করে নি অস্ত্র মানুষের ওপরে। সব শুধে যেতে হবে। এখানেই শুধতে হবে। তাই গুণাগার দিচ্ছে অস্ত্র।

ল'কলেজের বন্ধু বিমলেন্দুর স্ত্রী তাকে ছেড়ে চলে গেছিলেন অন্য একজনের সঙ্গে। অনেকদিনই হল। তারপরে সেই সুন্দরী মহিলা মারাও গেছেন আজ বছর কুড়ি। ওর দু'মেয়ে। কিন্তু বিয়ে হয়েছে। তারা নিজের নিজের সংসার ও চাকরি নিয়ে থাকে। বিমলেন্দু প্রায় অন্ধই হয়ে গেছে। চেম্বাইয়ে নেত্রালয়ে নিয়ে গেছিল মেয়েরাই। হরপ্রসাদ মক্কেলদের বলে তাদের চেম্বাইয়ে থাকার এবং গাড়ির বন্দোবস্ত করে দিয়েছিলেন। কিন্তু কিছুই হয় নি। বিমলেন্দু অন্ধই আছে। দেখতে পায় না। দু'মেয়ের একজন প্রায় রোজই এসে ওকে দেখে যায় রিলিজিয়াসলি। কিন্তু বিমলেন্দু বলছিল ফোনে সেদিন, বুঝলি হরু, ওরাও আমাকে নিয়ে হয়রান। দুসসু, এই জীবন রাখতে ইচ্ছে করে না রে। মনে হয়, আত্মহত্যা করে মরে যাই।

বিমলেন্দুকে কখনও কখনও গাড়ি পাঠিয়ে রাজপুরে নিয়ে আসেন। তবু ওর পক্ষে আসা মুশকিল। সঙ্গে সব সময় একজনকে লাগে। রিফ্রেক্সও টিলে হয়ে গেছে।

মনে হওয়া আর করা এক নয়। অমন তো হরপ্রসাদের মনে হয় মাঝেমাঝেই। আত্মহত্যা করা কাপুরুষদের কাজ আদৌ নয়। অত্যন্তই সাহস লাগে আত্মহত্যা করতে। এখন মনে হয় হরপ্রসাদের।

কে জানে! সত্যিই কি পাপ-পুণ্যের হিসেব-নিকেশ এখানেই করে যেতে হবে? পরজন্ম-টরজন্ম সব বোগাস? পুণ্যের প্রাপ্তি, পাপের গুণাগার সব এখানেই?

অনেকে বলে ঈশ্বরচিন্তা করতে। কোনও গুরুটরুর কাছে যেতে। কলেজের বন্ধু যতীন, সাঁইবাবার ভক্ত হয়েছে। সেদিন এসেছিল। সাঁইবাবার একটি ছবি আর কিছুটা ভঙ্গ দিয়ে গেছে। বলেছে, কাছে রাখিস, কোনও বিপদই তোকে ছুঁতে পারবে না।

অনিমেষ, অনুকূল ঠাকুরের শিষ্য হয়েছে। প্রায়ই দেওঘরে যায়। বলে, মহানন্দে আছি রে হরে। যাবি নাকি তুই? 'জয় ঠাকুর!' কথায় কথায় 'জয় ঠাকুর' বলে।

• হরপ্রসাদ হেসেছেন। বলেছেন মন এখনও করে নি, করলে, তোকে অবশ্যই বলব।

বিজিতেন লোকনাথবাবার শিষ্য হয়েছে। চাকলাধাম না কোথায় যেন যায় স্ত্রী-শাশুড়ি ছেলেমেয়ে সকলকে নিয়ে গাড়ি বোঝাই করে সপ্তাহান্তে। বলে জানিস, বড় শান্তি পাই রে।

শান্তির নানা রকম আছে। প্রতিটি মানুষের শিক্ষা, মানসিকতা ছেলেবেলা থেকে তাকে একজন আলাদা মানুষ করে গড়ে তোলে। প্রত্যেকেরই আদল আলাদা আলাদা হয়। এক খাপে অন্যে আঁটে না। হয়ত সেই কারণেই তারা মানুষ, জানোয়ার নয়।

কারোকেই ছোট বলে ভাবেন না হরপ্রসাদ, তবে ছাপ্পান বছর বয়সে পৌছে একথাটা বোঝেন যে, তিনি অন্যদের থেকে আলাদা। বৈরাগ্য সাধনে মুক্তি তাঁর হবে না। অথচ কিসে যে হবে, তা তিনি নিজেও জানেন না। 'মুক্তি' বলতে ঠিক কী যে বোঝায় তা নিয়েও বিশেষ চিন্তাভাবনা করেন নি।

মাঝরাতে 'বল হরি হরি বোল' ধ্বনি দিতে দিতে পথ দিয়ে কোন মৃতদেহ

নিয়ে গেলে হঠাৎ ঘুম ভেঙে উঠে বসে ভাবতে বসেন হরপ্রসাদ, কোথায় যাচ্ছে মানুষটা? আধুনিক বিজ্ঞান বলে, কোথাওই যাচ্ছে না। এখানেই সব শেষ। সেই শেষ কবে আসবে তাঁর? মানুষ অনেকই দেখেছে, জেনেছে, কিন্তু কার শেষ কখন যে আসবে সেই জ্ঞানটা তো কারও ভাঁড়ারেই নেই।

একথা ঠিক যে, এইসব ভাবনা হয়ত উনি ব্যাচেলর বলেই, একা বলেই, প্রায়ই আসে মনে। ভয় ভয় লাগে। আর লাগে বলেই, ওই মেয়েটি, দেবী, তার সঙ্গে হঠাৎ আলাপিত হওয়ার পরে তারুণ্যর উষ্ণতা ও দীপ্তির চমক দিয়ে অন্য এক জগতের আভাস দেয়। সে এবং তার লিভ টুগেদারের দুই সঙ্গীর কাছেই, ওই থ্রী-মাস্কেটিয়ার্স-এর কাছেই বোধহয় হরপ্রসাদের পুনর্যোবনের মুক্তির মস্ত্র আছে। দিন বদলে গেছে, পৃথিবী পাল্টে গেছে। কতখানি যে পাল্টে গেছে তা সামান্য দূরে, দমদম-এর নাগের বাজারের, একটি মড পরিবারকে জেনেই তিনি বুঝতে পারছেন।

অবাক লাগছে হরপ্রসাদের। যে আধুনিক জগৎ সম্বন্ধে তাঁর কোনও ধারণা নেই সেই জগৎ সম্বন্ধে তীব্র এক আকর্ষণ বোধ করতে থাকলেন উনি ফোনটা আজ ছাড়বার পর থেকেই।

বাঃ। কোচটা তো একেবারে নতুন।

এইচ. পি. বললেন।

তা তো হবেই স্যার।

দেবী বলল।

কেন? তা হবেই কেন?

এখন রাঁচি তো একটি রাজ্যের রাজধানী। ঝাড়খণ্ডের রাজধানী নয়? তাই রাঁচির ট্রেনকে উপেক্ষা করলে আর চলবে না। আগে আগে সাউথ ইস্টার্ন রেলের যত গুঁচা কোচ সব ঠেলে দিত রাঁচি এক্সপ্রেস আর পুরী প্যাসেঞ্জারে।

এ সি কোচও?

সব সব। ফারস্ট ক্লাস, এ সি সব কোচই। রেলের অনেক উন্নতি হচ্ছে। হয়ত আরও হবে। আপনি শিয়ালদহ থেকে যে রাজধানী ছাড়ে তাতে কখনও চড়েছেন স্যার। ভাবা যায় না। উনিফর্মড বেয়ারারা হাতে গ্লাভস পরে দারুণ খাবার সার্ভ করছে, পলিথিনের ব্যাগে করে বেডশিট তোয়ালে পিলোকেস দিচ্ছে, মিনারাল ওয়াটারের বোতল।

কোন ক্লাসে? এ সি ফারস্ট-এ?

না, না এ সি থ্রি টায়ারেই। আমি জীবনে এ.সি. ফারস্ট ক্লাস-এ চড়েছি না কি? এই তো প্রথম চড়লাম আপনার দৌলতে। তবে মানে হয় না কোন এত পয়সা নষ্ট করবার।

আমি তো মোটা মানুষ। তা'ছাড়া, পয়সা তো খরচ করারই জন্যে। পয়সা জমিয়ে রাখলে তা কাগজই হয়ে থাকে। জমানো পয়সা হয়ত কোন কোন অশিক্ষিত অধশিক্ষিত আত্মবিশ্বাসহীন মানুষের শ্লাঘা বাড়ায় কিন্তু পয়সাকে কে কোন কাজে ব্যয় করে তার ওপরেই পয়সার সার্থক হওয়া না হওয়া নির্ভর করে। তা'ছাড়া, সারাটা জীবন অনেকই পরিশ্রম করেছি। জীবনে তোমরা যাকে 'সফল হওয়া' বলো, তা হতে অনেকই মূল্য দিয়েছি। জীবনের সবচেয়ে সুন্দর সব দিনে নিজেকে অনেকই সুখ, অনেকই আনন্দ থেকে বঞ্চিত করেছি তাই আমার মনে হয়, এই সাঁঝবেলাতে পৌঁছে এইরকম কিছু কিছু আরামের যোগ্যতা আমি হয়ত অর্জন করেছি।

অবশ্যই! আমি আমার নিজের কথাই বলছিলাম। কিছু মনে করবেন না স্যার।

না, না মনে করব কেন?

তা'হলে চড়বেন একবার শিয়ালদহ থেকে ছাড়া রাজধানীতে।

ট্রেনে চড়ি কোথায়? আজকে তোমার পাল্লায় পড়ে ট্রেনে চড়ছি, তাও সন্তোষ

বছর পনেরো পরে। নইলে সব জায়গায়ই তো প্লেনেই যাতায়াত করতে হয়। সময় কোথায় সময় নষ্ট করবার।

কটা বাজল স্যার?

সাড়ে নটা। কেন? তোমার ঘড়ি নেই?

থাকবে না কেন? আছে। ব্যাটারিটা বদলাতে দিলাম কিংশুককে। তা ভুলেই গেল।

তোমাকে একটা ভাল ঘড়ি দেব।

দেবেন কেন? একটা তো আছেই। অপচয় করবেন না। তা'ছাড়া আমি যত ভাল আমার ঘড়ি তার চেয়ে বেশি ভাল হলে দৃষ্টিকটু দেখাবে না!

আরেকটা কাটলেট খাও। আমার বাবুর্চি ইদ্রিস আলি রান্নাটা ভালই করে। ইংরেজি, মোগলাই, চাইনিজ যা বলবে রঁধে দেবে। তবে বাঙালি রান্না এখনও শিখল না।

কেন?

শেখাবে কে?

তাই? তা আপনি বাঙালি রান্না কি কি খেতে ভালবাসেন?

সেসব কথা থাক। তুমি খাও তো এখন। পুডিংটা খেও। সুইট-ডিশও খুব ভাল করে ইদ্রিশ।

আপনি তো কিছুই খেলেন না।

খাদ্য আমি রাতে কমই খাই। দুটি হুইস্কি খাই। দেখছ'তা খাচ্ছি।

হ্যাঁ। তা তো দেখছিই। কি হুইস্কি খান আপনি?

তুমি কি নাম জানো নাকি?

না, ওরা মাঝেমধ্যে খায় তো।

ওরা কি খায়?

রয়্যাল স্ট্যাগ। শিঙাল হরিণের ছবি দেওয়া বোতলে।

হেসে ফেললেন এইচ. পি.।

বললেন, তাই?

তারপর বললেন, ওটা দেশী। তবে শুনেছি ভালই।

আপনি দেশী খান না?

উনি হেসে বললেন, এমনিতে আমি খুবই দেশপ্রেমী কিন্তু হুইস্কির বেলাতে নই। হুইস্কি বলতে স্কটল্যান্ডের হুইস্কিই বুঝি। আমার নিজের কিনতেও হয় না। প্রতি সপ্তাহেই কোনও না কোন মক্কেল বিদেশে যান, নিয়ে আসেন আমার জন্যে। নিজে আর কতটুকু খাই। কখনও পার্টিটাটি দিলে অন্য কথা।

পেছনে বালিশ নিয়ে পায়জামা-পাঞ্জাবি পরে বসেছিলেন এইচ. পি.।

এককালে হ্যান্ডসাম ছিলেন। মানুষে বলত। এখন বয়স এসে অনেক কিছুই একে একে ছিনিয়ে নিয়েছে। পারে নি শুধু মনটাকে। মনের মধ্যে এখনও একটি কুড়ি-একশ বছরের তরুণ বাস করে। তবে সে বড় লাজুক। মুখ লুকিয়েই থাকে। কখনও সখনও চারদিকে যে কেউ নেই তা দেখে নিয়ে চুপিসাড়ে মুখ বের করে।

তবু সে যে আছে, থাকে তাঁর হৃদয়ে, নীরবে এবং গোপনে এই কথাটা জেনেই খুবই আনন্দ হয় এইচ. পি. চ্যাটার্জির। সে বুকের মধ্যে না থাকলে, সত্যিই একেবারেই বুড়ো হয়ে যেতেন।

তুমি যে আমার সঙ্গে ট্রেনের ক্যুপেতে ট্রাভেল করছ, তোমার ভয় করছে না? আমি বুড়ো হলেও তো এমন বুড়ো নই! মেয়েদের ক্ষতি করার ক্ষমতা তো এখনও যায় নি আমার।

খুব জোরে হেসে উঠল দেবী, খাওয়া থামিয়ে। বলল, আপনি যেটাকে আমার ক্ষতি ভাবছেন সেটা তো আমার লাভও হতে পারে। 'কিন্তু আমি অথবা আপনি তো জঙ্ঘ-জানোয়ার নই যে সুযোগ পেলেই শারীরিক সম্পর্ক ঘটে যাবে আমাদের মধ্যে। আমরা মানুষ। দু'জন মানুষের মধ্যে শারীরিক সম্পর্ক হওয়ার আগে কত সময়ের, বিবেচনার দরকার। আমরা যে দারুণই কমপ্লিকেটেড জীব। মনের মিল হতে হবে, তারপরে সহমর্মিতা, তল্লও পরে রুচির মিল, তারপরেও সোহাগ, শৃঙ্গার, আদর। এ সবকিছুর পরেই তো বড় আদর। কত মাস বছর কেটে যায় এই সব প্রসেসে। সত্যি! বিধাতা মানুষকে বড়ই গোলমালে করে গড়েছেন।

বলেই বলল, আপনার হঠাৎ এ কথা মনে হল কেন স্যার?

আমার মনে ঠিক হয় নি। তোমার মনে কিছু হল কি না তারই খোঁজ করছিলাম। তুমি এব্যাপারে আশ্বস্ত না হলে রাতেও নিশ্চিন্তে ঘুমাতে পারবে না যে!

ক্যারামেল কাস্টার্ড পুডিংটা খেতে খেতে হাঃ করে হাসল, দেবী।

বলল, আমি তো ধোওয়া তুলসী পাতা নই। অন্যায়তাও নই। আপনি তো জানেনই যে আমি মিনি-দ্রোপদী। তবে আমি ধোওয়া তুলসী পাতা নই বলেই যখনই ইচ্ছে যে কেউ বাজার থেকে কিনে নিয়ে গিয়ে পুজোয় লাগাবে তাও হবার নয়। আসলে, আপনি আমার আই কিউ-এর লেভেল বড় নিচু বলে মনে করেছিলেন স্যার ভুল করে। আপনাকে সারাস্রাতে নিয়ে যাব বলে ঠিক করার অনেক আগেই আপনাকে আমি বুঝে গেছিলাম। আপনার দ্বারা কোন কুকর্ম হবে বা না হবে, সে সম্বন্ধে আমার স্বচ্ছ ধারণা না থাকলে আপনাকে সারাস্রাতে নিয়ে যাওয়ার কথা বলতামই না। এতো রেলগাড়িরই বন্ধ কামরা, হোক না সুন্দর বিছানা-পাতা, গদী-আঁটা, হোক না এয়ার কন্ডিশনড। প্রকৃতির মধ্যে যখন থাকব আমি আর আপনি একই ঘরে, সেই সাংঘাতিক অভিঘাতও যখন আপনার সয়ে যাবে বলে আমার বিশ্বাস, তখন এই ট্রেনের ক্যুপেতে কোনও অঘটন ঘটবে না। আসলে আপনাকে যে কারণেই হোক আমি এমন এক জায়গাতে বসিয়েছি আমার মনের, এমন এক উঁচু কুলুঙ্গিতে যে, সেখান থেকে মাটিতে নেমে অন্য দশজন সাধারণ পুরুষের মতো পুরুষ আপনি কখনওই হতে পারবেন না।

তারপর একটু চুপ করে থেকে বলল, দেবীর বয়স কম হলে কি হয়, এ পর্যন্ত যে অনেকই পুরুষের পুজো পেয়েছে, গ্রহণ করেছে কি করে নি, সেটা অবাস্তব। তাই এই সব সামান্য ও তুচ্ছ ব্যাপার নিয়ে আপনি মোটেই মাথা ঘামাবেন না। কিংশুক আর অস্তুর সঙ্গে তো আমি লিভ টুগেদার করিই। আপনি আমার স্বপ্নের

মানুষ। আমি চাই আপনি স্বপ্ন হয়েই থাকুন। আপনার আদর যদি কখনওই খাই তো স্বপ্নেই খাব। আপনি আমার চেয়ে বয়সে অনেকই বড়। আপনিও নিশ্চয়ই নানা অভিজ্ঞতার মধ্যে দিয়ে হেঁটে এসেছেন এতগুলো বছর। আপনারও কি মনে হয় না যে স্বপ্ন, বাস্তবের চেয়ে সব সময়েই বেশি সুন্দর?

মনে হয়। কিন্তু মনে মাঝে মাঝে এ সংশয়ও জাগে যে, শুধু স্বপ্ন নিয়েই কি জীবন কাটানো যায়? বিশেষ করে, জীবন এখন শেষই হয়ে এসেছে।

অবশ্যই যায় স্যার। আমি পারি নি ফিন্যান্সিয়াল কারণে।

এইচ. পি. হইস্কির গ্লাসটা শেষ করে বললেন তুমি তো ভারি সুন্দর কথা বল। তুমি লেখালেখি করো না কেন?

কথা বলতে পারলেই কি লেখা যায়? শুধু কথায় ভার থাকে না। শুধু কথা গাঁথে গাঁথে লিখে যুক্তিহীন অর্থহীন টিভি সিরিয়ালের স্ক্রিপ্ট লেখা যেতে পারে, সাহিত্য সৃষ্টি হয় না। কিংশুকের আসার কথা আছে—কথা আছে আগামী পরশু পাটনা থেকে, সারান্নাতে। সেত কবি। সে লিখতে পারে। শুনবেন তার কবিতা।

কবিতা লেখাই ওর প্রফেশান নাকি?

ঠিক তা নয়। কবিতা ওর প্রেম। প্রথম প্রেম। আমি ওর দ্বিতীয় প্রেম। মনে হয়। জানি না ঠিক। ও সম্ভবত বিজ্ঞাপনের কপি-টপি লেখে। ফ্রী-ল্যান্সার। ঠিক কী যে করে তা বলতে পারব না।

কিংশুকের পদবী কি?

বন্দ্যোপাধ্যায়।

কিংশুক বন্দ্যোপাধ্যায়।

নিজের মনে বললেন এইচ. পি.। নামটা তো চেনা মনে হচ্ছে না।

কি করে হবে। ওতো লেখে লিটল ম্যাগ-এই। তা ছাড়া কবি তো এখন বাংলা ভাষায় আছে কয়েক হাজার। মানে, যাঁরা নিজেদের কবি বলে ভাবেন। স্বঘোষিত কবি আর কি! দেশে জনসংখ্যার বিস্ফোরণ হয়েছে অবশ্যই কিন্তু কবিদের জনসংখ্যাতে যে বিস্ফোরণ ঘটেছে গত ত্রিশ বছরে, মানে আমার জন্মের সময় থেকেই, তার কোনও নজির নেই। শুনেছি, স্বয়ং শক্তি চট্টোপাধ্যায়ও একবার লিখেছিলেন, বড় বেশি কবি হয়ে গেছে এখানে।

এইচ. পি. বললেন, তাই বুঝি?

তাই তো শুনেছি।

নীল নাইট-লাইটটা কি জ্বালিয়েই শোবে? না কি সব আলো নিভিয়ে দেবে?

আপনার কিসে সুবিধা?

সব আলো না নিভিয়ে আমি শুতে পারি না, তবে তোমার অসুবিধে হলে নাইট-লাইটটা জ্বালিয়েই রেখো।

আমি তো ওপরের বার্থে শোব। যদি রাতে বাথরুমে যেতে হয়, নামতে গিয়ে আপনার ঘাড়ে পড়লেই চিন্তির। যদিও সুন্দর সিঁড়ি লাগানো আছে।

তবে, জ্বেলেই রেখো।

আপনি শুয়ে পড়বেন এখন?

কেন? তুমি কি জেগে থাকতে চাও?

বেশিক্ষণ নয়। একটা রিপোর্ট জমা দিতে হবে দে সাহেবকে। সেটাতে একবার চোখ বুলিয়ে নিতাম। মাথার কাছে রিডিং ল্যাম্প জ্বালিয়ে পড়ে নেব। আপনার অসুবিধে হবে না।

দে সাহেব কে?

প্রফেসর ইন্ডিজিং দে। তিনি আর তাঁর স্ত্রী সুমিতাদিই তো সোসাইটি ফর রুরাল ইন্সটিটিউটস চালান। রাঁচির বারিয়াতুতে ওঁদের ফ্রিয়াকাণ্ড দেখলে আপনার চোখ জুড়িয়ে যাবে। এন জি ও। ওঁদের সঙ্গে আমাদের টাই আপ আছে। সুমিতাদির ইউনিটটির নাম অবশ্য অন্য।

কি তা?

“ভূমিকন্যা”।

বলেই বলল, আমি একবার বাথরুম থেকে ঘুরে আসি। পা-টা ভাল করে না ধুলে আমার ঘুম আসে না।

খুবই ভাল অভ্যাস। শুধু পা-ই কেন, গোড়ালি, হাঁটু, হাঁটুর উল্টোদিক, কনুই, কজি, ঘাড়, কানের পেছন এসব জায়গাতে জল লাগিয়ে শুলে খুব ভাল ঘুম হয়। তবে চান করতে পারলে সবচেয়ে ভাল। আমি তো সারা বছরই রাতে গরম জলে চান করি।

তাই? তো সারাগাতে কি হবে? ওখানে তো গিজার-টিজার নেই।

তারপরে বলল, ঠিক আছে। ক্যানেশারা করে জল গরম করে দিতে বলব। আর সব কিছুর অভাব অবশ্যই আছে কিন্তু লোকবলের তো অভাব নেই আমাদের। বলেই বলল, তা'হলে আমি যাই?

যাও। তুমি এলে আমি একবার যাব।

বাথরুমে যেতে যেতে দেবী বলল, নীল আলোটা নিভিয়েই দেব। আপনার যখন অসুবিধে হয়। রাতে আমি উঠিই না বলতে গেলে। যদি কখনো কথা ভেবেই বলেছিলাম। উঠলে, তখন বাতিটা জ্বালিয়ে নেব।

দেবী চলে গেলে এইচ. পি. লম্বা হয়ে শুয়ে পড়লেন। পা দুটো ভিতরে করে নিলেন যাতে দেবী ফিরে এসে ইচ্ছে করলে বসতে পারে? পায়ের কাছে ভাঁজ করা সাদা চাদর আর নতুন কম্বল। যখন ঠাণ্ডা লাগবে তখনই গায়ে দেবেন। আজকাল একাধারে স্পন্ডিলাইটিস, অন্যধারে সাইনাসাইটিস-এ ভারি কষ্ট পাচ্ছেন। কাজের জন্যে চেম্বারে এ সি তো চালাতে হয়ই কিন্তু এসবের ভয়ে শোবার ঘরে সারা রাত চালাতে পারেন না। ঘরটা ঠাণ্ডা হয়ে গেলেই বন্ধ করে দেন। কিন্তু বন্ধ ঘরে অস্মিজেনের অভাবে বৃক্ক কষ্ট হয়। ডাক্তার বলেছেন স্লিপ অ্যাপনিয়ার জন্যে কাত হয়ে শুতে। চিং হয়ে না-শুতে। ওজনটা বেড়ে যাওয়াতেই নানারকম অসুবিধেতে পড়েছেন। ওজন কমবার কোন সম্ভাবনাও তো দেখছেন না। মা বাবা দু'জনেই মোটা ছিলেন। গোপেন গান্ধুলি রোগা হওয়ার ওষুধ অ্যামেরিকান ‘গোলা’ খেয়ে অনেক কেজি কমেছে, প্যান্ট ঢিলে হয়ে গেছে। কিন্তু এইচ. পি. অনেক অনুরোধেও খান নি। ভগবান যাকে যেমন গড়ন দিয়েছেন। রোগা-মোটা, বের্টে-

লম্বা, ফর্সা-কালো করে গড়েছেন তিনি মানুষকে। খামোখা খোদার ওপর খোদাকারী করার দরকার কি?

দেবী বাথরুমে চলে যাবার পরে ক্যুপের মধ্যে তার শরীরের হালকা পারফিউমের গন্ধ পেলেন এইচ. পি. এয়ার কন্ডিশনারের বিরঝিরে হাওয়ায়। রাতে ঠাণ্ডাটা কমাবার ব্যবস্থা করতে হবে। এখনি কোচ অ্যাটেনডেন্টকে বলে রাখতে হবে। তিনি নিজে ডাবল-কম্বল গায়ে মাথা ঢেকে ঘুম লাগালেই চিন্তির।

এই সুগন্ধে বেশ একটা ঘোর ঘোর লাগছে এইচ. পি.-র। পারফিউমের গন্ধ ছাড়াও দেবীর শরীরেরও কি আলাদা কোনও গন্ধ আছে? কোন যুবতীর এত কাছে তো বহুদিন থাকেন নি। মুগেনের বউকে তিনি রমণ করেছিলেন বার কয়েক অবশ্যই, তাও বছর পঁচিশেক আগে কিন্তু তাকে রমণীজ্ঞানে কখনও দেখতে পান নি. দেখেছিলেন এক কামুক ডাইনি হিসেবে।

যদি উনি বিয়ে করতেন যৌবনে, যখন সকলেই করে, তা'হলে ফুলশয্যার রাতে কি এমনই গন্ধ-মেদুর অনুভূতি হতো? সুগন্ধি অন্ধকার ঘরে একটি যুবতীর সঙ্গে এমন ভাবে রাত কাটান নি কখনও। রীতিমত উত্তেজনা বোধ করছেন উনি। যদিও দেবী তাঁর সঙ্গে শোবে না, শোবে উপরেই, তবু এই সান্নিধ্যও তো অভূতপূর্ব। দেবীর চুড়ির রিনঝিন, পায়ের পায়জোর-এর শব্দ নিবুম রাতে কানে আসবে। ঘুম কি আসবে তাঁর? রবীন্দ্রনাথের লেখাতে পড়েছিলেন, কোন কবিতাতে তা মনে নেই,

“রাতের রেলগাড়ি, দিল পাড়ি

গাড়ি ভরা ঘুম, কামরা নিবুম।”

ঘুম কি আজ আসবে এইচ. পি.-র?

দেবী ফিরে এলে উনি চটিটা গলিয়ে বাথরুমে গেলেন। ফিরে এসে দেখেন দেবী তাঁর পায়ের কাছের চাদর পেতে তার ওপরে কম্বল বিছিয়ে সুন্দর করে ভাঁজ করে দিয়েছে, ফাইভ-স্টার হোটোলে যেমন ভাবে করে “হাউস-কীপিং”-এর লোকেরা।

দেবী বলল, জল রইল মাথার কাছে। হাত বাড়ালেই পাবেন।

তোমার জলের বোতলটা ওপরে তুলে নিয়েছ তো?

হঁ।

তারপরে স্বগতোক্তির মতো বললেন, সোহনলালবাবু গাড়িটা পাঠালে হয় স্টেশনে। রাঁচি স্টেশন থেকে কতক্ষণ লাগবে তোমার সারান্সা পৌঁছতে?

ভাল ড্রাইভার হলে ঘণ্টা আড়াই।

বলেই প্রশ্ন করল, সোহনলালবাবু কে?

সোহনলাল ব্যাহেল। আচ্ছুরাম কালকাফফ, লাক্সা কোম্পানির ম্যানেজিং ডিরেক্টর।

ও। ওঁদের নাম তো শুনেছি। রাঁচি থেকে চক্রধরপুরের যাওয়ার রাস্তায় খুঁটি

পেরিয়ে মুরহুতে তো ওঁদের মস্ত কারখানা আছে না লাক্কার? ওই জায়গাটার নাম হচ্ছে তো আচ্ছুরামপুরী।

তুমি জানলে কি করে?

আমাদেরই একটি ইউনিট তো ওখানে আদিবাসীদের মধ্যে কাজ করছে, তাই জানি। যদিও আমি যাই নি সেখানে কখনওই। কিন্তু আমার বন্ধু সুদীপ এখন খুঁটিতেই আছে। আপনি কি গেছেন স্যার? ওদের তো গেস্ট হাউসও আছে শুনেছি ভাল।

এইচ. পি. মাথা নাড়লেন। বললেন, নাঃ যাই নি। আচ্ছুরাম, সোহনলালবাবুর বাবার নাম। জার্মান কোলাবরাশানে কোম্পানিটি ফর্ম করেছিলেন উনি। উনি অনেকবারই বলেছেন যদিও। সেখানে ইংলিশ জার্সি গরু আছে। তার দুধ-ঘি-দই খাওয়াবেন বলেছিলেন। নিরামিষ, কিন্তু খুব ভাল খাওয়া।

গেলেন না কেন? যদি কখনওই যান তবে ওই অঞ্চলের মুণ্ডাদের নিয়ে লেখা 'সাসানডিরি' নামের একটা উপন্যাস অবশ্যই পড়ে নেবেন। এ অঞ্চলের বিপজ্জনক ডি-ফরেস্টেশান এবং মুণ্ডারী সংস্কৃতির বিনাশের কথা তাতে আছে।

তারপরে বলল, গেলেই তো পারেন একবার।

বুঝলে দেবী। ওপরওয়ালার মতো জবরদস্ত অ্যাকাউন্ট্যান্ট আর দুটি দেখলাম না। এক হাতে তিনি দেন আর অন্য হাতে নিয়ে নেন। একটা ডেবিট হলে সঙ্গে সঙ্গে একটা ক্রেডিটও হয়। ওঁরই অঙ্গুলি হেলনো। ভারতবর্ষে এমন কম জায়গাই আছে যেখানে ব্যারিস্টার এইচ. পি. চ্যাটার্জি যেতে চাইলে স্টেশনে বা এয়ারপোর্টে এয়ারকন্ডিশনড গাড়ি থাকবে না, থাকা-খাওয়া-ঘোরার দুর্দান্ত বন্দোবস্ত থাকবে না, কিন্তু সময় কোথায়? সময়ই যে জীবনে সবচেয়ে দামি সে কথা এই পরিণত বয়সে এসে যতটা বুঝি অল্প বয়সে ততটা বুঝি নি।

তারপর বললেন, তুমি যেতে চাও তো বোলো আমাকে। তোমরা তিন জনেই যেয়ো না। এই পুজোতে যাবে? সব বন্দোবস্ত করে দেব। স্টেশন থেকেই ওদের কেউ এসে তোমাদের নিয়ে যাবে। ভি আই পি ট্রিটমেন্ট দেবে।

দেবী খুশি হয়ে বলল, বলব। আসলে ওই অঞ্চলই তো বিরিসামুণ্ডার উলগুলান-এর জায়গা। অনেক কিছু দেখার আছে ওদিকে। লুথেরান মিশন আছে। জার্মান মিশন। ফাদার হফফম্যানের জায়গা। কত পড়েছি ফাদার হফফম্যান সম্বন্ধে।

বাবাঃ। তুমি কত কি জানো। ছোট্ট মেয়ে হলে কি হয়! তোমাদের জ্ঞান-গন্ধিই আলাদা। একবার যাও। তোমাদের তিন জনকে এই Treat-টা দিতে পারলে আমার খুব ভাল লাগবে।

আমাদেরও খুব ভাল লাগত এক সঙ্গে যেতে পারলে কিন্তু তিন জনের এক সঙ্গে হওয়াটাই যে প্রচণ্ড অসুবিধের। আমাদের তিন জনেরই কাজের রকম এমনই যে, কী বলব! অথচ কাজ তো না করলেই নয়। তবে শুধু যে টাকার জন্যেই কাজ করি এমনও নয়। নেশাও বলতে পারেন। সত্যি! বাবা বা মামা যদি বেশ কয়েক লাখ ব্যাল্কে রেখে যেতেন তবে এই ক্ষুন্নিবৃত্তির জন্যে এমন হন্যে হয়ে ঘুরতে হতো না।

শুধুই কি পেটের অন্নর জন্যেই খাটো? মনে তো হয় না। তুমি, যেই তোমার স্বামী হোক না কেন, তার রোজগারেই অবহেলায় তার বাড়িতেই থাকতে পারতে। হাউস ওয়াইফ হয়েই না হয় থাকতে। থাকো না যে তার কারণ অন্য। আমার মনে হয়, এত হাজার বছরের পরে তোমরা যে স্বাধীনতার স্বাদ পেয়েছ, অর্থনৈতিক স্বাধীনতা, চিন্তা-ভাবনা, সঙ্গী নির্বাচন, ব্যক্তিগত সেক্স-লাইফের স্বাধীনতা তা তোমরা পুরোপুরি উপভোগ করতে চাও। সে জন্যে তোমরা অনেক কিছুই ছাড়তে রাজি আছ এবং ছাড়ছোও। তোমাদের এইসব কষ্ট স্বীকার যে আনন্দরই এক অন্য রূপ, অন্য অভিব্যক্তি, তা এই মুহূর্তে তোমরা হয়ত বুঝতে পারছ না কিন্তু তোমাদের উচ্ছ্বাস, এই স্বাধীনতার চেউয়ে চেউয়ে চূর্ণীত জীবনের ফেনা যখন থিতুয়ে আসবে তখন অবশ্যই বুঝতে পারবে। আমি তো এইসব নিয়েই বলেছিলাম তোমাদের সেদিনের সেমিনারে।

সত্যি! যদিও আপনি সোশ্যালজির পণ্ডিত নন, কোন বিশ্ববিদ্যালয়ে পড়ানও না, আমাদের, মানে, অল্পবয়সী মেয়েদের স্বাধীনতার স্বরূপের ব্যাখ্যা সেদিন আপনি যেমন প্রাঞ্জল করে আপনার বক্তৃতাতে দিলেন তাতে আমরা তো বটেই আমি যে কলেজে পড়তাম এবং অন্যান্য নানা কলেজের অধ্যাপক-অধ্যাপিকারাও মুগ্ধ। দূর থেকে দেখে এমন অ্যানালিসিস যে করা আদৌ যায় তা ভেবেই ওঁরা চমৎকৃত। তাও যদি আপনি সাহিত্যিক-টাইলিকও হতেন। জীবনের নানা দিককে যাঁরা দেখেছেন, ভেবেছেন, ছিড়েছেন, লিখেছেন তা'হলেও না হয় বোঝা যেত।

আমরা যাঁরা মনোযোগ দিয়ে ওকালতি করি তাঁরা কিন্তু সাহিত্যিকদের চেয়ে কিছু কম জানি না মানুষের জীবনকে। আইন ব্যাপারটাই দাঁড়িয়ে থাকে ফ্যাক্টের ওপরে। ফ্যাক্ট যদি ডিসটিংগুইশ করতে পারো তাহলে আইনের প্রয়োগ ভিন্ন রকম হবে। আর সে কারণেই প্রত্যেক কেস-এরই এই ফ্যাক্টকে আলাদা করে জানতে গিয়েই অনেক গভীরে যেতে হয়, অনেকই বিভিন্ন জগতে ঢুকতে হয় আমাদের। আর এই করে করেই মানুষকেও জানতে পারা যায়। আমরা কলম ধরলে অনেক সাহিত্যিকের চেয়েই হয়ত ভাল লিখতে পারতাম।

এই সব Facts কি সব কেসেই আলাদা আলাদা হয়?

নিশ্চয়ই। তবে Facts ভুল ইংরেজি অথচ অনেক উকিল ও জজসাহেব পর্যন্ত এই শব্দটি ব্যবহার করেন।

সে কি! Facts ভুল শব্দ?

ভুলই তো। Fact হচ্ছে Plural, Singular হচ্ছে Factum। যেমন Datum আর Data।

সত্যি? এটা জানতাম না তো। সকলেই ব্যবহার করেন, আমার চেয়ে অনেক জান্নী-গুণীরাও তাই আমিও ব্যবহার করি।

বাজল কটা?

সাড়ে দশটা?

এবার শোবে তো?

ওই। শুয়েই পড়ব। দাঁড়িয়ে তো গল্পও হবে না, পড়াও হবে না।

তার আগে ওই কলিং বেল-এর স্যুইচটা একবার টেপ তো লক্ষ্মীটি।

দেবী বেল-এর স্যুইচ টিপলে একটু পরই আটোনেড্যান্ট এলেন। বললেন, ইয়েস স্যার। কি লাগবে?

লাগবে মানে, ঠাণ্ডাটা বেশ বেশি আছে। একটু পরেই কম করে দিতে হবে।

কোনও চিন্তা নেই স্যার। একটু পরেই অটোম্যাটিক থার্মোস্ট্যাটে দিয়ে দেব। প্রথমে সকলেরই গরম বেশি লাগে তো। তার ওপর প্রতি কম্পার্টমেন্টে যে সব ব্রিফকেস আছে তার মধ্যে বাণ্ডিল বাণ্ডিল হাজার আর পাঁচশ'র নোট। তাদের গরমটার কথাও তো ভাবতে হবে স্যার।

আমাদের ব্রিফ কেস নেই।

নেই যে তা দেখেছি বলেই তো সাহস করে বললাম কথাটা। আচ্ছা স্যার। গুড নাইট। আপনাকে একটা একস্ট্রা পিলো কি দেব? পাশ বালিশ করার জন্যে? দিলে তো ভালই হয়।

এখুনি দিচ্ছি।

আপনি বুঝি পাশ বালিশ ব্যবহার করেন? দেবী বলল।

করি। আমার তো বৌ নেই যে তার কোমরে পা তুলে দেব। তা'ছাড়া পাশ পালিশ কেন, আমি Neck-Pillowও ব্যবহার করি।

সেটা কি জিনিস?

সাহেবরা বলছে এখন Neck-Pillow কিন্তু আমাদের দেশে এর ব্যবহার বহুদিনের! লক্ষ্মী'র নবাবেরা একে বলতেন 'গল-তাকিয়া'। মানে, গালের বালিশ। তুমি যখন পাশ ফিরে শোও তখন গালের নিচে হাঙ্কা ও ছোট্ট বালিশ দিলে আরাম হয়। Neck-Pillow-টা ঠিক গাল-তাকিয়া নয় যদিও। মনে হয়, যাদের স্পন্ডিলোসিস আছে তাঁরা পুরো বালিস ব্যবহার না করে এই ঘাড়ের নিচের ছোট্ট কোলবালিশের মতো গোল বালিস ব্যবহার করলে আরাম পান। আজকাল ক্যামাক স্ট্রিটের West Side-এ কিনতে পাওয়া যাচ্ছে।

দেবী বলল বাবাঃ। কত কি শিখছি আপনার কাছে স্যার।

আমিও শিখছি তোমার কাছে।

দেবী বলল, আমি তা'হলে স্বর্গারোহণ করছি। কিন্তু তার আগে আমার একটা প্রশ্নর জবাব দেবেন?

কি বল?

এতো নাম থাকতে আপনার নাম হরপ্রসাদ কে দিলেন?

হেসে ফেললেন এইচ. পি.। বললেন, আমার এক বালবিধবা পিসী ছিলেন আমাদের বাড়ির সর্বময় কত্রী। খুবই অল্প বয়সে বিধবা হয়েছিলেন বলেই বাবা-কাকারা ওঁর অনেক অপ্রাপ্তির শূন্যতা তাঁকে ভাঁড়ারে চাবি আর এই কর্তৃত্ব দিয়ে পূর্ণ করে দিতে চেয়েছিলেন। তাঁর ওপরে কথা বলেন এমন সাধ্য মা কাকীমাদের কারোই ছিল না। তিনিই আমাদের সকলের নাম দিয়েছিলেন। তিন ভাইয়ের তিন ছেলের নাম হরপ্রসাদ, রুদ্রপ্রসাদ এবং কালীপ্রসাদ। আর মেয়েদের নাম মানদাসুন্দরী, জ্ঞানদাসুন্দরী, মৃণালিনী, কাদম্বরী ইত্যাদি।

এই বিচ্ছিন্ন নাম নিয়ে আপনার কোন অভিযোগ ছিল না?

ছিল বৈকি। কিন্তু নিজের নাম তো কেউই নিজে রাখে না। তা, একদিন আমার বাবা আমাকে একটি গল্প বলেছিলেন। তারপর থেকে আর কোনও অনুযোগ অভিযোগ ছিল না। তখন আমি ক্লাস থি-তে পড়ি।

কি গল্প? বলে ওপরে ওঠার সিঁড়িতে হাত দিয়ে দাঁড়িয়ে পড়ল দেবী।

বাবা বললেন, একজন মানুষের নাম ছিল ঠনাঠন দাস।

সে আবার কী নাম!

বিহারী নাম। আমার ঠাকুর্দা অল্পবয়সে কাজ করতেন বিহারের কোডারমাতে। সাহেবদের কোম্পানি ছিল, ক্রিশ্চান মাইকো কোম্পানি, তাতে। তাই গল্পটির অনুশঙ্গ বিহারী। বাবার ছেলেবেলা ওই অঞ্চলেই কেটেছিল বলে।

গল্পটা বলুন।

হ্যাঁ। তা ঠনাঠন দাসের মনে বড়ই দুঃখ। এমন নাম নিয়ে কেউ বাঁচে? সকলেই তাকে নিয়ে হাসি-ঠাট্টা করে, নামেরই জন্যে। তা একদিন এই দুঃখের নিরসন করবে বলে সে নদীতে ডুবে আত্মহত্যা করবে মনস্থ করে নদীর দিকে চলল।

তারপর?

কিছু দূর যাওয়ার পরেই দেখল পথের পাশে এক বাড়ির সামনে জটলা। কি ব্যাপার? না একজন মরে গেছেন। তাঁর চাদরে ঢাকা মৃতদেহ শোয়ানো আছে চৌপায়ার ওপরে। ঠনাঠন দাস জিজ্ঞেস করল, মৃতর নাম কি ছিল? পরিজনেরা বললেন, অমরনাথ।

তারপর?

ভারি অবাধ হল ঠনাঠন দাস। যার নাম অমরনাথ সেই না কি মরে গেল যৌবনাবস্থাতেই।

তারপর?

তারপর ঠনাঠন দাস জঙ্গলে ঢুকে নদীর পথ ধরল। আরও কিছু দূর গিয়ে দেখে একটা ছোট হাট মতো। এক জন বুড়ি শতছিন্ন শাড়ি পরে পাহাড়ি ঝোরা থেকে ধরা মাছ তিন ভাগ করে নিয়ে বসে আছে। ঠনাঠন জিজ্ঞেস করল, তোমার নাম কি বুড়ি মা?

বুড়ি বলল, লক্ষ্মী।

তারপর?

ঠনাঠন তো আরও ফাঁপরে পড়ল। যার নাম লক্ষ্মী তারই কিনা এই দশা।

তারপর?

ভাবতে ভাবতে ঠনাঠন দাস আরও এগিয়ে যেতে দেখে এক বুড়ো খালি গায়ে একটি ছেঁড়া খেটো ধুতি পরে জঙ্গলের মধ্যে কান্ডে দিয়ে ঘাস কাটছে। সেই ঘাস হয়ত বাড়িতে বয়ে নিয়ে যাবে গরু বা ছাগলকে খাওয়ানোর জন্যে অথবা বিক্রি করে দেবে অন্যকে।

তারপর?

ঠনাঠন দাস জিজ্ঞেস করল, তোমার নাম কী বুড়ো বাবা?

বুড়ো বলল, ধনপত্। শুনে তো ঠনাঠনের অজ্ঞান হওয়ার যোগাড়। যে সাক্ষাৎ
ধনপত অর্থাৎ ধনপতি কুবের, তারই না কি এই দশা।

তারপর কি হল? হাসতে হাসতে বলল দেবী।

তারপর ঠনাঠন দাস অ্যাভাউট টার্ন করে বাড়ির দিকে ফিরে যেতে যেতে
বলল,

“অমরনাথ যো সো মর গ্যয়ে হ্যায়,
ওর ধনপত কাটতি হ্যায় ঘাস,
লছমি যো, সো মছলি বিকতি হ্যায়
ভালাই ঠনাঠন দাস।”

দেবী হাসতে হাসতে ওপরে উঠে গেল। উঠে বলল, আমারই জিজ্ঞেস করা
অন্যায় হয়েছে। শেকসপীয়রই তো সেই করে বলে গেছেন What's in a name?

দেবী কালের ওপরে সাদা পোলকা উট-এর একটি সালোয়ার কামিজ পরেছিল
সিক্কের। সে ওপরে উঠে যাওয়ার আগে তার সুন্দর পায়ের পাতা, দু'পায়ের
মধ্যমার রূপোর চুটকি, সুডৌল সুগৌর গোড়ালিতে পাংলা পায়জোর শুদ্ধ পায়ের
ছবিটি এইচ. পি.-র চোখে আঁকা হয়ে গেল। আলোগুলি নিভিয়ে দিল দেবী।

অন্ধকার ক্যুপেতে চোখ খুলে শুয়ে উনি ভাবছিলেন, ওঁর মধ্যে যে এতখানি
রোম্যান্টিকতা ছিলই শুধু নয়, আজও বেঁচে আছে সে সম্বন্ধে তাঁর নিজেরই কোন
স্পষ্ট ধারণা ছিল না। নিজেকে পুরোপুরি জানেন, ভাবতেন উনি। এখন জানছেন
যে, আদৌ জানতেন না নিজেকে। সময়ে বিয়ে করলে তাঁর দেবীর বয়সী কন্যা
থাকতে পারত। তাঁর কন্যার প্রতি তাঁর যে মনোভাব, যে অপতা, তার রকমটা
কেমন হতো তা জানার উপায় তাঁর আর নেই কিন্তু দেবীর প্রতি তাঁর যে মনোভাব
তার মধ্যেও অপতা মিশে আছে অনেকখানি এবং সেই অপত্যর সঙ্গে আরও
অনেক কিছু মিশে আছে। কিন্তু সেই সব বোধের নাম তিনি নিজেও জানেন না।
আশ্চর্য! সারা জীবনেও একজন মানুষ তার সব বুদ্ধি বিদ্যা ও অনুভূতি দিয়েও
নিজের কতটুকুকেই বা ধরতে পারে, জানতে পারে। অথচ সে সর্বজ্ঞ মনে করে
নিজেকে। রবীন্দ্রনাথের গান মনে পড়ে গেল আবার এইচ. পি.-র। “আপনাকে এই
জানা আমার ফুরাবে না, ফুরাবে না/সেই জানারই সঙ্গে সঙ্গে তোমায় চেনা।”

টাটিসিলোয়াই।

টাটিসিলোয়াই স্টেশনে ট্রেনটা দাঁড়িয়েছিল। কোচ অ্যাটেন্ড্যান্ট দরজাতে টক টক করে বলে গেলেন আর কিছুক্ষণের মধ্যেই রাঁচি পৌঁছবে ট্রেন। উঠে বসলেন এইচ. পি.। চেঞ্জ করার কিছু নেই। যে পায়জামা পাঞ্জাবি পরে ট্রেনে উঠেছিলেন তা পরেই নামবেন। শুধু বাথরুম স্লিপারটা ব্যাগে ঢুকিয়ে কাবলিটা পরে নিতে হবে। ক্যাপের মধ্যেই ওয়াশ বেসিন ছিল। লিকুইড সাপ, তোয়ালে, সব। মুখ চোখ ধুয়ে নিলেন।

দেবী উপর থেকেই বলল ওড মর্নিং স্যার।

ভেরি ওড মর্নিং ইনডিড। রাতে ভাল ঘুম হয়েছিল?

ঘুমই হয় নি।

কেন?

ট্রেনে কি ঘুম হয় না কি কারো? তা'ছাড়া সারারাত স্বপ্ন দেখলাম।

সত্যি? কাকে দেখলে স্বপ্নে?

কত জনকে। তার মধ্যে আপনিও ছিলেন।

তাই? বাঃ। শুনেও ভাল লাগছে। বাস্তবে না থাকলেও তোমার মতো সুন্দরী কৃতবিদা যুবতীর স্বপ্নে যে আছি এইটাই বা কম কি?

আর আপনার ঘুম হয়েছিল?

আমি তো একটা অ্যালজোলাম খেয়েছিলাম। রোজ রাতেই খাই।

কত মিলিগ্রাম?

ওয়ান।

ঘুম হয়েছিল তবে?

হ্যাঁ।

আর স্বপ্ন দেখেন নি?

আমি আমার জীবনের এমন একটা পর্যায়ে এসে পৌঁছেছি দেবী যেখানে সব স্বপ্ন শেষ হয়ে গেছে। স্বপ্ন যদি কখনও দেখিও তবেও শুধু অতীতই দেখি। আমার অতীতই সব। ভবিষ্যৎ তো নেইই, বর্তমানও ক্ষীণ হয়ে এসেছে। তা'ছাড়া ঘুমের ওষুধ নিয়মিত খেলে স্বপ্ন দেখার ক্ষমতা নষ্ট হয়ে যায়।

বানিয়ে বানিয়ে কথা বলেন আপনি। আপনিও স্বপ্ন দেখেছিলেন, আমি জানি।

উপর থেকে নামতে নামতে দেবী বলল।

আমি বাথরুম থেকে আসছি। তুমি মুখ এখানেই ধুয়ে নাও, দাঁতও মাজতে চাও তো তাও মাজতে পারো, তোমার তোয়ালে বাঁদিকে আছে। আমি আসছি।

ঠিক আছে।

রাতের দেবীর মুখকে এক রকম দেখিয়েছিল। আজ জানালা দুটোর পর্দা সরিয়ে দেওয়ায় সকালের আলোতে তাকে অন্য রকম দেখালো। চুল এলোমেলো, মুখটা সামান্য ফোলা, এ সি'র ঠাণ্ডাতে বোধহয়।

বাথরুম থেকে ফিরে এসে দেখলেন চুল আঁচড়ে, হালকা করে লিপস্টিক দিয়ে ফিটফাট হয়ে গেছে দেবী।

নিজের থেকেই বলল, লিপস্টিক দেওয়া আমি পছন্দ করি না কিন্তু এতো ঠোঁট ফাটে যে বলার নয়।

বেশ করো। দেখতেও ত ভালই লাগে। তুমি কোন কোন শেডের লিপস্টিক ব্যবহার করো তা আমাকে লিখে দিও। আমার মক্কেলদের বলে দেব অনেক এনে দেবে তোমাকে। এক বছরের স্টক।

আপনি স্যার ভীষণই বোরিং।

কেন?

আপনার কোনো অভাবই নেই। অভাববোধ কিন্তু থাকাটা জরুরী।

তাই?

হ্যাঁ, আমার মনে হয়। অভাব না থাকলেও অভাববোধ থাকাটা দরকার।

চাদর ও কম্বলটা ফটাফট পাট করে ফেলে বালিশটার সঙ্গে এক কোনায় করে এক পাশে বসে পড়ল দেবী। এইচ. পি. অবাক হয়ে দেখছিলেন। ভাবছিলেন, মেয়েরা কিছু কিছু কাজ এমন নিপুণভাবে অথচ অবহেলায় করে যে ছেলেরা হয়ত শত চেষ্টাতেও করতে পারবে না। রাতের বেলা তাঁর বিছানার উপরে চাদর ও কম্বল বিছানোর কথাও মনে পড়ে গেল। এই প্রজন্মের পুরুষেরা কি বলবে তা জানেন না এইচ. পি. কিন্তু তিনি বুঝতে পারেন যে মেয়েরা পুরুষের জীবনের কত শূন্যতাই কি আশ্চর্যভাবে পূরণ করে। একথা ভাবলেও আশ্চর্য হন। অথচ তিনি এত বড় ইডিয়ট যে সারা জীবন এক জেদের বশে পেশাতে এক নম্বর হওয়ার জন্যে, পুরুষের জগতে পূর্ণতা আনার সাধনাতে, তাঁর অন্য অনেক জগতই শূন্যই রেখে দিলেন। আজ আর পূর্ণ করার সময় এবং উপায়ও নেই।

ট্রেনটা ছেড়ে দিল। এ সি ফারস্ট ক্লাস-এর কামরা থেকে বাইরের স্টেশনের প্ল্যাটফর্মের বা প্ল্যাটফর্মের বাইরেরও কোন আওয়াজই শোনা যায় না। বাইরেটাতে নড়াচড়া দেখেই বুঝতে হয় ট্রেন ছাড়ল। হাওড়া-হাটিয়া এক্সপ্রেস টাটসিলোয়াইতে থামে না, সিগন্যাল না পেয়ে থেমেছিল। কে জানে!

এইচ. পি. একটা বড় দীর্ঘশ্বাস ফেললেন। ওঁর ভিতরটাও ওই এ সি কামরারই মতো হয়ে গেছে। বাইরের কোনো তাপ বা শীত কোনো গান বা কথা বা নিমন্ত্রণের প্রবেশাধিকার নেই আর ওঁর মনে। নিজের উপরে হঠাৎই বড় রাগ হল ওঁর। কি করতে এই প্রায় অচেনা ছুঁড়ির সঙ্গে তিনি তার কথাতে মজে সারাসা না ফারাসা দেখতে এলেন? দেবীর মতলব যদি এই হয় যে, ওদের অর্গানাইজেশনে কিছু ডোনেশন পাওয়া ওঁর কাছ থেকে, তবে ব্ল্যাক্স চেক লিখে দিচ্ছেন এখুনি উনি। সোহনলালবাবুর সঙ্গে ওঁর ওখানে একটা দিন কাটিয়ে আগামীকালই প্লেনে বা ট্রেনে ফিরে যাবেন।

রাঁচি স্টেশনে নেমেই মোবাইল ফোনে ধরলেন কার্তিককে। কার্তিক রায় তাঁর ক্লার্ক-কাম-সেক্রেটারি-কাম ম্যানেজার সব। মহিলাহীন সংসারে সেই ম্যানেজার। কি বাজার হবে থেকে কোন গাড়ির ড্রাইভারের কি ডিউটি প্রত্যেক দিন, কোন কাজের লোক হবে ছুটি নেবে বা দেশে যাবে সেসব কার্তিকই ঠিক করে, দেখাশোনা করে। তার নীচে ক্যাশিয়ার আছে একজন। সেই রাতে, চেম্বারে মক্কেলদের কাছ থেকে চেক ও ক্যাশ নেয়, হিসেব রাখে, খরচও করে। আরও অনেকে আছেন তবে কার্তিকই ইনচার্জ। অত সকালে কার্তিক তখনও ঘুম থেকে ওঠে নি। তার স্ত্রী ধরলেন ফোন। বললেন, অনেক রাত করে ফিরেছে স্যার। আপনি তো নেই।

এইচ পি. বললেন, ও বড় বেশি ড্রিঙ্ক করছে আজকাল। ওকে বলবে যে, অমন করলে চাকরিটা যাবে। পরিমিতিজ্ঞান যার নেই আমার কাছে তার জায়গা নেই। আর শোনো মলিনা, ও উঠলে বোলো যে আমি নেই বলে যেন চেম্বার সে কামাই না করে। আমি হয়ত কালই ফিরে যেতে পারি। রাতে ফোন করে জানাব ওর মোবাইলে। ঠিক আছে?

ঠিক আছে স্যার। আমি শুনেছিলাম সাত দিনের জন্যে গেছেন। যা পরিশ্রম করেন স্যার, একটু ছুটি নেওয়া তো ভালই।

কার্তিকের স্ত্রী মলিনা বললেন।

একথার উত্তর না দিয়ে এইচ. পি. বললেন, ছাড়ছি।

কার্তিককে, ক্যাশিয়ারকে এমন কি তাঁর খাস ড্রাইভার রামদীন সিংকেও একটা করে মোবাইল ফোন দিতে হয়েছে। রামদীনের দরকার ক্যালকাটা ক্লাব বা টলি ক্লাবের পার্কিং লট থেকে গাড়ি নিয়ে আসার জন্যে বলতে। আজকাল তো কোথাওই সোফার-ড্রিভন গাড়ি রাখতে দেয় না। ক্লাব থেকে বেরোবার পাঁচ মিনিট আগে মোবাইলে বলে দিলে গাড়ি নিয়ে গেটে এলে সুবিধা হয়।

দেবী এইচ. পি.-র মোবাইলের কথোপকথনটা শুনতে পেয়েছিল। ফোনটা সুইচ অফ করে দেওয়ার পরে দেবী এইচ. পি.-র মুখে তাকাল। এইচ. পি.ও তার মুখে তাকালেন। দেবীর মুখটা কালো হয়ে গেছিল। মুখ নীচু করে বলল, আপনি ফিরে যাবেন? আমার কি অপরাধ হয়েছে কোনো?

দেবীর কালো হয়ে যাওয়া মুখে চেয়ে তাঁর বুকে হঠাৎ করে কি যেন বিঁধল। হার্ট অ্যাটাক হলে কি অমন ছুরির মতো বেঁধে বুকে? কিন্তু উত্তর দেবার সময় পেলেন না, সোহনলালবাবুর বড় ছেলে কুলদীপ ব্যাহেল, যার ডাকনাম কুকু, এসে তাঁকে প্রণাম করল।

এইচ. পি. হেসে তাকে তুলে বুকে জড়িয়ে ধরে বলল, হাউ আর উ?।

ফাইন আঙ্কল।

পিতাজী ক্যা ঘরমে?

উনোনে ত দেখি গ্যায়া কালহি এক্সপোর্ট প্রোমোশন কাউন্সিল মে কুছ জরুরি কাম পড় গ্যায়া। আপকি মোবাইল নাম্বার মুখে দিজিয়ে উনসে বাত করা দেগা। গাড়ি তো লায়া?

জী আঙ্কল। মগর হামলোগোঁ কো তো মাসিডিজ নেহি না হয়। ওপেল অ্যাস্ট্রা লেকর আয়া। তকলিফ হোগা আপকি।

মজাক্ মৎ ওড়াও বেটা।

বলেই বললেন, কাহে? পিলা রঙকি এক মাসিডিজ তো থী। বাব্বিকে শাদীমে ওহি গাড়িমে ম্যায় বরাতভি গ্যয়েথে।

হাঁ হাঁ থী। মগর পেট্রোল কা থী। সফেদ হাতি বন গ্যয়ে থে। পিতাজী হ্যাজ গিফটেড দ্যাট কার টু দ্যা রাজা অফ গুণ্ডু, হিজ ফ্রেন্ড। গুণ্ডু সে কাফি স্টিকল্যাকভি আতা হ্যায় ফ্যাক্টরীমে।

এইচ. পি. দেবীর দিকে ফিরে আলাপ করিয়ে দিয়ে বললেন, ইনোনে হ্যায় দেবীজী, দেবী ভটচারিয়া...। সোস্যাল ওয়ার্কার হ্যায়। বহুতই তেজ আপনি কামমে।

বলেই বললেন, সারাঙ্গা কাঁহা হ্যায়? জানতে হ্যায় তুম কুকু ?

নেহি তো আঙ্কল। কিতনা সারি জাগে হ্যায় হিয়া ঝাড়খণ্ডমে সবহি ম্যায় জানতা খোড়ী। রাঁচী গুর মুরহু এহি তো হ্যায় হামারা বীট। কভি কভি কলকাতা ভি চলে যাতেঁ হেঁ। বাসস্।

চলো, কাঁহা হ্যায় তুমহারা গাড়ি।

বলে, দেবীকে বললেন, এসো দেবী।

আপলোগোঁ কি সামান?

এই কুলি।

বলে ডাকলেন এইচ. পি.। বললেন, একহি কুলি লেগা দোনোকো সামান। দোনোকো লাগেজ। গাড়ির কাছে পৌঁছে এইচ. পি. বললেন, তুম লওটে গা কৈসে? দূসরা গাড়ি লায়?

কুকুবাবু বললেন, আপনাকে ছাড়ছি খোড়ী। বাড়িতে চলুন। রেশমী আর মা আপনাদের জন্যে নাস্তা বানিয়ে অপেক্ষা করছেন। মুখ হাত ধুয়ে নাস্তা করে তারপর যাওয়া। ওই ওপেল গাড়ি আর সানেকা মুণ্ডা ড্রাইভার আপনারই হেপাজতে থাকবে আপনি যতদিন থাকবেন। সাত দিন থাকবেন ত?

কথা তো সে রকমই ছিল। তবে আগেও ফিরে যেতে পারি। কতগুলো ঝামেলার মামলা আছে, অনেকগুলো প্লেইন্ট সেটল করতে হবে। জুনিয়রেরা কাল্লাকাটি করবে।

আসাটা আপনার হাতে ফেরাটা আমাদের হাতে! কি বলেন দেবী জী? কুকু বললেন।

জরুর।

দেবী বলল।

তারপর বলল, স্যার আমরা কিন্তু সোজা বেরিয়ে গেলেই ভাল করতাম। পথে কুরুতে ব্রেকফাস্ট করে নিতাম, তাইলে সারাঙ্গাতে পৌঁছনো যেত সময় মতো। আপনার মতো বড় মানুষকে নিয়ে তো যাই নি কখনও আগে। আপনার যাতে অসুবিধে না হয় তার সব বন্দোবস্ত করতে হবে তো। তারপরে দুপুরে দে সাহেব

আর সুমিতা বৌদি আসবেন। আমাদের সঙ্গে এক সঙ্গে খাবেন বলেছেন। আমাকে আপনার ভাল লাগছে না যে তা বুঝতে পেরেছি কিন্তু ওঁদের অবশ্যই ভাল লাগবে।

এইচ. পি. বললেন, কুকু যদি তোমাদের বাড়ি না যাই তবে ভাবীজী আর রেশমী কি খুবই রাগ করবেন?

গেলে যদি আপনার অসুবিধে হয়, তা'হলে আর রাগ করবেন কি করে।

তা'হলে আমাকে ছেড়েই দাও। ফেরার সময়ে, কথা দিচ্ছি, ট্রেনে ওঠার আগে তোমাদের বাড়িতে খেয়ে তারপরেই ট্রেনে উঠব।

প্রমিস আঙ্কল?

প্রমিস। চলো তোমাকে নামিয়ে দিয়ে যাই।

আমি অন্য গাড়ি এনেছি পাছে আপনি না মানেন। তা'ছাড়া আপনারা কুরুর দিকে যখন যাবেন তখন আমাদের বাড়ি একেবারেই উল্টো দিকে হবে।

ঠিক আছে। ওঠো দেবী। তুমি ডান দিকে বোসো আমি বাঁ দিকে বসব।

দেবী বলল, আমি ড্রাইভার সাহেবের পাশেও বসতে পারি। পেছনে আমি বসলে অসুবিধে হবে না আপনার?

এইচ. পি. এবার দৃঢ় গলাতে বললেন, না, হবে না। তুমি পেছনেই বোসো।

দেবী উঠে বসলে এইচ. পি. কুকুবাবুকে বললেন, কুকু প্লিজ নোট ডাউন মাই মোবাইল নাম্বার।

জী আঙ্কল, বলেই পকেট থেকে ছোট নোট বই বের করে নাম্বারটা নোট করে নিলেন কুকুবাবু আর নিজের একটা কার্ড দিয়ে বললেন, এতে আমার মোবাইল নাম্বার আছে। সকাল পাঁচটা থেকে ছটা, চার্জ রাখি, শুধু সেই সময়টুকু ছাড়া যে কোনও সময়েই করতে পারেন।

তারপর এইচ. পি.-কে বসিয়ে, গাড়ির দরজা বন্ধ করার আগে বললেন, আঙ্কল, শুনেছি, আপনি জঙ্গলে যাবেন। সেখানে এই গাড়িতে যদি সুবিধে না হয় তবে জিপ পাঠিয়ে দেব একটা। মাহিন্দ্রর 'বোলেরো' নিয়েছি দুটো। এসিও আছে। দারুণ গাড়ি। ওপেলটাও রাখবেন। ফোন করলেই পাঠিয়ে দেব। আরও কিছুর দরকার হলেও বলবেন, দ্বিধা করবেন না। আপনার কোনওরকম অসুবিধা হয়েছে জানলে বাবা আমার চাকরিটাই খেয়ে নেবেন।

এইচ. পি. বললেন, থ্যাঙ্ক ইউ।

দরজাতে হাত দিয়েই কুকু এবার দেবীকে জিজ্ঞেস করলেন, সারাসা জায়গাটা ঠিক কোথায়?

দেবী বলল, চান্দোয়া-টোরী থেকে লাতেহারের দিকের রাস্তাতে মাইল পনেরো গিয়ে বাঁদিকে একটা কাঁচা পথ ঢুকে গেছে। ওই পথেই সাত আট কিমি গেলে সারাসা। অতি ছোট্ট বস্তি। আসলে ওখানে একটা পাহাড়ি নালাও আছে, যার নাম সারাসা।

নদীর নামে গ্রামের নাম? আশ্চর্য তো।

এইচ. পি. বললেন।

নদীর নামেই গ্রামের নাম। গ্রামীণ ভারতবর্ষের প্রায় সব জায়গাতেই নদীর

নামেই গ্রামের নাম হয়। পাহাড়ের নামে ও গাছের নামেও নাম হয় দেশের কোথাও কোথাও।

দেবী বলল।

তারপর বলল, বস্তির নাম অবশ্য কম মানুষই জানেন। এতেই ছোট বস্তি। জঙ্গলে জঙ্গলে চাহাল-চুঙরু থেকে একটা কাঁচা জীপেবল্ রোড এসেছে সারাপাতে। বহু বছর আগে একটা কোলিয়ারি ছিল না কি। এবানডনড হয়ে গেছে। তাও আজ চক্লিশ বছর আগে, শুনেছি। আমার জন্মেরও আগে। ছিপাদোহর থেকেও একটা পথ এসেছে তবে পায়ে চলা। জীপও যায় না সে পথে।

তা হলে এবারে আমরা এগোই কুকু?

এইচ. পি. বললেন।

জী আঙ্কল। হ্যাপি জার্নি।

থ্যাঙ্ক ড্যু।

ড্রাইভার সানেকা মুণ্ডা গাড়ি স্টার্ট করল।

এইচ. পি. বললেন, ট্রেন মে বহতই সর্দি থা। এয়ার কন্ডিশনার ইকদম কমতি করকে রাখ না গাড়িকো।

জী স্যার।

বলল, সানেকা।

এখনও রাঁচি শহরের মধ্যেই আছে ওরা। শহর এখনও পুরো জাগে নি।

এইচ. পি. বললেন, আমি একবার নেতারহাটে এসেছিলাম বছর চক্লিশেক আগে। তারপরে আর আসি নি এদিকে। তখন মানুষজন অনেক কম ছিল। হাটিয়ার হেভি-এঞ্জিনীয়ারিং-এর কারখানা তখনও হয় নি সম্ভবত। ভারি ভাল লেগেছিল। এখন তো শুনি রাঁচি একটা ইন্ডাস্ট্রিয়াল শহর হয়ে গেছে।

দেবী চুপ করে রইল।

তুমি কিন্তু আমাকে গাইডের মতো সব দেখাতে দেখাতে নিয়ে যাবে দেবী। আবার কবে আসব এদিকে কে জানে। এ জীবনে কি আর আসা হবে!

দেবী তবুও চুপ করেই রইল।

কি হল? চুপ মেরে গেলে যে! কথা বলছ না যে!

কি কথা বলব বলুন স্যার। যখন কিছু দ্রষ্টব্য জায়গা আসবে তখন বলব আপনাকে।

তারপরে দু'জনেই নিজের নিজের ভাবনাতে বঁদ হয়ে জানালার বাইরে চেয়ে রইলেন। গাড়ি চলতে লাগল।

খুবই ভাল ড্রাইভার।

বলল, দেবী।

হ্যাঁ। গাড়ির ড্যাশবোর্ডে জলের গ্লাস রাখলেও জল একটুও চলকে পড়বে না এমনই সুন্দর চালাচ্ছে গাড়ি! শুধু গিয়ারেই গাড়ি চালাচ্ছে ব্রেক প্রায় ব্যবহারই করছে না, লক্ষ্য করেছ?

তারপর বলল, জাপানে যে বুলেট ট্রেন আছে তার কথা মনে পড়ে গেল।

দেড়শ মাইল গতিতে, ট্রেন যায় অথচ ডাইনিং রুমে তোমার চায়ের কাপ থেকে চা একটুও চলকাবে না।

আমি কি কখনও গাড়ি চালিয়েছি না রোজ গাড়ি চড়ি। আমি এসবের কি বুকি? জাপানেও তো যাই নি কখনও।

যেতে চাও? তুমি বললেই বন্দোবস্ত করে দেব। মারুতির কিছু কাজ আমি করি। জাপান অবশ্যই দেখা উচিত। দেখার মতো দেশ। গেলে সেপ্টেম্বরের শেষে যেও। তখন ওদের 'সাকুরা' ফেস্টিভ্যাল হয়। সাধুরা মানে চেরী ট্রী। চেরী গাছে ফুল আসে তখন। আর সেপ্টেম্বরেই হাওয়াইতে 'আলোহা' উইক হয়। আলোহা মানে, ওয়েলকাম। একটা প্যারেড হয় ওয়াইকিকিতে দেখবার মতো। জাপান থেকে সেখানে চলে যাবে।

জাপান থেকে হাওয়াইয়ান আইল্যান্ডস কত দূরে?

কি আর দূর। প্যাসিফিক ওসানে তো। জাপান হয়ে স্টেটস-এ আসতে পথে হনলুলু। মনে নেই? জাপানিরা তো জাপান থেকেই হনলুলুরই খুব কছে পাল হারবার-এ প্রথমে অতিক্রমিত বোমা ফেলে আমেরিকান ন্যাভাল বেস ধ্বংস করেছিল। তারপরেই না যুদ্ধে নামল আমেরিকা।

সত্যি। পৃথিবীর এদেশ থেকে ওদেশের কথা এমন করে বলছেন যেন বালিগঞ্জ থেকে টালিগঞ্জ যাওয়া। কত্ত জানেন আপনি। দেবী বলল।

এইচ. পি. বললেন। তুমি যা জানো তা তো আমি জানি না। এখন থেকে আমি শ্রোতা আর তুমি বক্তা। আমাকে সব দেখাতে দেখাতে নিয়ে চলো। আমি কিছুই মিস করতে চাই না কিন্তু। আসলে নিজের দেশই দেখি নি। লজ্জার কথা।

ঠিক আছে।

বলল, দেবী, অন্যমনস্ক গলাতে।

এইচ. পি. বুঝলেন যে মেয়েটি খুবই সেনসিটিভ। নইলে কাল ট্রেনের ক্যুপেতে সে এক রকম ছিল আর প্লাটফর্মে নেমেই অন্য রকম হয়ে গেল মোবাইল ফোনে তাঁর কথোপকথন শোনার পর থেকেই। নিজেকেই বকলেন মনে মনে। যাচ্ছ তো ঠিকই, থাকবেও সাত দিন, তবে শুধু শুধু মুডটা নষ্ট করতে গেলে কেন মেয়েটার। কত ভালবেসে আগ্রহ ভরে সে নিয়ে এসেছে এইচ. পি.-কে। ভারি আত্মসম্মানজ্ঞানী মেয়ে, মনে হয়। সে সইবে কেন অবহেলা? ওতো কিছু চাইতে আসে নি এইচ. পি.-র কাছ থেকে। সারা জীবন ঘাঘু মক্কেলদের চরিয়ে খেয়েছেন, কার কি ধান্দা তা ঠিকই বোঝেন। এ মেয়ে কোনও ধান্দা নিয়ে তাঁর কাছে আসে নি। আর আসে নি যে, তা জেনেই আরও ফাঁপরে পড়েছেন উনি। ধান্দাহীনতাই একটা ধান্দা কি না সে বিষয়ে নিঃসন্দেহ হতে পারছেন না কিছুতেই। আসলে ধান্দাবাজ মানুষ দেখে দেখে নিজের মনটাই বোধহয় বক্র হয়ে গেছে। সহজ কথা, সোজা কথা ভারতে পর্যন্ত পারেন না। এ একটা ট্রাজেডি। সারা পৃথিবীই তাঁর চোখে বেঁকা হয়ে গেছে।

গাড়িটা এখন ফাঁকাতে এসে পড়েছে। ডান দিকে কালো পাথরের স্তূপ, সবুজ গাছগাছালি বুক করে দাঁড়িয়ে আছে বৃষ্টিস্নাত লাল মাটির পটভূমিতে। ডান দিকে মস্ত বড় একটা আমবাগান।

দেবী বলল, দেখেছেন স্যার? আশ্রকুঞ্জ? শান্তিনিকেতনের আশ্রকুঞ্জর চেয়েও অনেক গুণ বড়।

আর ওই আশ্রকুঞ্জের পেছনে লাল পাথরের যে দুর্গ মতো দেখা যাচ্ছে ওটা কার দুর্গ?

এইচ. পি. জিজ্ঞেস করলেন।

ওটা দুর্গ নয়, রাজবাড়ি। ওই জায়গাটার নাম রাতু। রাতুর রাজার বাড়ি ওটা। আর দেখুন বাঁদিকে জলাটা। বিরাট নয়? শীতকালে এখানে অনেক রকম পরিযায়ী হাঁস আসে।

পরিযায়ী মানে?

মানে, মাইগ্রেটরি।

মাইগ্রেট করে আসে পাখি? কোথেকে?

কত দেশ থেকে আসে, ইয়োরোপের নানা দেশ থেকে আসে, রাশিয়া, সাইবেরিয়া। তবে এই জলাতে সামান্যই আসে।

আবার চলে যায় ফিরে?

যায়ই তো। গরম পড়লেই ফিরে যায়। তবে যেতে যেতেও এপ্রিলের মাঝামাঝি অবধি কোন কোন প্রজাতিকে দেখা যায়।

প্রজাতি মানে?

মানে স্পিসিস।

তুমি এই সব পাখিদের নাম জানো?

সবের নাম কি জানি? তবে কিছু কিছুদের জানি। সারাপ্রান্তে আমরা নদীতে একটা বাঁধ বেঁধেছি পঞ্চায়েতের সহযোগিতাতে। তাতে একটি জলাধার হয়েছে বেশ বড়। গত শীতে ওখানেও এসেছিল কিছু পাখি। শিকার করা তো একদম মানা। পাহারাও দিই আমরা। তাই মনে হয়, এ বছর আবার পাখি আসবে। মাছও ছেড়েছি গত বছরে। এ বছর শীতে দেখা যাবে মাছ কত বড় হল।

কি মাছ ছেড়েছ?

মেইনলি রুই, কাতলা, মিরগেল। তবে দে সাহেব কিছু তেলাপিয়াও ছেড়েছেন গেরস্থ-পোষা হিসেবে।

বাঃ।

কয়েকটি পরিযায়ী পাখির নাম বলো তো শুনি, চিনি কি না একটাকেও।

ম্যালার্ড, পোচার্ড, গাগনি, পিন টেইল, পোচার্ড, পিংক-হেডেড পোচার্ড, শোভেলার, স্পুন-বিলড, নাক্টা, বাহমিনি ডাকস, মানে চখা-চখি, নানা রকম টিলস, ছইসলিং টিল, গিজ নানারকম। এরা সবাই হাঁস। আরও কত আছে। যেমন কুট, মুরহেন ইত্যাদি।

আচ্ছা, কাম পাখি বলে কি কোনও পাখি আছে, জগু বলে, তার দেশের বিলে আছে। দারুণ সুন্দর নাকি দেখতে, লাল ঠোঁট আর ময়ূরের মতো গায়ের রং, বড় বড় পা। সত্যি?

এইচ. পি. বললেন।

ঠাঁর দেশ কোথায়?

বহরমপুরে।

হ্যাঁ বহরমপুরে তো অনেকই বড় বড় বিল আছে। থাকতে তো পারেই। কাম পাখির ইংরেজি নামই তো মুরহেন।

আর গিজ মানে রাজহাঁস? আসে?

হ্যাঁ। তবে সারাদ্বায়ে আসে না।

সরস্বতী ঠাকুরের রাজহাঁসের মতো?

এইচ. পি. রীতিমত উত্তেজিত হয়ে উঠলেন। উনিও জানেন কম নয়, ইন্ডিয়ান ল রিপোর্টস, ইনকাম ট্যাক্স রিপোর্টস, সুপ্রিম কোর্ট রিপোর্টস, সেলস ট্যাক্স রিপোর্টস। আইনে আর রায়ে ঠাঁর মগজ খচখচ করে। কিন্তু এ যে জীবনের খবর, অন্য জগতের খবর। আশ্চর্য! বড়ই অশিক্ষিত তিনি। ওই অতটুকু মেয়েটার কাছেও যে ঠাঁর এত কিছু শেখার থাকতে পারে তা ঘণাক্ষরেও ভাবেন নি উনি।

হ্যাঁ। সে রকমও আসে। ওইরকম বড় রাজহাঁস আসে অস্ট্রেলিয়া আর সাইবেরিয়া থেকে। তবে ওসব বড় হাঁস বড় হুদ বা নদী ছড়া নামে না। অস্ট্রেলিয়া থেকে অমন বড় কালোরঙা রাজহাঁসও আসে। চিড়িয়াখানায় দেখেন নি?

চিড়িয়াখানা! চিড়িয়াখানাতে বড়রা যায় না কি? শেষ গেছি বড় মামার সঙ্গে, যখন স্কুলে পড়ি। তা, বছর পঞ্চাশেক আগে হবে।

আপনি চিলিকা লেক-এ গেছেন?

দেবী বলল।

নাঃ। গোপালপুর অন সি-তে ওবেরয়ের পাম বিচ হোটেলে তিন দিনের জন্যে গেছিলাম একটা আইনের সেমিনারে একবার। হনেকেই উইক-এন্ডে গেছিলেন চিলিকাতে বটে। আমি যাই নি। বারান্দায় বসে বিয়ার খেয়েছিলাম আর হ্যারল্ড রবিনস্ পড়েছিলাম।

ও।

তুমি হ্যারল্ড রবিনস পড়েছ?

না। আমাদের নিজস্ব বিষয়ে এত পড়াশুনো করতে হয় যে অন্য কিছু পড়ার অবকাশই হয় না। আর পড়লেও ক্লাসিকস্ পড়ি বাংলা এবং ইংরেজি।

তারপরে বলল, দেবী, কিছুক্ষণ পরেই আমরা মান্দার বলে একটা জায়গা পেরোব। সেখানে হাট বসে আজকে। গীর্জা আছে, মিশনারিদের হাসপাতাল আছে।

এই মিশনারীরাও কি জার্মান?

না, জার্মান যে নন সেটা জানি তবে ইংলিশও নন। সম্ভবত বেলজিয়ামের কোনও মিশন। ঠিক জানি না।

মান্দারের পরে আমরা পৌছব বিজুপাড়াতে। রাঁচি থেকে ঠিক কুড়ি মাইল। সেখান থেকে ডান দিকে রাস্তা বেরিয়ে গেছে খিলারীর সিমেন্ট ফ্যাক্টরির। আর বিজুপাড়া থেকে কিছু দূর গিয়ে চামা নামের একটি বস্তি হয়ে বাঁদিকে গেলেই ম্যাকলাস্কিগঞ্জ। বিজুপাড়া থেকে পনেরো মাইল। নাম শোনেন নি?

না তো। ম্যাকলাস্কি কে ছিলেন?

তা জানি না, তবে জানি যে, অ্যাংলো-ইন্ডিয়ানদের খুব সুন্দর কলোনী ছিল মস্ত এলাকা জুড়ে সেখানে, পাহাড়-জঙ্গলের মধ্যে মধ্যে। স্কটসম্যান ম্যাকলাস্কি একটা সোসাইটি গড়ে সেই কলোনির পত্তন করেছিলেন তাই তাঁর নামে নাম। খুবই স্বাস্থ্যকর জায়গা শুনেছি আর ভারি সুন্দর নিসর্গ দৃশ্য। ক্লাব ছিল, চার্চ ছিল। তবে এখন আর সাদা অ্যাংলো-ইন্ডিয়ানরা নেই-ই বলতে গেলে, সব অস্ট্রেলিয়াতে চলে গেছে।

এত কাছ দিয়ে যাও আসো আর যাও নি একবারও। এইচ. পি. বললেন।

হয় নি যাওয়া। কাছ গেলেই কি যাওয়া হয় সবসময়ে? কি পথে, কি জীবনে। কথাটার গভীরতায় চমকে উঠলেন এইচ. পি.।

দেবী বলল, সারাদ্বায়ে কাজে আসি। রাঁচিতে নেমে রাঁচি শহরের রাত্তি রোড বাসস্ট্যান্ড থেকে ডালটনগঞ্জের বাসে চড়ে এসে সারাদ্বার মোড়ে নেমে যাই। কেউ না কেউ থাকে মোড়ে, আমার অপেক্ষায়। তার সঙ্গে হেঁটে চলে যাই। অনেক সময় সাইকেলেও যাই। অনেক সময় কেউই আসতে পারে না কাজ বেশি থাকলে, তখন একাই হেঁটে যাই।

জঙ্গলে অতখানি পথ একা হেঁটে যেতে ভয় করে না?

জঙ্গলে একা হাঁটার মতো সুখ আর কিছু নেই। আসলে একা তো আর থাকি না - কত পাখি, প্রজাপতি, ওরাও তো সঙ্গে থাকেই। তাছাড়া ভয়, শহরে যতখানি জঙ্গলে তার ছিঁটেফোঁটাও নেই। আমরা জঙ্গলকে চিনি না, ভালবাসি না, তাই মনের মধ্যে নানা মিথো ভয় পুষে রেখেছি।

তুমি সাইকেল চালাতো জানো?

অবাক হয়ে বললেন এইচ. পি.।

হেসে ফেলল, দেবী। বলল, সাইকেল চালানো আর কঠিন কাজ কি? আপনি জানেন না?

নাঃ। তবে গত দশ বছর আগে অবধিও জিম-এর সাইকেল চালিয়েছি। সে সাইকেল তো আর এগোয় না, তা চড়তে ব্যালান্সেরও দরকার হয় না।

তা ঠিক।

মান্দার পেরিয়ে যাওয়ার পরে কিছু দূর গিয়েই পথটা একটা খুব খারাপ বাঁক নিয়েছে ডান দিকে।

অত্যন্ত বাজে বেড তো!

এইচ. পি. স্বগতোক্তি করলেন।

হ্যাঁ। এখানে বহু অ্যাকসিডেন্টও হয়েছে। কলকাতার এক সময়ের খুবই নামী বাঙালি চার্টার্ড অ্যাকাউন্ট্যান্ট ফার্ম পি কে মিত্র অ্যান্ড কোম্পানির নাম শুনেছেন? জি বাসু, রায় অ্যান্ড রায়ের সমসাময়িক?

হ্যাঁ। শুনেছি বৈকি। তখন তো মাড়োয়ারি গুজরাটি প্রফেশনালস কলকাতায় ছিলই না বলতে গেলে। প্রফেশনাল মানেই ছিল বাঙালি।

সেই ফার্মের পার্টনার সি পি মুখার্জির ছেলে এই বাঁকে মারাত্মক অ্যাকসিডেন্ট করেছিলেন। তবে প্রাণে বেঁচে যান।

কবে?

সেও বহুদিন আগে। আমি দে সাহেবের কাছে শুনেছি।

এই দে সাহেব মানুষটি সম্বন্ধে আরও কিছু জানা দরকার।

জানবেন। যেমন সুন্দর চেহারা তেমন প্লিজিং পার্সোনালিটি। আমেরিকাতেও প্রফেসারি করে এসেছেন। ভার্সিটিইল মানুষ। ওর স্ত্রী সুমিতাদি শাস্তিনিকেতনের মেয়ে। তিনিও চমৎকার। সুন্দরী, ভাল গানও গান। আলাপ হলেই দেখবেন। ওদের সঙ্গে আলাপ হলে আমাকে ভুলে যাবেন।

আমি যাতে তোমাকে ভুলে যাই-ই সে; জানো তুমি এত উদগ্রীব কেন? তুমি কি চাও যে, আমি ভুলে যাই তোমাকে, ভাল করে চিনতে না চিনতেই।

আমার কোন চাওয়া নেই।

খারাপ কথা। এই বয়সেই এমন হলে তোমাতে আর সন্ন্যাসিনীতে তফাত কি রইল?

সন্ন্যাসিনী হতেই বা দোষ কোথায়?

না, দোষ নেই। তবে কোন অভিমানে এই বয়সেই বিবাগী হবে? আমিই কি তোমাকে বিবাগী করলাম? আমি মানুষ হিসেবে কি এতই রিপালসিভ?

হেসে ফেলল, দেবী। বলল, তাই কি বললাম?

কিংখক কিভাবে আসবে পাটনা থেকে?

এইচ. পি. প্রসঙ্গান্তরে গিয়ে বললেন।

পাটনা থেকে বাসে বা ট্রেনে আসবে রাঁচি। রাঁচি থেকে বাসে আসবে। পাটনা থেকে ডান্টনগঞ্জের বাসও থাকতে পারে সরাসরি। সেট; গয়া হয়ে এলে জৌরী চাতরা হয়ে চান্দেয়া-টৌরী হয়ে ডালটনগঞ্জের দিকে আসতে পারে। জানি না, আমি ঠিক। কি করবে না করবে তা ও এবং ওরই জানে। একবার শুনছিলাম দুজনেই আসবে। আবার কেউই আসতে নাও পারে। ওদের মতির স্থির নেই।

তোমার ব্যাপারে তো দিব্যি একমত হয়েছে।

হয়েছিল। কতদিন সম্পর্ক ট্যাকে দেখি। লিভ টুগেদারের যা সুবিধে তাই অসুবিধে। চলে যাবার জন্যে দরজা খোলা থাকে বলেই সবসময় পা সুড়সুড় করে চলে যাওয়ার জন্য।

তারপরই বলল, ওই যে সামনে বিজুপাড়া। আপনার খিদে পেয়ে থাকলে এখানেও খেতে পারেন। নইলে কুকতে গিয়েও খাওয়া যেতে পারে। বাসে এলে, সেখানেই খাই। যেমন আপনার ইচ্ছা।

এখন টু আর্লি হয়ে যাবে। তবে সকাল থেকে বেড টিও খাওয়া হয় নি, এক কাপ করে চা খাওয়া যেতে পারে। ড্রাইভারেরও খাওয়া দরকার। তার ঘুম পেয়ে গেলে মুশকিল।

বলেই, বললেন, সানেকা আগে জারা রোকনা। ঔর উতারকে আচ্ছা সে চায়ে বানোয়ানা। একমে বেগর চিনি। তুম ভি পি লেনা, কুছ। খানা হ্যায় তো খা ভি লেনা।

নেহি স্যার। অ্রিফ চায়েই পীয়েগা। ম্যায় লা রহা হঁ আপলোঁগোকি চায়ে।

একটু পরই সানেকাকে ভাঁড়-এ করে দু'ভাঁড় চা নিয়ে আসতে দেখা গেল।
এইচ. পি. বাঁদিকের দরজাটা খুলে দিয়েছিলেন।

দেবী বলল, এই এসি গাড়িগুলো শহরে ভাল। আওয়াজ ও পল্যাশন এবং হিউমিডিটির হাত থেকে বাঁচা যায় কিন্তু বাইরে এলে প্রকৃতির সঙ্গে কোনও সম্পর্কই থাকে না। তাই না?

ঠিক তাই। তাই তো খুলে দিলাম। তবে কাঁচ নামানো থাকলে আবার চুলগুলো ছটোপাটি করে চোখে-মুখে হাওয়ার ঝাপটা লাগে, ধুলো-বালিও ঢোকে। গরম তো আছেই। ঠাণ্ডার দিনেও ঠাণ্ডা তো থাকে। চা খেয়ে কাঁচ নামিয়েই যেতে বলব। তারপর বেলা বাড়লে গরম লাগলে তখন চালানো যাবে আবার। কি বল?

আমি তো বাসে করেই আসি। আমার কিসের অসুবিধা।

একি! ভাঁড়ের চা। আহ! সেই ছেলেবেলাতে খেয়েছিলাম। রেলস্টেশনে স্টেশনে “চায়ে গরম”, “চায়ে গরম” করে চা নিয়ে ফেরি করত চাওয়াল। আহা। বড় নস্টালজিক করে দিলে আমাকে দেবী। ভাগ্যিস তোমার সঙ্গে এসেছিলাম।

চায়ে চুমুক দিয়ে বললেন, চিনি দিয়েই খাই? কি বল? ডাক্তারেরা তো কত বারণই করেন। সানেকা, ইক চামচ শর্কর লাও তো। চাম্‌চভি লেতে আনা।

সানেকা চিনি নিয়ে এলে চিনি গুলিয়ে চা-টা খুব রেলিশ করে খেলেন এইচ. পি.।

দেবী অবাক চোখে তাঁর দিকে চেয়েছিল। ভাবছিল মানুষটা বড় হলেও একেবারে শিশু আছেন কোন কোন ব্যাপারে। সত্যি একজন মানুষের মধ্যে যে কতজন মানুষ থাকেন!

চা খাওয়া হলে, এইচ. পি. সানেকাকে পার্স খুলে একটি পাঁচশ টাকার নোট দিয়ে বললেন, তোমার কাছে রাখ। পেট্রলও তো কিনতে হবে। যখন যা লাগে। তোমার বিড়ি সিগারেট।

সানেকা লম্বা কুর্নিশ করে বলল, নেহি হুজুর। পয়সা তো কুকুবাবু দেহি দিয়া। আপকি কোঈভি ফিক্কর নেহি কর না চাহিয়ে। হামারা নোকরী চলা যায়েগা।

এতো মহা ফ্যাসাদ। স্বগতোক্তি করলেন এইচ. পি.। তারপর ওটি ফেরত নিয়ে একটি একশো টাকার নোট দিলেন। বললেন, লো, রাখখো।

গাড়ি আবার চলল। মিষ্টি হাওয়া আসছে। আকাশ মেঘলা থাকলেও গুমোট নেই। এইচ. পি. বললেন, এর পরে কী কী জায়গা পাবো আমরা পথে?

এরপরে পাব সঁস। সঁস-এ এ অঞ্চলের মস্ত বড় হাট বসে। চান্দোয়া থেকে, লাতেহার থেকে, ডাল্টনগঞ্জ থেকে নানারকম সবজি, মোরগা-আঙা, পাঁঠা সব আসে এই হাটে। আজ মান্দারের হাট। সঁস-এ আজ হাট নেই। আমাদের কোন পিকনিক টিকনিক হলে সঁস থেকে পাঁঠা কিনে নিয়ে যাওয়া হয়। অবশ্য যদি ট্রান্সপোর্ট অ্যারেঞ্জড হয়।

তারপর?

তারপর পৌছব কুরু। কুরুতে নাস্তা করে আমরা ডান দিকে ঘুরব।

আর সোজা গেলে?

সোজা গেলে লোহারডাগা। আর লোহারডাগা থেকে নেতারহাট ঠিক পঞ্চাশ মাইল, আপনি যেখানে গেছিলেন।

লোহারডাগা কত মাইল রাঁচি থেকে?

ঠিক পঞ্চাশ মাইল। সারাস্রা থেকে জঙ্গলে জঙ্গলে একটা পথ গেছে বেতলা ন্যাশনাল পার্ক-এর মধ্যে দিয়ে—সেটা সোজা গিয়ে উঠেছে লোহারডাগা—নেতারহাটের পথের বানারীতে।

বাবাঃ। তুমি দেখছি এসব জায়গা হাতের রেখার মতো জানো।

গত চার বছর মাসে তিন-চারবার করে আসছি যে।

তারপর কুরু থেকে?

কুরু থেকে চান্দোয়া-টোড়ি এগারো মাইল। কিমিতে একটু বেশি হবে।

চান্দোয়া-টোড়ি নাম কেন?

চান্দোয়ার ঘাটে উঠব আমরা একটু পরে। সুন্দর জঙ্গলে পাহাড়ি ঘাট রাস্তা। ঘুরে ঘুরে পথ উঠেছে। এই পথেই ঘাট শেষ হওয়ার আগে ডান দিকে একটি বাংলা আছে নাম, আমঝারিয়া। অনেকটা নেতার হাটের পালামৌ ডিভিশনের বাংলোব মতো।

বলেই বলল, আপনি মধ্যপ্রদেশের মাণ্ডুতে গেছেন কখনও?

মাণ্ডু? সেটা আবার কোথায়?

মধ্যপ্রদেশের ধার জেলাতে। মাণ্ডু একটি দুর্গ। দেখার মতো। সত্যি! আমাদের দেশে গর্ব করার মতো কত কিই যে ছিল। দেখলে অবাক হয়ে যেতে হয়।

কাদের তৈরি?

তৈরি তো করেছিলেন রাজা ভোজ দশম শতকে। তারপর একাদশ শতকে পারমার রাজারা দখল নেয়। ঘোরি এবং খিলজি বংশের মালিকানাতে যায় চতুর্দশ শতকে। সেই সময়েই রাজধানী মাণ্ডুর রবরবা হয়। জাহাঙ্গির এর নাম দেন শাদিয়াবাদ বা আনন্দনগরী। মারাঠারা মুঘলদের হঠিয়ে দেয় অষ্টাদশ শতকে। তখনই মাণ্ডু তার গরিমা হারায়। কারণ, রাজধানী সরিয়ে নিয়ে যায় তারা সমতলে। ধার-এ। এখন ধার মধ্যপ্রদেশের একটি জেলা।

তারপর বলল, আপনি এ এল ব্যাশামের “দ্য ওয়াল্ডার দ্যাট ওজ ইন্ডিয়া” বইটা পড়েছেন?

না তো।

এইচ. পি. বললেন।

কী আর পড়েছি বলা? শুধু তো অকাজই করেছি। কাজের কাজ আর কি করলাম। এতগুলো বসন্ত পার করে দিলাম। অথচ। নিজের ওপরে ঘেমা হয়।

তারপর বললেন, হঠাৎ মাণ্ডুর কথা উঠল কেন?

না, মাণ্ডুর এক প্রান্তে রূপমতী মেহাল আছে। নবাব বাজবাহাদুর আর গায়িকা রূপমতীর প্রেমের উপাখ্যান কিংবদন্তি হয়ে আছে। সেই মেহালটি দুর্গর শেষ প্রান্তে এবং সেখান থেকে পাহাড় খাড়া নিচে নেমে গেছে প্রায় দু’হাজার ফিট নিচে, নিম্নারের উপত্যকায়, যেখান দিয়ে নর্মদা বয়ে গেছে। আমঝারিয়া বাংলোর

সামনেটাও মাথুর মতো অতখানি না হলেও প্রায় হাজার ফিট খাড়া নেমে গেছে নিচে পাহাড় জঙ্গলাবৃত উপত্যকায়। সেই বনাভূমি ধরে সোজা হেঁটে গেলে চাতরা আর সোজা গিয়ে ডান দিকে গেলে হাজারিবাগ। অপূর্ব দৃশ্য। তবে এখন গাছ কেটে তো প্রায় শেষ করে দিয়েছে। দে সাহেবের কাছে শুনেছি আগে ওই উপত্যকার দৃশ্য দেখার মতো ছিল, বিশেষ করে বসন্তে ও বসন্ত শেষে।

দেখাবে না আমাকে?

নিশ্চয়ই দেখাব। তবে বর্ষার রূপ দেখতে পাবেন। বসন্ত তো কবেই চলে গেছে।

একটু চুপ করে থেকে এইচ. পি. বললেন, তা ঠিক। বসন্ত অনেক দিন হল চলে গেছে। 'কখন বসন্ত গেল, এবার হলো না গান'। হয়তো আর কখনওই হবে না।

কিছুক্ষণ চুপ করে থেকে বললেন, তারপর কোথায় যাব আমরা?

তারপর চান্দোয়ার ঘাট থেকে নেমে টোড়ি বস্তিতে গিয়ে বাঁ দিকের পথে ঘুরে যাব আমরা লাতেহার ডাল্টনগঞ্জের দিকে। সাতাল মাইল পথ। বেতলার পথ চলে গেছে ডাল্টনগঞ্জে পৌঁছানোর সাত কিমি আগে, বাঁদিকে। তবে আমরা ওই পথে টোড়ি থেকে মাইল পনেরো গিয়ে বাঁদিকে কাঁচা পথে ঢুকে যাব।

কটা নাগাদ পৌঁছব?

নাঙ্গা করতে মিনিট পনেরো কুড়ি লাগবে। তা ধরে, ধরুন এই দশটা সাড়ে দশটাতে, খুব বেশি হলে এগারোটাতে। দেখতে দেখতে, থামতে থামতে যাচ্ছি তো, তাই এত সময় লাগবে।

বাঃ।

সানেকা বলল, মেমসাহেবকো তো সবেহি মালুম। মুঝে ভি ইতনি সারে মালুম নেহি হ্যায়।

হাসল, দেবী।

এইচ. পি.-ও হাসলেন, অ্যাডমিরেশনের হাসি। তারপর পকেট থেকে মোবাইল ফোনটা বের করে নাম্বার ডায়াল করলেন। কে? কার্তিক? শোনো, তোমার স্ত্রীকে বলেছিলুম যে কালই ফিরে যেতে পারি। কিন্তু যাচ্ছি না। ছুটি খাও। তবে সন্কেবেলা চেস্বারটা অ্যাটেন্ড কোরো। ফোন এবং ফ্যাক্স-এর মেসেজগুলো নোট করে রাখতে বোলো ডালিয়াকে। ঠিক আছে? ছাড়ছি। তারপর আবার ডায়াল করলেন। মে আই স্পিক টু কুকু? ও কুকু। কুকু প্লিজ গेट মী ট্যু রিটার্ন টিকেটস্ বাই হাটিয়া হাওড়া অন নেস্ট স্যাটারডে। ইয়েস, আই সাপোজ উ নো মাই নেম অ্যান্ড এজ। দ্যা আদার শুড বি ইন দেবী, ডি ই বি আই ভটচার্জিস নেম। এজ? ইটস্ নট নাইস টু আস্ক আ লেডি হার এজ। বাট পুট থাটি। শী শুড বী অফ রেশমীজ এজ। গेट আ ক্যুপে প্লিজ। থ্যাঙ্কস্।

আমি কিন্তু আপনার সঙ্গে ফিরতে নাও পারি। তা'ছাড়া দু'জন যদি কাল আসে এখানে।

তারা অর্ডিনারী থ্রী-টায়ারে যাবে আর আমি আপনার সঙ্গে ফারস্ট ক্লাস এসিতে যাব এটা কি ভাল হবে?

সব কিছুই যে ভাল হতে হবে তার কি মানে আছে? তোমার ইচ্ছে হলে যাপে নইলে টিকিট নষ্ট হবে। নইলে বলো, ওদের জন্যেও ফার্স্ট ক্লাস এসির টিকিট কাটতে বলি—ফোর বার্থ কম্পার্টমেন্ট—গল্প করতে করতে যাওয়া যাবে। বলেই, পকেট থেকে ফোনটা আবার বের করলেন।

দেবী বলল, না না ওরা অত দামি ক্লাসে যাবে না।

যাবে না?

তারপর বললেন, ওরা যাক আর নাই-ই যাক। তুমি আমার সঙ্গে যাবে।

দেবী এইচ. পি.-র দিকে পূর্ণ দৃষ্টিতে তাকাল। এইচ. পি.-ও ওর দিকে তাকালেন।

দু'জনেই কি বুঝলেন ও বুঝল তা অন্যে বুঝল বা বুঝল না। কিন্তু দু'জনের মনেই নানা ভাবনার ঝড় উঠল। দেবী ভাবল, মনের ব্যাপারে মানুষটি অশক্ত নন। শরীরে তো নিশ্চয়ই নন। আফটার অল পুরনো দিনের পুরুষ তো, আস্তে আস্তে জোর খাটানো শুরু করেছেন। আসলে সব পুরুষই সমান। বসতে দিলে শুতে চায়।

এইচ. পি. ভাবলেন, দু'জনের সঙ্গে সহবাস করো বলেই তো আর খেঁটায়-বাঁধা গরুর মতো জরু নও তুমি। জীবনের সাঁঝবেলাতে এসে আমিও যে সাহসী হতে পারি তা প্রমাণ করব। এক জন পুরুষের মধ্যে মেয়েরা কি চায় তা ঠিক জানেন না এইচ. পি.। এবারে জানবেন। আগল যখন খুলেইছেন, নিশি যখন ডেকেইছে, তখন কোন দিকে সে তাঁকে নিয়ে যায় দেখাই যাক না। তাঁব শরীর মনের মধ্যে অনেক শুকিয়ে যাওয়া চাওয়ার উৎসমুখগুলি যেন একে একে খুলে যাচ্ছে।

জীবনের এই সাঁঝবেলাতে পৌঁছে এ কি বিপদে পড়লেন তিনি!

সকালবেলা ঘুম ভাঙল হাজারো পাখির ডাকে। পায়ের কাছে ও গায়ের কাছে জানালা দিয়ে ঝকঝকে রোদ এসে পড়েছে। কে বলবে অগাস্টের শেষ। রোদের রঙ, আকাশের রঙ এবং মিস্তি ঠাণ্ডাতে মনে হচ্ছে যেন শরতেরই সকাল।

চোখ মেলে প্রথমে কয়েক সেকেন্ড বুঝতে পারেন নি এই এইচ. পি. তিনি কোথায় আছেন। কলকাতাতে মাঝ রাতে উঠে এয়ার কন্ডিশনারটা বন্ধ করে দেন। ঘরের পর্দা সব টানাই থাকে। ভোরে উঠে একবার বাথরুমে গিয়ে মুখে ঘাড়ে জল দিয়ে আসেন তারপর আবার শুয়ে পড়েন। একটু আলসেমি করেন। দ্বিতীয় বার শোওয়ার আগে ঘরের দরজার লকটাকে আনলক করেন। পাঁচ-দশ মিনিট শুয়ে থেকে বালিশের পাশে রাখা রিমোট কন্ট্রোল বেলের সুইচটা টেপেন। তাঁর খাস-বেয়ারা জগু নিঃশব্দ পায়ে এসে ঢোকে পাঁচখানি খবরের কাগজ নিয়ে। মশারী খোলে এবং তোলে; এয়ারকন্ডিশনার ঘরে শুলেও তিনি মশারী টাঙিয়েই শোন। চিরদিনের অভ্যাস। জানালাগুলির পর্দা সরিয়ে জানালাও খুলে দেয় সে, তারপর পশ্চিমের জানালার সামনে রাখা রুঁকিং-চেয়ারের পাশের উঁচু তেপায়াতে কাগজগুলি রেখে চা আনতে যায়। খবরের কাগজ তিনি পড়েন না। প্রথম পাতার হেডলাইনগুলি দেখেন শুধু টাইমস অফ ইন্ডিয়ার। পরে ওগুলো চেম্বারে চলে যায়, মক্কেল এবং জুনিয়রেরা পড়েন।

দু'মুঠো মুড়ি খান একটা বড় এককোয়া রসুন দিয়ে, তারপর বিস্ক ফার্মের দুটি মিস্তি এবং দুটি নোনতা বিস্কিট দিয়ে দু'কাপ চা। তারপরে শরীরের রক্ত চলাচল শুরু হয়।

দে'জ মেডিকেলের ম্যানেজিং ডিরেক্টর ভূপেন্দ্রনাথ দে মশায় খুব স্নেহ করতেন এইচ. পি.-কে, শুধু উকিল হিসেবেই নয়, এক বিশেষ চোখে দেখতেন তিনি হরপ্রসাদকে। উনি বলতেন ঘুম মানে অর্ধ-মৃত্যু। ঘুম ভেঙে চা খেলে তবেই জীবন ফিরতে থাকে তোমার মধ্যে। আরেকটা কথা বলতেন যা খুবই মানেন এইচ. পি.। বলতেন দ্যাখো, আমরা ওষুধ তৈরি করার সময়ে যেমন লিখে দিই প্যাকের ওপরে ডেট অফ ম্যানুফ্যাকচারিং আর ডেট অফ এক্সপায়ারি, আমাদের যিনি বানিয়েছেন তিনিও তেমনই লিখে রেখেছেন আমাদের কপালে অদৃশ্য কালিতে ডেট অফ এক্সপায়ারি। যেদিন যেতে হবে সেদিন হবেই। সেদিন যে কোন দিন বা কোথায় তা আগে থেকে জানাও যাবে না আর তা নিয়ে ট্যা-ফো করাও চলবে না।

মনে পড়ে গেল এইচ. পি.-র যে ভূপেনবাবু যেদিন মারা যান বসন্তে সেদিন এইচ. পি.-ও বসন্তেই ছিলেন। বসন্তে হাইকোর্টে দুটো ম্যাটার ছিল। তাজমহল হোটেলের ওল্ড উয়িং-এ উনি উঠেছিলেন, যেমন চিরদিন ওঠেন, কিন্তু এইচ. পি.

জানতেন না যে ভূপেনবাবুও সেদিন সেখানেই আছেন। অনেক সময় লবিতে তাঁর সঙ্গে বা তাঁর পুত্র গৌতমের সঙ্গে দেখা হয়ে গেছে কিন্তু সেবারে হয় নি। রাতে নাকি পেটে অসহ্য যন্ত্রণা হয় তারপর ডেট অফ এক্সপায়ারিতে তিনি এক্সপায়ার করে যান। তাঁর মৃত্যু সংবাদ পরদিন বিকেলের ফ্লাইটে কলকাতাতে পৌঁছে তারপরই পান এইচ. পি.। ভূপেনবাবুও জানতেন না যে উনিও ঐদিন ওখানেই আছেন।

সাতসকালে মৃত্যুর কথা কেন মনে এলো জানেন না। প্রৌঢ়ত্বের শেষে এবং বার্ষিক্যর চৌকাঠে তিনি অবশ্যই পৌঁছেছেন এসে কিন্তু মরার সময় তো তাঁর আদৌ হয় নি। তবু এই এক আকাশ রোদের মধ্যে এই মৃত্যু চিন্তা কেন?

দু'কাপ চা না খেলে তিনি “নট-নড়ন-চড়ন-নট কিচ্ছু” হয়ে থাকেন। ল্যাজে-গোবরে। কিন্তু কে এনে দেবে তাঁকে এখন চা? কাল রাতেই বুঝতে পেরেছিলেন যে অ্যাডভেঞ্চার করতে এসে ভাল করেন নি। কষ্ট করার ক্ষমতা তাঁর আর নেই। আরামের মধ্যে তিনি নির্বাসিত হয়ে গেছেন চিরজীবনের মতো। তাঁর আর মুক্তির উপায় নেই।

কাল রাতের ডিনার ছিল মোটা মোটা আটার রুটি আর আলু ভাজা। কাল দুপুরে খেয়েছিলেন মোটা চালের ভাত, অড়হরের ডাল আর বেগুন ভাজা। খেতে কিন্তু খারাপ লাগে নি। কিন্তু সবচেয়ে যেটা খারাপ লেগেছিল সেটা হচ্ছে বিকেলের চা! মোটা, আখফাটা কাচের গ্লাসে খুব দুধ আর চিনি দেওয়া গুঁড়ো চা। কাঠের আঙনের গন্ধ তাতে। গেলা যায় না। আবার সেই চা খেতে হবে ভাবতেই ভয় করছিল এইচ. পি.-র।

ছেলোটির নাম যেন কি? ভিণ্ডু? হ্যাঁ ভিণ্ডুইতো। ভিণ্ডু বলে ডাকলেই সে এসে দাঁড়াবে, বলেছিল দেবী। বলেছিল, এইচ. পি. যতদিন আছেন ভিণ্ডুকে অন্য সব দায়িত্ব দিয়ে ছুটি দেওয়া হয়েছে, শুধুই এইচ. পি.-র ডিউটি করবে সে। খাটের ওপরে উঠে বসে ভাবলেন, ভিণ্ডু বলে ডাকেন। ঠিক সেই সময়ে বাইরে থেকে দেবীর গলা ভেসে এল : ঔর জারা গরম পানি বৈঠাও। ম্যায় ঔর এক গ্লাস পিয়েগা ঔর সাবকি লিয়েভি বানানা তো পড়ে গা।

জী দিদি।

ভিণ্ডু বলল।

মাটির বাড়ি একটা। খাপরার চাল। মনে হয় না বেশিদিন বানানো হয়েছে। বাড়ির চারদিকে চারটি বারোমেসে জবার বড় গাছ। তাতে নীল, লাল, সাদা আর কালচেটে জবা ফুটেছে। এই জবা গাছ তাঁর রাজপুরের বাগানবাড়িতে আছে বলে তিনি চেনেন। চাঁর গাছের নিচে। গাছটার নাম গতকাল বিকেলেই ইন্দ্রজিৎবাবু বলেছিলেন এইচ. পি.-কে। বিরাট গাছ। ফলও ফলে। মানুষে খায়ও সে ফল।

দুটি ঘর পাশাপাশি। সামনে ছ'ফিট গভীর বারান্দা — লম্বাতে আঠারো ফিট হবে। তাতে কয়েকটি বেতের ও বাঁশের মোড়া রাখা আছে। একটি ঘরে পাশাপাশি ঠাসাঠাসি করে চৌপাইতে শুয়েছিল রামধানীয়া, নাগেশ্বর আর ভিণ্ডু। যে রান্না করে সেই ভরত শোয় রান্নাঘরেই। তিন দিন আগেই নাকি এক ভাল্লুক এসেছিল

রাতে তার সঙ্গে ভাব করতে। রামধানীয়ারা ঠাট্টা করছিল ওকে, বলেছিল ভান্নুকি নিশ্চয়ই, নইলে অবিবাহিত ভরতের খোঁজ করতে বর্ষা রাতে কেন আসবে?

হঠাৎ নিচু গলাতে গান ধরল দেবী। কি গান? মনে হয় ব্রহ্মসঙ্গীত। শোনেন নি আগে।

“তঁারে দূর জানি ভ্রম, সংসার সঙ্কটে
আছে বিভূ তোমা হতে তোমারো নিকটে
তুমি কেন নিরন্তর থাকো তা হতে অন্তর
ভাব সেই পরাৎপর নিত্য অকপটে
ভ্রম, সংসার সঙ্কটে।”

চমৎকার গলা দেবীর। আর আশ্চর্য সুন্দর ভাবও আছে গলাতে। আছে ঈশ্বর-প্রেম, সমর্পণ-তন্ময়তা। ওইটুকু বয়সের মেয়ের মধ্যে এমনটি আসা করারই নয়।

এইচ. পি. বাইরে এলেন।

দেবী ওই ডেরার পাশেই গাছতলাতে বড় কোনও গাছের একটা গুঁড়ি ফেলা ছিল তার ওপরে বসেছিল। সেটাই চেয়ারের মতো ব্যবহার করে সবাই, কালই দেখেছিলেন। গুঁড়িটা এতখানি লম্বা যে জনা পনেরো কুড়ি মানুষ তার ওপরে বসতে পারেন পাশাপাশি।

এইচ. পি.-কে দেখে দেবী উঠে দাঁড়াল। রাতে সালায়ার কামিজ পরেই শুয়েছিল। এখন একটা কালো জিন্স আর হলুদ গেঞ্জি পরেছে। ভারি সুন্দর দেখাচ্ছে। আসলে চোখ যাকে একবার সুন্দর দেখে, তাকে সব বেশেই, সব অবস্থাতেই সুন্দর দেখে বোধহয়। সেই চোখটা যখন মরে যায় বা নড়ে যায় তখন আর একটুও সৌন্দর্য খুঁজে পাওয়া যায় না যাকে দেখা যায় তাঁর মধ্যে। দেবী ঠিক কতখানি সুন্দর বা আদৌ সুন্দর কি না, ঠিক জানেন না এইচ. পি.। প্রস্ফুটিত পূর্ণ যৌবনের দীপ্তি যখন লাগে, কি নারী কি পুরুষের মুখে, তখন সেই মুখ এক আলগা এবং আলাদা সৌন্দর্য পায়। কুকুরীও যৌবনে সুন্দরী। যৌবন যখন চলে যায় তখন নিষ্ঠুরের মতো সেই দীপ্তিকে মুখ থেকে মুখোশের মতো ছিঁড়ে নিয়ে যায়। দুঃখের বিষয় এই যে, যাদের যৌবন আছে ভরপুর, তারা এই দীপ্তি সম্বন্ধে আদৌ সচেতন নয়।

মুঞ্চদৃষ্টিতে চেয়েছিলেন এইচ. পি. দেবীর মুখে।

দেবী দাঁড়িয়ে উঠে বলল, রাতে ঘুম হল ভাল?

কাল থেকে হবে। নতুন জায়গাতে প্রথম রাতে ঘুম হয় না।

তা ঠিক।

তুমি ঘুমালে?

আমি তো পড়ি আর মরি।

ঘরের মধ্যে খাড়ি শুয়োর নিয়ে কেউ ঘুমোতে পারে?

মানে?

মানে আমি নাকি নাক ডাকি শুয়োরের ঘোঁৎ ঘোঁৎ-এর মতো।

কে বলেছে?

আমার বন্ধু ব্রতীন বলতো। গোপালপুরে ঘর কম থাকাতে সে আমার ঘরে ছিল ওবেরয় পামবীচ-এ। তিন রাত। ভুক্তভোগী বলেই বলত।

জানি না। আমি তো বুঝতে পারি নি।

বলেই বলল, চা আনতে বলি? চা আর লেডো বিস্কিট।

তারপর বলল, আমার ভীষণই খারাপ লাগছে। আপনাকে যে কোন আঙ্কেলে এখনে নিয়ে এলাম। এত খারাপ থাকা-খাওয়া, বাথরুম পর্যন্ত নেই, অ্যাটাচড-বাথরুম তো দূরস্থান, সবই জঙ্গলে—এর মধ্যে আপনার মতো মানুষ কি থাকতে পারেন? তার ওপরে মশার কামড়। যদি ম্যালেরিয়া-ট্যালেরিয়া হয়ে যায় তা'হলেই তো চিন্তির। কি করে মুখ দেখাব?

কার কাছে মুখ দেখাবে? আমার তো আত্মীয়-পরিজন কেউই নেই। জবাবদিহি করতে হবে না তোমার কারো কাছেই। এই মস্ত সুবিধা। আমার অসুখে বিচলিত হওয়ার মতো কাছের মানুষ নেই-ই বলতে গেলে।

আপনার কোনও আত্মীয় নেই?

আপন ভাইবোন নেই। কাজিনস্ আছেন। তবে আত্মীয় শব্দটার মানে তো যে বা যাঁরা আত্মার কাছে থাকেন। সেই অর্থে আত্মীয় কেউই নেই। আর হবে যে কেউ, তারও বেলা নেই আর।

বলেই বললেন, তোমার কাছে আমি কতখানি যে কৃতজ্ঞ কি বলব। সারা জীবনে তো দেশে-বিদেশে অনেক জায়গাতেই বেড়ালাম। মুসৌরী, নৈনিতাল, কেদাই, গোয়া, কাশ্মীর, আন্দামান, কোভালম। অস্টিয়া, সুইটজারল্যান্ড, ওয়াইকিকি, কোবে, সেশ্যেলস। সব জায়গার সবচেয়ে ভাল হোটেলে থাকলাম কিন্তু সে সব জায়গাতে না তোমার মতো কেউই হাত ধরে নিয়ে গেছে, না আমাদের এই জঙ্গলে ভারতবর্ষ ছিল আমার অনুষ্ঙ্গ হয়ে। এই আমার প্রথম স্বদেশ ভ্রমণ। সত্যিই বলছি।

বাবাঃ। দারুণ বাংলা বলেন তো আপনি। কবিতা-টবিতা লিখতেন না কি?

যৌবনে কবিতা লেখে নি এমন বাঙালি কি একজনও আছেন? আর যাঁরা কাগজে লেখেন নি কলম দিয়ে, তাঁরা মনে মনে অবশ্যই লিখেছেন, বসন্তের বাতাসে, ঝরা পাতাতে, শ্রাবণের মেঘে লিখেছেন, তারপরে উড়িয়ে দিয়েছেন, হারিয়ে ফেলেছেন। কবিতার যারা প্রেরণা তারাই যখন অধিকাংশ ক্ষেত্রে হারিয়ে যায় তখন কবিতা হারিয়ে যাওয়া নিয়ে দুঃখ করে কি লাভ?

তারপরে বললেন, পঞ্চাশের দশকের শেষার্শে 'দেশ'-এ একটি কবিতা পাঠিয়েছিলাম এবং সেটি ছাপাও হয়েছিল।

সত্যি?

হ্যাঁ।

তারপর আর লিখলেন না?

লিখেছি অনেক কিন্তু পাঠাই নি কোথাওই। আমাদের সময়ে কবি গায়ক চিত্রীদের মধ্যে এমন রাতারাতি বিখ্যাত হওয়ার মানসিকতাটা ছিল না। অনেক গুণই মানুষে নিজস্ব করে রাখতে ভালবাসত—বাজারে পাঠাতে চাইত না পণ্য

হিসেবে। এখন যার গলাতে একটা পর্দাও সুরে বলে না সেও ক্যাসেট করে, সি টি ভি এন চ্যানেলে না কি সেই সব ছেলেমেয়েদেরই গাছ জড়িয়ে বা সিঁড়িতে বসে গান শুনতে ও দেখতে হয় শূনি।

শোনেন মানে? আপনি টিভি দেখেন না?

নাই বলতে পারো। দেখলে বিবিসি, বা ডিস্কভারি বা ন্যাশনাল জিওগ্রাফিক চ্যানেল দেখি।

তারপর বললেন, এমন অত্যাচার আমাদের সময়ে কেউ করতও না, করলে কেউ সহ্যও করত না। প্রত্যেক মানুষেরই মধ্যে একটা শালীনতাবোধ ও লজ্জাবোধ ছিল। যথেষ্ট ভালভাবে কোনও কিছুই না করতে পারলে, না শিখলে, জনসমক্ষে আসতে মানুষে স্বভাবতই কুণ্ঠিত হতো। গুরুরাও ছাত্রছাত্রী যথেষ্ট তৈরি না হলে তাদের পাবলিক পারফরমেন্স করতেই দিতেন না। আর আজকাল শয়ে শয়ে ক্যাসেট-করা, সিডি বের করা শিল্পীর গল্গও বেসুরে বলে অথচ নির্লজ্জতার চরম করে তাঁরা মঞ্চ ও টিভির পর্দা দাপিয়ে বেড়াচ্ছেন।

একটু চুপ করে থেকে এইচ. পি. বললেন, আসলে আমার কি মনে হয় জানো 'দেবী? ইকনমিক্স-এর Gresham সাহেবের সেই ম্যাক্সিম এখন বাঙালি জীবনের সব ক্ষেত্রে, সাহিত্য, সঙ্গীত, রাজনীতি সব ক্ষেত্রেই প্রচণ্ডভাবে প্রযোজ্য।

সেই ম্যাক্সিমটা কি?

“ব্যাদ মানি ড্রাইভস্ এওয়ে গুড মানি”। থার্ড ক্লাস মানুষেরা এসে জীবনের সব ক্ষেত্র থেকেই প্রকৃত গুণী মানুষদের ঝাঁটিয়ে বিদায় করছে। প্রকৃতই য়ারা গুণী, তীব্র আত্মসম্মান এবং তীব্রতর অভিমান নিয়ে নিজের নিজের বাড়িতে বসে আছেন। এই বাজারি প্রতিযোগিতাতে নামতে তাঁরা যেনা বোধ করেন।

তারপরই বললেন, তুমি যেমন গাও, তুমি তো সহজেই ক্যাসেট করতে পারতে দেবী। রেডিও এবং টিভিতেও গাইতে পারতে। গাও না কেন? ভারি ভাল লাগল তোমার গান।

ঐ যে! বললেন না আপনি! কিছু জিনিস তো আমার নিজস্ব থাকবে। আমার অবকাশের নিশ্চিন্ত পরিসরে বসে আমি আমার গানই হোক কি ছবি কি কবিতা আমি আমাকেই শোনাব বা দেখাব। দশজনের বাহবা যে পেতেই হবে তার কি মানে! নিজের অন্তরের গভীরে যদি আনন্দ পাই তবে সেই তো পরম প্রাপ্তি।

আর তোমার যারা প্রিয়জন তাদেরও কি এই গান শোনাও না, শোনাবে না?

যদি তারা ভালবেসে শোনে তবে তো শোনাব।

মুখ নিচু করে গলা নামিয়ে বলল দেবী।

ঐ গানটি, মানে যেটি গাইছিলে একটু আগে, সেটি ব্রহ্মসঙ্গীত, না? কার কাছে শেখো তুমি? আমি চুপ করে শুনছিলাম বলেই আওয়াজ দিই নি এতক্ষণ। ঘুম তো ভেঙেছে অনেকক্ষণই।

কারো কাছেই শিখি নি তেমন করে। আমার মা খুব ভাল গান করেন। মায়ের গান শুনে শুনে, শুধু মাই-ই কেন, আমার মামা-মামীরাও প্রত্যেকে ভাল গান করেন। শিশুকাল থেকে গানের আবহের মধ্যেই বড় হয়ে উঠেছি তাই গাইলে

বেসুরে গাই না এটুকুই বলতে পারি। আসলে, আমার মা বলেন, সুর সকলের গলাতে থাকে না। যার গলাতে নেই সে যত চেপ্টাই করুক তার গলা, হারমোনিয়াম ভেঙে ফেললেও সুরে বলবে না। আর যার সুরের কান না তৈরি হয় তার পক্ষে সুর-বেসুরের তফাৎটুকুও বোঝা সম্ভব নয়। নয় বলেই, সে মহা জাঁকজমকের সঙ্গে পনেরোটি বাজনা নিয়ে মঞ্চ কাঁপিয়ে গান গাইলেও সে নিজেই বুঝতে পারে না যে তার গান গাওয়াটা গান হচ্ছে না, তার গান গাওয়া আদৌ উচিত নয়।

ঠিকই বলেছ। তোমার মামা বাড়ি কি ব্রাহ্ম? এমন ব্রাহ্মসঙ্গীত!

ব্রাহ্ম নন। ব্রাহ্মদের সব কিছুই যে ভাল এমন তো নয়। অবশ্য কারোই সব কিছু ভাল নয়।

না। তবে মামাবাড়ি ব্রাহ্মভাবাপন্ন একথা বলতে পারি। হয়ত মা-মাসীরা সবাই শাস্তিনিকেতনে লেখাপড়া করেছেন বলেই কিছুটা প্রভাবিত হয়েছেন। আজকের শাস্তিনিকেতনের অবশ্য তেমন কোনও প্রভাব ছাত্রছাত্রীদের ওপরে নেই। প্রতিষ্ঠানেরই নিজস্বতা যদি না থাকে তবে তা ছাত্রছাত্রীদের মধ্যে টুঁইয়ে আসবে কি করে। সারা পৃথিবীরই সব দুধেই এখন জল। কি আর করা যাবে।

ভিণ্ড একটা প্লাস্টিকের থালাতে বসিয়ে গ্লাসে করে চা আর লেডো বিস্কিট নিয়ে এলো। ওর গ্লাসটি তুলে নিতে নিতে দেবী বলল, আরেক গ্লাস খাবেন তো?

খেতে পারি। এই চা খেয়ে আমাদের এক বেলজিয়ান বন্ধুর কথা মনে পড়ে গেল।

কী সে কথা।

এইচ. পি. বললেন, রসিকতাটা রসিকতা হিসেবেই নিও - নো ইল-ফিলিং প্লিজ। বলুনই না।

উনি বলেছিলেন, “সামথিং ওজ বীইং সোস্‌ড অ্যাট মিস্‌িং লেন, হুইচ লুকড লাইক কোকো, টেস্টেড লাইক কফি, অ্যান্ড ওজ টোস্‌ড টু বী টি।”

মিস্‌িং লেনটা কোথায়?

ও, মিস্‌িং লেন হচ্ছে লানডান-এর চা অকশনের জায়গা—পৃথিবীখ্যাত।

ও।

দেবী হেসে বলল, আমাদের সারাস্রার চা তা’হলে এক অভিজ্ঞতা। কী বলুন। পাই-পয়সাও বাঁচাতে চাই আমরা। অনেকের চাঁদার টাকাতেই তো চলে সব। নিজের টাকা হলে এসব বিলাসিতা নিয়ে ভাবা যেত।

তারপর বলল, ভিণ্ড, সাবকে লিয়ে গুর এক গ্লাস চায়ে লাও। উসকে বাদ সাবকো লেকর জঙ্গলকে যানা। লোটামে পানি লে যা না।

জঙ্গলে বাথরুম জীবনে করেন নি। কি করে যে কি হবে এবং হবার পরে যে কি হবে এই চিন্তাতেই চ্যাটার্জি সাহেবের মগজ কাল রাত থেকেই খুবই উত্তেজিত আছে। কঠিনতম মামলার আগেও এমন উত্তেজনা বোধ করেন নি কখনও। যাক, যা হওয়ার তা হবে। তবে কালই তো ইনিশিয়েশন হয়ে গেছে। আজকে অতটা কঠিন কাজ বলে মনে হবে না।

চা খেতে খেতে এইচ. পি. বললেন, কিংসুক কখন আসবে?

এসে পড়বে। অস্ত্রও আসবে হয়ত। দে সাহেব, মানে ইন্দ্রজিৎদা বলছিলেন। এক জনের সখ আধুনিক কবিতা অন্য জন বাংলা ব্যান্ডের সঙ্গে যুক্ত।

কি? মহীনের ঘোড়াগুলি?

দেবী হেসে বলল, না, সে তো অনেক দিন আগের ব্যাপার। মহৎ ব্যাপারও। অস্ত্রদের ব্যান্ডের নাম 'ঝঞ্ঝাটিয়া পাখিরা'।

কি? কি?

'ঝঞ্ঝাটিয়া পাখিরা'। ওদের লিড ভয়েস দেয় যে ছেলেটি তার নাম ঝঞ্ঝাট সেন। সে আবার Gay।

তারপরই বলল, আপনাকে একটু সাবধান করে দেওয়া দরকার।

কিসের থেকে সাবধান?

না, ওদের থেকে।

কেন?

ওরা দু'জনেই বয়োজ্যেষ্ঠদের একেবারেই সম্মান দিয়ে কথা বলে না। সম্মান তো দেয়ই না, উল্টে অপমানজনক কথাবার্তাও বলে, মুখের ওপরেই। ওদের ধারণা আমাদের প্রজন্মের যা কিছু দুঃখ-কষ্ট তার সবের জনেই দায়ী আপনাদের প্রজন্ম।

সম্মানের যোগ্য যদি কেউ না হন তবে তাকে সম্মান দেবেই বা কেন? তা'ছাড়া ওদের অভিযোগ তো পুরোপুরি মিথ্যাও নয়। আমি দোষ দিতে পারি না ওদের।

তা বলে জেনারালাইজ করা কি ভাল? ওরা যে যোগ্য-অযোগ্যের বিচার করে না। আমি নিশ্চিত যে, আপনি সমাজের যে তলাতে বাস করেন, যাদের সঙ্গে ওঠা-বসা করেন, সেই সমাজকে ওরা জানেই না, আমিও অবশ্য জানি না। সেই সমাজের সঙ্গে কিংসুক আর অস্ত্রের কোনই মিল নেই। আপনাদের ওরা জানে না, একেবারেই জানে না। জানতে না পারে কিন্তু জানার ইচ্ছেটাও কেন থাকবে না? ওরা সবকিছুকেই উড়িয়ে দিয়ে বলে, বিন্দাআস।

এইচ. পি. বললেন, বিন্দাআস। এই শব্দটার মানে কি? বিন্দাআস? সেদিন সৌরভের খেলা দেখার জন্যে টিভি খুলে ওপেল গাড়ির বিজ্ঞাপনে দেখি ব্যবহৃত হচ্ছে ঐ শব্দটি। মানে বুঝিনি।

বস্মতে চালু আছে এই বিন্দাআস শব্দটি। দেখছেন না। কিডন্যাপাররা যেমন আসছে বস্মে থেকে, নানা নতুন শব্দও আসছে। কলকাতা এখন পুরোপুরিই রিসিভিং এন্ড-এ।

তা বিন্দাআস শব্দটির মানেটা কি?

ঠিক মানে কি তা আমিও বলতে পারব না। ধরুন ইংরেজিতে could not care less বলতে আমরা যা বুঝি, তাই আর কি!

সবকিছুকেই উড়িয়ে দেওয়া, মানে ওড়ানোর জনেই উড়িয়ে দেওয়াটা তো স্বাস্থ্যের লক্ষণ নয়। ওড়ানোর জিনিসকে ওড়ানো খারাপ নয় কিন্তু ওড়ানোর মতো প্রি-ডিটারমিন্ড মেন্টাল ফ্রেম কি ভাল?

এইচ. পি. বললেন।

ভাল তো নয়ই। কিন্তু এসব ওদের পার্সোনাল ব্যাপার। পার্সোনাল ভিউ অফ লাইফ। আমার সঙ্গে দু'জনের সম্পর্ক জীবনের একটা বিশেষ দিকের। তবে আমিও ওদের উদ্দেশ্যেই দিই। আমরা তিন জনে সহাবস্থান করি বটে কিন্তু তা সীমিত আছে জীবনের কিছু বিশেষ ক্ষেত্রেই—যেখানে আমাদের মধ্যে ঝগড়া বা মতবিরোধ এখনও নেই। অন্য সব ব্যাপারে আমরা তিন জনেই ব্যক্তিগত স্বাধীনতার দাম দিই। কিন্তু ওদের বয়োজ্যেষ্ঠদের প্রতি এই যে আটার ডিসরেসপেক্ট, এটা আমার ভারি খারাপ লাগে। অসভ্যতা বলেই মনে হয়। অথচ ওরা ভাবে, এটাই সপ্রতিভতা।

এই ব্যাপারটা আমিও অনেক তরুণদের মধ্যে লক্ষ্য করেছি। Arrogance-কেই ওদের মধ্যে অনেকে Smartness-এর সমার্থক বলে মনে করে। এই ধারণাটা ভুল অবশ্যই। আমরাও একদিন তরুণ ছিলাম, আমাদের তারুণ্যের দিনে এমনটি আমরা কখনওই ভাবি নি।

এইচ. পি. বললেন।

জানি স্যার। তাই-ই আপনাকে সাবধান করে দিলাম।

দেখো দেবী, অনেক দুঁদে উকিল-ব্যারিস্টারের সঙ্গে টক্কর দিয়ে আমার দিন কাটে, এতগুলো বছর কাটলো। ওদের আমি ঠিকই ট্যাকল করতে পারব। তোমার চিন্তা নেই কোনও।

না, মানে আমি যা বলতে চাইছি সেটা হচ্ছে, প্রয়োজনে আপনি ওদের “ফিল্ড” করে দেবেন। ওদের অসভ্যতা, মানে যদি কিছু করে, তাহলে আপনি ছেড়ে দেবেন না। ওরা আমার এমন কিছু আপনজন নয়। বলেইছি তো! আমরা তিন জনে এক সঙ্গে থাকি ওনলি ফর কনভিনিয়েন্স। এর চেয়ে বেশি কিছু নয়।

সে কি! স্বামী-স্ত্রীর মতো থাকছ আর বলছ সম্পর্কটা বিশেষ নয়। ওরা তোমার আপনজন নয়।

সত্যিই তাই। মনে করুন, আমরা ট্রেনের এক কম্পার্টমেন্টের যাত্রী। যে কোন স্টেশনে যে কেউই নেমে যেতে পারি। আজকের পৃথিবীতে “চিরকালীন” বলে কোনও সম্পর্ক আর নেই স্যার। সব কিছু সম্বন্ধেই এখন বলা চলে, “বিন্দাআস”! এক জন নারী আর পুরুষের মধ্যে শারীরিক সম্পর্কটাই আগেকার দিনে সম্পর্কের একেবারে শেষ কথা বলে ধরা হতো। আজকাল সেই কনসেপ্ট আর নেই। সব ভেঙেচুরে গেছে। গেছে যে, তা তো আমাদের দেখেই বুঝতে পারছেন স্যার।

এইচ. পি. চায়ের গ্লাসটা শেষ করে বললেন, কি জানি! দেখি তোমাদের বুঝতে পারি কি না। এতো বড় কুইজের মধ্যে এনে ফেলবে জানলে সত্যিই আসবার আগে ভাবতাম।

আহা। আমি তো আপনার দলেই। অন্যায় কিছু যদি করে ওরা তবে আমিই বা মেনে নেব কেন? আফটার অল আপনি তো আমারই অতিথি হয়ে এখানে এসেছেন স্যার।

আর ওরা? ওরা কার অতিথি?

ওদের কেউ নেমস্তন্ন করে নি। দে সাহেবকে মানে ইন্ডিজিৎদাকে চেনে, একবার আমারই সঙ্গে এসে বারিয়াতুতে ছিল দু'দিন। আমাদের প্রজেক্ট কো-অর্ডিনেটরকে চেনে। তাই আমি আসছি এবং কয়েক দিন ছুটি পড়েছে বলে ওরাও আসছে। হয়ত ছুটি নিয়েওছে ক'দিন। ছুটি নেওয়ার মতো বাঁধা-ধরা কাজ ওরা কেউ করে বলে জানি না অবশ্য। সম্ভবত না। তবে আদৌ আসবে কি না এবং কবে আসবে তা ওরাই জানে। ওদের চলা-ফেরার, কথাবার্তার কোনোই ঠিক নেই।
হঁ।

এইচ. পি. বললেন, একটু চিন্তিত হয়েই।

এইচ. পি. যখন ভিগুর সঙ্গে প্রাতঃকৃত্য সারতে জঙ্গলে যাচ্ছিলেন তখনই কলকল করতে করতে আদিবাসী মেয়েরা, যারা কাল সঙ্কর আগে ফিরে গেছিল কাছাকাছিই নিজেদের গ্রামে এবং সারাগাতেও, তারা ফিরে এসে দেবীকে ঘিরে ধরল। গতকালই লক্ষ্য করেছেন এইচ. পি. যে, দেবী মেয়েটির মধ্যে নেতৃত্ব দেওয়ার এক স্বাভাবিক ক্ষমতা আছে। কিছু হেসে, কিছু গভীর হয়ে কিছু বকে-ঝকে ওদের কাছ থেকে কাজ আদায় করে নেওয়ার এক বিরল গুণ আছে। ও যথেষ্ট জনপ্রিয়ও। গ্রামের মেয়েদের ব্যবহারে এটা স্পষ্ট যে দেবী যদি এখানে পাকাপাকিভাবে থাকত তবে তারা খুবই সুখী হতো, দেবীকে কম পায় বলেই যখন পায় তখন বোধহয় এমনি করেই পুরোপুরি নিংড়ে নিতে চায়। সকলেই ওকে দেবীজী। দেবীজী। বলে ডাকছিল।

দেবী জঙ্গলের দিকে ভিগুর দিকে এগিয়ে যাওয়া এইচ. পি.-কে বলল, স্যার, আমি কিন্তু চলে যাচ্ছি। আপনি ফিরে কখন নাস্তা করবেন ভিগুকে বলে দেবেন।

তুমি নাস্তা করবে না?

নাঃ। আমার সময় নেই। অনেক কাজ। দুপুরে খেতে আসব।

কটাতে?

বারোটা থেকে একটার মধ্যে। তবে আমার দেরি হলে আপনি খেয়ে নেবেন।

দে সাহেবরা কি আজও আসবেন?

সম্ভবত না। আজ ওঁদের বারিয়াতুতে একটা সেমিনার আছে। তবে বলেছেন, চেষ্টা করবেন।

ঠিক আছে।

ওঁদের কেমন লাগল স্যার আপনার?

ফ্যানটাস্টিক। আমি গ্রেট ফ্যান হয়ে গেছি ওঁদের। এমন মেড ফর ইচ আদার কাপল আর দেখেছি বলে মনে পড়ে না।

বলেছিলাম না আপনাকে। ওঁরা আমার আদর্শ। আপনিও কিছুটা।

আমি?

অবাক হয়ে বললেন এইচ. পি.।

নাস্তার পরে ভিগুকে নিয়ে চারদিক এবং আমাদের নানা প্রজেক্ট দেখতে পারেন।

আমি এখন তোমার সঙ্গে যেতে পারি না?

আমার কোন আপত্তি নেই। কিন্তু চার কিমি পাহাড়-জঙ্গলের মধ্যের পাকদণ্ডী দিয়ে হাঁটতে হবে। আপনি পারবেন না। খুব উঁচু একটা চড়াই আছে। ব্রিজটাও ভেঙে গেছে শুনছি। নদীতে এখন কত জল কে জানে। নদী পেরিয়ে যেতে হবে।

এইচ. পি. হার স্বীকার করে বললেন, না। হাঁফ ধরে যায়। চড়াই উঠতে পারব না।

পারবেন। কয়েকবার এসে থাকুন, দেখবেন শরীর মন সব বদলে গেছে। বয়স কুড়ি বছর কমে গেছে। তবে এখন পারবেন না বলেই আপনাকে রেখে যাচ্ছি। আমি এগোলাম স্যার। টা-টা।

হাত তুলে দেবীর এই টা-টা বলার ভঙ্গিটা ভারি ভাল লাগল এইচ. পি.-র। যেন কত জন্মের কাছের কেউ ও।

জঙ্গলের দিকে এগোতে এগোতে এইচ. পি. ভাবছিলেন শরীরের চর্চা বহু বছরই ছেড়ে দিয়েছেন। ওঁর ছেলেবেলার বন্ধু মুনা দাস, ফুটবলার, এখনও রোজ সকালে রবীন্দ্র সরোবর স্টেডিয়ামে তার নাতিকে নিয়ে জগিং-সুট পরে দৌড়ায়। এখনও দারুণ ফিট আছে। সারা পৃথিবীতেই ফিজিক্যাল ফিটনেস একটা ক্রেইজ হয়ে গেছে এখন। সকলেরই ফিগার-ভাল থাকা চাই-ই। মানুষ যেন পুরোপুরিই শরীর-সর্বস্ব জীব হয়ে গেছে। যতই ফিট থাকুক মুনা দাস, সে তো একটা চিতাবাঘের মতো ফিট হতে কোনদিনও পারবে না। মানুষ তো চিরদিনই তার মনের সুবাদেই উৎকৃষ্টতম জীব। চারদিকের এই শারীরিক ক্রিয়াকাণ্ড দেখে মনে হয় মানুষের মনের চর্চার আর দরকার নেই। মনের চর্চা সম্বন্ধে বিশেষ কিছু করতে বা বলতে কারোকেই দেখেন না। বিধাতা তো বৈচিত্র্যর জন্যে মোটা মানুষ রোগা মানুষ বেঁটে মানুষ লম্বা মানুষ কালো সাদা হলুদ বাদামী নানা রঙা মানুষই সৃষ্টি করেছিলেন। সকলেরই যে আদা নুন খেয়ে রোগা হতে হবেই কেন সে কথা ভেবে পান না এইচ. পি.। কিন্তু নিজের মনের কথা বলে যে হালকা হবেন বা নিজের মতের পক্ষে অন্য কারোকে পাবেন তেমন মানুষ একজনও পান না। তাই এ প্রসঙ্গর অবতারণাই আর করেন নি কারো কাছেই—পাছে লোকে পাগল বলে।

ভিগু তাঁকে একটা প্রস্তরময় জায়গাতে নিয়ে গেল। কাল বিকেলে অন্যদিকে গেছিলেন। বড় বড় নানা আকৃতির পাথর আছে সেখানে। পাশ দিয়ে একটি সরু ঝোরা মতো বয়ে গেছে। তাতে জল চলছে তিরতির করে। ভিগু বলল আপনার পছন্দসই একটা পাথরে বসে পড়ুন, যার পেছন দিকে ফাঁকা। এইচ. পি. বুঝলেন ভিগু কি বলছে। ভিগু এবারে জল ভর্তি ঘাটিটা ওঁর হাতে ধরিয়ে দিয়ে বলল, আমি ওই মছয়া গাছটার নিচে থাকব। আপনার হয়ে গেলে আমাকে ডাকবেন। আরও জলের দরকার হলে ওই নালাতে নেমে যাবেন—দুকদম তো। বহুতা জল আছে।

মছয়া গাছ কোনটা?

বিপদে পড়ে বললেন এইচ. পি.। গাছ-টাছ তিনি চিনবেন কোথেকে!

ভিগু আঙুল দিয়ে মস্ত গাছটাকে দেখালো। বড় বড় পাতাতে ভরে আছে। অবাক হয়ে চেয়ে রইলেন এইচ. পি.। এই মছয়া গাছ! “মছয়া” নামের একটি বইও তো আছে রবীন্দ্রনাথের। মছয়া নামের একটি মেয়েও পড়ত তাঁদের সঙ্গে স্কটিশ চার্চ কলেজে। মছয়ার মদ-এর কথাও শুনেছেন। কিন্তু মছয়া গাছ। জীবনে এই প্রথম দেখলেন। কে জানে। আগে হয়ত কখনও দেখেছেন কিন্তু চিনতেন তো না।

ব্যাপারটা যেমন অসাধ্য বলে ভেবেছিলেন কাজে তেমন মনে হল না। হলো না যে তা জেনে পুলকিত হলেন এইচ. পি.। তিনি এখনও পুরোপুরি বর্জ্য পদার্থ হন নি তা'হলে, শহর আর আরামের ঘেরাটোপের বাইরে আসতে ও চলতে ফিরতে তিনি তা'হলে পারতেও পারেন, যদিও কষ্ট খুবই হবে প্রথম প্রথম।

ভিণ্ডু বলল, সব ঠিকঠাক না হয় সাব?

সব ঠিক ঠাক। নান্নামেভি উতর গ্যায়াথ!। উঁহা মীট্রিভি মিল গ্যায়া। সাফ পানি থা।

তারপর বললেন, জঙ্গলেই যানা হোতা তো আওরং লোগ কওন টাইম মে যাতি?

উনোনে সব সুরজ উঠনেকে পহিলে পহিলেই যাতি হয়। দিদিভি গায়ীথি। ই দেহাত জঙ্গল কি এহি রেওয়াজ। ফির সাম মে সুরজ চলনেকো পহিলে পহিলে এক দফে যাতি হয়। জাগে সব অলগ অলগ হয় না। যাঁহা মর্দলোগ যাতা আওরতলোগ হুঁয়া না যাতি।

একটা ছোট্ট পাখি ফিচিক ফিচিক করে ডাকতে ডাকতে উড়ে গেল সবুজ শালের চারায় কাঁপন তুলে। ঐ চারার ওপরেই বসেছিল সে।

কি পাখি ওটা?

এইচ. পি. শুধোলেন।

ফিচফিচিয়া।

এমন সময়ে ট্যা ট্যা ট্যা কর্কশ শব্দ করে কচি-কলাপাতা-সবুজ একঝাঁক টিয়া উড়ে চলে গেল মাথার ওপর দিয়ে।

ভিণ্ডু বলল, হারামজাদা।

এইচ. পি. বললেন, এমন সুন্দর পাখিগুলো কি দোষ করল?

দে'ষ? ব্যাটারা তো ফসল খেয়ে শেষ করে দেয়। আর একমাস পরেই মকাই পাকবে। পেকে গেলে তার ওপরে এক ঝাঁক সুগা এসে পড়লে সব মেহনত আর আশা সাফ হয়ে যাবে পনেরো মিনিটের মধ্যে। ওরা আমাদের দূশমন।

বলে কি ছেলেটি! টিয়া পাখি, চন্দনা পাখি তো শহরের মানুষদের কাছে বড় আদরের ধন আর জঙ্গলের মানুষদের ওরা এমন শত্রু তা তো জানা ছিল না।

দূর থেকে একটা পাখির ডাক টিউ টিউ টিউ করে ভেসে আসছিল।

এইচ. পি. শুধোলেন, ওটা কি পাখি?

কালি তিত্বর। তিত্বরভি হয়। তিত্বর বহত তেজ বোলতা হয়। বহত হয় হিয়া।।

ছবি দেখেছেন বটে পাখির বইয়ে, ব্ল্যাক প্যাট্রিজ। মনে পড়ল এইচ. পি.-র।

এমন সময়ে কেঁয়া - আ - আ করে তীক্ষ্ণ স্বরে খুব জোরে কি একটা ডেকে উঠল সারা বনে অনুরণন তুলে।

চমকে উঠে এইচ. পি. বললেন, ঈ কওন জানোয়ার হয় হো?

ভিণ্ডু কলকাতার ডাকসাইটে উকিল সাহেবের অজ্ঞতাতে হেসে ফেলল। বলল, ঈতো মোর বা। শাওন কি মাহিনামে মোর নেহি বোলগো তো কব বোলগো?।

এই কেকাধ্বনি! অবাক হয়ে শুনলেন এইচ. পি.।

আর একটু এগিয়ে গিয়ে বাঁদিকে চেয়ে দেখলেন অনেকখানি জায়গা জুড়ে নানা গাছ—যেসব গাছের মধ্যে দু'একটি তাঁর চেনা, যেমন কেসিয়া, নডুলাস, গোলমোহর। জঙ্গলের গাছ তো উনি চেনেন না কিছুই।

এগুলো তো জঙ্গলের গাছ নয়।

নাই তো। দিদি অনেকগুলো লাগিয়েছেন আর দে সাহেব লাগিয়েছেন দিদিরও পাঁচ বছর আগে থেকে। এগুলো সব ফুলের গাছ। এইসব গাছের চারা ও বীজ কিনতে আসতে শুরু করেছে ডালটনগঞ্জ, রাঁচি এবং হাজারিবাগের মানুষেরা।

গাছগুলো তুমি চেনো?

না, না, আমি চিনি না। দিদি চেনে।

দিদি এখন কোথায় গেল ওই মেয়েদের নিয়ে?

স্কুলে। স্কুল আছে যে।

কোন ক্লাস অবধি পড়ানো হয় এখানে। এই সব মেয়েরাই পড়াশোনা জানে? লিখতে পড়তে জানে?

লিখা-পড়ার স্কুল নেহি সাব। ওখানে নানা হাতের কাজ শেখানো হয়। সেলাই, চামড়ার কাজ, বাঁশের বুড়ি বানানো, পোড়া মাটির নানা জিনিস বানানো। এই সব বানিয়ে লাতেহারের কো-অপ্-এ সাপ্লাই দেয় সব। সেখানে বিক্রি হয়। অন্যান্য নানা জায়গাতেও হয়। সেই স্কুলে চাষ-বাসের কাজ, মাছ চাষের কাজ এসবও শেখানো হয়। গোবর-গ্যাসের মেশিনও আছে। সোলার টিটার, সোলার লাইট।

তুমি কি ইংরেজি জানো ভিণ্ডু?

দিদি শিখিয়েছেন একটু একটু। এবারে তো আপনি এসেছেন তাই কাল সন্ধ্যাবেলা গল্পটল্প হল। নইলে অন্য সময়ে সন্দের পরে দিদি আমাকে আর সুরাতিরা দিদির ইংরেজি আর হিন্দি পড়ান। ভারতদাদা শিখতে চায় না। বলে, উমর বিত গ্যায়া।

এইচ. পি. একটা দীর্ঘশ্বাস ফেললেন। উমর বীত গ্যায়া।

আমাদের খাতা-বইও আছে। দিদি এলে খুব মজা হয় আমাদের।

দিদি কি রাঁচি হয়েই আসেন?

ঠিক নেই। অনেক সময়ে টোড়ি হয়েও আসেন, অনেক সময়ে ডালটনগঞ্জ হয়েও আসেন। এখন নাকি শক্তিপুঞ্জ বলে গাড়ি হয়েছে। - কলকাতা থেকে বিকেলে রওনা হলে একেবারে ভোরে ডালটনগঞ্জে এসে পৌঁছয়। আর ডালটনগঞ্জ থেকে বাসে সারাক্ষর মোড়ে নামলেও রাঁচি হয়ে আসার মতোই সময় লাগে বাসে।

ডেরাতে পৌঁছলে নাস্তা নিয়ে এল সুরাতিয়া। সুরাতিয়া এমনিতে এখানে থাকে না। দেবী এলে দেবীর জনোই আসে। হাতেগড়া আটার রুটি আর আলুর চোকা এবং আবার সেই চা। সকালে উঠেই জঙ্গলে হেঁটে যাওয়া-আসাতে ক্ষিদে ক্ষিদে পেয়েছিল এইচ. পি.-র। খিদে যে কাকে বলে তা ভুলেই গেছেন। রাতে দু'তিনটি হুইস্কি খেলে একটু খিদে খিদে মনে হয়, ঐ আর কি। খিদের মুখে ওই খাবারই অমৃত বলে মনে হল। ভিণ্ডুকে জিজ্ঞেস করলেন, দুপুরে কি খাওয়া হবে?

চাউল, মুঁগ কি ডাল, বাইগন ভাজি আর চালোয়া মাছ ভাজা। মাছ যদি পায় চানোয়া। এখন নদীতে অনেক জল। মাছ পাওয়া মুশকিল। নইলে আশা হতে পারে। ঠিক জানি না। দে সাহেব এলে রাঁচি থেকে রুই মাছ নিয়ে আসবেন বলেছিলেন কাল।

তোমরা কি এই চালই খাও বাড়িতে? মানে, তোমাদের গ্রামে?

আমরা? চাল? চাল তো হুজোর শাদী-টাঙ্গীর খানা থাকলেই খাই। নইলে আমরা ভাত রোজ খোড়ি খেতে পারি। রোজ ভাত তো আপনাদের মতো বড়লোকেরাই খেতে পারে। তবে এখানে কাজ করি বলে আমি, আমরা খাই। বস্তির লোকেরা ভাত পাবে কোথেকে।

তা'হলে তোমরা রোজ কি খাও?

বাজার রুটি খাই, সুখা মছয়া সিদ্ধ করে খাই, কখনও কান্দা-গেঠিও খাই। সরঞ্জার তেল দিয়ে ভেজেও নিই অনেক সময়।

কান্দা-গেঠিটা কি জিনিস ভিণ্ডু?

জঙ্গলের মূল বাবু। আমরাও খুঁড়ে আনি, শুয়োরেরাও খুঁড়ে খায়। ওলের মতো, তবে তেতো হয় খেতে। সারারাত বর্নার জলে ধুয়ে নিলে তেতো একটু কমে। ধান হয় চিনামিনা, সাঁওয়া এই সব। ছোট ছোট চাল হয় তাতে। ওই সব ধান আমরা এই জঙ্গল পাহাড়ের মানুষেরাই চাষ করি, ছোট ছোট জমিতে, আমরাই খাই।

নাস্তার পরে পরেই একটা জীপের শব্দ শোনা গেল। দেখা গেল, ইন্ডিজিৎ দে সাহেব আর ওঁর স্ত্রী সুমিতা দেবী আসছেন। এখন মনে হচ্ছে এইচ. পি.-র যে, ওপেল গাড়িটা রাঁচিতে ফেরত না পাঠালেই ভাল হতো। বাজার দোকান করানো যেত হচ্ছে করলে। কিন্তু পরের গাড়ি মিছিমিছি আটকে রাখতে বিবেকে বাধল। যেদিন ফিরবেন সেদিন দুপুরে আবার চলে আসবে এমনই বলে দিয়েছেন সানেকা মুণ্ডাকে। এখানে ইলেকট্রিসিটি নেই বলে মোবাইল ফোনটা রিচার্জ করা যাচ্ছে না। ব্যাটারিটা বসে গেলেই খামোকা খরচ হবে।

দে সাহেব জীপ থেকে নেমেই বললেন, আমাকে ফোনটা দিয়ে দিন, পুরো চার্জ করিয়ে পরণ্ড নিয়ে আসব। আমারটা বরং আপনি রাখুন। পুরো চার্জ দেওয়া আছে। থ্যাঙ্ক ডা। তবে আপনারটা রাখার দরকার নেই। দু'দিন ফোন না থাকলে আর কি হবে। ফোন একটা যন্ত্রণা। মোবাইল ফোন আরও যন্ত্রণা।

মিসেস দে বললেন, এখানে কষ্ট হচ্ছে তো?

মিথ্যে বলব না। তা একটু হচ্ছে। তবে আনন্দও কম হচ্ছে না। আনন্দটা কষ্টের চেয়ে অনেকই বেশি।

তা হলেই ভাল। দেবী কোথায় গেল?

বলল, স্কুলে যাচ্ছি।

সেখানে তো জীপ যাবে না। একটা ছোট্ট নালায় ওপরে ব্রিজ আছে পথে, সেটা ভেসে গেছে বানের তোড়ে গত রবিবারে। হেঁটে যাওয়া যেতে পারে কিন্তু খুব উঁচু চড়াই আছে পথে – আপনার পক্ষে অসুবিধের হবে।

হ্যাঁ। আমি পারব না।

আপনি জিপে করেই চলুন। আপনাকে ঘুরিয়ে আনি।

দে সাহেব বললেন।

কোথায়?

আরে চলুনই না। আমাদের এখানে যেরদিকে পা বাড়াবেন সেদিকেই আনন্দ, সেদিকেই ছুটি, বিশেষ করে আপনার মতো মানুষের কাছে, যাঁরা ইট-চাপা ঘাসের মতো প্রকৃতি-বিবর্জিত জীবন কাটান। প্রকৃতি আর জীবন যে সমার্থক একথা কয়েকবার এলেই বুঝতে পারবেন।

সুমিতা বললেন, ওঃ। আপনার জন্যে একটু মাছ ও পাঁঠার মাংস এনেছেন উনি আর আমি এনেছি ফুল। ভুলেই গেছিলাম।

ফুল? কী ফুল?

আমার বাড়ির ফুল। স্বর্ণচাঁপা।

বাঃ।

বিছানাতে রেখে দেবেন শোবার সময়ে।

ফুলশয্যা হবে বলছেন?

ভাবলে, তাই।

থ্যাঙ্ক ড্যু।

তারপর ভিণ্ডকে ডেকে বললেন, আমরা তাহলে যাচ্ছি ভিণ্ড। তুমি এগুলো সব নিয়ে গিয়ে সুরাতিয়াকে আর ভরতকে দাও, যা করার করবে। মাছটা দুপুরে রাঁধতে বোলো আর মাংসটা রাতে। সাঁতলে রাখতে বোলো।

জিপ স্টার্ট করার পরই সুমিতা বললেন, আমাকে বরং ঝরিয়া নালার ভান্স-ব্রিজের কাছে নামিয়ে দাও। আমি স্কুলেই যাই। দেবী একা হিমসিম খাবে। আজই তো খুলছে স্কুল। অনেকদিন পরে।

ঠিক আছে যেমন বলবে।

দে সাহেব বললেন।

মাহিন্দ্রর কম্যান্ডার জিপ। দে সাহেব স্টিয়ারিং-এ, মধ্যে মিসেস দে আর বাইরের দিকে এইচ. পি.। জঙ্গলের পথে কিছুটা গিয়েই সকালে যে ফুলের গাছে ভরা বনটি দেখেছিলেন এইচ. পি. তারই পাশে এসে জিপ দাঁড় করালেন দে সাহেব। বললেন, দেখুন আমি আর দেবী মিলে যেমন ফ্লাওয়ারিং ট্রি-র বন করেছি। এই সব গাছের চারা আর বীজ বিক্রি করে আমাদের প্রজেক্টের অনেক রোজগার হবে ভবিষ্যতে। রোজগার এখনই আরম্ভ হয়ে গেছে। আসুন, নামুন, গাছগুলো চেনাই। ফুল তো এখন অধিকাংশ গাছেই নেই। আমাদের এই বনের আসল রূপ যদি দেখতে চান তো হোলির সময়ে আসুন একবার। রং-এর দাঙ্গা কাকে বলে দেখতে পাবেন।

জিপ থেকে নেমে সামনেই যে গাছটা ছিল সেটাকে দেখিয়ে বললেন, এই দেখুন সারাঙ্গা। এই গাছের নামেই আমি এই প্রজেক্টের নাম রেখেছিলাম সারাঙ্গা।

সারাঙ্গা কি হিন্দি নাম?

না, তা কেন? বাংলা নাম। ইন ফ্যাক্ট এই গাছের হিন্দি নাম আদৌ আছে কি না জানি না। থাকলেও আমার জানা নেই। এর ইংরেজি নাম আছে অবশ্য অনেকগুলো যেমন নিকারাগুয়ান শেড ট্রি, মাদার অফ কোকো, ইত্যাদি। এদের আদি নিবাস আমেরিকার ক্রান্তীয় অঞ্চলে। পর্ণমোচী গাছ এটি।

মানে?

মানে, ডিসিডুয়াস। যাদের পাতা ঝরে যায় এবং আবার গজায়। ছেলেবেলায় পড়েন নি? “এসেছে শরত হিমের পরশ লেগেছে হাওয়ার পরে” ... আমলকী গাছের পাতা খসানোর সময় এসেছে, এইসব? তিন থেকে আট মিটার অবধি উঁচু হয় গাছগুলো। ফেব্রুয়ারি মার্চ-এ ফুল আসে। তবে তিন সপ্তাহের বেশি থাকে না।

কেমন দেখতে এই সারাস্পার ফুল?

হালকা গোলাপি থেকে হালকা বেগুনি। নিম্পত্র গাছে যখন ঠাসা থোকায় ফুল আসে তখন গাছতলি ছেড়ে যেতে ইচ্ছে করে না। এই অঞ্চল ছাড়া আমাদের প্রজেক্টের প্রায় পুরো এলাকাতেই এই গাছ লাগিয়েছি। আর চার বছর পরে সব গাছে যখন ফুল আসতে আরম্ভ করবে তখন যা দেখাবে তা ভাবলেও রোমাঞ্চ হয়। হার্টিকালচার গার্ডেন হয়ে যাবে।

আমি শুধু এই দুটি গাছকেই চিনি, কেসিয়া নোডোসা আর গোল্ডমোহর মানে কৃষ্ণচূড়া। আমার বাগানে আছে।

কেসিয়া নোডোসা, কৃষ্ণচূড়া, রাধাচূড়া এখন ক্লিশে হয়ে গেছে। সবাই ওই গাছই চেনে এবং লাগায় অথচ আরও কত ফুলের গাছ যে আছে কী বলব। সেশ্যালস দ্বীপপুঞ্জে এক রকমের গাছ হয় তাদের নাম ফ্র্যামবয়ান্ট। কী আশ্চর্য লাল ফুল যে ফোটে সে গাছে। আমার এক বন্ধু নিয়ে এসে দিয়েছিল, এখানে এবং বারিয়াতুতেও লাগিয়েছিলাম। কিন্তু বাঁচাতে পারি নি। সেশ্যালস-এর Endemic গাছ। এখানের কৃষ্ণচূড়ার সঙ্গে ফ্র্যামবয়ান্টের মিল আছে যদিও।

Endemic মানে? এইচ. পি. শুধোলেন।

মানে নেটিভ আর কি।

সুমিতা বললেন। ঐ দেখুন! ঐ যে ম্যাজেন্টা রঙা ফুল ফুটে আছে গাছে, ঐ গাছটার নামই ম্যাজেন্টা। এদেশে এসেছে এ গাছ বেশিদিন নয়। তবে এসেই খুব জনপ্রিয় হয়েছে। প্রায় সব ঝতুতেই ফুল হয়।

ওটা কি গাছ?

ওটির নাম বসন্তী। বসন্তে ফোটে। হলুদ ফুল ... পাতা ঝরে যাওয়া গাছে যখন রাশি রাশি হলুদ ফুল ফোটে তখন ভারি সুন্দর দেখায়।

এইচ. পি. বললেন, এরই একটি চারা এনে দিয়েছে দেবী আমাকে বাড়গ্রাম-এর “হার্টিকালচারাল এরেনা” থেকে।

এখান থেকে বীজ নিয়ে গেলেই পারত। পাগলি একটা। বীজ থেকেও এই গাছ হয়। দু-তিন বছরেই ফুল দেয়। এটা ট্যাবেবুইয়া ভ্যারাইটির ফুল, হলুদ যেমন হয়, তেমন সাদা, বেগুনী এবং গোলাপিও হয়। এরা বিগনোনিয়েসী গোত্রের গাছ সব।

এখানে অন্যান্য রঙের লাগালেন না ট্যাবিবুইয়া?

ভুল হয়ে গেছে। আগামী সপ্তাহেই লাগাব। এখনও বৃষ্টি হবে মাসখানেক। ধরে যাবে গাছ।

বলেই বললেন, ওই দেখুন ওই গাছটি। ওর নাম সিলভার ওক। বাংলা নামটি ভারি সুন্দর। কি নাম? রূপসী। আদি নিবাস কুইন্সল্যান্ড ও নিউ সাউথ ওয়েলস। আন্দামান দ্বীপপুঞ্জও দেখা যায় এদের। প্রজাতিগত নাম রোবাস্টা। Robust থেকে। খুব উঁচু হয় গাছগুলো প্রায় পঁয়তাল্লিশ মিটার মতো। এদের ফুল আসে এপ্রিল থেকে জুন-এ।

এবারে সুমিতা বললেন, আপনার জন্যে যে ফুল নিয়ে এলাম সেই ফুলের গাছ দেখুন, কনকচাঁপা। সেই আমাদের ছেলেবেলার ভুঁড়েশিয়ালির কনকচাঁপা। এর সংস্কৃত নাম কর্নিকারা। বাংলাতে এর আর একটি নাম আছে। মুচকুন্দ। সে নামটা আনরোম্যান্টিক। এই গাছের ফুল কিন্তু হাল্কা বসন্তে ও গ্রীষ্মে। অনেকদিন আগে ফুল শেষ হয়ে যাওয়ার কথা ছিল কিন্তু আমাদের বারিয়াতুর প্রজেক্ট এরিয়ার মধ্যে একটি গাছ কেন যেন এখনও ফুল দিচ্ছে। হয়ত আপনি আসবেন বলেই।

দে সাহেব বললেন, ওই যে উঁচু গাছটা দেখছেন, ওটি হল স্বর্ণচাঁপা। ভারতীয় বন বিভাগের সমীক্ষা অনুযায়ী এই গাছই ভারতের বনের মধ্যে সবচেয়ে উঁচু গাছ। প্রায় তিরিশ মিটার অবধি উঁচু হয়। চন্দনদস্যু বীরাম্বনের কোম্পেন্সালের জঙ্গলে, মানে নীলগিরি হিলস-এ, এরা যত বড় হয় তত বড় আর কোথাওই হয় না।

ফুল কখন হয়?

শরতে আর বসন্তে। পূজোর সময়ে আসবেন। ফুল দেখাব। গন্ধে ম ম করবে ন তখন।

সুমিতা বললেন, সত্যি! এই তোমার দোষ। তোমাকে একবার গাছে পেলো হুমি একেবারে গেছো ভুত হয়ে যাও। গাছ থেকে মোটে নামতেই চাও না। চলো এবার। আমার তো ওখান থেকে হেঁটে যেতেও প্রায় পঁয়তাল্লিশ মিনিট লাগবে। এখন পৌঁছব, কখন ফিরব, কখন তোমরা খাবে।

তোমরা না ফিরলে খাব না আমরা।

চলো।

চলো, বলে জিপে উঠলেন সকলে।

দে সাহেব বললেন, আপনাকে ফেরার সময় আবার চেনাব গাছ। আকাশমণি ও আফ্রিকান টিউলিপ আছে, শ্বেতচাঁপা, আকাশনিম, নাগলিঙ্গম সব দেখাব।

ওঁকে শিরিষ, কুর্চি আর গুলঞ্চ গাছও দেখিয়ে দিও।

সুমিতা বললেন।

এইচ. পি. বললেন, আপনাদের একবার আমার রাজপুরের বাগানে নিয়ে যাব। কিন্তু বনের মধ্যে গাছপালার যা শোভা, তা কি শহরে খোলে! রাজপুরও আর মাগের রাজপুর নেই। শহর হয়ে গেছে।

তার চেয়ে আপনিই বরং এখানে চলে আসুন। ঝাড়খণ্ড হওয়ার পরে তো এঁচিই ক্যাপিটাল হয়ে গেছে। এখন আপনাদের মতো সিনিয়র কাউনসেল-এর

এখানে চাহিদা হবে। আপনার কথা বলছিলেন বীরু রায় এবং তাঁর জুনিয়র রবি সরকার। আপনাকে তো ওঁরা চেনেন। হয়ত এসেও পড়বেন দু'একদিনের মধ্যে সারাদ্বায়ে আপনার সঙ্গে দেখা করতে।

বীরু রায়? ও হ্যাঁ! হ্যাঁ! চিনি বই কি। ভাল উকিল তো। রবি সরকারকে তো ঠিক চিনলাম না।

খুব লম্বা ছ'ফিট দুই-টুই হবে, কালো, ছিপছিপে, কার্মাটোলিতে বাড়ি।

ওও হ্যাঁ চিনেছি। সে তো কলকাতাতেও আসে প্রায়ই। হাইকোর্টে নয়, অন্যান্য কোর্টে অ্যাপিয়ার করে। আমার জুনিয়র শ্যামল সেন বলছিল, সেদিন রাঁচির কথা ওঠাতে। বীরু কি সেই সার্কুলার বোডেই থাকে? কি একটা হোটেলের পেছনে যেন।

অপ্সরা।

হ্যাঁ হ্যাঁ।

লালপুরে বাড়ি না?

তার দাদা তো জজ ছিলেন রাঁচি হাইকোর্টে। বীরু বাড়িতে জব্বর নেমস্তুর খাইয়েছিল একবার। এবং ভাল ছইস্কি। নিজে নিয়ে এসেছিল চার লিটারের বোতল, 'জনি ওয়াকার ব্লু-লেবেল-এর, স্টেটস থেকে আসবার সময়। সে সব অনেক দিনের কথা।

তবে তো আপনি জানেন-চেনেনই। এখানে একটা গ্রাম অ্যাডাপ্ট করে সেই গ্রামেই থেকে যান। মাসে দু'তিনটে মামলা করবেন। আপনার যা ফিস তাতে একটা পুরো গ্রামের খোরপোস চলে যাবে।

গ্রামও অ্যাডাপ্ট করা যায় নাকি? আজকাল তো ছেলেমেয়ে অ্যাডাপ্ট করা বহিড়িক পড়েছে।

তা পড়েছে। কিন্তু পুরো গ্রাম অ্যাডাপ্ট করলে তো সব ছেলেমেয়ে এবং তাদের মা-বাবারও আপনারই পুষ্টি হবে। কত বড় স্যাটিস্ফ্যাকশন বলুন তো।

এমন হয় না কি?

হয় না? দেবী কিছু বলে নি আপনাকে?

কই না তো।

তা'হলে বলবে পরে।

অ্যাডাপ্ট করতে কত টাকা লাগে?

এক লাখ মতো। আপনার তো হাতের ময়লা। চলে আসুন। বী ওয়ান অফ আস। প্রকৃতির মধ্যে থাকবেন, কী ডিজেল আর পেট্রলের ধোঁয়ার মধ্যে খাবি খান কলকাতাতে চ্যাটার্জি সাহেব। কলকাতাতে কোন মানুষে থাকে? তার অন্য কোন উপায় থাকলে?

তা ঠিক। অন্যমনস্কর মতো বললেন এইচ. পি.। তারপর বললেন, সম্ভবত অভ্যেসে থাকে। কলকাতা অজগর সাপের মতো। আমাদের গিলে ফেলেছে। এখন সে নিজে যদি দয়া করে উগরে দেয় তা'হলেই মুক্তি, নচেৎ নয়।

ততক্ষণে জিপটি সেই ভাঙা ব্রিজের নদীর কাছে এসে পৌছে গেছে। নদীতে

প্রায় হাঁটু জল। বেশ শ্রোতও আছে। মধ্যখানে আরও বেশি হতে পারে। চ্যাটার্জি সাহেব বললেন, সুমিতাকে, ওপারে যাবেন কি করে!

কেন? শাড়িটা একটু তুলে নেব। পায়ে তো গল্ফ শু। ভিজে গেলেও শুকিয়ে যাবে কিছুক্ষণের মধ্যে।

এইচ. পি. বললেন, দেবীও কি এই ভাবেই নদী পেরিয়ে গেছে?

অবশ্যই। আর কি ভাবে যাবে! ও কি আজ জিনস পরেছিল?

হ্যাঁ।

তবে ভিজবে ওটা। মেয়েটা শাড়ি যে কেন পরে না কে জানে। এত সুন্দর দেখি আমি ওকে শাড়ি পরলে।

চ্যাটার্জি সাহেব চুপ করে রইলেন। শাড়ি পরা দেবীকে দেখেন নি উনি কখনওই। তবে অন্য পোশাকেও উনি যথেষ্ট সুন্দরীই দেখেন।

তারপর মিসেস দে বললেন, শাড়ি পরার এই সুবিধা।

লুডিরও।

দে সাহেব বললেন।

ভদ্রলোক লুডি পরে না।

টা-টা। দুপুরে দেখা হবে।

বলে, সুমিতা জিপ থেকে নেমে নদীতে নামলেন। দে সাহেব জিপটা ঘুরিয়ে নিলেন।

যেতে যেতে মাঝ নদীতে দাঁড়িয়ে চাঁচিয়ে বললেন, আমরা মেয়েদের সঙ্গে ওখানেই কিছু খেয়েও নিতে পারি। কাজ যদি শেষ না হয় তবে তাই করব। তোমরা দুটো অবধি দেখে খেয়ে নিও কিন্তু। চ্যাটার্জি সাহেবকে উপোসী রেখে না।

এই গভীর জঙ্গলের মধ্যে একা একা অত খানি পথ যাবেন উনি? যাওয়াটা কি সেফ হবে?

চ্যাটার্জি সাহেব বললেন।

বুনো জঙ্গুর ভয় দিনে নেই বললেই চলে। তবে বনের জানোয়ারদের ভয় আমরা করি না। মানুষদেরই করি—তাও বনের মানুষদের নয়। শহরের জানোয়ারেরা এমন পথে সুমিতা বা দেবীকে একা পেলে জিপে উঠিয়ে নিয়ে যাবে হয়ত। শহরের মানুষমাত্রই সেক্স-স্টার্ডড। কেন এমন হয় জানি না। হয়ত প্রকৃতি-বিবর্জিত জীবন বলেই হয় এমন। এ নিয়ে গবেষণা হওয়া দরকার। এখানে শহরে মানুষেরা নেই তাই বাঁচোয়া কিন্তু শহরের প্রভাব খুব দ্রুত এসব জায়গাতেও দূষণ ছড়াচ্ছে।

হঠাৎ? কি করে?

টিভির মাধ্যমে। ভবিষ্যতের কথা ভবিষ্যতই জানে। তবে কলকাতাতে তো হেঁটে গেলে যখন তখন বাস-মিনিবাস-গাড়ি চাপা পড়েও মরতে পারে মানুষ। এখানে বিপদ-আপদ সেই তুলনাতে নেই-ই বলতে গেলে। তা'ছাড়া এই পুরো অঞ্চলে সুমিতা এবং দেবীকে সকলেই চেনে, ভালবাসে, শ্রদ্ধা করে। আমরা তো

ওদের শোষণ করতে আসি নি। সম্পূর্ণ স্বার্থহীনভাবে ওদের ভাল করতেই এসেছি। এবং ভাল করছিও। মিশনারীদের পর্যন্ত কখনও কখনও কোনও ভেস্টেড ইন্টারেস্ট থাকলেও থাকতে পারে, সে তারা যে ধর্মাবলম্বীই হন না কেন, যেমন-ধর্মাস্তরকের, কিন্তু আমাদের তো কিছুমাত্রই স্বার্থ নেই। সে কথা পঞ্চাশ বৎসর মাইল এলাকার মানুষে জানে। ওদের বিপদ কেউ ঘটালে তার সাংঘাতিক বিপদ ঘটাবে জঙ্গলের বাসিন্দারাই।

বেলা দেড়টা নাগাদ দে সাহেব হাতঘড়ির দিকে চেয়ে বললেন, জিপটা নিয়ে আমি ওই ব্রিজটার কাছে গিয়ে বরং দাঁড়াই একটু। অন্তত আধ মাইল তো কম হাঁটতে হবে ওদের। যদি ফিরে আসে।

তা ঠিক।

বলেই, ভিণ্ডকে ডেকে বললেন, দো বাজি খনা লগা দেনা। ম্যায় লণ্ডট আয়েঙ্গে। খ্যয়ের, ম্যায় নেহি ভি আয়া, তো সাহাবকো বৈঠাকে মত রাখ না, সমঝা? সাহাবকো খিলা দেনা।

জী হুজোর।

দে সাহেব চলে গেলে এইচ. পি. ভাবছিলেন, স্বামী-স্ত্রীর সমস্ত বিষয়ে সমান আগ্রহ থাকলে দাম্পত্য সম্ভবত এমনই মধুর হয়। তাছাড়া ইন্দ্রজিৎ এবং সুমিতার দাম্পতিটিকে প্রকৃতিও এক অন্য মাত্রা দিয়েছে। অবিবাহিত এইচ. পি., দাম্পত্য সম্বন্ধে কিছুই বোঝেন না কিন্তু এই দাম্পতিটাকে দেখে বিয়ে যে কেন করেন নি সময়ে তা ভেবে ভারি আক্ষেপ হচ্ছে। তবে সকলেই বলে, বিয়ে তো দিল্লিকা লাড্ডু, যো খায়া উও পস্তায়া, যো নেহি খায়া উওভি। আবার দেবীর দাম্পত্যর রকম সম্বন্ধে যা শুনেছেন তাতে গভীর ঔৎসুক্য জন্মেছে সেই দাম্পত্য সম্বন্ধেও।

তবে ওই সম্পর্ককে কি দাম্পত্য আদৌ বলা চলে?

তারপর ভাবলেন, তবে কি লাম্পটা বলবেন? না, তাও তো নয়। ওরা তিন জনে লুকিয়ে-চুরিয়ে তো কিছুই করছে না। যা করছে তা তো বুক ফুলিয়েই করছে এবং তিন জনের একে অন্যের মধ্যে সম্ভবত এক আশ্চর্য সমঝোতাও আছে। এমন সম্পর্কর কথা আগে কোন বইতেও পড়েন নি, এইচ. পি., দেখেন তো নিই। মনে হয়, দেবী অত্যন্ত সৎ ও সাহসী মোয়ে নইলে এইচ. পি.-র কাছে তাদের ঐ অদ্ভুত ত্রিভুজ সম্পর্কর কথা সে একটুও লুকোচাপা না করে বলত না। তাছাড়া দেবীর সঙ্গে তাঁর আলাপই বা কত দিনের? তাও তো বলতে গেলে ফোনে ফোনেই। দেবী তো দূরভাষিণীই।

চাঁর গাছ তলাতেই বসেছিলেন এইচ. পি.। আকাশে একটু একটু করে মেঘ জমছে। হয়ত দুপুর বা বিকেলের দিকে বৃষ্টি হবে। ঝিরঝির করে হাওয়া দিচ্ছে একটা নানা বনজ গন্ধ বয়ে। নানা রকম পাখি ডাকছে চারদিক থেকে। নাম জানেন না তাদের। আসলে তিনি কত কিছুই যে জানেন না তা এখানে না এলে বুঝতেনই না। তিনি যতটুকু জানেন তা শুধু টাকা রোজগার করতেই দরকার হয়। সে সব না জানলেও মানুষ হিসেবে তাঁর কোনও ক্ষতিই হতো না। বৃষ্টির আগে দেবীরা না ফিরলে তো ভিজ়ে ঝোড়ো কাক হয়ে যাবে। হাতে তো দু'জনের কারোই কোন

ছাতা-টাতাও ছিল না। এঁদের যতই দেখছেন ততই অবাক হচ্ছেন এইচ. পি.। এঁরা প্রকৃতিরই কন্যা যেন।

এমন সময়ে দুটি ছেলে বছর তিরিশেক বয়স হবে, এক জন দেহাতি মানুষের মাথায় দুটি ব্যাগ এবং কাঁধে একটি গিটার ঝুলিয়ে শাল বনের মধ্যে লালমাটির পথটি যেখানে বাঁক নিয়েছে সেই বাঁকটি ঘুরে ডেরার দিকে এগিয়ে এল। এক জনের পরনে জিনস আর লাল গেঞ্জি। অন্য জনের পায়জামা-পাঞ্জাবি। খন্দরের। দু'জনের চেহারাই বেশ ভাল এবং মনে হয়, ভাল পরিবারেরই ছেলে। গিটারটা দেখেই এইচ. পি. বুঝতে পারলেন এরাই দেবীর দুই সঙ্গী। গিটারের মালিকই নিশ্চয়ই বাংলা ব্যান্ড 'ঝঞ্জাটিয়া পাখিরা'র একজন। তবে গিটারটার মালিকানা জিনস-পরিহিতর না পায়জামা-পাঞ্জাবি পরিহিতর তা বোঝা গেল না।

ওই বাঁকের মুখে এসেই তারা দু'জনে একসঙ্গে হাঁক দিয়েছিল কোঈ হ্যায়? আরে হ্যায় কোঈ? দেবীশ্রী কাঁহা হ্যায়?

এইচ. পি. বুঝলেন, দেবীর পুরো নাম তাহলে দেবীশ্রী। ছোট করে দেবী বলে। ছোট্টই তো নাম তার আবার ছাঁট-কাট-এর প্রয়োজন কি?

যে লোকটি ব্যাগ দুটি আর গিটারটি বয়ে নিয়ে আসছিল সেই গলা তুলে ডাকল আর-এ। হ্যায় কোঈ?

তার গলার আওয়াজে ওরা তিন জনেই একই সঙ্গে রান্নাঘর থেকে বাইরে এল। এতক্ষণ রান্নাঘর থেকে তাদের পুটুর পুটুর কথা শোনা যাচ্ছিল।

আগস্তুকদের মধ্যে একজন বলল, দেবীজী কাঁহা? দেবীশ্রী?

দিদি তো জঙ্গলমে গ্যায়ী।

বয়স্ক ভরত বলল।

জঙ্গল মে মঙ্গল।

অন্য জন বলল।

খানাপিনা কুছ মিলেগা না? উনোনে হাম লোগোকো বারেমে কুছ বোলকে তো গ্যায়ী।

জী হাঁ। বোলিনখী যো আপলোগ কাল ইয়া পরশু আওবে কিজিয়েগা।

এক রোজ পহলেই আ পৌছা। পহিলে পৌছ গিয়া ইসলিয়ে ক্যা ভুখা রহনা পড়ে গা?

নেহি নেহি বাবু। ঈ কোঈ বাত হ্যায়? সব ইস্তেজাম হো যায়গা।

তুমহারি দিদি কব লওটেঙ্গি?

কোঈ ঠিক নেহি হ্যায় বাবু।

তব হামলোগ কাঁহা আরাম করেগা, কওন কামরামে ঠাহরেগা ইসব বাতায়গা কওন?

ভিও সেই দেহাতি লোকটিকে বলল, আরে এ লগন ভাইয়া, শামান সব বাঁয়াওয়ালা কামরামে রাখথো।

তারপর আগস্তুকদের দিকে ফিরে বলল, পানি—উনি পিজিয়েগা বাবু? চায়ে উয়ে লিজিয়েগা?

হাঁ। থোড়া পানি পিয়েগা আর থোড়া মাথামে ঢালেগা।

এক জন বলল, রসিকতা করে। কিন্তু ভিগু সে রসিকতা বুঝল না।

অন্য জন বলল, জঙ্গলে এলাম রাফিং করতে, দেবীর মোডাস-অপারাপ্তি, ওয়াকিং প্রেস, লিভিং কমফর্টস দেখতে। আর সেই হাপিস।

তারপর ভিগুকে বলল, এই সময়ে কেউ চা খায়। দোঠো গ্লাস ঔর পানি লানে সকতা?

এবারে ওদের দেখে এইচ. পি.-র মনে হলো ওরা কিঞ্চিৎ ড্রাঙ্ক হয়েই এসেছে। সম্ভবত পথেই খেয়েছে। বাসে খেলে অন্য বাত্রীরা আপত্তি করতেন নিশ্চয়ই। এখন বাজে প্রায় দেড়টা। লাঞ্চ-এর আগে Boozing-এর সময় তো হয়েইছে।

ভিগু দুটি গ্লাস এবং জলের ঘট নিয়ে এল।

এক জন বলল, লোটামে পানি। ঈরে বাবা। হামারা গা ঘিনঘিনি কর রহা হ্যায়। যো লেকে টাট্রিমে যাতা ঐ লোটামেই পানি পীতা। অঁ? তুম লোগ সাচমুচ জংলী হ্যায়।

ভিগু বলল, ছাইসে বহত আচ্ছাসে মলকে উসকো বাদ আচ্ছাসে ধোকর তবহি না পিনেকে পানি লেতে আয়া।

অন্য জন বলল, ছাড় তো। সময় চলিয়া যায় নদীর স্রোতের প্রায়। বোতলটা বের কর তোর ব্যাগ থেকে। নিপ দুটো তো শেষ করে দিলাম পথেই।

‘নিপট ইন দ্যা বাড’ কথাটা কি এই নিপ থেকেই এসেছে না কি রে?

আমি কি করে বলব। আমি কি তোর মতো বিদ্বান, কপি রাইটার।

সেই কথাতে এইচ. পি. বুঝলেন যে, পায়জামা-পাঞ্জাবি পরা ছেলেটিই কিংশুক এবং অন্য জন অস্তু। অস্তুর পুরো নাম বলে নি দেবী তাঁকে।

অস্তু ব্যাগ থেকে একটা ব্লু রিব্যান্ড জিন-এর বড় বোতল বের করল এবং একটি ঠোঙাতে চূরমুর। তারপর কিংশুককে বলল ওরভি হ্যায়। ঘাবড়াও মত।

কিংশুক বলল, নিষু হ্যায়? নিষু?

ভিগু বলল। নেহি বাবু।

এমন সময়ে সুরাতিয়া বাইরে এল, সম্ভবত আগস্তুকদের ভাল করে দেখতে।

ভিগু বলল, আণ্ডা খাইয়ে গা আপলৌগ?

কিসকি আণ্ডা?

অস্তু বলল।

তারপরে কিংশুক সুরাতিয়ার দিকে চেয়ে বলল, তুমহারি আণ্ডা?

এইচ. পি. ওখানে বসেছিলেন। এবার কিছু একটা বলা বা করা দরকার। তারা দেবীর লিভ-টুগোদারের পার্টনারই হোক আর যেই হোক, এনাফ ইজ এনাফ।

এইচ. পি. বললেন, আপনাদের পরিচয়?

পরিচয়?

ওরে! পরিচয়। কি পরিচয়? কার পরিচয়? আপনার কি পরিচয়? আপকি তারিফ?

আমার নাম এইচ. পি. চ্যাটার্জি।

ব্যারিস্টার?

এখন সবাই উকিল।

এইচ. পি. বললেন।

মাই! মাই! সরি স্যার। চিনতে পারি নি। অবশ্য আমরা দেখি নি তো আগে। আপনি যে এমন ধুমসো মোটা এক বুড়ো তা ভাবতেও পারি নি। দেবী এত কথা বলেছে আমাদের আপনার সম্বন্ধে।

ও হয়তো আমার পেশার কথা, নেশার কথা বলেছে, চেহারার কথা বলে নি। বলতে পারত।

তা হবে? দেবীকে আপনিই নিয়ে এলেন ফারস্ট এসির ক্যুপেতে করে? আপনিই সেই ফ্যাবুলাসলি রিচ ব্যারিস্টার।

ফিল্দি-রিচ বল্।

ইয়া। ফিল্দি-রিচ। ফর আ চেঞ্জ, তুই ঠিক বলেছিস কমরেড।

তা, দেবীকে কোথায় গুম করে দিলেন চ্যাটার্জি সাব?

কাজে গেছে। হয়ত খাওয়ার আগেই চলে আসবে। কিন্তু আপনাদের পরিচয় তো পেলাম না, যদিও আন্দাজ করতে পারছি।

কেন সারা রাত ধরে দেবীর সঙ্গে এলেন, দেবী আমাদের পুরো পরিচয় দেয় নি কি? সারা রাতেও টাইম হলো না?

দিয়েছে, মানে, সম্পর্কর কথাটা বলেছে কিন্তু ...

বলেছে? তা জানার পরেও মিস্টার ফ্যাটসো কোন সাহসে আপনি ক্যুপেতে দেবীর সঙ্গে রমদা-রমদি করতে করতে এলেন। সাহস তো কম নয়। আপনি শিগগিরি কিডন্যাপড হবেন। আপনাদের মতো খসসরদেরই কিডন্যাপ করা উচিত। তা না করল ব্যাটারা ভদ্রলোক পার্থ রায়বর্মনকে।

কিংশুক বলল, জিন চলবে নাকি একটু?

আমি দুপুরে খাই না বহু বছর। রাতে দুটো ছইস্কি খাই।

দুটো। যারা গুনে গুনে ছইস্কি খায় তারা মানুষ খুন করতে পারে, সুদের কারবার করতে পারে। তোমাকে, খুড়ি কি বলে ডাকা যায় বলুন তো আপনাকে। সতীনের পুংলিঙ্গ কি?

তুই না শালা কপি রাইটার। বাংলাতে না কি তোর দারুণ ফাণ্ডা, কবিতা লিখিস লিটল ম্যাগ-এ, লিরিক লিখিস, আর সতীনের পুংলিঙ্গ জানিস না?

বলেই, বোতলটা দেখিয়ে বলল, ঢাল না, ঢাল।

এইচ. পি. রীতিমত আতঙ্কিত বোধ করলেন। এই দুটি চরিত্রর সঙ্গে দেবী থাকে! দেবী সম্বন্ধেও ধারণা সব গোলমাল হয়ে যাচ্ছে। 'স্বীয়াশ্চরিত্রম দেবা নঃ জানন্তি কুতো মনুষ্যাঃ' মনে পড়ে গেল। তারানাংকরের দুই পুরুষ নাটকের ডায়ালগ। সংস্কৃত-টংস্কৃত এইচ. পি. বিশেষ জানেন না।

অস্ত্র বলল, লিরিক দে লিরিক। তবে না সুর কম্পোজ করব। নে একটা বড় টোক দে, মাথা খুলে যাবে।

দাঁড়া, দাঁড়া, ভাবতে দে। এ কি শালা তোর সকালবেলার পার্জিৎ? কমোডে

বসলাম আর হয়ে গেল। পার্জিৎ অবশ্যই, তবে ক্রিয়েটিভিটির পার্জিৎ। বাচ্চা প্রসব করার মতোই কষ্ট হয় একটা কবিতা লিখতে। বুয়েছিস। তাও সিজারিয়ান নারে শালা। নর্ম্যাল ডেলিভারি।

গিটারটা বেঁধে নিয়ে পীড়িং পীড়িং করতে লাগল অস্ত। করতে করতে বলল, দে দে। বডি এখন লিরিক চাইছে। লিরিক দে।

হঠাৎ কিংসুক বলল, এসেছে। নে ধর। গরম গরম। দাঁড়ে-বসা মুরগির ডিম যখন মুরগির পেট থেকে পড়ে তখন ক্যাচ করেছিস কি কখনও? করে থাকলে, তেমন করেই ক্যাচ কর।

যত বাতেল্লা পাটির। দে দে লিরিক দে। বডি এখন গান চাইছে।

আজকে এই বাদল দিনে
সারাক্ষাতে এসে
বড্ড ভালবেসে
দেখতে পেলাম ঘ্যাম ফ্যাটসো
কাঁটাল যেন ভুঁড়ি, খুড়ি খুড়ি খুড়ি।

এরপর অন্তরা। বল বল। বডি গান চাইছে।

সে যে মোদের সতীন,
তার বাপের নাম যতীন
আর তার সাঁটুলির নাম দেবী-ই-ই-ই...
আঃ। আঃ। আঃ। মাই বেবী-ই-ই...
ঝিৎকু চিকুর! ঝিৎকু চিকুর! ঝিৎকু চিকুর!
কিরে!

এরপর অ্যারেঞ্জার মিউজিক দেবে।

সুর লাগা, কম্পোজিশনটা জমে গেলে ‘ঝঞ্জাটিয়া পাখিরা’র পরের প্রোগ্রামে এটা গেয়ে দিস।

দাঁড়ানা! পঞ্চম আর দ্বৈবত এমন করে লাগাব না! শাল্লা! ঐরাবত বের হবে। তোর মুরগীর ডিম নয়। বল, বল, লিরিকটা রিপিট করে যা, সুর কম্পোজ করা কি সোজা কথা রে। এই ক্রিয়েশনের কথা যারা জানে, তারাই জানে!

তারপরই বলল, কিন্তু নোটেশন করবে কে? পরে যে ভুলে যাব। আমার কি মোটা দীনু আছে?

আমি টেপ করে নিচ্ছি, কলকাতা গিয়ে ভালুদাকে দিয়ে করিয়ে নিস।

বলেই, এইচ. পি.-র দিকে ফিরে বলল, স্যার। আপনি কি নোটেশন করতে পারেন? মানে, স্বরলিপি? দেবীজী তো আপনাকে স্যার বলেই ডাকে। আপনি আমাদেরও স্যার।

স্যার? না ষাঁড়?,-

আঃ হচ্ছেটা কি?

না, না, আমি বেরসিক নিগুণ। অত বিদ্যা আমার নেই।

এইচ. পি. বললেন।

অস্তু বলল, ন্যাকা! বিনয় হচ্ছে!

কিংশুক বলল, অস্তুগুণ না থাকলেও ছারগুণ আছে।

অস্তু বলল, আমাদের ক্ষমা করে দেবেন স্যার। খালি পেটে মাল পড়েছে, আমরা ড্রাক হয়ে গেছি। আসলে আমরা ...

কিংশুক বলল, ছাড় তো! অত এক্সপ্লানেশন কিসের? মাল তো খায় মানুষে ড্রাক হবার জন্যেই। অত এক্সপ্লানেশন কিসের? কারো বাপের পয়সাতে খাচ্ছি কি? নিজেদের কষ্টার্জিত পয়সাতেই খাচ্ছি।

এইচ. পি. ভাবলেন বলেন, সকলের পয়সাই কষ্টার্জিত। যাদের রোজগার কম শুধুমাত্র তারাই কষ্ট করে না রোজগার করতে। তবে হ্যাঁ, কস্টের রকমটা আলাদা আলাদা হয় অবশ্যই। কিন্তু এদের এসব বলার মানে কি? এদের ওয়েভ-লেস্ট আর ওঁর ওয়েভ-লেস্ট একেবারেই আলাদা। এরাই যদি বাংলার যুব-সমাজের প্রতিভূ হয় তবে বাংলার ভবিষ্যৎ নিয়ে অবশ্যই চিন্তিত হওয়ার সময় হয়েছে।

এমন সময়ে জীপটা ফিরে এল। দে সাহেব একা। ওঁরা আসেন নি।

জীপ থেকে নেমেই বললেন, ও, তোমরা এসে গেছ। এসেই বসে গেছ।

ওরা বলল, কি করব দাদা, দেবী নেই, চেনা মুখের কেউ নেই, শুধু উনি।

এসেই বসি নি, দাদা। পথেও মছয়া আর ছইকির নিপ খেয়েছি।

মছয়া পেলে কোথা থেকে?

বাস থেকে নামবার পরে ওই যে মক্কেল মাল বয়ে আনলো, তাকে বলতেই সে যোগাড় করে দিল। হোয়ার দেয়ার ইজ আ উইল, দেয়ার ইজ আ ওয়ে।

তোমাদের চেনা করে নিতে আর কতক্ষণ লাগে? আলাপ আছে কি? চ্যাটার্জি সাহেবের সঙ্গে?

ছিল না। হল।

বলেই অস্তু বলল, একটা গান কম্পোজ করেছি এই মাত্র। শুনুন ইন্ডিজিৎদা।

লিরিক কিংশুক বন্দ্যোপাধ্যায়, কম্পোজিশান অস্তু দাস-এর।

বলেই, গানটি ধরে দিল।

গান শুনে ইন্ডিজিৎ দে বললেন, গান-টান আমি বিশেষ বুঝি না। সুমিতা শান্তিনিকেতনে পড়েছিল, রবীন্দ্রসঙ্গীত গায় ও। তাই শুনে শুনে রবীন্দ্রসঙ্গীতই ভাল লাগে। মানুষের মনের এমন কোনও ভাব নেই যা রবীন্দ্রসঙ্গীতে নেই।

হাঃ রবীন্দ্রসঙ্গীত আর কে গাইবে? পীযুষদাই মরে গেলেন।

তিনি কে?

পীযুষকান্তি সরকার। তাঁর গান না হয় না শুনলেন, নামও শোনেন নি?

না।

আপনি টিভি দেখেন না?

না।

নিউজ পেপার পড়েন না?

না। সুমিতা আনন্দবাজার পড়ে। অভোস, ছোটবেলার সময় পেলো আমিও চোখ বোলাই। সেখানে কি খবর বেরিয়েছিল?

নিশ্চয়ই।

তা'হলে তেমন ইম্পর্ট্যান্স দিয়ে বেরোয় নি।

আই পিটি উ। আর কি বলব।

কিংসুক বলল।

অস্তু বলল, পীযুষদাই মরে গেলেন। রবিন্দরসঙ্গীতও শেষ হয়ে গেল।

দে সাহেব ভিণ্ডকে ডেকে জিজ্ঞেস করলেন, ভাত আরও চাপিয়েছে কি না?

ভিণ্ড বলল, ভাত তো চাপিয়েইছে বেশি করে তার ওপর মাছের ঝোলেও জল ঢেলে ঝোল বাড়িয়েছে। আলুও ভেজে দেবে সুরাতিয়াদিদি।

বেশ।

অস্তু বলল, আরেক লোটা জল আনো তো বাবা। শুধু জল দিয়ে খেতে মুখ মেরে যাচ্ছে, লেবু তো নেই-ই, জেরা মিরচা হবে?

লেবুও হবে। আমি নিয়ে এসেছি পথ থেকে। আজকে সঁসএ-র হাট ছিল। সুমিতা এত কিছু কিনল যে সে জন্যেই দেরি হয়ে গেল।

তারপর ভিণ্ডকে ডেকে বললেন, দেখো ভিণ্ড, জিপকা পিছুমে নিষু ঔর হরা মিরচা হয়। ধো কর লাও পিরিচমে, বাবুলোগাঁকো লিয়ে।

জী হুজৌর।

এরা কি আপনাদের ক্রীতদাস নাকি? কথায় কথায় হুজৌর বলে কেন? কি বা মাইনে দেন এদের। দেওয়ার মধ্যে দু'বেলা খেতে দেন মাত্র।

সেটা ওদের চরিত্রদোষ, মানে সম্বোধনটা। পুরনো অভোসে বলে। আসলে ওরা জানে যে, আমরা ওদের সহকর্মী। লাভের জন্যে তো এই এন জি ও চালাই না আমরা। তা ওরা ভাল করেই জানে।

এখানে তো এই সারাঙ্গা না বারাঙ্গাতে তো থাকা-খাওয়ার বিস্তরই অসুবিধা। আপনার বারিয়াতুতেই গিয়ে উঠলে পারতাম আমরা। সেখানে সব কিছুই ওয়েল অর্গানাইজড। ইলেকট্রিসিটি আছে, জেনারেটর আছে। খাওয়ার ঘর, টেবল-চেয়ার, রান্নার লোক, খিদমদগার। কমোডওয়লা অ্যাটাচড বাথ ...

এই সারাঙ্গাতেও সব হবে একদিন। বারিয়াতুতে যখন প্রথম প্রজেক্ট করি তখন উদ্যোগ টাড়া ছিল। আরম্ভ দেখেই মুষড়ে পড়লে কি হয়? আরম্ভটা তো বীজ। এই বীজ থেকেই মহীরুহ হয়।

এই আপনার দোষ দাদা, শুধু আপনারই নয়, আপনাদের সকলেরই, আপনাদের জেনারেশনের দোষ-এই জ্ঞান দেওয়া। একটা সিম্পল কোয়েস্চন-এর সিম্পল আঙ্গার আপনারা কখনও দেবেন না। জ্ঞান ঢোকাবেন, ফিলসফাইজিং করবেন। আপনারা সবাই এক রকম।

দে সাহেব সে কথার জবাব না দিয়ে বললেন, তোমাদের খেতে তো দেরি আছে। আমরা খেয়ে নিয়ে একটু বেরবো। ঠিক আছে তো?

আপনিই তো মালিক। আপনি যা বলবেন তাই ঠিক আছে। আবার এসব ভণ্ডামির দরকার কি?

কিংগুক বলল, তা যাবেন কোন দিকে?

এই জঙ্গলেই। মিস্টার চ্যাটার্জি প্রথমবার এলেন, একটু ঘুরিয়ে সব দেখাই। কত রকম প্রজেক্ট করছি আমরা। পনেরোটি গ্রামের মানুষ এতে সক্রিয় ভূমিকা নিচ্ছে। পঞ্চায়েতও অবশ্য পুরোপুরি ইন্ডলভড হয়েছে। ঝাড়খণ্ড হওয়াতে আমাদের কাজের অনেক সুবিধা হয়েছে।

এম সি সি-র ঝামেলা নেই?

প্রথম প্রথম ছিল, ছিল না যে তা নয়। গাছতলাতে বসে গ্রামের মানুষের সঙ্গে মিটিং করছি হঠাৎ অটোম্যাটিক রাইফেল হাতে এম সি সির আট-দশ জন অ্যাক্টিভিস্ট যেন আকাশ থেকে পড়ল। কালো জাম খাচ্ছিলাম আমরা গাছ থেকে পেড়ে। কালো জাম দিয়েই দুপুরের খাওয়া সারছিলাম। ওদেরও দিয়ে, পাশে বসতে বললাম। আমাদের প্রজেক্টের কথা বুঝিয়ে বলার পরে তারা বুঝল। গ্রামের সব লোকজনের সঙ্গেও কথা বলল। জঙ্গল পাহাড়ের মানুষের ভালর জন্যেই যে যা করার তা করছি, নিজেদের মুনাফার জন্যে নয়, সে বিষয়ে ওরা নিশ্চিত হওয়ার পরে বলে গেল, আপনাদের কাজে যদি কেউ বাধা দিতে আসে আমাদের জানাবেন, আমরা তাদের ধড়কে দেব।

বাঃ। হিতোপদেশের গল্পর মতো শোনাচ্ছে মাইরি। না রে কিংগুক।

অস্তু বলল।

ঈশপ্‌স ফেবল।

কিংগুক বলল।

তাই তো শোনাবে। আমরা যে অন্যের হিতই করছি।

দে সাহেব বললেন।

তারপর গলা তুলে বললেন, আমাদের দু'জনের খাবার দাও ভিণ্ড, বেরোব আমরা।

অস্তু বলল, রিয়্যালি, বিশ্বাস করতেও কষ্ট হয়। দেবী যখন আপনার আর বৌদির কথা বলে উত্তেজিত হয়ে, তখন ওর মুখ চোখের ভাব বদলে যায়। নিজের লাভ ছাড়া এই পৃথিবীতে কেউ যে কিছু করতে পারে এ কথা ভাবাও আমাদের পক্ষে অসম্ভব। যারা তা করে বা করতে চায়, তারা পাগল ছাড়া আর কিছুই নয়, নয়ত ভণ্ড। তারা হয়ত কোনও Big bluff-এর অংশ। গুরুদের মতো, অমুক বাবা তমুক মায়ের মতো আপাত বুদ্ধিমান-বিদ্বান মানুষদের মেসমেরাইজ করে তারা যা বাগাবার বাগিয়ে নেয়। এইসব “কাল্ট”-এর বিরুদ্ধে আমরা আন্দোলন করছি। একদিন হয়ত আপনাদের এই ভড়কিবাজীরও শেষ দেখব আমরা। যাঁরা আপনাদের ডোনেশান দেয় তাঁদের কাছে আপনাদের এক্সপোজ করে দেব। আপনারা সেয়ানা পাগল, পাগল নন।

জেনুইন পাগলও তো হতে পারি। আফটার অল, থাকি তো রাঁচিতেই। কাকের মেন্টাল হসপিটাল তো কাছেই।

দে সাহেব বললেন।

সে আমরা দেখব। দেবীকে কী গুণ করেছেন আপনি এবং আপনারা জানি না আমরা কিন্তু ওকে এই চক্রর থেকে মুক্ত করবই। সে জনোই আসা এবারে। আপনারদের চক্রর আর এই ফ্যাটসোর খপ্পর থেকে। কলকাতার জীবন ছেড়ে, এত রকম এন্টারটেইনমেন্ট ছেড়ে এই জঙ্গলে কিসের খোঁজে বার বার আসে ও, এবার তা ভাল করে বুঝে যেতে চাই।

আশ্চর্য। দে সাহেব একটুও রাগ করলেন না। হাসলেন। বললেন, এবারে তো চার-পাঁচদিন ছুটি নিয়ে এসেছ, ভাল করে বুঝে যাও। দেখো, তারপরে দেবীর সঙ্গে তোমরাও যেন কলকাতার সব মোহ ছেড়ে এই জঙ্গলের নেশাতে মজে এই গরীবীতে সামিল না হও। সাবধানে থাকো। এই প্রকৃতি অক্টোপাসের মতো। যাকে সে ধরে, তাকে আর সে ছাড়ে না।

ওঁদের খাওয়ার নিয়ে এল ভিণ্ড প্লাস্টিকের থালাতে করে। বাটিটাটি নেই, থালারই মধ্যে ভাতের ওপরে ডাল, আলু ভাজা এবং মাছও। ভাত লাগলে আরও দেবে।

থালার একপাশে কাঁচা লঙ্কা কাঁচা পেঁয়াজ। দে সাহেব বললেন, চলুন, আমরা ও দিকে গিয়ে বসি। ওদের হয়ত অসুবিধে হবে।

আমাদের সবচেয়েই সুবিধে। দূরে যেতে চান, যান, অত এক্সপ্লানেশান কিসের মিস্টার দে?

এগুলো? ওগুলো দেখিয়ে চ্যাটার্জি সাহেব বললেন আতঙ্কিত গলায়।

সাহেবের পাত থেকে পেঁয়াজ কাঁচা লঙ্কা তুলে নিয়ে যাও ভিণ্ড। বললেন দে সাহেব।

তারপর বললেন, আরে কাঁচা পেঁয়াজের মতো এনার্জি-গিভার আর কিছুই নেই। সেকেন্ড ওয়ার্ল্ড ওয়ারের শেষ দিকে বার্মার জঙ্গলে, এখন মায়ানমার, জেনারেল উইংগেট ছিলেন ব্রিটিশ আর্মির। জাপানিদের বিরুদ্ধে উইংগেটের কীর্তিকলাপ কিংবদন্তি হয়ে আছে। উইংগেট নাকি শুধু কাঁচা পেঁয়াজ খেয়েই থাকতেন। ‘উইংগেটস্ সার্কাস’ বলে খ্যাত ছিল তাঁর রেজিমেন্ট।

গন্ধ লাগে না?

আমার তো লাগে না। আর আমাকে চুমুটা খাচ্ছে কে? যে কখনও সখনও খায়, আমার বিয়ে — করা বউ তাকেও পেঁয়াজ কাঁচা লঙ্কা ধরিয়ে দিয়েছি। গন্ধ কাটুকুটি হয়ে যায়।

চ্যাটার্জি সাহেবদের খাওয়া হয়ে গেলে দে সাহেব দেবীর দুই সঙ্গীকে বললেন, তোমরা খুব দেরি কোরো না। কারণ, তোমাদের খাইয়ে ওরা নিজেরা খেয়ে দেয়ে বাসনপত্র মেজে আবার রাতের রান্নার বন্দোবস্ত করবে।

তারপর বললেন, রাত কি খেতে চাও তোমরা? তোমরা হলে দেবীর গেস্ট, মহামান্য, আমার কাছে।

রাতে রাম্ খাব আমরা। রাম্-এর সঙ্গে খিচুড়ি জমবে ভাল।

মাংসও করতে বলব। কষা মাংস। চলবে?

বাঃ। তা'হলে তো জমে যাবে। আপনি গ্রেট। রিয়্যালি।

দুপুরের খাওয়ার পর একটু বিশ্রাম তো করবে?

একটু মানে? লম্বা ঘুম লাগাব। ট্রেন জার্নি করে এসেছি, ঘুম তো হয় নি। আসারও ঠিক ছিল না। আনরিসার্ভড কামরাতে সেকেন্ড ক্লাসে সারা রাত প্রায় বসে বসেই এসেছি। দেবীর এই ইনফ্যাচুয়েশনটা ইনভেস্টিগেট করতে আমাদের আসাটা খুবই জরুরি ছিল। এই সারাঙ্গা এবং ফ্যাটসো এই দুটি মিথকেই আমরা এক্সপ্লোড করে যেতে চাই।

খুব ভাল। থরোলি ইনভেস্টিগেট করো। বিকেলে বা সন্ধ্যাতে ঘুম ভেঙে উঠে চা চেয়ো, চা দেবে। ওর নাম ভিগু। সুরাতিয়া রান্নাঘর থেকে বেরোয় না। ওকে উত্ত্যক্ত করো না ড্রিঙ্ক-ট্রিঙ্ক করে। মাথায় টাঙ্গির কোপ পড়বে।

কে মারবে?

আমাদেরও ক্লোজড—সার্কিট টিভি আছে। আগন্তুকদের সব ক্রিয়াকলাপ মনিটর করা হয়। গার্ডও আছে। দেবী নিজে টাঙ্গি চালালেও আশ্চর্য হয়ো না। আমাদের এখানে আমরা সকলেই, তোমরা যাকে পাগল বলে, তাই। পাগলে কি করে আর কি করে না, তা কি বলা যায়?

ওকে। থ্যাঙ্ক উ) ফর দ্যা ওয়ানিং।

কিংগুক বলল।

অস্তু বলল, এইচ. পি. চ্যাটার্জির ওপরে একটা গান কম্পোজ করলি, এবার ইন্ড্রিজিৎ দে'র উপরে আরেকটা কম্পোজ কর। ফিরলে, গিটার বাজিয়ে গেয়ে শোনাব। দেবীকেও শোনাতে হবে দুটি গানই।

বলে, দু'জনেই হি হি করে মাতালের হাসি হাসতে লাগল।

জীপে এক কিমি মত গিয়ে একটা চড়াই-এ উঠে খুব ঘন জঙ্গলের মধ্যে মালভূমির মতো একটা সমান জায়গাতে পৌঁছে ইন্দ্রজিৎবাবু বললেন, নামুন এবারে।

তারপর বললেন, আধ কিমি মতো হাঁটতে পারবেন ত? চেষ্টা করলেই পারবেন। রোজই একটু একটু করে যদি হাঁটা বাড়ান তা'হলেই দেখবেন ঠিকই হাঁটতে পারছেন। কোনোই অসুবিধা হচ্ছে না। তা ছাড়া, এখানে পিওর অক্সিজেন। যাঁদের হার্টের অসুখ তাঁরাও এখানে এসে নওজোওয়ান হয়ে যান। আসলে শরীর ত মন বিবর্জিত নয়। মন আনন্দে থাকলেই শরীরও আনন্দে থাকে।

দু'জনে কথা বলতে বলতে আধ কিমি মতো হেঁটে গিয়ে সেই মালভূমির একেবারে শেষে গিয়ে দাঁড়ালো। নীচে গভীর খাদ। অত্যন্ত গভীর জঙ্গল সেখানে। বহু রকম গাছ। দুপুরের রোদে সেই জঙ্গলের বৃষ্টি ভেজা ক্রোরোফিল-উজ্জ্বল গাঢ় সবুজ পাতারা একেবারে ঝকঝক করছে।

একটা বরঝরানি আওয়াজ শুনতে পাচ্ছেন চ্যাটার্জি সাহেব?

পাচ্ছি।

এটাই হলো ঝিঙ্গুরঝারি নালা। ঐ নালাতেই বাঁধ দিয়েছি আমরা। ঐ বাঁধের জন্যে যে জলাধার হয়েছে সেই জলাধার থেকে ক্যানাল কেটেছি দু'দিকে। এ বছর যা ফসল ফলবে তা বলার নয়।

তারপর বললেন, আমি যখন পূব-আফ্রিকার তানজানিয়ার লেক-মানিয়ারা ন্যাশনাল পার্ক-এ যাই তখন সেখানের ফরেস্ট লজ-এ প্রথম বার সুইট-কর্ন স্যুপ খেয়ে ভাললাগায় অস্তগন হয়ে গেছিলাম। গেছিলাম জুলাই মাসে। তখন আফ্রিকাতে শীতকাল। অত বড় বড় ভুট্টার দানা ভারতের কোথাওই দেখি নি। আসার সময় শুকনো দানা নিয়ে এসেছিলাম। বারিয়াতুতে আমাদের প্রজেক্ট-এরিয়ার মধ্যে একটি আলাদা বেড করে তাতে ঐ ভুট্টার দানা ছড়িয়ে দিয়েছিলাম। তা থেকে যে ভুট্টা হয়েছিল তার পুরোটাই বীজ হিসেবে রেখে নানা জায়গাতে লাগিয়েছিলাম। হাজারিবাগ—গয়া রোডে মারহান ফার্মও বীজ দিয়েছিলাম। সেই ভুট্টাই আমরা সারাজাতে লাগিয়েছি। এবারে আসুন শীতে, আপনাকে মস্তিকি রোটি আর শর্ষুকি সাগ খাওয়াব। সুইট-কর্ন স্যুপও খাওয়াব। দেখবেন, কত বড় বড় দানা ভুট্টার। আর কী মিষ্টি!

তারপর বললেন, জানেন ত, এই ভুট্টাই জিম করবেট পূব-আফ্রিকার কিনিয়া থেকে এনে উত্তরপ্রদেশের হিমালয়ের তরাই অঞ্চলে তাঁর কালাধুঙ্গির খামার বাড়িতেও লাগিয়েছিলেন।

তাই? আমি কি করে জানব বলুন চ্যাটার্জি সাহেব। বিপুলা এ পৃথিবীর কতটুকু

জানি! তা আমাদের দেশের কেন্দ্রীয় ও রাজ্য সরকারেরা কেন পূর্ব-আফ্রিকা থেকে ঐ ভুট্টা আনান না?

বলতে পারব না। হয়ত আনান। পঞ্জাব গভর্নমেন্ট নিশ্চয়ই আনান। কি করে ফেলেছে ওরা! কৃষি-কাজ করেও যে অমন বড়লোক হওয়া যায় তা পঞ্জাব আমাদের চোখের সামনে করে দেখিয়েছে।

তারপর একটু চুপ করে, এক টোঁক জল খেয়ে, চ্যাটার্জি সাহেব বললেন, তবে পঞ্জাবীদের অনেকই গুণ। কঠোর পরিশ্রমী তাঁরা। জেদী। ইজরায়েলিদের সঙ্গে নানা ব্যাপারে মিল আছে ওঁদের।

পঞ্জাবীদের বড়লোক হবার আরেকটা কারণ অ্যাগ্রিকালচারাল ইনকাম-এর ওপরে ট্যাক্স নেই যে!

কেন? ট্যাক্স বসানো হয় না কেন?

কোনো কেন্দ্রীয় সরকারেরই উপায় নেই কৃষি-আয়-এর ওপরে কর বসায় —। রাজ্য সরকার যে ট্যাক্স বসান তা ক্ষুদ্র-কুঁড়োর সমান। আয়কর আমরা যে-হারে দিই তার ধারে কাছেও আসে না তা। এদিকে কৃষিকাজ করেই এয়ারকন্ডিশানড খামার বাড়িতে থাকছে, এয়ারকন্ডিশানড গাড়ি চড়ছে তারা গত ত্রিশ বছর ধরে।

কেন? উপায় নেই কেন?

উপায় নেই, কারণ ভোট চলে যাবে। ভোট পেলে তবেই না গদীতে থাকা যাবে। আর গদীই যদি চলে যায় তবে দেশের ভাল দিয়ে কি হবে! সেই নেহরু সাহেবের আমল থেকেই এই ট্র্যাডিশন সমানে চলে আসছে। মুখে “গরীবী হাটাও” আর বদলে ভোট বাগাও। দেশের ভাল সত্যিই করতে চাইলে জনসংখ্যা এমন প্রলয়ঙ্কর রূপ ধারণ করে! আমাদের দেশের সব সমস্যার গোড়াতে ত এই জনসংখ্যাই। স্বাধীনতার এত বছর পরে উৎপাদন কি বাড়ে নি? সবকিছুই বেড়েছে। কিন্তু উৎপাদন যদি অ্যারিথম্যাটিক্যাল প্রগ্রেসনে বেড়ে থাকে তাহলে জনসংখ্যা বেড়েছে জিওমেট্রিক্যাল প্রগ্রেসানে। সমস্যার সমাধান হবে কি করে।

আপনারা ফ্যামিলি-প্ল্যানিং সম্বন্ধে কিছু কি করছেন? আপনাদের প্রজেক্টে।

করছি বৈকী। একটা মিজারের কথা বলতে পারি। জঙ্গলে পাহাড়ে আমোদ বলতে মুখ্যত ছিল সঙ্গম। সঙ্কে নামার সঙ্গে সঙ্গে ঘরে ঢুকে দুয়ার দিয়ে জঙ্গলের মানুষ আর কি করবে? ঐ একমাত্র আনন্দ ছিল।

কি করেছেন আপনারা তার বিকল্প হিসেবে?

আমরা ওদের যা “রোজ” দিই তার দশ পার্সেন্ট কেটে রেখে তার সঙ্গে আমরাও দশ পার্সেন্ট যোগ করে টাকা জমলেই ওদের ব্যাটারির ট্রানজিস্টার কিনে দিচ্ছি। তাতে নানা রকম প্রোগ্রাম শুনছে ওরা। সঙ্কের পর সময় কাটছে ভাল। তাছাড়া সেক্স-এডুকেশন ক্যাম্প আছে, নানা এন.জি.ও.-কে ইনভলভ করে বার্থ-কন্ট্রোল পিলস, কন্ট্রাসেপটিভস ইত্যাদি বিনা পয়সাতে আমাদের সব প্রজেক্টেই বিলি করছি। চাইল্ড কেয়ার সেন্টার, ক্রেশ, এসবেরও বন্দোবস্ত করেছি। ছোট পরিবারই যে সুখী পরিবার একথা ওরা প্রত্যেকেই এখন জেনে গেছে।

রেডিও কিনে দিচ্ছেন, তো টিভি কি দোষ করল? সোলার ব্যাটারি দিয়ে ইলেকট্রিসিটি আনা যায় না?

যায়। কিন্তু এই টিভি আর টিভির বিজ্ঞাপন আর লাগামহীন সিরিয়াল আর ছবিই ত যা কিছু ভারতীয়ত্ব তার সর্বনাশ করে দিল। পেপসি আর কোক আর নেসলে কি কলগেট বা ছগুই বা সোনি এরা একটিও কি ভারতীয়? এদের এই বরমরমার মানে কি? দেশের টাকা বিদেশে বুক ফুলিয়ে পাচার। এদের এমপ্লয়মেন্ট পোটেনশিয়ালই বা কি? ক'জন মানুষকে চাকরি দিচ্ছে এরা।

তারপর একটু চূপ করে থেকে বললেন, আসলে এত কিছুই করার আছে আমাদের এই সব প্রজেক্টস-এ চ্যাটার্জি সাহেব, আর আমাদের জনবল, অর্থবল এতই কম যে, তেমন কিছুই করে উঠতে পারি নি এ পর্যন্ত।

আমি কি আপনাদের কোনো সাহায্য করতে পারি। ইন্ডিজিৎবাবু?

না। আর্থিক সাহায্য এখনি নেব না। এখনও তার সময় হয় নি। আপনাকে বার বার আসতে হবে, আমাদের সঙ্গে হাত লাগাতে হবে। আর্থিক সাহায্যের কথা অনেক পরে। আমরা ইনভলভমেন্ট চাই, টাকা চাই না। এই সারান্স প্রজেক্টটা দেবীই বলতে গেলে একা হাতে গড়েছে, আমি আর সুমিতা সাহায্য করেছি মাত্র। বাইরের টাকার চেয়েও স্থানীয় মানুষদের উৎসাহ উদ্দীপনা এখানের সবচেয়ে বড় স্ট্রিংথ।

দেবী বলছিল যে, এক লাখ টাকা দিলে না কি একটা গ্রাম অ্যাডাপ্ট করা যায়। বলছিল বুঝি?

দে সাহেব বললেন।

তারপর বললেন, তা অবশ্যই যায়। কিন্তু তার আগে সেই গ্রামের মানুষদের আপনাকে তো বাবা বলে মানার মতো মানসিকতাও আসতে হবে। এতো আর মাদার টেরিজার আশ্রম থেকে শিশুকে নিয়ে আসা নয়, আবাল-বৃদ্ধ-বনিতা সমেত একটা পুরো গ্রামের বাবা হওয়া। সেই সময়টুকু আগে দিতে হবে। যাকে বলে জেস্টেশান পিরিয়ড। আন্তরিকতাও প্রমাণ করতে হবে। তাদের পছন্দ না হলে তারা বাবা বলে মানবেই বা কেন আপনাকে?

ভেবেই উত্তেজিত বোধ করছি। সত্যিই কল্পনাশীল! একজন অকৃতদার মানুষের এত বড় পরিবার!! সত্যি। দেবীর কাছে আমি ভারি কৃতজ্ঞ। ও যদি না নিয়ে আসত তবে ত আসতেই পারতাম না এখানে। নিজের চোখে এসব দেখতেই পারতাম না। জানতেই পারতাম না।

তা ঠিক।

ইন্ডিজিৎবাবু বললেন।

তারপর বললেন, দেবীর মত অল্পবয়সী একটি মেয়ের এই প্রজেক্টে যা ইনভলভমেন্ট তার প্রকৃত মূল্যায়ন করা আমাদের পক্ষে সম্ভবই নয়। চিন্তাই করা যায় না। ও হয়ত অল্পদিনের মধ্যেই কলকাতা ছেড়ে এখানেই এসে থাকবে পাকাপাকিভাবে। তা ছাড়া, কলকাতাতে ওর অ্যাট্রাকশানটা কি? যাদের সঙ্গে ঘর করে তাদের ত দেখলেন। ওরাই হচ্ছে আপনাদের কলকাতার নবা-বুদ্ধিজীবীর শমুনা। কোনো পালের “গোদা” বা “দাদা” ধরে দল পাকিয়ে পারস্পরিক পিঠ-

চুলকোনি করেই জীবন পার করে দেবে এরা। শুধু 'মুখেন মারিতং জগৎ' অ্যাটিট্যুড নিয়েই ত আর চলে না। যদিও আমি প্রবাসী, তবু বাঙালি ত! এদের মতো বাঙালির স্যাম্পল দেখে লজ্জা করে আমার নিজেকে বাঙালি বলে পরিচয় দিতে। আপনারা তো কলকাতাতেই থাকেন। করতে পারেন না কিছু?

আমার বয়স হয়ে গেছে। তা'ছাড়া আমি অন্য জগতের মানুষ। খেটে খেতে হয় আমাকে। আমার কথা এই সব নানা ধান্দাবাজেরা কি শুনবে? তা'ছাড়া বাাপারটা কি জানেন? হা-ভাতেদের দেশে বড়লোক হবার মতো পাপ আর নেই। বড়লোক মানেই 'বুর্জোয়া'। বড়লোক মানেই খারাপ। বড়লোক মানেই চোর। বড়লোক মানেই নিগুণ। এই আটারলি নেগেটিভ অ্যাটিটুডই সব কিছু শেষ করে দিল। অথচ প্রত্যেক হা-ভাতের, সে বুদ্ধিজীবীই হোক অথবা শ্রমজীবী - মনের গভীরে কিন্তু একটাই স্বপ্ন।

কি সেই স্বপ্ন?

বড়লোক হবারই স্বপ্ন।

বিশেষ করে বুদ্ধিজীবীদের। বামপন্থা পশ্চিমবঙ্গে নান্যপন্থা নয়। সেটা একটা ভেদক। যত দুর্বুদ্ধিজীবী তারাই নানা দল পাকিয়ে লাল পতাকার তলায় গিয়ে জুটেছে। ভণ্ডামির চূড়ান্ত। ভাল মানুষ ও প্রকৃত বুদ্ধিজীবী যে নেই তা নয়, কিন্তু তাঁরা নগণ্য। এখন দুশ্রমীদেরই দিন।

দে সাহেব একটুমুগ্ধ অন্যান্যনয় হয়ে থেকে হঠাত্ই বললেন, ওদের মেরে আঁচি ঘাড় পরে বের করে দিতাম জঙ্গলে। রাঁচির বাস-এ চড়িয়ে দিতাম। কিন্তু পারলাম না শুধু দেবীর কথা ভেবে।

তারপর বললেন, কেন এবং কিসের জন্যে দেবী ঐ দুটো লোফারের সঙ্গে থাকে বলতে পারেন?

এইচ. পি. বললেন, না। সত্যিই পারি না। তবে দেবীকে আপনি আর সুমিতা দেবী অনেক বেশি চেনেন। আমি আর কতটুকু জানি ওকে। তবে একথা ঠিক যে ওই নৈকটা আমার সব বুদ্ধির বাইরে। কোথায় দেবী, কোথায় ওরা! তবে একথাও ঠিক যে ওদের প্রজন্মকে আমরা হয়ত ঠিক বুঝতে পারি না। দোষটা হয়ত আমাদেরই।

তারপর বললেন, মেয়েদের বোঝা সহজ নয় জানতাম কিন্তু তা যে এতখানি কঠিন তা সত্যিই জানতাম না।

থাক ওসব আলোচনা, দেবীর সঙ্গীদের আলোচনা, দেশের বা আপনাদের কলকাতার আলোচনা, এবার একটু ডান দিকে চলুন। দেখেছেন ঐ পাহাড়টা। চারদিকের সবুজের সমারোহের মধ্যে কেমন ন্যাড়া, গাছহীন।

সত্যি ত? কি করে এমন হল?

অনেকদিন আগে ফরেস্ট ডিপার্টমেন্ট ওখানে হরজাই বা পাঁচমিশেলি জঙ্গলের ক্লিয়ার-ফেলিং করেছিল কোনো এক রকম গাছের প্ল্যানটেশান করবে বলে। প্ল্যানটেশান না করলেও পাহাড় কি জমি জঙ্গল এমনি ফেলে রাখলেও তাতে হরজাই জঙ্গল গজিয়েই যায় অচিরে। প্রকৃতির মতো বড় জমিদার, বড় লেঠেল

আর দ্বিতীয় নেই। অচিরে প্রকৃতি দখল নেয় ন্যাড়া জমি বা পাহাড়ের। কিন্তু এই পাহাড়ের ওদিকের ঢালে একটি গুহা আছে। সেই গুহাতে “হো”দের এক দেবতা আছেন। ক্লিয়ার-ফেলিং-এর সময়ে বন বিভাগের কাঠুরেরা ঐ গুহাতে ঢুকে দেবস্থান নাকি অপবিত্র করে। সেই রাগে সেই দেও ঐ পাহাড়ে বন বিভাগকে কিছুই করতে দেন নি। তাঁর অভিশাপে ঐ পাহাড়ে বন বিভাগ কোনো একটি গাছকেও বাঁচাতে পারে নি।

ঐ দেবতা কেমন দেখতে?

আমাদের দেশের দেবতারা সবাইত সাকার নন। বনে-জঙ্গলে টোটম পূজোরই বেশি প্রচলন। নিরাকারও আছেন। এই দেও একটি গোল পাথর কিন্তু উজ্জ্বল সিঁদুরে লাল রং তার।

কী করে?

তা বলতে পারব না। ম্যাক্সনিজ' আকরের তাল কি না জানি না, জিওলজিস্টরাই বলতে পারবেন! কোনো কোনো বছর ঐ গুহার মুখে যে একটা মাত্র বড় শাল গাছ আছে, তাকে গাছ না বলে মহীক্ষহ বলাই ভাল, সেই গাছে এক জোড়া লাল-রঙা পাখি এসে বসে চৈত্রর শেষে। যে বছর আসে। সে বছর তারা থাকে দিন দশেক।

কি পাখি?

তা আমি জানি না। জঙ্গলের মানুষেরা বলে পাখি দুটি ঐ লাল দেবতার পূজারী। পাখির ছদ্মবেশে আসে। যে বছর আসে সেই বছর মস্ত মেলা বসে ঐ পাহাড়ের ওদিকে, গুহামুখে। সকলে লালদেওকে পূজা চড়ায়। সারাদিন রাত ভিড় লেগে থাকে, নাচগান হয়। তারপর পাখিরা উড়ে গেলে মেলাও শেষ। স্থানীয় মানুষদের আশা এক দিন লাল দেওর দয়াতে ঐ পাহাড় আবার সবুজ হবে।

আপনি এসব বিশ্বাস করেন দে সাহেব?

বিশ্বাস বলতে আমরা যা বুঝি তা হয়ত করি না, আবার অবিশ্বাসও করি না। কারণ, ঘটনা ত সত্য। যতক্ষণ না বিজ্ঞান তার কোনো প্রণিধানযোগ্য ব্যাখ্যা দিয়ে এই ঘটনাকে অপ্রমাণ না করতে পারছে ততদিন বিশ্বাস না করার কারণ নেই। যদিও আমার কোনো কুসংস্কার নেই, আমিও ত এই সারাদিকার মানুষদেরই মতো একজন জঙ্গলের মানুষই। আমরা তিন পুরুষ রাঁচীতেই। আমার বাবা ডাক্তার ছিলেন। তাঁর খুব শিকারের সখ ছিল আর সে জনোই বন পাহাড়ের যত অগম্য জায়গা, পাহাড়-চূড়া, নদী-নালা, গুহা সব জায়গাতে তাঁর যাতায়াত ছিল। বছর দশ বারো বয়স থেকে বাবা আমাকেও সঙ্গে নিতেন। সেই কারণে আমি প্রকৃতির মধ্যেই বড় হয়ে উঠেছি বলতে পারেন। প্রকৃতিকে যেমন ভালবাসতে শিখেছি ছোটবেলা থেকে, তেমনি এক জন সরল সাধারণ আদিবাসীরই মতো তাকে ভয় করতে, মান্য করতেও শিখেছি। মনের মধ্যে এক ধরনের ধারণা তৈরি হয়ে গেছে যে ঈশ্বরবোধের সঙ্গে বিজ্ঞানের কোনো বিরোধ নেই। ব্যাপারটা আমি ব্যাখ্যা করে বলতে পারব না। এটা অনুভূতির ব্যাপার। আপনি যদি বার বার বছরের পর বছর আসেন এখানে আপনি তখনই বুঝতে পারবেন কি আমি বলতে চাইছি।

এইচ. পি. চুপ করে ছিলেন। ভাবছিলেন, কলকাতা থেকে এ কোন রাজ্যে এসে পৌঁছোলেন!

চ্যাটার্জি সাহেব বললেন, এই বনের গভীরে একটা প্রাগৈতিহাসিক কদম গাছ আছে।

কদম গাছ?

হ্যাঁ। যে কদম গাছের নীচে দাঁড়িয়ে কৃষ্ণ কানহাইয়া বাঁশি বাজিয়ে রাখাকে ডাকতেন। দেখেন নি কখনও?

না তো!

লজ্জার সঙ্গে বললেন এইচ. পি.।

ঐ দেখুন।

বলে ডান দিকে আঙুল দিয়ে একটা বড় গাছকে দেখালেন ইন্ড্রজিৎবাবু। হলুদ গোল গোল ফল হয়ে আছে। ছেলেবেলাতে ঐরকম হলুদ পশমের বল দিয়ে তাঁরা ব্যাডমিন্টন খেলতেন তাঁদের যৌথ পরিবারের বাড়ির ছাদে। অবাধ হয়ে চেয়ে রইলেন এইচ. পি.। কত কিই যে জানার আছে অথচ ভেবেছিলেন তিন-চারটি আইনকে নখদর্পণে এনেছেন বলেই তিনি সবই জানেন।

তারপর কিছুক্ষণ চুপ করে থেকে বললেন, সেই গাছটির কথা বলুন।

হ্যাঁ। এক গাঁওবুড়ো আমাকে নিয়ে গেছিল সেই গাছের নিচে। গাছের নিচে মস্ত চ্যাটালো পাথরের কালো একটি শিলাসন। তার ওপর আমাকে নিয়ে বুড়ো বসল।

কতদিন আগে?

তা আজ থেকে পঁচিশ-ত্রিশ বছর আগে। তখন বড় বাঘের দাপটে এ জঙ্গলে ঢোকাই নিপদ ছিল। ঢুকলেও বেলা চারটির আগেই বন ছেড়ে চলে আসতেন মানুষ। তবে আমি তো শিকারী। আমি তো বাঘকে ভয় পাই না, বাঘের সঙ্গে মোলাকাত করার জন্যই আসতাম।

তারপর বুড়ো বলল, বুড়ো আমার বাবাকেও জানত। বাবা সেই গাঁওবুড়োর বৌকে দুরারোগ্য চীচক্ রোগ থেকে বাঁচিয়ে ছিলেন বলে বাবাকে ডাগদারসাব হিসেবে খুবই খাতির করত গাঁওবুড়ো এবং পুরো গ্রামের লোকেরা। ওদের গ্রামের নাম ছিল চুগুর।

বুড়ো কি বলল, বলুন তারপরে।

হ্যাঁ। বুড়ো বলল তোর মনে খুব অশান্তি?

তখন আমার বয়স কুড়ি। অশান্তি বলতে, ঐ বয়সেই একটি মেয়ের প্রেমে পড়েছিলাম। বাবা-মা বুঝতে পেরে আমাকে কিছু দিনের জন্যে পাটনাতে সরিয়ে দিলেন। তার ওপর পড়াশুনার চাপ ত ছিলই। বিদেশ যাওয়ার কথা। সব মিলিয়ে আমার জঙ্গলের স্বর্গ থেকে নির্বাসিত হয়ে পাটনার হৈ-রৈ এর পরিবেশে আমার আত্মহত্যা করতে ইচ্ছে করত।

বুড়োকে মাথা নাড়িয়ে জানালাম যে, হ্যাঁ। অশান্তি আছে।

জানি না, বাবা, বুড়োকে কিছু বলে রেখেছিলেন কি না।

শীতকাল। চুঙর বস্ত্রির ফসল খেতে বুনো শস্যের আসত, ওদের খুবই ক্ষতি করছিল বলেই আমরা শস্যের মারতে গেছিলাম সেই গ্রামে। তখন বাবা জীপ গাড়ি কিনেছেন, গেছিলাম বাবার জীপেই।

বুড়ো বলল, তোর যাকে যা বলার আছে, যার ওপরে যত রাগ আছে, যা-ই তুই চেয়েছিস অথচ পাস নি সব কিছু এক সঙ্গে একটা দলা পাকিয়ে নে।

দলা পাকিয়ে?

আশ্চর্য হয়ে বললেন এইচ. পি.।

হ্যাঁ। বলল, দলা পাকিয়ে।

তারপর?

তারপর সেই দলা মনে মনে ছুঁড়ে মার ঐ গাছের ওঁড়িতে। তারপর একটা নুড়ি তুলে নিয়ে জোরে মার ঐ গাছের কাণ্ডে। তারপর আমি চলে যাব। তুই মনটাকে স্থির করে, ঐ গাছতলাতে এক ঘণ্টা বসে থাক। গাছ তোকে আশীর্বাদ দেবে। তোর সব অশান্তি দূর হয়ে যাবে।

বলে বুড়ো আমাকে সেই পাথরের ওপরে রেখে চলে গেল। বলল, এক ঘণ্টা হয়ে গেলে তোর ঘড়ি দেখে আমাকে ডাকবি, আমি আসব। কাছেই থাকব আমি তবে তোর সঙ্গে নয়।

তারপর?

তারপর কি যে হল কি বলব!

আপনি কি জোড়াসনে বসেছিলেন, মানে, কোনো মুদ্রাতে?

আরে না না চ্যাটার্জি সাহেব। চেয়ারে বসার মতো করে পাথরটার উপরে বসেছিলাম। শীতের বিকেল। সূর্যের কমলা আলো এসে গাছপালার ফাঁক-ফোকর দিয়ে সেই পাথরটা এবং আমার গায়েও এসে পড়ছিল। নানা পাখি ডাকছিল। একটা কোটরা হরিণ বাক্ বাক্ করে ডাকছিল নিচের নালা থেকে। বাঘ দেখে থাকবে হয়ত। টিয়ার ঝাঁক দিন শেষের খবর আবীরের মতো ছড়াতে ছড়াতে তীর বেগে উড়ে যাচ্ছিল মাথার উপর দিয়ে। আমি মনটাকে যত সম্ভব শান্ত করে বসেছিলাম।

তারপর?

এক ঘণ্টা কখন হল আমি ঠিক জানি না তবে আমার সত্যিই ভার-মুক্ত মনে হতে লাগল। মনের মধ্যে কোনো ব্যাপারেই আর কোন চিন্তা, দ্বিধা বা সংশয় রইল না। রাগ রইল না কারো ওপরে। মনটা যেন পাখির মতো হয়ে গেল, মনে হল, ওড়াউড়ি করতে পারবে যেন ইচ্ছা করলেই।

গাঁওবুড়ো হঠাৎ ডাকল, ইন্দা।

আমি চমকে উঠে ঘড়িতে তাকিয়ে দেখলাম, দেড় ঘণ্টা হয়ে গেছে। মন আমার অভাবনীয়ভাবে চিন্তাশূন্য হয়ে গেছিল। সত্যি।

পরে আবার কখনও এসেছেন?

হ্যাঁ। সেই গাঁওবুড়ো কবে মরে গেছে। এখন তার ছেলে গাঁওবুড়ো। কিন্তু আমি বছরে কম করে তিন-চার বার আসিই। এ এক আশ্চর্য থেরাপি।

কোন সময় আসেন?

তার ঠিক নেই কোনোই। যখনই মনে ভার জমে, টেনশান, স্ট্রেস, রাগ, অভিমান তখনই চলে আসি এবং সম্পূর্ণ ভার মুক্ত হয়ে ফিরে যাই। সুমিতাকেও নিয়ে এসেছি অনেকবার। দেবীও যাবে বলেছে একবার। তবে ওখানে বসতে হয় একাই। অন্য কেউ সঙ্গে থাকলে হয় না। দূরে চলে যেতে হয় সঙ্গীকে।

কবে?

কী কবে?

মানে, দেবী কবে বলেছে যে যাবে ওখানে?

গতবারে এখান থেকে যাবার সময়ে বলে গেছিল যে এবারে এসে যাবে। ও পথ চেনে তো।

শেষবার এখানে কবে এসেছিল দেবী?

দিন পাঁচশেক আগে।

ও।

এইচ. পি. মনে মনে হিসেব করলেন কবে দেবী তাঁর সঙ্গে আলাপ করেছিল সেই সেমিনারে নিজে এগিয়ে এসে – তা প্রায় ছ'মাস তো হলো।

এইচ. পি. বললেন, জীপটা নিয়ে একবার সেই ভাঙা ব্রিজটার কাছে যাবেন না? ওঁরা যদি না এসে থাকেন তবে আধ কিমি ওদের কম হাঁটতে হবে। বেলাও ত পড়ে আসছে।

হাত ঘড়িতে এক ঝলক দেখে নিয়ে ইন্ডিজিৎ দে সাহেব বললেন, হ্যাঁ! চলুন। তবে ডেরা হয়ে যেতে হবে। যদি ওঁরা ইতিমধ্যেই ফিরে এসে থাকেন। তবে সে সম্ভাবনা কম। খেতে যখন আসেন নি তখন কাজ পুরো করে সঙ্কের মুখে মুখেই ফিরবেন।

জীপ নিয়ে ডেরাতে যখন পৌঁছলেন এইচ. পি.-রা তখন বেলা পড়ে এসেছে। ভিঙ আর ভারত বলল মেমসাহেবরা ফেরেন নি।

বাবুরা কখন খেলেন?

দে সাহেব জিগগেস করলেন।

এই তো একটু আগেই।

এত দেরীতে?

জী সাব। পুরো বোতলটা সাফ করে তারপরই না খেলেন।

তোমরা খেয়েছ? হ্যাঁ, খেয়েছি একটু আগে।

তোমরা আগে খেয়ে নিলে না কেন?

মেহমানরা না গেলে কি করে খাই সাহাব। খাওয়ার কোনও জিনিস যদি কম পড়ে যেত। কেমন খান তা জানা নেই না আমাদের!

কোথায়? বাবুরা?

ঘুমুচ্ছেন। বলেছেন, ওঁরা উঠে চা চাইলে চা দিতে। নইলে ওঁদের যেন না ডাকা হয়।

ভাল করে খেয়েছেন ত? তোমরা দেখাশোনা করেছ ত ঠিক মতো।

জী সাব।

যা চেয়েছেন তাই দিয়েছ?

জী সাব। তবে একটা জিনিস ছাড়া।

সেটা কি?

সুরাতিয়ার ভিম।

ঐ বাজনদার বাবুটা ভারি ঝামেলা কবছিলেন, সুরাতিয়ার ভিম খাবেন বলে।

তাই?

জী সাব।

দে সাহেবের চোয়াল দুটো শক্ত হয়ে এলো।

ওঁরা যখন সেই ভাঙা-ব্রিজের নদীটার কাছে পৌঁছালেন তখন সূর্য পশ্চিমের জঙ্গলে হারিয়ে গেছে। গাছের পাণ্ডার ভাঙ্গ শেখের গলানো রোদ মাখামাখি হয়ে আছে। একটা ময়ূর ডেকে উঠল সামনে থেকে। ওঁরা দু'জনে জীপ থেকে নেমে ভেঙে যাওয়া ব্রিজের একটা পিলারের ওপরে বসলেন।

দে সাহেব চ্যাটার্জি সাহেবকে বললেন, এখনি এসে পড়বে ওরা।

তারপর কি রকম চূপ করে থেকে কি ভেবে বললেন, আমরা সবাই বুনো। দেবীও গত চার বছরে বুনো হয়ে উঠেছে। আমার মন বলছে, শহরের বাঁধন ও এবারে ছিঁড়বে। কিন্তু আমি না হয় বিবাহিত। মেয়েটা বিদেশে চলে যাওয়ার পর থেকে সুমিতাও ওর পুরো সময় দেয় মেয়েদের নানা প্রজেক্টে। কিন্তু দেবীর সামনে লম্বা জীবন পড়ে আছে। ওতো আর মিশনারী নানা নয়। ওল জীবনেও তো অন্য চাহিদা আছে, ঘরের মতো ঘর বাঁধার ইচ্ছে আছে। কী করবে, তা ঐ জানে। ওবে ভালুক বা শুয়োর বা বাঁদরের সঙ্গে ঘর করার চেয়ে ঘর না করাই ভাল। আপনি কি বলেন চ্যাটার্জি সাহেব?

আমি কি বলব? আমি কিই বা জানি। বিশেষ করে এসব ব্যাপারে, বগুন? তারপর বললেন, দেবী যে সঙ্গীদের সঙ্গে লিভ-টুগেদার করছে তাদের নিয়ে কি ও সুখী নয়?

আদৌ নয়।

আপনাকে বলেছে কখনও?

সরাসরি বলে নি। তবে আভাসে ইঙ্গিতে বলেছে। আসলে, ও আপনাকে বলেছে কি না জানি না, ওর মা'র দুটি কিডনিই খারাপ হয়ে গেছে। ওঁকে সপ্তাহে একবার ডায়ালিসিস করাতে হয়। টাকার ওর খুব প্রয়োজন। বাবার মৃত্যুর পরে বাবারই এক ব্যাচেলর বন্ধুর সঙ্গে থাকেন মা। তাঁর একটা ছোট দোকান আছে যাদবপুরে। তাঁর রোজগার সামান্যই। তবে তিনিও যতটুকু রোজগার তার সব টুকুই দেবীর মায়ের জন্যেই খরচ করেন। ওঁদের সম্পর্কটা অন্যায়ের নয়, নোংরাও নয়। শুনেছি অন্য সূত্র থেকে যে, দেবীর বাবাও জানতেন সেই সম্পর্কের কথা। দুই বন্ধুই ভালবাসতেন একই নারীকে। ছেলেবেলা থেকে এটা দেখে ও জেনেই হয়ত দেবীর কাছে দু'জন পুরুষের সঙ্গে লিভ-টুগেদার করাটা অস্বাভাবিক মনে হয় নি। আমাদের এই প্রজেক্ট থেকে বা ও পায় তার সবই মাকে দিয়ে দিতে হয় ওর।

তাই ওর থাকা খাওয়ার কারণেই হয়ত ওদের কাছে থাকে। তা'ছাড়া যখন থাকবে বলে মনস্থির করে, তখন হয়ত ভালবাসাও ছিল ওদের সঙ্গে। কোন মানুষ জীবনের কোন পর্যায়ে এসে কি করে, কেন করে তা শুধু সেই জানে। অন্যের পক্ষে অনুমান করা হয়ত সম্ভব, জানাটা প্রায় অসম্ভব। তা'ছাড়া এই সব ব্যাপার এতোই ব্যক্তিগত যে, নিজে থেকে না বললে কারোকে ত জিগগেসও করা যায় না!

তাতো ঠিকই।

এইচ. পি. বললেন।

তারপর বললেন, দেবীর মায়ের ডায়ালিসিস কোথায় হয়?

ওদের পাড়ারই একটা নার্সিংহোমে হয়। ওদের মেশিন আছে।

কোন নেফ্রোলজিস্টের আন্ডারে আছেন?

ডঃ বাণী ব্যানার্জি।

নার্সিংহোম-এর নাম কি জানেন?

রাসবিহারী অ্যাভিনিউতে, ইউনিক নার্সিংহোম, লেক মার্কেটের কাছে শুনেছি।

ও। বললেন, এইচ. পি. তারপর বললেন, আপনারা তো চলে যাবেন একটু পরে রাঁচীতে, তাই না?

হ্যাঁ। দে সাহেব বললেন।

গত রাতে ত আমি ছিলাম। আজ তো দেবীর সঙ্গীরা সবাই এসে গেছে। কিন্তু ওরা যদি না আসত তবে দেবী একা থাকত রাতে এই জঙ্গলে? ভয় করে না ওর?

ভয়ডর আর নেই দেবীর। ও আমাদেরই মতো হয়ে গেছে। তা'ছাড়া মুসলিম এসে যাবে। মুসলিমই থাকে এখানে। এতক্ষণে হয়ত এসেও গেছে। আজ লাতেহার হয়ে আসবে। হয়ত সঙ্গে নামার পরেই আসবে। তা না হলে ওর আসার আওয়াজ পাওয়া যেত।

তারপর বললেন, দেবী যখন আসে তখন দেবীর দেখাশোনা ও করে। সুরাতিয়া, ভিণ্ড আর ভরত তো থাকেই।

এই মুসলিম কে?

সে এক ক্যারেক্টার। ছ'ফিট দু'ইঞ্চি লম্বা। কুচকুচে কালো। অলিভগ্রীন পোশাক পরে। দেখলে মনে হবে কম্যান্ডো। ও ছিল ডালটনগঞ্জের মোহন বিশ্বাসের ছিপাদোহরের জঙ্গল-ম্যানেজার। আই সি সি'র পেপার মিলে লাখ লাখ টাকার বাঁশ যেতো, তার জন্যে শয়ে শয়ে কুলি লাগত আর সেই সব কুলির "মেট" ছিল ঐ মুসলিম। টাইগার প্রজেক্ট হয়ে যাওয়াতে ত সব ফরেস্ট অপারেশনই বন্ধ হয়ে গেল, মোহন বিশ্বাসও মারা গেছেন -- তাই ওকে আমাদের প্রজেক্টের কাজে লাগিয়েছি। সপ্তাহে একদিন করে যায় ছিপাদোহরে। সেখানেই তার পরিবার থাকে। ছেলেরাও বড় বড় হয়ে গেছে। তারা নানা জায়গাতে কাজ ও ব্যবসা করে। কিন্তু মুসলিম জঙ্গলেই সারা জীবন কাটিয়েছে তাই বাকি জীবনও কাটাতে চায়। একটা বহু পুরনো লজবুড়ে বি এস এ মোটর সাইকেল আছে ওর। তাই চালিয়ে জঙ্গলের মধ্যের পায়ে চলা পথ দিয়ে চলে আসে ছিপাদোহর থেকে।

বাঃ।

বাঃ না। ওদিকের জঙ্গলে তো হাতি আছে অনেক। হাতির মাঝে মাঝেই গণ্ডগোল করে।

কেন?

ওরা মোটর সাইকেলের শব্দ একেবারেই পছন্দ করে না। ভট ভট ভট শব্দ শুনতে পেলেই তাড়া করে আসে।

তাই?

বলেই, এইচ. পি. বললেন, একি! সঙ্গে তো হয়ে এল! এবার আমারই ভয় করছে। আপনার স্ত্রী আর দেবী কি রাত নামলে ফিরবেন? ধন্য মহিলা ওঁরা সত্যি। আপনিও ধন্য।

টেনশান করবেন না। বনে এসে কোনো রকম মিছে চিন্তা করবেন না। বী কুল। ওঁরা এসে যাবেন। তা'ছাড়া দেখুন ওদিকে চেয়ে।

এইচ. পি. বর্ষামাত্র স্নিগ্ধ নির্মেঘ আকাশের দিকে চাইলেন
দেখতে পাচ্ছেন?

চ্যাটার্জি সাহেব বললেন।

কি?

দেখুন পশ্চিমে সূর্য ডুবছে লাল থালার মতো আর পূবে চাঁদ উঠছে হলুদ থালার মতো। আর ঐ দেখুন, পশ্চিমাকাশে সন্ধ্যাতারা। দেখছেন?

মঞ্জুমুখর মতো এইচ. পি. বললেন, হ্যাঁ।

তারপর বললেন, অনেক জঙ্গলেই বেড়াতে গেছি, বাংলাতে বসে ছইস্কি খেয়েছি, তাস খেলেছি, কলকাতার গল্প, পরনিন্দা পরচর্চা করেছি কিন্তু জঙ্গল দেখার চোখ তো ছিল না। আপনি আমাকে ইনিসিয়েট করলেন। এখন আর মুক্তি নেই মনে হচ্ছে।

এখনই তো আসল মুক্তি। মুক্তির পথই তো আপনাকে আমি চেনালাম। বঙ্গনের মধ্যেই ছিলেন ত এতগুলো বছর।

একথা ঠিক। আমার যেন এমানসিপেসান হলো চ্যাটার্জি সাহেব আপনার দয়াতে।

আমার দয়া নয়। দেবীই তো আপনাকে নিয়ে এলো হাত ধরে। আপনার কৃতজ্ঞতা দেবীরই প্রতি থাকুক। আমরা তো উপলক্ষ মাত্র।

তারপর এইচ. পি. বললেন, আপনারা রাঁচীতে কটা নাগাদ পৌঁছবেন?

আটটা নাগাদ।

বিজুপাড়া না কি একটা জায়গা আছে না? ওখানে পৌঁছে মোবাইলে বলে দেব কুকুকে গাড়িটা পাঠাতে। কোথায় পাঠাতে বলব?

সেকি! আপনি থাকবেন না রাতে?

না।

কেন?

বলেই বললেন, বুঝতে পারছি -- থাকবেন না ফর আন্ডারস্ট্যান্ডেবল রিজন্স। কিন্তু দেবী যে দুঃখ পাবে।

মনে হয়, দেবী বুঝবে। আমি আজ রাতে এখানে থাকলে দেবীর সামনে আমি অপমানিত হলে দেবীর সম্পর্কটা ওদের সঙ্গে হয়ত চিড় খাবে। দেবীর কোনো রকম ক্ষতি হয় তা আমি চাই না।

আপনি ম্যাগনানিমাস। তবে আমিও আপনার জায়গাতে থাকলে বোধহয় চলেই যেতাম।

তারপরই বললেন, ছেলেদুটো কি আমার সঙ্গে ঠাট্টা করল? নইলে বিনা প্ররোচনাতে কেন এমন ব্যবহার করবে? দেবী আমার সঙ্গে এসেছে বলে তো ওদের উদ্ভেজিত হবার কারণ ছিল না।

ওরা তো অত্যাধুনিক। তা'ছাড়া ওরা তো ম্যারেডও নয়। তেমন কোনো জোরও তো নেই দেবীর উপরে ওদের।

কী জানি! কিছু কিছু জোর থাকে যা দুর্বলতার মোড়কে মোড়া থাকে। সেই মোড়ক খুলে দেখতে পারলেই সেই জোরের স্বরূপ বোঝা যায়।

দে সাহেব বললেন।

হবে হয়ত।

এইচ. পি. বললেন।

এক জোড়া পেঁচা উড়ে উড়ে ঝগড়া করতে করতে চক্রাকারে ঘুরতে ঘুরতে চাদের মধ্যে ঢুকে গেল। লালচে-হলুদ অন্ধকার নেমে-আসা রাতে তাদের অপার্থিব গলার স্বর এইচ. পি.-র গায়ে কাঁটা দিল। এমন সময়ে দেবী আর সুমিতার গলার স্বর শোনা গেল। মনে হল, ওরা নদীর ওপারে দাঁড়িয়ে কথা বলছে।

দে সাহেব বললেন, পাঁচ-সাত মিনিটের মধ্যে এসে যাবে।

পাঁচ-সাত মিনিট লাগবে?

হ্যাঁ। এই নিস্তক জঙ্গলে আওয়াজের দূরত্ব অনুমান করতে পারবেন আপনিও পরে। আমি ততক্ষণে জীপটা ধরিয়ে নিই।

বলেই উঠলেন দে সাহেব।

চিঠিটা নিয়ে এসেছিল সোহনলাল বাবুদের ড্রাইভার সানেকা মুণ্ডা একটা ছোট মারুতি গাড়ি নিয়ে।

পরশু বিকেলে স্যার ইন্ডিজিৎদাদের সঙ্গে চলে গেছিলেন সঙ্কের পরেই। কিংসুकरা তখনও ঘুমোচ্ছিল। মিশ্র মদের নেশাতে। ওরা বলে “Sleeping it off”. ঘুম থেকে উঠেছিল প্রায় রাত দশটার সময়ে। গত কাল সারা দিন ও রাত ওরা ছিল। তবে দেবী তো কাল ভোরে উঠেই চলে গেছিল সারাদিনে। ওরা কেউই সেখানে যাওয়ার উৎসুক্য দেখায়নি।

গতকাল সঙ্কের সময়ে ফিরে শুনেছিল দেবী যে ভিগুকে দিয়ে সুগালিয়া বস্তি থেকে মছয়া আনিয়া সারাদিন মছয়া খেয়েছে এবং গিটার বাজিয়ে গান গেয়েছে ওরা দু’জন। ওরা ওদের মতো করে “Enjoy” করেছে ওদের ছুটি, কিন্তু দেবীর মনে খুবই দুঃখ হয়েছিল যে ওদের মধ্যে কেউই দেবীর কাজ সম্বন্ধে বিন্দুমাত্র উৎসাহ দেখায় নি। জিগগেস পর্যন্ত করে নি দেবী সারাদিন কি করে।

প্রথম রাতে ইন্ডিজিৎদাদের জীপ চলে গেলে ঘুম থেকে উঠে ইন্ডিজিৎদা এবং স্যারের নিন্দাতে মুখর হয়েছিল। একজন জীবনমুখী গায়ক যেমন পরম উদ্ধত্যের সঙ্গে তাবৎ বয়স্কদের সম্বন্ধে কথা বলেন, যেমন মনে করেন যে, Arrogance is synonymous to smartness. যেমন মনে করেন যে তরুণরা বুঝি চিরদিন তরুণই থাকবেন এবং প্রৌঢ় এবং বৃদ্ধদের হেলিকপ্টার থেকে ঐ অবস্থাতেই ধরাধামে বিধাতা নিক্ষেপ করেছিলেন কিংসুकरা তেমনই মনে করে। ওরা ভাবে, ওদের সবকিছুই ভাল, ওরা সর্বগুণ, সমস্ত ট্রাডিশনই খারাপ। পূর্বসূরীদের প্রতি শ্রদ্ধা ভক্তি পুরনো মূল্যবোধ সবই একেবারেই অর্থহীন। ওরা বলে, বাবা-মায়ের যৌন-সুখের কারণে ওরা পৃথিবীতে এসেছে তাঁদের প্রতি বিন্দুমাত্র দায়দায়িত্ব বা কর্তব্য ওদের নেই। এইসব নানা কারণেই সাম্প্রতিক অতীত থেকে দেবীর দম বন্ধ হয়ে আসছিল। ওদের সঙ্গে থাকবে অথচ বিকল্প নিয়ে যে ভাবে। তার সময়ও ছিল না।

বালিগঞ্জ পাড়ার এক বড়লোকের বউ-এর শাড়ির দোকান পুরোপুরি দেখাশোনা করার ভার তারই উপরে। টাকার জন্যেই করে। অথচ পার্টনার করে নিলেও বুঝত। মাইনে যদিও খারাপ দেন না কিন্তু দিনে কত লাভ হয়, বিশেষ করে পয়লা বৈশাখ ও পূজোর আগে তা দেবী ভালই জানে। তাই যা পায়, তা ওর পরিশ্রম ও যোগ্যতা হিসেবে কিছুই নয়। কিন্তু কী করে! উপায়ও নেই। সারাদিনে আসে যতখানি আনন্দের জন্যে, ততখানি টাকার জন্যে নয়। নো-প্রফিট অর্গানাইজেশন বেশি টাকা দেবেনই বা কী করে। তবে সারাদিনে মাঝে মাঝেই আসতে পারে বলেই সে এখনও বেঁচে আছে।

ওরা দু'জনেই যে দেবীর সহবাসের সঙ্গী সে কথা এই ভিণ্ড, ভরতদা বা সুরাতিয়াদিদি বা মুসলিমদাদারা জানে না। ভাগ্যিস জানে না! ওরা শুধুমাত্র জানে যে, দু'জনের একজন দেবীর স্বামী। আর অন্যজন তার বন্ধু। কিন্তু চোখের সামনে ইন্দ্রজিৎদাদের দু'জনকে দেখে তারা “ভদ্রলোকদের” সম্পর্কে যে ধারণা পোষণ করে এসেছে এত দিন এদের দু'জনকে দেখে তা নিশ্চয়ই ভেঙে গেছে। বড় অপমানিত বোধ করেছে দেবী। সুরাতিয়া দিদির প্রতি অশোভন আচরণ করেছে ওরা। একথা ভরতদাদা ও ভিণ্ডর কাছে শুনেছিল দেবী। লজ্জাতে মরে গেছিল। সুরাতিয়া দিদি নিজে অবশ্য কিছুই বলে নি। শুনে, দেবীর আত্মহত্যা করতে ইচ্ছে হয়েছিল। দেবী শুনেছিল অনেকের কাছে যে, রাঁচির এক নামী বাঙালি ভদ্রলোক নাকি তার নিশ্চয়ম্যানিয়াক স্ত্রীর নির্লজ্জ বেলেক্লাপনার কারণে, চাকর ড্রাইভার প্লাস্টার মিস্ত্রী সকলের সঙ্গেই সেই মহিলার বিছানাতে যাবার প্রবণতার লজ্জা সহ্য করতে না পেরে, ঘুমের ওষুধ খেয়ে আত্মহত্যা করেছিলেন অনেকবছর আগে।

এই কি শিক্ষার নমুনা! মদ তো এইচ. পি. চ্যাটার্জিও রোজই খান। সেদিন খেলেনও রাতে ট্রেনে। কখনও কখনও ইন্দ্রজিৎদাও খান। দেবী তো একাই ছিল ক্যুপেতে।

কই? কোনো রকম অশালীনতা তো করেননি।

গত দু'রাত সে ঘুমোতে পারে নি। এই দুই নব জীবনের দুতের সঙ্গে দেবী কি করে কাটালো গত দেড়টা বছর! তা ভেবেই ওর বড় গ্লানি হচ্ছে। অথচ মায়ের কাছে থাকাটাও সম্ভব ছিল না। ওর দুঃখের কথা ওই জানে।

তার ভোলে-ভালা বাবার সঙ্গে, বাবার শেষ দিনকটিতে মা খুবই খারাপ ব্যবহার করেছিলেন। তার প্রেমিকেরই জন্যে। সে কথা দেবী ভুলতে পারে নি। পারবেও না কোনোদিন। আজকে সেই পাপেরই প্রায়শ্চিত্ত হয়ত করছেন মা। যাই হোক, জন্মদাত্রী মা, যে ক'দিন আছেন তাঁর প্রতি সব কর্তব্যই করে যাবে দেবী। পাপ-পুণ্যের বিচার করবেন ওপরওয়ালা, যদি তিনি থেকে থাকেন।

এই ওপরওয়ালা ব্যাপারটা সম্বন্ধে তার কোনো ভয়-ভক্তি ছিল না। গত চার বছর ধরে ইন্দ্রজিৎ এবং বিশেষ করে সুমিতার সঙ্গে বিভিন্ন গ্রামে ঘুরে, ঘুরে-দিন রাত জঙ্গলে পাহাড়ে কাটিয়ে ওর মধ্যে একধরনের প্রকৃতি-সজ্জাত ঈশ্বরবোধ গড়ে উঠেছে। গড়ে যে উঠেছে, সে বিষয়ে ও নিঃসন্দেহ।

ছেলেবেলাতে মায়ের হাত ধরে পুজোমণ্ডপে অঞ্জলি দিয়েছে ঠিকই। কিন্তু না বুঝে। যাঁরা অঞ্জলি দেন তাঁরা নানা Rituals পালন করেন, তাঁদের বিশ্বাসে দেবী আঘাত দিতে চায় না। কারণ, সেসব ভাল না খারাপ সে কথা জানার মতো বিদ্যাবুদ্ধি বা মানসিকতা ওর এখন গড়ে ওঠে নি। কিন্তু ওর মধ্যে যে প্রকৃতি-সজ্জাত ঈশ্বরবোধ জন্মেছে তা একেবারেই অন্য জিনিস। সেটাও যে ঠিক কী তা ও ব্যাখ্যা করে বলতে পারবে না। তবে সেই বোধকে সে অন্তরের গভীরে সযত্নে ও সসম্ভ্রমে লালন করে।

এইচ. পি. চ্যাটার্জির চিঠিটা হাতে নিয়ে অনেকক্ষণ বসে ছিল দেবী। আজই দুপুরে চলে গেছে কিংশুক আর অম্বু। রাঁচীর বাস ধরে। রাঁচী গিয়ে রাতে কলকাতার গাড়ি ধরবে হোটেল খেয়ে।

আজ দেবী সারাঙ্গর বাঁধে যায় নি। বৃষ্টি যদি আরও হয় তবে বাঁধের এক জায়গাতে ফাটল দেখা দিতে পারে। চুলের মতো ফাটল দেখা দিয়েছে। আজকে ওদের বলে এসেছে যে, মুসলিম দাদার তত্ত্বাবধানে বাঁধকে মজবুত করে যেন ওরা। পাথরও অজস্রই আছে, বালিরও কোনো অভাব নেই। ট্রাকে করে সিমেন্টের বস্তা টোড়ি থেকে এনে ট্রাক যতদূর আসে, ততদূর পর্যন্ত নিয়ে গিয়ে তারপর বাঁধের দোলায় বয়ে এনেছে ওরা। কাজটা আজই সারা দরকার। সিমেন্টের বস্তাগুলো একটা চাঁর গাছের তলাতে প্লাস্টিকের চাঁদোয়া খাটিয়ে তার নিচে রাখা হয়েছে। কাল রাত থেকেই আকাশে মেঘ জমছে। বৃষ্টি যে কোনো সময়েই আসতে পারে। এলে সব পণ্ড হবে কিন্তু ঝুঁকি নিয়ে মেরামত না করেও উপায় নেই কোনো। ওরা সকলেই এ কাজে ব্যস্ত থাকবে আজকে। পাতার সারের জন্য যে বড় বড় গর্তগুলো করা হয়েছে সেগুলো আরও বড় করা দরকার। সেগুলোর উপরেও বাখারির আস্তরণ দিতে হবে।

সানেকা মুণ্ডাকে চা খাইয়েছিল দেবী। সে বলল, সাহেব মুরখতে আচ্ছুরাম কালকাফফ-এর গেস্ট হাউসে আছেন। সকালে নাস্তা করেই বেরিয়ে পড়েন সোহনবাবুর সঙ্গে। আজকে বীরিসা মুণ্ডা যে পাহাড়ে থাকতেন তা দেখতে যাবেন খুঁটি থেকে তামারে, গভীর বনের মধ্যে দিয়ে যে বাস্তা চলে গেছে সেই রাস্তাতে। কাল যাবেন টেবো ও চক্রধরপুর। পরশু যাবেন বলরামপুর।

সাহেব ভাল আছেন তো?

দেবী জিজ্ঞেস করেছিল।

বহুবছর হয়ে হয়ে গেল অনাস্থীয় কারোর জন্যই এমন উদ্বেগ বোধ করে নি সে। নিজেকে দেখে নিজেই অবাক হল দেবী। সেদিন হাওড়া স্টেশনে এসে হাওড়া-হাটিয়া এক্সপ্রেস-এ চড়ার পর থেকে তার মধ্যে নানা রকম পরিবর্তন লক্ষ্য করছে যার কোনো ব্যাখ্যা সে জানে না।

মানেকা বলল, জী মেমসাব। সাহাব বহুত মজেমে হায়।

সানেকা একটা প্যাকেট নিয়ে এসেছিল হাতে করে। তাতে নেসকাফের টিন, নর-এর চিকেন এবং টোম্যাটো স্যুপের গোঁটা বারো প্যাকেট, এক প্যাকেট লপচু চা এবং বিস্কফার্ম আর ব্রিটানিয়া কোম্পানির বিস্কিট।

মুখে মৃদু হাসি ফুটে উঠল দেবীর। মনে মনে বলল, এসব বাহ্য ব্যাপারের

প্রয়োজন বহু দিন হলো ফুরিয়ে গেছে ওর। এসবের কোনো দরকার ছিল না। এইচ. পি. তাকে অন্তরের যে উষ্ণতাটুকু দিয়েছেন সেটাই যথেষ্ট। তাতেই সে সফুরিত হয়েছে। আসলে এইচ. পি.-র সঙ্গে আলাপ না হলে ও জানতেও পেতো না যে তার ভিতরে এত ফাঁক-ফোকর ছিল, এত ফাঁকি ছিল।

মানেকা চলে গেলে গাছতলার বেদিতে বসে সে চিঠিটা খুলল। একটু পরেই সঙ্গে হয়ে যাবে। কিংশুকরা এতক্ষণে হয়ত বিজু পাড়ার কাছাকাছি পৌঁছে গেছে। ওদের সঙ্গে বিশেষ কথাবার্তা হয় নি আজকেও। আজকেও ওরা সকাল থেকে মছয়া আনিয়ে জঙ্গলের মধ্যে একটি পাথরে বসে ছিল। অনেকগুলো গান; ওদের ভাষায় 'লিরিক' কম্পোজ করেছে নাকি—কিংশুক অস্তুর জন্যো। পরের মাসে নজরুল মঞ্চে 'ঝগ্গাটিয়া পাখিরা' একটি অনুষ্ঠান করবে তাই অনেক গানের দরকার অস্তুর।

দেবীকে সবচেয়ে যেটা বেশি আহত করেছে তা হল ওদের দুজনের কারো মধ্যেই একটুও অনুশোচনা না দেখে। রাতে খোয়াঁরি ভাঙলে উঠে বাইরে এসে ফুটফুটে জ্যোৎস্না দেখে ওরা খুব খুশি হয়েছিল। কিংশুক বলেছিল, দেবী তোমার সেই নেকু নেকু রবীন্দ্রসঙ্গীত গাও তো একটা।

দাঁড়াও! রাম-এর বোতলটা নিয়ে আসি। রাম খেতে খেতে শুনব।

অস্তুর বলেছিল, ভূত পেঙ্গী তাড়াতে তো রাম নামই করতে হয়।

তারপরে বলেছিল, রাতে খিচুড়ি হচ্ছে তো?

সেরকমই তো শুনলাম। ইন্দ্রজিৎদাও তাই বলে দিয়েছেন। খিচুড়ি করতে আর অসবিধা কি? সঙ্গে আর কি কি থাকবে? আলু ভাজা আর ডিম ভাজা হচ্ছে।

সুরাতিয়ার ডিম?

দেবী প্রচণ্ড চটে উঠে ইংরেজিতে বলেছিল, এনাফ ইজ এনাফ। বিহেভ ইওরসেভলস। সকালে যা করেছ তা করেছ। আর নয়। তোমাদের ব্যবহারে আমার অতিথি অসম্মানিত হয়ে চলে গেলেন এখন আমার এখানকার সহকর্মীদেরও আমি অপমান করতে দেব না। যদি একটুও অসভ্যতা আর করো তা'হলে তোমাদের এই নাতেই বড় রাস্তাতে পাঠিয়ে দেব। তারপরে বাঘেই থাক কি ডাকাতেই ধরুক তোমরা বুঝবে।

বাবাঃ। এত পীরিত।

অস্তুর বলেছিল।

কাদের ভয় দেখাচ্ছ তুমি দেবী? আমাদের? মেয়েছেলের কি অভাব আছে আমাদের? কলকাতাতে ফিরে অ্যাড্রেস বদল করো। আমরাও আমাদের স্বাধীনতায় এহেন মেয়েছেলের এমন হস্তক্ষেপ সহ্য করব না।

সত্যি বলছি, কিছু মনে করো না। তোমাদের প্যারেন্টেজ নিয়ে আমার মনে নানা প্রশ্ন জাগছে কিছুদিন হল। সব স্বাধীনতার মধ্যেই স্বৈচ্ছারোপিত কিছু পরাধীনতা সুপ্ত থাকেই। তোমরা এমনই বালখিল্য যে, সেটুকু বোঝার মতো ক্ষমতাও তোমাদের হলো না। অথচ তোমরাই নিজেদের সর্বজ্ঞ ভাব।

এসব জ্ঞান পরে দিও। এখন গানটা গাও।

ইয়েস। অস্তু বলল, গানটা। সেই গানটা জোসনা রাতে সোবাই।

অস্তু বলল, গ্যাসসে বোনে।

অর্ডার দিয়ে গান হয় না।

কে বলেছে হয় না?

বলল অস্তু।

আমরা কেউ বাজারের পাখিকে অর্ডার দিলে সে গায় না গান?

সব পাখি সমান নয়।

ওক্কে। ওক্কে। কাল সকালেই আমরা ফুটে যাব।

এক্ষুণি যাও না। দ্যা সুন্যার উ গো দ্যা বেটার ফর এভরিওয়ান।

ইয়ার্কি পেয়েছ? কত খরচ করে এতদূর এলাম। তোমার ইচ্ছেতে ফিরে যাব?
নিজেদের ইচ্ছেতে এসেছি, নিজেদের ইচ্ছেতেই যাব। আমরা স্বাধীন বাঙালি।

অস্তু বলল।

না রে! এখানে থাকব না।

কিংশুক বলল।

এখন চেপে যা। বর্ষাকাল! বড় বড় সাপ আছে। শেষে সাপের কামড় খেয়ে
মরবি? তোদের শো-এর কি হবে?

গ্লাস আনতে বল না। এই ভিডু।

ও নাম ভিঙু।

দেবী বলল।

ঐ হলো। আমি যে নামে ডাকব তাই ওর নাম হবে। তোমার নামও তাই হবে।
তোমার নাম দেবী নয় বিদে।

ভিঙু প্লাস্টিকের থালায় বসিয়ে দুটো গ্লাস এবং জনের ঘটি নিয়ে এল। তারপর
দেবীকে ও জিগগেস করল, খিচুড়ির সঙ্গে কি পের্যাজি করবে? ভরতদাদা
জিগগেস করছে।

করতে বলে। করতে বলে।।

অস্তু বলে উঠলো।

পের্যাজী ভাজো, কিন্তু পের্যাজী মেরো না।

এমন সময়ে মুসলিম এসে দাঁড়াল। আলোছায়ার বুটি-কাটা জমিতে আধো
আলো আধো ছায়ায় তার কুচকুকে কালো ছ'ফুট দুইধি মূর্তি দেখে ওরা দুজনেই
বেশ ভড়কে গেল।

এ আবার কেন কাঁড়িয়া পিরেত বা?

কিংশুক বলল।

কাঁড়িয়া পিরেত ত ধুতি পিন্দতে থে। তুমি কে বাওয়া লুঙ্গি পরা ভূত?

ওঁর নাম মুসলিম ভাই। আমাদের এখানের ম্যানেজার। শুধু হাতে একটা
চিতাবাঘকে মেরে ফেলেছিল। গায়ে এত জোর।

হাঃ আমরা পশ্চিমবঙ্গের ক্যালকাটার রয়্যাল বেঙ্গল টাইগার।

আই। “কলকাতা” বল। সুনীলদা শুনতে পেলে খুব রাগ করবে।

দেবী ভাবল, এরা ছেলেবেলাতে সেই লাইনগুলিও কি পড়ে নি? 'নিজে যারে বড় বলে বড় সেই নয়, লোকে যারে বড় বলে বড় সেই হয়!' পশ্চিমবঙ্গকে এই দোষেই খেল। কী মন্ত্রী, কী আমলা, কী কেরানী, কী ফোর্থ ক্লাস কর্মচারী সকলেই গুমোরে মরল। নিজের রাজ্য ছেড়ে অন্য রাজ্যে কেউই যায় না, গেলেও সম্ভবত চোখ বন্ধ করেই যায়। নিজেদের গর্তে নিজেদের গুমোর নিয়েই পচে মরল সকলে। না করল কোনো কাজ, না পালন করল কোনো কর্তব্য, নিজ মুখেই, টেঁচিয়ে গেল আজীবন। আমাদের মতো ভাল আর কেউই নয়। দেখো। দেখো। উফঃ!! রয়্যাল বেঙ্গল টাইগার! আমাদের মত আত্মমগ্ন, দুপুরবেলার মাঠে চরে-বেড়ানো ছাগলের মতো আত্মতৃপ্ত, অপরিণামদর্শী, অনিয়মানুবর্তী, আত্মসম্মান-জ্ঞানহীন জাত আর ভারতে আছে কি না সন্দেহ। দুবুদ্বিজীবী আর ভণ্ডদের ডিপো এই রাজ্য। স্বার্থাশ্বেষীদের স্বর্গ। বাঙালির যা কিছু ভাল তা আছে প্রবাসী বাঙালিদের মধ্যে। হয়ত বাংলাদেশীদের মধ্যেও।

ঝিরঝির করে হাওয়া দিচ্ছিল একটা পাতায় পাতায় সড়সড় শব্দ তুলে। আকাশের দিকে চেয়ে প্রার্থনা করল দেবী, আজ আর কাল যেন বৃষ্টি না হয়। দুটো দিন পেলে বাঁধটা মেরামত হয়ে যাবে। মানে মেরামতের জায়গাগুলো শুকিয়ে যাবে। দুদিন পুরো রোদ পেলেই হবে। পরক্ষণেই ভাবল দেবী, ওর মনের ফাটা-বাঁধ কি মেরামত আদৌ হবে?

চিঠিটা এবারে খুলল দেবী। আলো থাকতে থাকতেই চিঠিটা পড়ে ফেলবে। যদিও চিঠিতে কি থাকতে পারে তা অনুমান করেছে মোটামুটি, তবু কি লিখেছেন এইচ. পি. তা জানতে ইচ্ছে তো করছেই খুব। বড় লজ্জা দেবীর, বড় লজ্জা।

দেবী,

কল্যাণীয়াসু,

আমি জানি যে চলে এলাম বলে তুমি খুব দুঃখ পেয়েছ কিন্তু ভাল করে ভেবে দেখলে বুঝতে পারবে তোমাকে এমবারাসমেন্টের হাত থেকে বাঁচাবার জন্যেই আমি চলে এলাম।

নিজ গুণে আমাকে ক্ষমা করো।

শেষটা কিংগুক অথবা অস্তুর নয় (তার ভাল নাম তুমি আমাকে জানাওনি এবং আমারও জানার সুযোগ হয়নি) দোষটা পুরোপুরি আমারই। কিংগুকরা ওদের 'ঝঞ্জাটিয়া পাখিরা'র জন্যে আমার নামে যে গান কম্পোজ করেছে সেটা কি শুনেছ? না শুনে থাকলে শুনে নিও।

গলার স্বর এবং সুর গান জ্ঞান দুইই ভাল এবং ওদের ভাষায় 'লিরিক'ও ভাল।

দোষটা আমার এই জন্যেই বলছি যে, প্রশংসা শুনে শুনে এবং আমার চারপাশে কিছু আঞ্জাবহ স্বার্থাশ্বেষী চাটুকারও জন্মে যাওয়াতে আমি এই হরপ্রসাদ চ্যাটার্জি মানুষটার যে কোনো নেগেটিভ দিকও থাকতে পারে তা ভুলেই গেছিলাম। আমি এক কাঁচের স্বর্গের বাসিন্দা ছিলাম এতদিন। যে স্বর্গে শুধুমাত্র আমার বশংবদ মক্কেল আর আঞ্জাবহ জুনিয়র এবং কর্মচারীদেরই বাস। অন্যভাবে বললে বলতে হয়, কোনো কোনো সফল ব্যবসাদার ও ইন্ডাস্ট্রিয়ালিস্ট সব সম্পর্কেই মনিব ও

চাকরের সম্পর্ক বলেই মনে করেন এবং কোনো সম্পর্কই যাঁদের কাছে সমতার নয়, এবং মমতারও নয়, তাঁদের অন্য কেউ হঠাৎই তাঁদের বয়স, বৈভব, তাঁদের নিজস্ব ছোট জগতের খ্যাতি ও ক্ষমতার দুর্ভেদ্য বর্ম ভেদ করে যদি তাঁদের নিছক অন্য একজন সাধারণ মানুষ হিসেবেই দেখতে চায় ও দেখে, তখন সেই প্রথমোক্তদের মোহভঙ্গ হয়। গুমোরে ধাক্কা লাগে। মোহভঙ্গ হওয়া আর অপমানিত হওয়া ত এক কথা নয়।

তোমার বন্ধুরা, যাদের সঙ্গে তুমি থাকো, যাদের কাছে তুমি দ্রৌপদী, আমাকে অন্যায় কিছুই বলে নি। আমার যে বয়স হয়ে গেছে, ওপারের ডাকের জন্যেই যে আমার বসে থাকা, আমি যে কুদর্শন, পৃথুল এবং “ধুমসো” “ফ্যাটসো” সে কথাও তো একশ বার সত্যি। আমি যে ওদের তুলনাতে সচ্ছল এটাও সত্যি।

আমাদের এই গরীব দেশে আমার মতো অতি সাধারণ সফল মানুষকেও দূরবীণের উল্টোদিক দিয়ে দেখে মস্ত বড়লোক বলে মনে হতে পারে। তা হতে পারে এইজন্যেই যে, বড়লোক কাকে বলে তা আমাদের মধ্যে কম মানুষই জানি। পশ্চিমী দুনিয়াতে যারা প্রকৃতই বড়লোক তাদের নিজের পাহাড় থাকে, দ্বীপ থাকে, নিজস্ব সমুদ্র ও সৈকত থাকে, আকাশ এবং জলে যাতায়াতের জন্য এয়ারোপ্লেন, হেলিকপ্টার এবং সী-প্লেন থাকে। বহু গণ্ডা গাড়ি থাকে, যার একটার দামই এদেশের সবচেয়ে দামী যে গাড়ি তার কুড়িটার দামের সমান। তাই আমাকেও বড়লোক ঠাউরে ওরা ভুল যদিও করেছে, অন্যায় করে নি কোনো। কারণ, আমাদের দেশে এখনও মানুষ অভুক্ত থাকে। আমাদের দেশে বড়লোক হওয়াটাই যথেষ্ট দোষের, তার অন্য কোনো দোষ থাক আর নাইই থাক।

ওদের সবচেয়ে বেশি রাগ হয়েছে আমি তোমাকে নিয়ে ফাস্ট এসির ক্যুপেতে এসেছি বলে।

যেটা তুমি বোঝো, ওরা হয়ত বোঝে না। এক জন মানুষের কাছে মনটার দাম যে শরীরের দাম-এর চেয়ে অনেকই বেশি এ কথা ওরা সম্ভবত ওদের রগরগে যৌবন এবং শরীর-সর্বস্বতার দিনে বোঝে না। বোঝে না বলে আমি ওদের কোনো দোষও দিই না। আমার যদি ওদের মতো বয়স হতো এবং আমার ভালবাসার সঙ্গিনীর কাছাকাছি যদি কোনো কুদৃশ্য বয়স্ক মানুষ আসার চেষ্টা করত তবে আমারও রাগ হতে পারত ওদেরই মতো। ওদের রাগটা আদৌ দুষণীয় নয়।

এত কথা বললাম এই জন্যে যে আমি চলে আসায় তুমি দুঃখ যাতে না পাও তাই সুনিশ্চিত করতে। এই “ফিলদি রিচ ফ্যাটসোর” সঙ্গে সম্পর্ক তুমি নাই বা রাখলে। না রাখলেও আমার জীবন যেমন চলছিল তেমনই চলবে। যার জীবনে প্রাপ্তি বলতে প্রকৃতই কিছু নেই তার হারানোর ভয়টাও কম। যার অনেক আছে, হারানোর দুঃখ তাকেই বাজে। যার কিছুই নেই সে কোনো উপরি পাওনা থেকে বিচ্যুত হলে তার দুঃখ হবার কোনো কারণ ঘটবার কথা নয়। আমার জন্যে তুমি ভেবো না।

তুমি যে আমাকে তোমাদের সারাক্ষাতে হাত ধরে নিয়ে এসেছিলে সে জন্যে আমি তোমার কাছে অশেষ কৃতজ্ঞ। ঠিক কতখানি যে কৃতজ্ঞ তা তোমাকে বলে

বোঝাতে পারব না। তোমাকে আমি প্রকৃতির মধ্যে আবিষ্কার করলাম—। যে রূপ তোমার আসল রূপ, সেই রূপকে প্রত্যক্ষ করলাম। কলকাতার যাদুঘরের আশুতোষ সেন্টিনারি হল-এর সেই সেমিনারের শেষে হলুদ শাড়ি আর কালো ব্লাউজ পরে একটা হলুদ বসন্ত পাখির মতো এসে তুমি আমার সঙ্গে আলাপ করেছিলে, আমার প্রশংসা করেছিলে, তারপর শুধু টেলিফোনের মাধ্যমেই তোমার সঙ্গে একটা আশ্চর্য মিষ্টি সম্পর্ক গড়ে উঠেছিল। এক দিন আমার সঙ্গে লাঞ্চ খাবার কথা ছিল, তাও হয় নি আমার বিচ্ছিন্নী কাজের জন্যে। আমরাই কাছাকাছি এলাম শুধু হাওড়া-হাটিয়া এক্সপ্রেসের ট্রেনের কামরাতে। এক সঙ্গে লাঞ্চ খেলে যেমন টেবিলের উল্টো দিকে বসে গল্প করতে করতে খেতে তেমনই ট্রেনেও রাতের খাবার খেয়েছিলে তারপর উপরের বাস্ক-এ উঠে শুয়েছিলে। সেই টুকুই আমার সঙ্গে তোমার 'সান্নিধ্য' যদি তাকে সান্নিধ্য আদৌ বলা যায়। তবে সেই টুকুই আমার কাছে অনেক। সত্যিই অনেক। সেই সুখস্মৃতিটুকু ভাঙিয়েই অনেক দিন কেটে যাবে আমার।

সেদিন তোমাকে মিথ্যে বলেছিলাম, যখন ট্রেনটা টাটিসিলোয়াই স্টেশনে দাঁড়িয়েছিল। আসলে আমি সারারাত তোমারই স্বপ্নে বঁদু হয়েছিলাম। এই প্রৌঢ়র জীবনে তোমার মতো যুবতীর সঙ্গে এক কামরায় রাত কাটানো এক অভিজ্ঞতা। এই কথাটি তোমাকে আমার বলা দরকার, নিজেবে ছোট করেও। দরকার এই জন্যে যে, পরে হয়ত আর সময় পাবো না। আমার হাতে তোমার মতো অটেল সময় নেই দেবীশ্রী। তোমার এখন তো সবে শুরু হল জীবন, আর আমি শেষের কাছে পৌঁছেছি, জীবন-নদীর মোহানাতে দাঁড়িয়ে আছি।

এই চিঠি তোমাকে ধন্যবাদ দেওয়ারও জন্যে। তুমি এখানে না নিয়ে এলে ইন্দ্রজিৎ ও সুমিত্রা দের সঙ্গে আলাপ হতো না। মানুষের জীবনে প্রকৃতির ভূমিকা কি এবং কতখানি, নিজের বিস্ত, নিজের আরামের চেয়েও যে আমাদের এই গরিব দেশের মানুষদের সাচ্ছল্য, তাদের সুখবিধানের জন্যে কিছু করাটা অনেক বেশি আনন্দর, তা এখানে না এলে নিজ চোখে তোমাকে এবং ইন্দ্রজিৎবাবুদের না দেখলে জানতেও পেতাম না। এই দেবীকে দেবীর ভূমিকাতে জানতাম না। অনেক এন. জি. ও.কে জানি, কিন্তু দে সাহেবের ও তাঁর স্ত্রীর এই প্রজেক্টের মতো প্রজেক্টও যে হয় সে কথা জানতাম না। মানুষের জীবনের উপরে, সব বয়সী মানুষেরই জীবনের উপরে প্রকৃতির যে কি অভিঘাত, তার যে কি সুদূরপ্রসারী প্রভাব তাও জানতাম না। সত্যি বলছি, অনেক কিছুই জানতাম না।

তুমি হাত ধরে নিয়ে না এলেও আমি এখানে আবার আসব। হয়ত তোমার সারাঙ্গীতে আসব না। আশাকরি, একথা জেনে কিংশুক ও অস্তু খুশি ও আশ্বস্ত হবে।

আমি একটি গ্রাম অ্যাডাপ্ট করব ভাবছি। জাস্ট ভাবছি। এখনও মনস্থির করিনি। Still toying with the idea। যদি শেষ পর্যন্ত করিই তবে সেই গ্রামকে আমি সত্যিই দেখার মতো গ্রাম করে গড়ে তুলব। খরচের কোনো কাপণ্য করব না কিন্তু সেই খরচের মধ্যে অশিক্ষিত বড়লোকের আত্মপ্রচারের রেশও থাকবে না। আর

আমার সেই প্রজেক্টের নাম দেব দেবীত্ৰী। পাছে, তোমার দুই সঙ্গী তোমার উপরে চটে যায় তাই তোমাকে দূরে রেখে তোমার নামটা নিয়েই থাকব বাকি জীবন। তাতেও নিশ্চয়ই আপত্তি হবে না তোমার। তবে আমার প্রজেক্টের যতই সব কিছুই সাধারণ হোক না কেন যে বন বাংলোতে আমি আর আমার অতিথিরা থাকবেন সেটিতে অ্যাটাচড বাথরুম থাকবে। কমোডও থাকবে। সেপটিক ট্যান্ক করে বাথরুম করব। এবং পুরনো সব বন-বাংলোতে যেমন থাকত, বাংলোর তিনদিকে ঘোরানো বারো ফিট চওড়া বারান্দা থাকবে। সব কটা বেডরুমেরই একটি করে দরজা থাকবে সেই ঘোরানো বারান্দার দিকে মুখ করা। সেই বারান্দাতে বড় বড় ডেক চেয়ার থাকবে—যাতে সারা দিনের পাহাড় জঙ্গল উপত্যকা পরিভ্রমার পর সকাল থেকে সন্ধ্যে পরিভ্রমের পর ইজিচেয়ারের হাতলে দুই পা তুলে দিয়ে ক্লাস্টি অপনোদন করা যাবে। সারাস্রাতে তোমাদের দেখেই বুঝেছি যে, আরাম করা তাদেরই সাজে যারা শুধু মাথার কাজ নয়, অনেক শারীরিক পরিভ্রমও করে।

গত সন্ধ্যে তোমরা যখন সারান্দা থেকে ফিরে আসছিলে, আর আমি আর দে সাহেব তোমাদের অপেক্ষাতে ভাঙা ব্রিজের পিলারের উপরে বসেছিলাম তখন একটা আশ্চর্য দৃশ্য দেখালেন দে সাহেব। সূর্য ডুবছে আর চাঁদ উঠছে। কাল বুঝি পূর্ণিমা ছিল? পূর্ণিমা অমাবস্যা তো শহরে বোঝাই যায় না। ঠাকুমার যেদিন বাতের ব্যথা বাড়ত তখন আমাকে বলতেন, পঞ্জিকাটা দেখত হপু, আজ নিশ্চয়ই পূর্ণিমা কি অমাবস্যা। নিদেন পক্ষে একাদশী। ঠাকুমার বাতই ছিল পূর্ণিমা অমাবস্যা জানবার নিশ্চিত উপায়। আজকের কলকাতাতে পূর্ণিমা অমাবস্যা তো অনেক বড় ব্যাপার সকাল ও সন্ধ্যে কখন আসে যায় তার খবরই বা কে রাখে। ক্ষুব্ধবৃত্তি আর আরও চাই আরও চাই এর দৌড়ে সকলেই ঘানি ঘোরানো চোখ বাঁধা বলদের মতো জীবন কাটাই। যার যা রোজগারই থাক সেই রোজগার সৃষ্টুভাবে খরচ করার শিক্ষা আমাদের কারোওই নেই।

রিডার্স ডাইজেস্টএ একটা লেখা পড়েছিলাম, How evening comes। সন্ধ্যে কিভাবে আসে, রাত কিভাবে শেষ হয় এইসব নির্জনে মনোযোগ দিয়ে দেখার মধ্যে দিয়ে সম্ভবত মানুষ নিজের মনুষ্যত্বকে উপলব্ধি করতে পারে। লেখাটা পড়েছিলাম বহু বছর আগে কিন্তু মানে বুঝি নি। লেখাটার তাৎপর্য যেন হঠাৎ করে বুঝলাম সারান্দাতে এসে।

দে সাহেব বলছিলেন, গুহার মধ্যে লাল দেবতা ও লাল পাখিদের কথা। বলছিলেন সেই মস্ত প্রায় প্রাগৈতিহাসিক কদম গাছ তলার বড় কালো চ্যাটালো পাথরটার কথা—সেখানে একা এক ঘণ্টা বসে থাকলে মন থেকে সব টেনশন, দ্বেষ, মালিন্য, ঈর্ষা, ক্ষোভ ধুয়ে মুছে যায়। কদম-গাছ খেরাপি। সত্যি! একটা দিনেই যে কত কিছু জানলাম। শুধু জানাই নয়, কত কিছু উপলব্ধি করলাম। উপলব্ধি করলাম তোমাকেও। তোমাকে একজন প্রখর বুদ্ধিমতি, সপ্রতিভ এবং গভীর যুবতী বলেই জেনেছিলাম কলকাতাতে, তুমি যে এমন একজন ব্যক্তিত্বময়ী, কর্মী, অঘটন-ঘটন-পটিয়সী মহিয়সী নারী সে সম্বন্ধে সামান্যতম ধারণাও ছিল না। জওহরলাল নেহরুর 'দ্য ডিসকভারি অফ ইন্ডিয়া' পড়েছিলাম, যখন স্কুলে পড়ি।

পড়েছিলাম এ এল ব্যাশাম-এর 'দ্য ওয়াভার দ্যাট ওজ ইন্ডিয়া'। কিন্তু কালকে তোমার সঙ্গে এসে এবং দে সাহেবদের সঙ্গে পরিচিত হয়ে আমার দেশ, ভারতবর্ষকে নতুন করে আবিষ্কার করলাম। আমরা পশ্চিমবঙ্গের শিক্ষিত বাঙালিদের মধ্যে অনেকেই পশ্চিমবঙ্গকেই ভারতবর্ষ বলে ভুল করি। পশ্চিমবঙ্গ যে ভারতবর্ষের একটা রাজ্য মাত্র এবং ভারতবর্ষ যে অনেকেই বড়, অনেক পুরনো, অনেকেই যে আঁটে তার মধ্যে, অনেক বাধা, অনেক ব্যবধান, অনেক পরিধান, অনেক মতামত, এই সত্য উপলব্ধি করতে হলে গ্রামীণ ভারতবর্ষে বার বার আমাদের যাওয়া দরকার, থাকা দরকার, বিভিন্ন সাধারণ মানুষের সঙ্গে মেশা দরকার।

তুমি হয়ত বলবে, তোমার স্বভাবসিদ্ধ রসবোধের সঙ্গে। “একদিনের পক্ষে জানাটা একটু বাড়াবাড়ি রকমের বেশি হয়ে গেল না?”

আমি বলব, অবশ্যই। তবে সবটুকু জানাই এখনি চর্চণ করার জন্যে নয়। গবাদি পশুরা যেমন যাই গেলে, তাই সঙ্গে সঙ্গে চর্চণ করে না, গলার থলেতে ভরে রাখে এবং অনেক পরে একটু একটু করে সময় সুযোগ ও প্রয়োজন মতো গলা থেকে মুখে এনে খাদ্যকে চর্চণ করার পরই তা উদরস্থ করে, তেমন করেই এই একদিনের জানাকে জমিয়ে রেখে জারক রসে ভিজিয়ে, ধীরে ধীরে হজম করব।

তোমাকে অনেক অনেক ধন্যবাদ জানিয়ে শেষ করছি এ চিঠি। এতো চিঠি নয়, আমার চলে আসার কৈফিয়ৎ। অত মানুষের সামনে তো এতো সব কথা বলা যেত না। তোমার দুই ইন্টারেস্টিং সঙ্গীর কাছ থেকে বিদায় নিয়ে আসতে পারলাম না, আসার সময়ে। ওদের বোলো যে আমি কিছুই মনে করি নি। ওরা বরং এই মোহগ্রস্ত স্বপ্ন দেখা বৃড়োকে সজোরে ধাক্কা দিয়ে বাস্তব কি তা বুঝিয়ে দিয়েছে। ওদের আমার ধন্যবাদ জানিও।

কলকাতা ফিরে, যদি ইচ্ছে হয়, তবে একটি ফোন করো। তোমাকে লাঞ্চ খাওয়াব বলেছিলাম। সে নেমস্তন্ন আছে এখনও। মনে করলাম সে কথা। যদি আসতে চাও, তো এসো।

আমি মুরছতেই থাকব। কাল টেবো ঘাটে যাব এবং চক্রধরপুরেও। কলকাতা থেকে যখন ছুটি করেই এসেছি বহুদিন পর তখন যেমন কথা ছিল তেমনই ফিরব। সত্যি কথা বলতে কি সারাদ্বাদে যাওয়ার পরে এবং তোমার সঙ্গে আর ইন্ডিজিৎ ও সুমিতার সঙ্গে আলাপিত হবার পরে প্রকৃতির পরশ এমনভাবে জীবনে প্রথমবার পেয়ে কলকাতাতে আর ফিরতেই ইচ্ছে করছে না।

দে দম্পতি বারবার বলেছিলেন বলে আজই সকালে বারিয়াতুতে গেছিলাম। দে সাহেবদের প্রজেক্ট সত্যি খুব ভাল লাগল দেখে। ইন্ডিজিৎ শুধু পণ্ডিত ব্যক্তি নন, একজন অত্যন্ত প্রাণবন্ত প্রকৃতি-পরায়ণ অতিথি পরায়ণ পুরুষ। আর ঠিক ততখানিই ভাল সুমিতা। এদের দু'জনের মধ্যে যেন পুরুষ ও প্রকৃতির বাস্তবায়ন হয়েছে। তোমারই জন্যে আলাপ হলো আমার ওদের সঙ্গে। সে জন্যেও কৃতজ্ঞতা জানাই আবার। এ এক পরম প্রাপ্তি আমার জীবনে। তুমি কি আমাকে বলেছিলে

যে, সুমিতার আদিবাসী মহিলাদের নিয়ে যে ক্রিয়াকাণ্ড তার নাম “ভূমিকন্যা”? ওঁরা একটি মহিলা ফাউন্ডেশনও করেছেন, নাম দিয়েছেন, ভূমিকন্যা ফাউন্ডেশন। তোমরা যে কেঁচো সার বা Vermi-Compost, পাতা-সার বা Leaf-Compost করছ, কেমিক্যাল পেস্টিসাইডস এর বদলে Bio-Pestisides করছ, নিম-করৌঞ্জ, রসুন, লংকা ইত্যাদি থেকে সে সব তো আমার জানাই ছিল না। শুনলাম যে করৌঞ্জ আর নিম-এর সার বাজার ইতিমধ্যেই ধরে নিয়েছে। সারের নাম হয়েছে ভূমিজ। ভূমিকন্যা ফেডারেশনই ঐসব প্রডাক্ট মার্কেট করছে। এছাড়াও আদিবাসী মেয়েদের কাঁথা স্টিচ-এর কাঁথা করছে এবং তাও বাজারে সমাদৃত হয়েছে। ইকোলজিকাল ফার্মও দেখালেন দে সাহেব। মাশরুম, ডেয়ারি, পোলট্রি, র‍্যাবিটরি, ডাকারি এবং সেরিকালচারও দেখলাম। এও শুনলাম যে ভবিষ্যতে লাক্ষা নিয়েও কিছু করার ভাবনা চিন্তা চলছে।

সব দেখে শুনে মনে হয়েছে মিথ্যেই শামলা এঁটে পাথর আর ইটের লাল দালানে জীবনটা “মী লর্ড। মী লর্ড!” করে কাটিয়ে দিলাম। প্রকৃতির মধ্যে থেকে প্রখর গ্রীষ্মের পরে মাটির নিচের বীজ থেকে অঙ্কুরোদগম দেখা, শুকনো ডালে ডালে প্রথম গুঁড়ি গুঁড়ি কিশলয় আসতে দেখা যে কত বড় এক গা-শিরশিরানি অভিজ্ঞতা তা কি এখানে না এলে কখনওই জানতাম।

বারিষাতুতে ন্যাড়া পাহাড়টিতে আর্মিকে রাজি করিয়ে হেলিকপ্টার থেকে ঘাসের বীজ ছড়িয়ে দে সাহেব কি করে সেই পাহাড়ের সবুজায়ন করেছেন তা শোনা আর কোনো যুদ্ধ জয়ের অভিজ্ঞতা একইরকম। আমি তো পুরুষ, গর্ভবতী হবার অভিজ্ঞতা কখনওই আমার হবে না। কিন্তু দে সাহেবের এই ন্যাড়া অথবা নেড়ি পাহাড়কে সবুজাত করে তোলার মধ্যে আমি যেন গর্ভাধানের অভিজ্ঞতাই পরোক্ষে অনুভব করলাম।

নাঃ! ঠিক করেছি এই ক্রিয়াকাণ্ডে আমিও দু’হাতে আঙ্গিন গুটিয়ে লেগে পড়ব। এখনও জীবনে যেটুকু সময় বাকি আছে তা কাজের মতো কাজে লাগাব। ইন্দ্রজিৎবাবুর ত সুমিতা আছেন, তুমি কি আমার ওই যজ্ঞে আমার কর্মসহচরী হবে? নর্মসহচরী তুমি কিংগুক আর অঙ্কুরই থাকবে—আমার কর্মসহচরী হলেই আমি সুখী।

পুনশ্চ :

একটা কথা আমার মনে হয়েছে তাই বলি।

অস্ত্র আর কিংগুক হয়ত পরিকল্পনা করেই নিজেদের ভিলেইন প্রতিপন্ন করাতে এসেছিল এখানে। ওরা হয়ত দেখতে চেয়েছিল আমার সম্বন্ধে তোমার মনোভাবের প্রকৃতিটা কিরকম? ওদের ঐরকম ব্যবহারে তোমার রি-অ্যাকশন কেমন হয়? আমি বিশ্বাস করি না, বিনা প্ররোচনাতে কেউ অপরিচিত কোনো বয়স্ক মানুষের সঙ্গে এমন ব্যবহার করতে পারে। এটা হয়ত পুরোপুরিই ভান ওদের, তোমাকে বোকা বানাবারই জন্যে।

আমার অনুরোধ এই যে, ওদের উপরে কোনো অবিচার কোরো না। আমার কারণে অন্তত কোরো না। করলে, নিজেকে অপরাধী বলে মনে করব।

আফটার অল, ওরাই ত তোমার সব। আমি কে? আমাকে ত তুমি ভাল করে চেনোই না। ঘাটে বাঁধা থাকলে জোয়ার এলে ঢেউয়ের ছলাৎ ছলাৎ ধাক্কা লাগেই। ভুল করে সেই দোলানিটুকুকেই বিপজ্জনক ভেবে যদি নৌকো খুলে দিয়ে ভেসে পড় তবে বড় বড় ঢেউয়ে ছোট তরী ডুবে যাবে। ঘাট যে পেয়েছে, সে মাঝনদীর ভয়ের কথা জানে না বলেই তার অমন ভুল করা উচিত নয় কোনো মতেই।

আমি তোমার চেয়ে অনেক বড়, বয়সে। তোমার চেয়ে আমার অভিজ্ঞতা বেশি বলেই এই কথা লিখলাম। কিংগুক আর অস্তু খুবই ভাল ছেলে, খারাপ ছেলের অভিনয় করতে এসেছিল ওরা এবারে তোমার সারাদ্বাতে।

এইচ. পি.-র চিঠিটি পড়ার পর দেবীর শরীর মনে এক অভূতপূর্ব মধুরতা এলো। এক ধরনের অবসাদ। দূরপাল্লার দৌড়বীর দৌড় শুরু করার আগে যেমন স্থির হয়ে যান, সংকল্পে কঠিন, শরীর মনের সমস্ত পেশী শিথিল হয়ে যায় তাঁর, পরে পরম কাঠিন্য আনার জন্যেই, দেবীর শরীর মনেরও এখন ঠিক তেমনই অবস্থা।

এ চিঠির জবাব কি দেবে। কেমন করে দেবে ভাবল ও সারারাত। জবাব না দিলেও হয়। উনি তো চিঠিতে কোনো প্রশ্ন রাখেন নি যে জবাব দিতে হবেই। তাঁকে জবাব দেওয়ার চেয়েও বড় সমস্যা হয়ে উঠছে এখন তার নিজের জীবন। তার জীবন এমনই এক প্রশ্নর সামনে এসে দাঁড়িয়েছে যে সেই প্রশ্নর জবাব তাকে খুঁজে বের করতেই হবে। দেবী করার উপায় নেই কোনো। এবং সেই জবাবের উপরেই তার ভবিষ্যৎ নির্ভর করবে।

কি করবে দেবী?

বড় উতলা বোধ করতে লাগল ও।

রাতে সুরাতিয়া খেতে ডাকলে বলেছিল, কিছু খাবে না, শরীর ভাল নেই। এমনি তে ওরা রান্নাঘরেই খায় মেঝেতে বসে। আমকাঠের পিঁড়ি বানানো আছে, তাতেই বসে প্লাস্টিকের থালা বাটিতে খেয়ে নেয়। বাটিও অধিকাংশ সময়ে ব্যবহার করে না। গরম গরম, যাই রান্না হয় থালাতেই দিয়ে দেয় হাতা করে। অতিথিদের জন্যে বাইরে কাঠের টুল এনে দেওয়া হয়। চেয়ার হিসেবে ব্যবহার করা হয় গাছতলার বেদিকেই।

সারারাত মেঘ-ছেঁড়া চাঁদের আলো খেলা করে গেল তার চিস্তিত মুখের উপরে। ঘুমুতে পারল না দেবী। শুয়ে শুয়ে নানা রাত-চরা পাখি আর ছোট বড় জানোয়ারের আওয়াজ শুনল। প্রথম প্রথম ভয় পেত। আজকাল অভোস হয়ে গেছে। স্বাভাবিক ব্যাকগ্রাউন্ড মিউজিক-এর মতো মনে হয়। তারপর শেষ রাতে দুটি ব্যাকেট টেইলড ড্রপ্সের ধাতব কর্কশ আওয়াজে চমকে উঠে বসল চৌপাই-এর উপরে। তখনও অন্ধকার।

সারারাত ধরে মনের মধ্যে একটা চিঠির খসড়া করেছে শুধু। সেই চিঠি 'এইচ. পি.-র চিঠির উত্তরও বটে এবং কিংগুক ও অন্তকেও লেখা বটে, যদি শেষ পর্যন্ত লিখে উঠতে পারে। তবে এ চিঠি ওরা হাতে পাবে না। আজ মুসলিমদাদা যাবে রাঁচীতে, ইন্ড্রজিৎদার কাছে। গত কাল লাতেহারের কো-অপ থেকে নিম্ন আর করৌঞ্জের Bio-Pesticide বিক্রিয় টাকা নিয়ে এসেছে হিসেব শুদ্ধ। তাই পৌঁছে দিতে যাবে। কারণ ইন্ড্রজিৎদা বেশ কিছু দিন ও পথে আসতে পারবেন না। উনি লোহারডাগার কাছের একটি গ্রামে ভূমিকন্যার একটি নতুন প্রজেক্ট-এর পত্তন নিয়ে

ব্যস্ত থাকবেন। যদি উত্তর একটা লিখতে পারে তবে মুসলিমদাদার হাতেই পাঠিয়ে দেবে রাঁচীতে। বারিয়াতুতে পৌঁছলে সুমিতাদি অথবা সুমনাদি ব্যাহেল সাহেবদের রাঁচীর বাড়িতে পাঠিয়ে দিতে পারবেন। আর ওঁরা পেলে, সে চিঠি মুরহ পৌঁছতে সময় লাগবে না। কিন্তু কি লিখবে দেবী?

আলো ফোটার সঙ্গে সঙ্গেই বন জাগল। হাজারো পাখির কলকাকলিতে ভরে উঠল বনভূমি। দেবী ঠিক করল, চিঠিটা লেখা শেষ করে মুসলিমদাদার হাতে দিয়ে সে একবার সেই গাছতলাতে যাবে। সেখানে গিয়ে নুড়ি ছুঁড়ে দিয়ে এক ঘণ্টা বসে থাকবে। তার মন কাল থেকে বড়ই অশান্ত হয়েছে নানা কারণে। মনের শান্তি এবং মনের মধ্যে ঝড়-তোলা নানা প্রশ্নর উত্তরের জন্য তাকে আজ সেখানে যেতেই হবে। এর আগে, ওর মায়ের ডায়ালিসিস আরম্ভ হবার পর পরই একবার গেছিল সেখানে। সে সময়ে সে মায়ের এবং কাকুর কাছে গিয়ে থাকবে কি না কিংশুকদের সঙ্গ ছেড়ে তা নিয়ে মনের মধ্যে বড় টানাপোড়েন চলেছিল ওর। সেই টানাপোড়েনের হাতে থেকে বাঁচতেই গেছিল সে। আজকে তার জীবনে তার চেয়েও অনেক বড় সংশয় উপস্থিত। এই সংশয় এই সমস্যার সমাধান তাকেই করতে হবে। এই সিদ্ধান্তের উপরে তার পুরো ভবিষ্যৎ নির্ভর করবে। তাকে পরামর্শ দেবার কেউই নেই।

তারপর ভাবল, চিঠিটা এখন লিখবে না। ওই পাহাড় থেকে ঘুরে এসে তারপরই লিখবে। মনস্থির করে নিয়ে সুরাতিয়াকে বলে, দেবী চলে গেল।

ফিরে যখন এল প্রায় ঘণ্টা দুই পরে, যেতে-আসতে এক ঘণ্টা ত লাগেই, তখন রোদ উঠে গেছে। কাল বিকেল থেকে জমতে-থাকা মেঘের আস্তরণ সরে গেছে। মুসলিমদাদা, ভিণ্ড, ভরতদাদা, সুরাতিয়া সকলের মুখেই হাসি ফুটেছে। আজকের দিনটা যদি এমন রোদ-ঝলমল থাকে তবে মেরামতী-করা বাঁধটাকে নিয়ে আর চিন্তা নেই। মুসলিম দাদাও বাঁধে যাওয়ার জন্য তৈরি।

দেবী বলল, মুসলিমদাদা তুমি আজ সুরাতিয়া দিদিকে নিয়ে যাও। এবাবে বেচারী আসার পরে রান্নাঘর থেকে এক দিনও ছুটি পায় নি। আজ ভরতদাদাই রন্ধে রাখবে, তোমরা দুপুরে এসে খেও। রাঁচী রওয়ানা হওয়ার আগে তুমি আমার কাছ থেকে একটা চিঠি নিয়ে যেও মনে করে। ভুলে যেও না। আমি আজ যাব না বাঁধে সকালে। বিকেলে যাব। আমার কিছু নিজস্ব কাজ আছে।

ওরা চলে গেলে, চা খেয়ে চানটান করে এল দেবী। এখানেই যখন থাকবে তখন চান করে উঠে—একটা লাল আর কালো খড়কে-ডুরে শাড়ি পরল। উলঙ্গ থাকা যায় না তাই কিছু একটা পরতে হয়ই। মেয়েরা শাড়ি বা গয়না পরলে তা অ্যাপ্রিসিয়েট করার মতো কেউই যদি না থাকে তবে এসব পরতে একেবারেই ইচ্ছে করে না। কিংশুক ও অস্তু এক দিনের জন্যেও তার পোশাক নিয়ে কোনো মন্তব্য করে নি। সুসজ্জিত, সালঙ্কারা দেবীর দিকে কখনও ভাল করে চেয়েও দেখে নি। ভাব দেখে মনে হয়, কিছু না পরলেই যেন ছিল ভাল।

কিংশুক এক দিন বলেও ছিল মেয়েদের সব সাজই তো খুলে ফেলার জন্যই। মানে, মেয়েদের নিরাবরণ রূপটিই একমাত্র বিবেচনার। কিছু বলে নি দেবী।

ভেবেছিল, যারা এত বড় প্রাচীনপন্থী তারাই আধুনিকতার বুলি কপচায়। প্রকৃত আধুনিকতার সঙ্গে সৌন্দর্য-পিপাসার কোনো বিরোধ আছে বলে জানে না দেবী কিন্তু ওরা তাই মানে। যাবৎ ট্রাডিশনের বিরুদ্ধেই ওদের জেহাদ। দুর্বিনয়, অভব্যতা, চিরাচরিতের বিরোধিতা করার মধ্যেই ওদের সব আনন্দ। কোনো কিছু ভাবাভাবি ওদের কাছে সময়ের নিছক অপব্যবহার। ওদের এই could not care less অ্যাটিটিউডের সঙ্গেই দেবীর বিরোধ। দেবীর মনে হয়, পুরনো ট্রাডিশনকে ভাঙার আগে নতুন ট্রাডিশনের ভিত করে নেওয়া উচিত। নইলে, মানুষের সঙ্গে কচুরিপানার কোনো তফাত থাকে না আর।

অনেক ভেবে টেবে চিঠিটা আরভই করে ফেলল দেবী। সম্বোধনে লিখল, মাননীয়েষু। শ্রীচরণেষু লিখতে পারলে খুশি হতো কিন্তু বঙ্গভূমে পায়ে হাত দিয়ে প্রণাম করার মতো মানুষ ভারতের একশৃঙ্গ গগুরেরই মতো অতি বিরল হয়ে গেছে। তা ছাড়া, যতখানি ভাল করে জানলে এবং ভক্তি করলে শ্রীচরণেষু লেখা যায় কারোকে এইচ. পি. স্যারকে ততখানি ভাল করে তো এখনও জানেনি দেবী।

তাই লিখল :

মাননীয়েষু,

সারাক্সা

পালাম্যু

বাড়খণ্ড

২৫/০৮/০১

আপনার চিঠি পেয়ে বড় লজ্জা পেলাম। লজ্জিত হয়েই ছিলাম, সেই লজ্জার বোঝা আরও বাড়ল।

সেদিন মিউজিয়ামের আশুতোষ সেন্টেনারী হলে নারী প্রগতির উপরে আপনার বক্তৃতাতে আপনি যা বলেছিলেন তাই প্রকৃত নারী প্রগতি। তবে দুঃখের বিষয় এই যে ভারতীয় নারীরা এখনও ততটা স্বয়ম্ভর ও স্বাধীন হয় নি যতটা হলে “প্রগতি” শব্দটার যথার্থ্য থাকে। তা ছাড়া নারীর অনুযঙ্গ এবং পরিবেশের অনেকখানিই পুরুষ নিয়ন্ত্রিত। এখনও। এবং পুরুষ জাতটার মধ্যে যে আপনার মতো পুরুষ বিধাতা বেশি সৃষ্টি করেন নি। নারী যদি আধুনিক হতে চায় তবে তার চারপাশের পুরুষদেরও আধুনিক হতে হবে। শারীরিক এবং অর্থনৈতিক দৌর্বল্যের কারণে এ দেশের নারীকে পুরুষের উপরে এখনও অনেকই দিন নির্ভর করতে হবে। এবং সেই পুরুষদের অধিকাংশই কিংসুক আর অস্তুরই মতো।

আপনার প্রতি এবং ইন্ডিজিৎদার প্রতিও ওদের দুর্বাবহারটা যে একটা পোজ মাত্র তা কিন্তু আমার মনে হয় না। ওরা আসলে এতই দুর্বল যে, বয়সে আপনি ওদের চেয়ে অনেক বড় এবং অন্য সব দিক দিয়েও। তা জানে বলেই আপনাকে সরাসরি অপমান করে আমার কাছ থেকে আপনাকে চিরদিনের মতো সরিয়ে দিতে চেয়েছিল।

প্রাণে না মেরেও মানুষকে সরানো যায় মানে মেরে। পুরুষের আত্মসম্মানজ্ঞান আজকাল নারীর সতীত্বেরই মতো সদা-বিপন্ন।

আপনার সম্মানে আঘাত লেগেছিল বলেই তো আপনি সেই সঙ্কেতেই ইন্দ্রজিৎদার সঙ্গে চলে গেলেন। যা দিনকাল পড়েছে, এখন পুরুষের সম্মানও নারীর সম্মানেরই মতো সম্বন্ধে অনুক্ষণ বাঁচিয়ে রাখতে হয়। একটু অসাধনানী হলেই তা হারিয়ে যেতে পারে। সম্মানহীন নারী বা পুরুষের বাঁচাতে আর যাই থাক, আনন্দ থাকে না। আর আনন্দেই যদি না বাঁচা গেল তা হলে বাঁচাই বা কেন?

ওদের প্রসঙ্গ এবার বন্ধ করি। আমার জীবনের এক বিপজ্জনক অধ্যায়ে কিংশুক আমার জীবনে এসেছিল। তাই কৃতজ্ঞতাভাবেই মা-মরা বাপ-খেদানো ছেলের সঙ্গে থাকতে রাজি হয়েছিলাম। আমারও তো পটভূমি খুব একটা সুস্থ ছিল না। আমার বাবার এক বন্ধুর সঙ্গে আমার মায়ের ঘনিষ্ঠতা ছিল। আমার মাও দ্রৌপদী ছিলেন। তাতে দোষ দেখিনি কিন্তু দোষ দেখেছিলাম অসুস্থ ও অসহায় বাবার সঙ্গে মা এবং তাঁর প্রেমিক যে ব্যবহার করেছিলেন তারই মধ্যে।

আমি আর কিংশুক দমদমে সজ্ঞাতে বাড়ি ভাড়া নেবার পরে অস্ত্র শ্রেফ অর্থনৈতিক কারণেই আমাদের সঙ্গে এসে জুটল। আমাদের দু'জনেরও নুন আনতে পাস্তা ফুরোচ্ছিল কিন্তু যৌবনের অকুপণ উষ্ণতাতে একে অন্যকে বুকে জড়িয়ে আদর করে আমাদের অন্য অনেক অভাবই আমরা পুষিয়ে নিতাম। যৌবনের দান অকুপণ। অনেক অভাবকেই একজন যুবক ও যুবতীর শারীরিক সামর্থ্যের আনন্দ অবলীলায় ভুলিয়ে দিতে পারে।

অস্ত্র প্রথমে এসে জুটেছিল প্রাণের দায়ে। ওর বাড়ি বহরমপুরে। মামাবাড়িতে থাকত। রাজনীতি করত। গান গায় বলে বাম দলে নাম লিখিয়েছিল। এখন তো নাম লেখালেই হল। অর্থ যশ পৃষ্ঠপোষক সবই জুটবে। গলায় সুর থাকুক আর নাই থাকুক। তবে ওই করে তো বেশি দিন চলে না। ঝঞ্ঝাট সেন-এর খপ্পরে পড়ে “ঝঞ্ঝাটিয়া পাখিরা” নাম দিয়ে ব্যান্ড তো করল কিন্তু ঝঞ্ঝাট যেন ঝঞ্ঝাট বাধাতে লাগল। রোজগারের সিংহভাগই তার পকেটে যেতে লাগল, কারণ পার্টিতে তাকেই চেনে সকলে পুরনো ক্যাডার হিসেবে। ফলে ওর পক্ষে ওই সামান্য রোজগারে কলকাতাতে বাড়ি ভাড়া করে একা থাকা অসম্ভব ছিল। প্রথমে অর্থনৈতিক কারণে আমাদের সঙ্গী হল, পরে সে আমার শরীরের সঙ্গীও হল। কিংশুকেরও আপত্তি ছিল না কারণ ব্যাপারটা ওর ভাষাতে দারুণ “Mod” হল। অস্ত্রও নিজেই Mod প্রমাণিত করার জন্যই ভিড়ে গেল, যতখানি না আমাকে ভাল লাগার জন্যে।

স্যার। আপনি বিয়ে করেন নি কিন্তু শারীরিক সম্পর্কও কি করেন নি কোনো নারীর সঙ্গে? করে থাকলে, অবশ্যই জানবেন যে, মন-বিবর্জিত শারীরিক সম্পর্ক কুকুর বা গোরুকে যতখানি মানায় মানুষকে ততখানি মানায় না। তা'ছাড়া সিকিওরিটির ব্যাপারটাও থাকে। মেয়েরা বহু হাজার বছর ধরে সিকিওরিটির কারণেই পুরুষের কণ্ঠলগ্না হয়েছে এবং একই পুরুষের ঘর করেছে। এই নির্ভরতা-প্রবণতা তার রক্তে বইছে। আমাদের তিন জনের রোজগার এক করে তবেই বাড়ি

ভাড়া খাওয়া-দাওয়া টেলিফোন ইলেকট্রিক বিল মেটাই আমরা। আমিও সমান টাকা দিই। রান্নাবান্নাও তিন জনে ভাগ করে করি। আমি উপরস্তু দিই শরীর। সেদিক দিয়ে দেখতে গেলে আমারই ঠকা হয়। ওরাও সেটা জানে।

(আসলে সমস্ত সম্বন্ধের গোড়ার কথা হল শ্রদ্ধা। সে দাম্পত্যই হোক, কি অপত্য, কি বন্ধুত্ব। স্বামী বা স্ত্রীকে, বাবা বা মাকে, বন্ধুকে শ্রদ্ধা করতে না পারলে তাকে ভালবাসা যায় না। সাম্প্রতিক অতীত থেকে আমার কেবলই মনে হতো যে, ওরা আমাকে ইচ্ছে করে ঠকাচ্ছে। আমার মন-বিবর্জিত শরীরটাকে ওরা পারকুইজিটস্ এর মতো ভোগ করছে। পারফ্যুম বা শাড়ি বা অন্য উপহারের কথা বাদই দিলাম, ওদের মধ্যে কেউ আমাকে ভালবেসে কোনো দিন একটু ফুলও এনে দেয় নি।

আপনার বক্তৃতা যেদিন শুনতে যাই আশুতোষ সেন্টেনারী হল-এ তখনই আমার মধ্যে এক বিদ্রোহ বাসা বেঁধেছিল। বারুদে ঠাসা ছিল আমার মনের ঘর। আপনার বক্তৃতা তাতে দেশলাই কাঠি ঠুকে দিল। এই ফাঁকি আমি আর বইব না বলেই ঠিক করেছি আমি। আপনাকে যে আমি বলেছিলাম কিছু দিনের মধ্যে আমি কনসিড করব সেই কথাটা মিথ্যে কথা ছিল। তবুও যদি ওদের সঙ্গে থাকতাম তবেও না হয় ব্যাপারটা ঘটতে পারত কিন্তু ওরা এখানে যা করে গেল তারপরে ওদের সঙ্গে আমি একদিনও থাকতে পারব না। ফিরে গিয়ে আমার এক বাস্কবীর সঙ্গে বাগবাজারে একটি মেয়েদের মেস-এ উঠব। তারপর কি করব তা পরেই ভাবব। ভাবছি, কলকাতা ছেড়ে চলে আসব এখানেই চিরদিনের মতো।

এসব কথা থাক। শুধু একটি কথা বলি। তা হল আমি যদি ঘৃণাক্ষরেও জানতাম যে, ওরা আপনার সঙ্গে এমন করবে তবে আপনাকে আদৌ আসতে বলতাম না। আমাকে আপনি যদি ক্ষমা না করেন স্যার তা'হলে আমি বড় অপরাধী হয়ে থাকব।

আপনাকে এখানে নিয়ে এসেছিলাম অনেক কল্পনা নিয়ে। গতবারে যখন এসেছিলাম তখন ইন্ডিজিৎদা সুমিতাদি আর আমি লোহারডাগার কাছে একটি গ্রামে গেছিলাম নতুন একটি প্রজেক্ট শুরু করা যায় কি না তার প্রসংগেই করতে। সেখানে পৌঁছে তো আশ্চর্য হয়ে গেলাম আমরা। সেখানে একটি পুরো রাজধানী আবিষ্কৃত হয়েছে। রাজবাড়ি, বাহিরমহল, অন্দরমহল, পুকুর। একটা পুকরের জলে রানী মুখ ধুতেন, অন্য পুকুরে চান করতেন। সেই পুকুর থেকে সোনার মাছ পাওয়া গেছে তিনটি। সরকারি আমলারা এসে নিয়ে গেছেন। ভাল করে খুঁড়লে আরও কি না জানি বেরোবে কিন্তু এখন পর্যন্ত যা খোঁড়াখুঁড়ি তা গ্রামের মানুষেরাই করেছেন। আর্কেওলজিকাল সার্ভের অফিসারেরা এখনও সেখানে পৌঁছেন নি।

সত্যি! ভাবা যায় না। আপনি দুটি বই পড়তে বলেছেন কলকাতাতে ফিরে—তার মধ্যে The Wonder that was India বইটি ফিরেই পড়ব ঠিক করেছি। আমাদের দেশের বন-পাহাড়ে যে কত এবং কতরকম ধনরত্নই ছড়ানো আছে তার খোঁজ আমরা নিজেরাই রাখি না।

কোন উপজাতির রাজবাড়ি ওটি, কে জানে! এখানে, এই পালামুতে কত উপজাতির বাস, চেরো, খাঁরওয়ার, ওঁরাও, মুণ্ডা, হো। আপনি কি 'কোয়েলের কাছে'

বইটি পড়েছেন? না পড়ে থাকলে, অবশ্যই পড়বেন। তাতে পালাম্যু ফোর্ট-এর প্রসঙ্গে কিছু প্রাক-ইতিহাস আছে। 'পালাম্যু' শব্দটি আসলে ড্রাবিড় শব্দ। 'পল+আম্ম+উ' এই তিনটি শব্দ থেকে সাহেবদের উচ্চারণে PALAMU হয়েছে। এই শব্দ তিনটির মানে হল দাঁত বের করা নদী। পালাম্যু ফোর্টের পেছন দিক দিয়ে ঔরঙ্গা নদী বয়ে গেছে। বর্ষার সময়ে জল যখন বাড়ে তখন নদীর বুকে বড় বড় কালো পাথর জেগে থাকে কলরোলে বয়ে-যাওয়া জলের মধ্যে, তখন মনে হয় নদী দাঁত বের করে আছে। সেই কারণেই, জায়গার নাম পালাম্যু।

জানেন স্যার, ঐ গ্রামের মানুষেরা যে ভাষাতে কথা বলে তার নাম কুরুক্। মুণ্ডাদের ভাষারই একটি উপ-ভাষা। ইন্দ্রজিৎদা আমাকে একটি বই পড়তে দিয়েছেন ফাদার হফফ্‌ম্যান-এর উপরে নানা জনের লেখা। লুথেরান জার্মান মিশনের ফাদার ছিলেন ফাদার হফফ্‌ম্যান। দ্বিতীয় বিশ্বযুদ্ধের সময়ে তিনি জার্মান বলেই তাঁকে ডিপোট করা হয় কিন্তু অত্যন্ত সম্মানের সঙ্গে তাঁকে নিয়ে যাওয়া হয় জাহাজে করে। মুণ্ডাদের বা ওঁরাওদের ভাষার কোন লিপি নেই। যুগযুগান্ত ধরে এই সব ভাষা মুখে মুখে বাহিত হয়ে বেঁচে আছে। লোহারডাগার ঐ গ্রামের কুরুক্ ভাষাও তেমনই এক ভাষা।

আমি ভেবেছিলাম আপনাকে নিয়ে যাব ঐ গ্রামে। গ্রামের নামটা আমি জানতাম কিন্তু মনে পড়ছে না। ইন্দ্রজিৎদা বলতে পারবেন।

জানি না, আপনি আমাকে ক্ষমা করবেন কি না এবং ক্ষমা করে সত্যি সত্যি আবারও আসবেন কি না। যদি আসেন, তাহলে কত কিছু যে দেখাবার আছে আপনাকে। আমি বাকি জীবন এখানেই কাটা'ব আর সর্বজ্ঞদের শহর কলকাতাতে ফিরব না ঠিক করেছি। দু'জায়গার খরচ চালানোও আমার পক্ষে সম্ভব নয়, বিশেষ করে ওদের সঙ্গে যখন আর থাকব না বলে সিদ্ধান্ত নিয়েছি।

আপনি কি যেদিন ফেরার কথা সেদিনই ফিরছেন? তাই ফিরবেন। আমার ফেরার ঠিক নেই কোনো। আগেও যেতে পারি, পরেও। গিয়ে নিজের একটা অস্থায়ী বন্দোবস্ত করে নিয়ে আপনাকে ফোন করব একদিন।

কী আর বলব! আপনার মতো মানুষের ভালবাসা, খুড়ি, ভালবাসা নয় অকৃপণ স্নেহ যে পেয়েছি এ আমার পরম সৌভাগ্য। ভাল থাকবেন স্যার। আমাদের মতো অনেক মানুষের জন্যে আপনার ভাল থাকাটা দরকার।

প্রকৃতির মধ্যে চলে আসুন স্যার। অনেক তো উপার্জন করেছেন। আর কেন? এবার কষ্টার্জিত ধন যোগ্য কারণে ব্যয় করুন। দেখবেন, আনন্দে আপনার মন ভরে উঠবে। ইন্দ্রজিৎদা আর সুমিতাদি'র সঙ্গে যোগাযোগ রাখবেন, দেখবেন নতুন এক সবুজ অনাবিল জগৎ খুলে গেছে আপনার সামনে। জীবন আর প্রশ্বাস নেওয়া আর নিঃশ্বাস ফেলা যে এক নয় তা অবশ্যই বুঝতে পারবেন।

রাঁচীতে বারিয়াতুতে যখন গেলেন তখন সুমনা চক্রবর্তী দত্তর সঙ্গে দেখা হয় নি আপনার প্রজেক্ট অফিসে? দারুণ! না, মহিলা? উনিও একজন ডিরেক্টর—তবে অন্য নানা বিষয় দেখেন। কালোর মধ্যে অমন সুশ্রী, একমাথা চুলওয়ালা মহিলা আপনি ভারতে বেশি দেখেন নি নিশ্চয়ই!

কলকাতা ফিরে আপনাকে একটি বই পড়াব। ভেরিয়ার অলউইনের উপরে লেখা—রামচন্দ্র গুহর Savaging The Civilized। এখন আপনিও তো জঙ্গলে আসবেন বারে বারে—এসব বই পড়তে হবে initiation এর জন্য। জঙ্গলও তো এক বিশ্ববিদ্যালয়। এখানে ভর্তি হতেও ত কিছু প্রস্তুতি লাগবেই।

ভাল থাকবেন স্যার।

এইচ. পি.-কে মুরছর গেস্ট হাউসে পৌঁছে দিয়ে সোহনলালবাবু চলে গেছেন রাঁচীতে। যদিও এঁরা সর্দার পাঞ্জাবী কিন্তু ওঁদের পুরো পরিবারই নিরামিষাশীই শুধু নন, জৈনদের মতো সূর্যাস্তর আগেই খাবার খেয়ে নেন। মশা মাছিও মারেন না। তা'ছাড়া পথটা নির্জন। একটা ছোট ব্রিজ আছে, সরু, যেখানে গাড়ির গতি কমাতেই হয় এবং সে কারণেই সেখানে প্রায়ই না কি ডাকাতিও হয়।

চানটান কবে তারপর খাবেন উনি। ভারি ভাল লাগল টেবো ঘাটের জঙ্গল পাহাড় এবং হিরনি জলপ্রপাতটি। চক্রধরপুরে গিয়ে বিয়ার কিনে দুপুরের খাবার আগে জঙ্গলে পিকনিক করলেন। সোহনলালবাবু এসব ছেঁন না। চমৎকার শুকনো পরোটা, আলুর ও পটলের শুকনো তরকারি, ক্যাপসিকাম স্টাফড, ছানা দিয়ে, নানা রকম আচার এবং বড় ফ্লাস্কে করে মশলা দেওয়া চা। মুরছর এই গেস্ট হাউসে খাওয়া নিরামিষ হলে কি হয়, খাঁটি ঘিয়ে সব কিছু তৈরি। ইংল্যান্ড থেকে জার্সি গরু আনিয়েছিলেন। সেই গরুর বন্যার মতো দুধ। চমৎকার বাগান। আটজন মালি কাজ করে। সকাল-বিকেল চায়ের সঙ্গে মাঠরী খান। খুব ভালবেসে খান এইচ. পি। তিনি যে খেতে এত ভালবাসেন তা নতুন করে জেনে সুনিশ্চিত হলেন। যে মানুষ খেতে ভাল না বাসেন, যাঁর সব ঔৎসুক্য মরে গেছে তিনি যথাথই বুড়ো। বার্কক্য শরীরের ব্যাপার নয়, মনেরই ব্যাপার পুরোপুরিই।

রোগ অনেকই রকম হয়েছে কিন্তু কোনো রোগকেই বিশেষ পাত্তা দেন না উনি। উনি বিশ্বাস করেন দে'জ মেডিকেলের ভূপেনবাবুরই কথায়। আর বিশ্বাস করেন মানুষ বাঁচেও মনের জোরে, ডাক্তারের দয়ায় নয়।

মাঝে মাঝে তাঁর জীবনের গন্তব্যহীনতা, পরিণতিহীনতা তাঁকে হতাশ করে দেয়। বড় একা বোধ করেন। পাগল পাগল লাগে। তখন তাঁর বাঁচার ইচ্ছাটা পুরোপুরি অন্তর্হিত হয়। এমন কি মাঝে মাঝে আত্মহত্যা করতেও ইচ্ছা হয়। এইচ. পি. চ্যাটার্জির মতো প্রত্যেক সফল মানুষই জানেন যে, সাফল্যও মানুষকে ফ্রাস্ট্রেট করে। ফ্রাস্টেশান শুধুমাত্র অসফল মানুষদেরই অসুখ নয়। সাফল্য যখন ফ্রাস্ট্রেট করে তখন পুরোপুরিই করে। অসফল মানুষের নানা স্বপ্ন থাকে। সেই সব স্বপ্ন সফল করার ভাবনাতে বঁদু হয়ে তাঁরা নতুন করে বাঁচার চেষ্টা করতে পারেন। কিন্তু সফল মানুষেরা ডেড এন্ড-এ পৌঁছে যান বলেই তাঁদের বাঁচার মতো কোনো তাগিদই আর থাকে না।

তবে মিথ্যে বলবেন না তিনি, দেবীর সঙ্গে আলাপিত হবার পর থেকেই তার মনে নতুন করে সুন্দরভাবে বাঁচার একটা ভীকু ইচ্ছা প্রবলভাবে মাথা চাড়া দিয়ে

উঠেছে। অর্থহীন নানা সুখকল্পনাতে নিমজ্জিত আছেন তিনি। চান করতে করতে গান গাইছেন প্রায়ই গুনগুন করে।

কলেজ জীবনে গান গাইতেন। গান বলতে শুধুই রবীন্দ্রসঙ্গীত এবং অতুলপ্রসাদের গান। একটা গানের স্কুলে কিছু দিন গান শিখেও ছিলেন। কিন্তু কাজের জগতে ঢুকে পড়ার পরে গান তাঁর জীবন থেকে ছুটি নিয়েছিল। কিন্তু সাঁতার কাটা বা সাইকেলে-চড়ারই মতো, গান এক বার শিখলে মানুষ জীবনেও তা ভোলে না। স্বর হয়ত নড়ে যায়, দম হয়ত কমে যায়, তবলার সঙ্গে না গাওয়াতে তালের হয়ত গণ্ডগোল হয়, উঁচু স্কেল-এ হয়ত গাওয়া যায় না কিন্তু গান ঠিকই বেঁচে থাকে সেই মানুষের বুকের মধ্যে। বসন্তের আগমনে বা আষাঢ়ের প্রথম বর্ষণে সেই সুপ্ত বীজ হঠাৎই অঙ্কুরিত হয়ে অপ্রস্তুত মানুষকে চমকিত করে।

একটি গান আজকাল তিনি প্রায়ই গুনগুন করে গাইছেন। করছেন। সচেতনভাবে যে গুনগুন করছেন তা নয়। তাঁর অবচেতন থেকে গানের কলিগুলি স্বতঃস্ফূর্তভাবে হাজির হয়ে তাঁকে একেবারে আশ্রুত, সিজ্জ করে দিচ্ছে। দেবব্রত বিশ্বাস এই গানটি ভারি ভাল গাইতেন, মানে যে গানটি কিছু দিন হল গুনগুন করছেন উনি। জর্জ বিশ্বাসের মৃত্যুর পরে হঠাৎ এতো মানুষ ওর ছাত্র ছিলেন বলে সোচ্চারে দাবি করছেন যে লজ্জাতেই এইচ. পি. কারোকেই বলেন না যে জর্জদার রাসবিহারী অ্যাভিনিউর উপরের ত্রিকোণ পার্ক-এর পাশের বাড়িতে গিয়ে তিনিও বেশ কিছুদিন গান শিখেছিলেন।

সেই গানটি হল, ‘আমার বেলা যে যায় সাঁঝ বেলাতে তোমার সুরে সুরে সুর মেলাতে/ একতারাটির একটি তারে গানের বেদন বইতে নারে / তোমার সাথে বারে বারে হার মেনেছি এই খেলাতে / তোমার সুরে সুরে সুর মেলাতে/’

গানটি পূজা পর্যায়ের কিন্তু রবীন্দ্রনাথের অনেক পূজার গানই প্রেমের গান বলে ধরে নেওয়া যায়, যেমন অনেক প্রেমের গানকেই পূজার গান বলে। আসলে, প্রেম আর পূজাতে তো কোনো তফাত নেই। বিরোধ ত নেইই!

কেন যে এই গানটিই আজকাল ঘুরতে ফিরতে, স্বপনে জাগরণে ফিরে ফিরে মনে আসে তা তিনি বলতে পারবেন না কিন্তু এই গানটির “SPELL”-এর মধ্যে বাস করছেন তিনি কিছুদিন হল। নিশিতে ডাকার মতো এই গানটি তাঁকে অনুক্ষণ ডাকছে রাতে দিনে।

যাঁরাই একটু আধটু গানবাজনা করেছেন কখনও তাঁরাই জানবেন এমনটা সত্যিই ঘটে। আর যখন ঘটে, তখন “নিশিতে পাওয়া” মানুষের মতোই অবস্থা হয় সেই মানুষের।

এইচ. পি. ঠিক করলেন যে, কিছুক্ষণ পায়চারি করে তারপর চান করবেন। তারপর কলকাতাতে কাটি ফোন করতে হবে মোবাইল ফোনে। এখানে যদিও ফোন আছে তবে তা ব্যবহার করতে অফিস ঘরে আসতে হয়। কী দরকার! তাঁর সুইটের ড্রইং রুমের সোফাতে বসেই যখন করা যাবে মোবাইল-এ। এখানে এসেই মোবাইল ফোনটা চার্জ করে নিয়েছেন।

প্রায় ঘন্টাখানেক পায়চারি করা হল — বিশুদ্ধ পরিবেশে। প্রায় সারাদিনই

গাড়িতে বসে ছিলেন। কোমরে ব্যথা হয়ে গেছে। পলিউশান বলতে কিছুমাত্রও নেই। সারা দিনে হয়ত এই পথ দিয়ে পনেরো কুড়িটা গাড়ি ও বাস যাওয়া-আসা করে। পরিবেশ বিশুদ্ধ কিন্তু বড় ন্যাড়া হয়ে গেছে এই অঞ্চল। বন নষ্ট করে ফেলা হয়েছে। সেই তুলনাতে সারাদ্বায়ে দুটি দিন কাটিয়ে যে এলেন তাকে স্বর্গ বলে মনে হচ্ছে এখন।

এমন সময়ে একটা সাদা ফোর্ড আইকন এসে ঢুকল কারখানার গেট-এ। গেস্ট-হাউসটি কারখানার চৌহদ্দিরই মধ্যে। ঔর কাছে যখন এল গাড়িটা মস্ত চওড়া ড্রাইভ ওয়ে বেয়ে, তখন দেখলেন সোহনলালবাবুর ছোট ছেলে বাব্বি যার ভাল নাম জগদীপ এবং তার ভালবেসে বিয়ে করা গুজরাটি স্ত্রী বিন্দু। বিন্দুর কাকা এইচ. পি-র সঙ্গে কলেজে এক সঙ্গে পড়তেন।

গুড ইভনিং আঙ্কল।

বলে. গাড়ি থেকে নামল বাব্বি।

গুড ইভনিং। তুম কব আয়া কলকাতা সে?

আজই সুবে আঙ্কেল। ম্যায় আয়া, ঔর কুকু গয়া।

তো আঙ্কেরামে কিঁউ আয়া খুবসুরৎ বিবিকো লে কর? ড্যাকাইতি তো হোতে হি রহতা হ্যায় হিয়াঁ। পিতাজী বলতে থেঁ।

জী হাঁ! মগর ক্যা কর? আপকে লিয়ে জরুরি খত আয়াথা বারিয়াতু সে। দে সাহাবনে ভেজিন। উসি লিয়ে পোস্টম্যান বনকর উও খত লেতে আয়া। বহতই জরুরি খত হোগী।

খত?

অবাক হলেন এইচ. পি.।

তারপর বললেন দে সাহাব তো ফোনসে ভি বাত কর সকতে যে ইতমিনান সে। খ্যয়ের উনকি লিখা ছয়া খত নেহি না হ্যায়। দুঁসরা কোঈ ভেজা হোগা।

চিঠিটা হাতে নিতে বললেন, এইচ. পি. আও অন্দর চলো। খানা খা কর যাও না হামারা সাথ।

বলেই, লঙ্জা পেলেন।

বললেন, ম্যায় তুমহারা মেহমান হঁ ঔর বাত অ্যায়সী কর রহা হ্যায় কি, যো লাগতা হ্যায় তুম দোনো হামারি মেহমান হো।

উও বাত তো বিলকুল সাহি হ্যায়। আপহি কো তো হ্যায়ই হ্যায় সব কুছ। পিতাজীকি ছোড়কর হামলোগোকি শর মে হাত রাখনেওয়ালা আদমী ঔর হ্যায় কিতনা?

এইচ. পি. বললেন, খানা নেহি খানা তব হিয়াঁ জাদা দের তক রোকো মত। জলদি লওট যাও। সাম্নাটা রাস্তে হ্যায়, রাস্তে লস্বে ভি হ্যায়। সাথমে বহজী হ্যায়।

বাব্বি ও বিন্দু গাড়ি থেকে নেমে পড়েছিল।

হেসে বলল, দুধ লেনা না হোগা। দুধ ঔর ফুল। সুবা সাম দো দফে দুধ ঔর ফুল লেনেকে লিয়ে কিসিকো না কিসিকো আনাই পড়তা। ঔর আজকালকি বিবি শাসকি সাথ জাদা দের তক রহ নেহি শক্তি।

বিন্দুকো রাস্তেমে চাট ঔর ভেলপুরি খিলা কে তবহি না ঘর যাও গে।

উও ডিউটিতো আনেকা ওয়াজ্জই পুরি কিয়া।

বলে, হাসল বাব্বি। বিন্দুও হাসল।

বিন্দু বলল, আঙ্কেল সাদী-শুদা আদমী নেহি হোনেসে ক্যা হোগা, সবহি চিজ্জিকি খয়াল রাখতে হেঁ।

ওয়াহ! ওয়াহ! বাহাদুর লেড়কী হো তুম।

তারপর বললেন, ইসসাল বিজনেস ক্যায়সা? এক্সপোর্ট? এক্সপোর্টকি অ্যাওয়ার্ড ইস সালভি মিলেগী না?

ইস সাল লাগতা হ্যায় কি সমর সিং জয়সোয়াল কোহি অ্যাওয়ার্ড মিলেগী।

এইসী বাত?

জী হাঁ। হর সাল মিলনা ভি নেহি চাহিয়ে। সবহিকো মিল-জুলকে মিলনা চাহিয়ে। শেল্যাককি ট্রেডমে জেলাসি ক্যাফি হ্যায়। সবকুছ শোচ-সমঝকর করনা চাহিয়ে।

বাঃ বেটা। তুমতো বাহাদুর বন গ্যয়ে। বহত খুউব।

ওরা দু'জনে গাড়ি থেকে নেমে পা ছুয়ে প্রণাম করেছিল আবার যাবার সময়েও পা ছুয়ে প্রণাম করল।

তার মঞ্চেলদের মধ্যে ভারতের সব প্রদেশীয়রাই আছেন, কাশ্মীর থেকে কন্যাকুমারীর। বাঙালি ছাড়া, এই সহবৎ, এই বিনয়, অন্য সব প্রদেশীয়র মধ্যেই দেখতে পান এইচ. পি.। বিশেষ করে যিনি তাঁদের চোখে “কাজের মানুষ” তাঁর প্রতি সম্মানের কোনো ঘাটতিই থাকে না। শুধু বাঙালিরাই পায়ে হাত দিয়ে প্রণাম তো দূরস্থান, নমস্কারও করেন না। এইচ. পি.-র কাকা, ব্যারিস্টার নরেন চ্যাটার্জি বলতেন, বাঙালি ব্যবসা কী করবে রে! ওরা দু'হাত জোড় করে সুন্দর করে নমস্কারই করতে শিখল না আজ অবধি। আদৌ কোনো দিন শিখবে কি না কে জানে। ব্যবসার নব্বই ভাগই হচ্ছে ব্যবহার, বিনয়। এই সরল সত্যটুকু বাঙালি যত তাড়াতাড়ি বোঝে ততই মঙ্গল।

এখন যে নবজাগরণের ঢেউ উঠেছে। তারা 'তো মনে হচ্ছে বাঙালিকে জাগিয়েই ছাড়বে।

সেদিন বার লাইব্রেরীতে ঘোষ সাহেব বলছিলেন।

তাকে মৈত্র বলেছিল, যে-জাত আত্মহত্যা করে নিজেরাই কবরে সৈঁধিয়েছে সেই জাতের 'নবজাগরণ' হওয়া মুশকিল। যীশুখ্রিস্ট Ressurrected হয়েছিলেন বলে সকলেই তো আর তা হতে পারেন না।

গাড়ির ডিকি ভর্তি ফুল আর বড় বড় মুখবন্ধ স্টেইনলেস স্টিলের পাত্রে দুধ নিয়ে ওরা চলে গেলে তীব্র উৎসুক্যে ড্রাইভওয়ার হ্যালোজেন লাইটের তলাতে দাঁড়িয়েই খামটা ছিড়লেন এইচ. পি.। খামের উপরে গোটা গোটা অক্ষরে মেয়েলি হাতের লেখাতে লেখা ছিল প্রতি/শ্রী হরপ্রসাদ চ্যাটার্জি, মুরহ। প্রেরক দেবীশ্রী ভট্টাচার্য, সারাক্স।

চিঠিটা খুলতেই দেখলেন সম্বোধনটি : মাননীয়েষু স্যার,

হাসি পেল ওঁর। কখনওই অধ্যাপনা না করেই এমন 'স্যার' হবার ভাগ্য সকলের হয় না। কে জানে! একটা দূরত্ব বজায় রাখার জন্যেই বোধহয় এইচ. পি.-কে স্যার বলে দেবী, দেবীশ্রী। কই ইম্ভজিৎ দে-কে তো স্যার বলে না ও, 'ইম্ভজিৎ দা' বলেই সম্বোধন করে। আসলে তিনি দূরের মানুষ বলেই তাঁকে দূরে দাঁড় করিয়ে রাখবার জন্যেই এই স্যার সম্বোধন।

চিঠিটা পড়া শুরু করেও পড়লেন না তিনি। ঠিক করলেন, চান করে উঠে খাওয়ার আগে সোফাতে বসে কুশান দেওয়া স্টুলের উপরে পা তুলে দিয়ে একটা ছইস্কি ঢেলে নিয়ে তারপরই পড়া শুরু করবেন চিঠিটা। কি লিখেছে দেবী কে জানে!

সোডা দিয়েই ছইস্কি খান। সারাদ্বায়ে সোডা ছিল না। সোহনবাবু লেহারের প্লাসটিকের বোতলের দু'ডজন সোডা আনিয়ে রেখে দিয়েছেন। রান্না যে করে, তাকে এবং খিদমদগার দু'জন আদিবাসী মুণ্ডা ছেলেকে বলে দিয়েছেন চারটে করে ফ্রিজ়ে ঢুকিয়ে রাখতে, অন্যগুলো স্টোর রুম-এ থাকবে।

যে কোনো চিঠিই খুলে ফেললে তা তুলে-ফেলা ফুলেরই মতো হয়ে যায়। তারপর অবশ্য চিঠি পড়তে শুরু করলে আবার নতুন নতুন ফুল ফুটতে থাকে মনের বাগানে। রঙ-মশালের নানারঙা আলো উড়তে থাকে চারদিকে। নিজে চিঠি আদৌ ভাল লিখতে পারেন না, বাংলায় চিঠি লিখতে ত জানেনই না, কিন্তু ভাল চিঠি পেতে ভারি ভাল লাগে ওঁর। অসমের গোয়ালপাড়ার গৌরীপুরের এক পাতানো-বৌদি এমন সুন্দর সব চিঠি লিখতেন এইচ. পি.-কে যে, সেই সব চিঠি পড়েই তাঁর সঙ্গে গভীর এক প্রেমের অশরীরী সম্পর্ক গড়ে উঠেছিল। মনে মনে সেই মহিলাকে অদেয় তাঁর কিছুই ছিল না।

সেই পাতানো বৌদি মাত্র পঁয়ত্রিশ বছর বয়সে ম্যালিগন্যান্ট ম্যালেরিয়ায় মারা যান। বেঁচে থাকলে কি হত বলা যায় না। এই যোগন, ফ্যান্স, ইমেইল-এর দিনেও চিঠিব কোনোই বিকল্প নেই, মনে হয় এইচ. পি.-র। ঐ সব হচ্ছে ব্যবসার উপকরণ আর চিঠি হচ্ছে ব্যক্তিগত সম্পর্কের সেতু। জাপানিজ গার্ডেনের লিলিপুলের উপরে যেমন সুদৃশ্য কাঠের পুল থাকে তেমন সেতু। সে সেতুর চারপাশে ভ্রমর আর প্রজাপতি ওড়ে, চেরী ফুল আর অমলতাস ফোটে। চিঠির মধ্য দিয়ে এক জন মানুষ অন্য জনকে যেমন করে সুগন্ধি প্রজাপতির মতো ছুঁয়ে যেতে পারে, তেমন করে আর কোনো মাধ্যমই পারে না বলেই মনে হয় ওঁর। তবে উনি ব্যাক ডেটেড - 'ফ্যাটসো', 'ধুমসো' এক জন মানুষ। এই নব্য যুগে একেবারেই বাতিল। তাঁর মতামতের দাম হয়ত কারো কাছেই নেই।

চান করতে করতে এইচ. পি. ভাবছিলেন, ইম্ভজিৎবাবুদের নানা প্রজেক্ট দেখার পর এই লাঙ্কার কারখানা দেখা আর এক অভিজ্ঞতা। সোহনলালবাবুর কাছ থেকে সারা দিনে অনেকই শিখলেন। লাঙ্কাকে এখানে বলে 'লা'। 'লা' কোনো ফল নয়, ফুলও নয়। লা নানা গাছের এক রকমের পোকাকার ক্রিয়াকাণ্ড থেকেই হয়। নানা রঙের লা না লাহি হয়। এই লাহিরই ইংরেজি নাম Seed-Lac. এই Seed-Lac থেকেই Shellac উৎপাদিত হয়। যারা লাহি উৎপাদন করে, মানে Seed-

Lac- এর গাছ করে, তাদের বলে গাছোয়াল। কুল, কুসুম, পলাশ, এই সব নানা গাছে লাহি হয়। পাঞ্জুন এবং লিপসি গাছেও হয়। বাংলাতে যে-গাছকে পাকুড় গাছ বলে সে গাছেও হয় না কি। পাকুড় গাছ দেখেন নি কখনও এইচ. পি.। কিই বা দেখেছেন! পোকা-লাগা ডাল থেকে চিলতে কেটে সে গাছেরই অন্য ডালে লাগিয়ে দিলে কলমের মতো সেখানেও পোকা হয়। লাহি নানারঙের হয়। আষাঢ় মাসে কুসুম গাছে যে লাহির কলম বাঁধা হয় তা কাটা হয় কার্তিক মাসে। সেই লাহির নাম কাত্কি। কার্তিক মাসেই সেই ডাল কাটে। পোকা-ধরা ডাল চলে যায় হাটে হাটে আর সেখান থেকেই পাইকারেরা তা সংগ্রহ করে বিভিন্ন Shellac ফ্যাক্টরিতে চালান দেয়। 'কাত্কি'কে "রঙিন"ও বলে। রঙিন কুল ও পলাশ গাছেও হয়। এই রঙিন লাহি পলাশ ফুলের মতো লাল বা লালের বিভিন্ন শেডস-এ হয়। কার্তিক মাসে কুল গাছে যে কলম করা হয় তা ওঠে বৈশাখ মাসে। তাকে বলে "বৈশাখি"। কুসুম গাছে যে লাহি হয় তার নাম "কুসুমি"। হাটে যে লাহি যায় তাকে লাহি বলে না, বলে খাদন। খাদন হচ্ছে Impurities. পাটের যেমন 'খলতা', সোনার বা কাঁসা পেতলের যেমন 'গলতা', লাহির খাদনেরও তেমন 'খাদ'। হাটে হাটে গাছের ডালের টুকরোগুলোই আসে। খাদন শুদ্ধ লাহি। খাদন থেকে লাহি আলাদা করে ওজন করা হয় কে জি হিসাবে। সেই লাহিকে, মানে খাদন ছাড়া লাহিকে বলে চৌরী। চৌরীর দাম স্বভাবত বেশি হয় খাদনের চেয়ে। সোহনলালবাবু বলেছিলেন যে, দার্জিলিং, আসাম আর সিঙ্গাপুরে লাহি নাকি অড়হর গাছেও হয়।

কত কিছুই জানার আছে। সত্যি। জানার ইচ্ছা যদি কারো থাকে তা'হলে জীবনে জানার শেষ নেই বোধহয়।

চান করে উঠে একটি হুইস্কি ঢেলে নিয়ে সোডা মিশিয়ে চুমুক দিলেন। সারা দিনের দৌড়াদৌড়ি বা কাজের পরে গরম জলে চান করে উঠে দু'তিনটি স্কচ খাবার আনন্দই আলাদা। তবে, তাঁদের কলেজের অধ্যাপক পি. এম. নারিয়েলওলা বলতেন, "You must earn your scotch." এই কথাটা কিংসুক অথবা অঙ্কুর সঙ্গে আবার যদি কখনও দেখা হয় তবে ওদের বোঝাবেন এইচ. পি.। "Nothing comes from nothing, nothing ever could. I must have done something good in my youth or in childhood." জীবনের প্রত্যেকটি জিনিসই অর্জন করতে হয়। ওরা সেই অর্জনের কষ্ট হয়ত স্বীকার করে নি তাই অনেক কিছুই হারাবে। অথবা এও হতে পারে যে ওরা জীবনে সুযোগই পায়নি নিজেদের প্রমাণ করার। এইচ. পি. যেমন পেয়েছিলেন। যদি তাই হয়, তবে সেটা ওদের দুর্ভাগ্য। এই সমাজেরই গ্লানি সেটা। সমান সুযোগ প্রত্যেকেরই থাকা উচিত, তারই পরে যোগ্যতা বা অযোগ্যতার বিচার হওয়া উচিত। আজকেও লক্ষ লক্ষ তরুণ-তরুণীদের সামনে সেই সুযোগ এনে দেওয়া যে গেল না সেটা এই সমাজব্যবস্থার ও রাষ্ট্রেরই অযোগ্যতা। স্বাধীনতার পরে এত বছরে সেই সুযোগ আসা ও থাকা অবশ্যই উচিত ছিল।

এসব কথা সব সময়ে যে ভাবেন তা নয় কিন্তু যখন ভাবেন তখন মন খারাপ হয়ে যায়।

কিন্তু এখন তিনি দেবীর চিঠিটা পড়ছেন তারিয়ে তারিয়ে শিশুরা যেমন করে আইসক্রিম খায়। এখন তিনি দেশ কাল সমাজ কিংশুক বা অস্তু কারো ভাবনাই ভাবতে চান না। For a change উনি একটু, না একটু নয়, ভীষণই স্বার্থপর হয়ে উঠতে চান। জীবনের কোনো কোনো ক্ষেত্রে স্বার্থপর না-হওয়াটা পরম মূর্খামি। এই কথাটা বুঝতে বড় বেশি সময় নিলেন এইচ. পি.।

মাননীয়েষু স্যার...

চিঠিটা পড়তে আরম্ভ করলেন এইচ. পি. চ্যাটার্জি, মুরহুর আচ্ছুরাম কালকাফ-এর লাক্ষা কারখানার নির্জন গেস্ট হাউসে বসে। এখন বিরাট ল্যাঙ্কশায়ার বয়লারটার একটানা নীচুগ্রামের আওয়াজ ছাড়া আর কোনো আওয়াজ নেই। চারদিকে সুষুপ্তি। কারখানার হাতার মধ্যে বিরাট বিরাট সব গাছ, কোনোটাতে এখন ফুল আছে, কোনোটাতে শরতে বা বসন্তে আসবে। গাছগুলো চেনেন না এইচ. পি. কিন্তু তারা যে প্রহরীর মতো তাঁকে এই নির্জনে পাহারা দিচ্ছে তাঁ তিনি বুঝতে পারছেন। এক একটি বড় গাছ সব দেখে, সব বোঝে, ভালবাসে। এই কথা সারাক্ষাতে না এলে এ জীবনে অজানাই থাকত এইচ. পি.-র কাছে।

সোহনলালবাবু বলেছিলেন, রাঁচীতে গরম গরম খেয়ে ওঁদের বাড়ি থেকে রওয়ানা হতে। অবাঙালি ব্যবসায়ীরা যে ব্যবসাতে কেন এত সফল তা তাঁদের স্ত্রী, পরিবার এবং রান্নাঘর দেখলেই বোঝা যায়। এটা বানানো কথা নয়। যাঁরা লক্ষ্য করে দেখেছেন তাঁরা সকলেই জানেন।

মুর্ছ থেকে চান টান করেই বেরিয়েছিলেন। রাঁচীর বাড়ি 'বৃন্দাবনে' পৌঁছতেই কুকু ও রেশমী, বাব্বী ও বিন্দু এসে পায়ে হাত দিয়ে প্রণাম করল। ছোট ছেলে গুল্লু আর তার স্ত্রী তখন ছিল না। রেশমীর বাবা রাজা সাহেব ছিলেন এন. সি. ডি. সি.-র ম্যানেজিং ডিরেক্টর। আর বিন্দুদের পারিবারিক ব্যবসা ছিল কয়লাখনির। জাতীয়করণ হয়ে যাবার পরেও তাঁরা কয়লার ব্যবসাই করেন। সোহনলালবাবুর স্ত্রী কৃষ্ণ দেবী বসার ঘরে এসে আপ্যায়ন করলেন। নাতি ও নাতনিরাও সবাই পড়া ছেড়ে প্রণাম করতে এল। এই সব ট্র্যাডিশন শিশুকাল থেকেই গড়ে ওঠে ওঁদের মধ্যে। বাঙালিদেরও অনেক সব সুন্দর ট্র্যাডিশান ছিল কিন্তু এইচ. পি.-র মনে হয়, অকারণ ঔদ্ধত্য ও অজ্ঞতা ও বুলি কপচানো রাজনীতিই সব কিছু Rituals-এর গভীরতা ও সৌন্দর্যকে শেষ করে দিল।

ওঁরা শুনলেন না। খাবেন না যখন তখন তিনটি হট কেস-এ গরম খাবার দেওয়া হল। ফ্লাস্কে গরম দুধ। এইচ. পি. হেসে বললেন, জার্সি গরুর দুধ কি বাঙালির পেটে সহিবে? তা'ছাড়া, রাতে দুধ খাই না আমি। হুইস্কি খাই।

কুকু বলল, সোডা ফ্রিজে রাখা আছে বের করি নি। গাড়িতে বসার সময়ে বের করব, যাতে ঠাণ্ডা থাকে। তারপর জিজ্ঞেস করল আঙ্কল জী, হুইস্কি ত হ্যায় না? নেহি ত আভিভ ফোন করবে মাস্সা লেতা হুঁ-সিঁধা স্টেশন মে পৌঁছ যায়েগা ব্ল্যাক ডগ।

নেহি নেহি বেটা, সব কুছ হ্যায়। ফিঙ্কর মত, করো।

কুকুর খিদমদগারি দেখলে কেউ বিশ্বাস করবে না সে স্টেটস্‌এ পনেরো বছর ছিল এবং ফিজিক্স পড়িয়েছে তার মধ্যে পাঁচ বছর। এই বিনয়ই বাঙালি ছেলেদের শেখার ছিল ওঁদের কাছে।

সবাই'র কাছে বিদায় নিয়ে বেরিয়ে পড়লেন এইচ. পি.। সঙ্গে দুই ছেলে চলল তাঁকে ট্রেনে উঠিয়ে দিতে। আসবার সময়ে ওঁদের সকলের আন্তরিকতা ও ভালবাসাতে একা-থাকা ব্যাচেলর এইচ. পি.-র মন দ্রব হয়ে উঠল।

দুপুরে ইন্ডিজিৎ আর সুমিতার সঙ্গে কথা হয়েছিল। ওঁরাও স্টেশনে আসবেন বলেছিলেন, এইচ. পি. মানা করেছিলেন। অনেক কথাই হয়েছিল কিন্তু সঙ্কোচে

জিজ্ঞেস করতে পারলেন না যে দেবী ফিরে গেছে কি না, না কি সারাদ্বায়েই আছে? না ফিরে গিয়ে থাকলে, কবে যাবে? সন্ধ্যাটা কেন যে হলো তা নিজেই বুঝতে পারলেন না। কিন্তু সন্ধ্যাই হলো না, সন্ধ্যাটা লজ্জা হয়ে তাঁকে পীড়িতও করল। তবে এই পীড়াতে কোনো জ্বালা ছিল না, একধরনের আনন্দ ছিল। ঠিক এই ধরনের সন্ধ্যাচ ও লজ্জার শরিক উনি বছ বছর হন নি।

ওরা একটা রিসেপশনে যাবে স্ত্রীদের নিয়ে, ছোটভাই গুল্লুর শ্বশুরবাড়ির কারো বিয়েতে, ঐ কারণেই গুল্লু ছিল না বাড়িতে, তাই এইচ. পি.-র ব্যাগ দুটি এবং তিনটি হট কেস এনে দিয়ে আবার প্রণাম করে বলল, গাড়ি ছাড়তে দশ মিনিট দেরি আছে। আমরা কি যেতে পারি আঙ্কলজী? আপনার ঠাণ্ডা সোডা ও জল সব কোচ অ্যাটেনড্যান্টকে দিয়ে দিয়েছি। আর এই রাখুন আপনার টিকিট।

কুকু বলল, আপনার সঙ্গে যিনি এসেছিলেন, উনি যাবেন না? ওঁর টিকিটও তো কাটা হয়েছে। আপনার আসার টিকিট তো আমার কাছেই রেখে দিয়েছিলাম সেই জন্যেই, যখন এলেন তখন গেটে দিই নি চেকারকে।

এইচ. পি. বললেন, খুব অন্যায়ে হয়ে গেছে আমার। তোমাদের বলে দেওয়া উচিত ছিল। এখন ফেরত দিলে ত এক পয়সাও ফেরত হবে না। সরি।

যাকগে। ভালই হল। খেয়ে দেয়ে দরজা লক করে শুয়ে পড়তে পারবেন। মুড়িতে বা টাটাতে কেউ ঝামেলা করতে পারবে না এসে। চলি আমরা। নমস্কে আঙ্কলজী।

এইচ. পি. ওদের মাথায় হাত দিয়ে আশীর্বাদ করলেন। সময়ে বিয়ে করলে ওঁরও এইরকম ছেলেরা ও বৌমারা থাকতে পারত। কিন্তু থাকলেও তারা এতো ভাল ও বিনয়ী কি হতো? কলকাতার সংস্কৃতি থেকে বিনয়, সহবৎ সব উধাও হয়ে গেছে। কিংসুক আর অস্তদের শহর এখন ওটি।

ওরা চলে গেলে যখন একা হয়ে গেলেন তখনই দেবীর কথা মনে হল তাঁর। কবে ফিরে গেল কে জানে মেয়েটা। গেলেও হয়ত নন-এসি থ্রি টিয়ারে যাবে গুঁতোগুঁতি করে। ওর মতো মেয়ের অত কষ্ট করা ঠিক নয়। জঙ্গলে কষ্ট করে, ঠিক আছে। কিন্তু হৃদয়হীন শহরের পথে-ঘাটে, ট্রেনে-বাসে ঝুলোঝুলি করাটা ওকে মানায় না। সাদা সীট কভার লাগানো একটি সাদা রঙা ওপেল-করসা গাড়ি থাকা উচিত ছিল ওর। সাদা উর্দি পরা ওয়েল-ম্যানারড স্মার্ট এক জন ড্রাইভার। ওর ওঠা-নামার সময়ে যে দরজা খুলে ওকে ওঠাবে এবং নামাবে।

ভাবনা শেষ হবার আগেই অ্যাটেনড্যান্ট এসে বললেন, স্যার, সোডা কখন লাগবে বেল টিপে জানাবেন, আর এম. এস. ডি. ভট্টাচার্জি যাবেন কি? সময়ত আর মাত্র পাঁচ মিনিট আছে।

হয়ত কাজে আটকে গেছেন কিন্তু উনি না আসতে পারলেও পয়সা দিয়ে টিকিট যখন কাটা হয়েছে তখন অন্য কারোকে ক্যুপেতে ঢোকাবেন না। খাওয়ার পরে আমি লক করে শুয়ে পড়ব।

ঠিক আছে স্যার।

আচ্ছা একটা সোডা আর একটা গ্লাস দিয়েই যান।

এখনি আনছি।

সোডা ও গ্লাস দিয়ে যেতেই ব্রিফকেস-খুলে টিচার্স-এর বোতলটা বের করে একটা ছইস্কি ঢেলে নিয়ে সোডা ভরে নিলেন। অ্যাটেড্যান্ট দরজাটা টেনেই দিয়ে গেছিলেন। কোচটা ফাঁকাই। ভিড় নেই তেমন। এ সি কোচ-এর জানালা দিয়ে রাতের বেলা কিছুই দেখা যায় না। বড় অস্বস্তি লাগে। বাইরে থেকে ভিতরেও কিছু দেখা যায় না। পর্দাগুলো টেনে দিলেন উঠে। ওয়াশ বেসিনের ওপরের আয়নাতে তাঁর মুখটাকে দেখা গেল। একেবারে সান-ট্যানড হয়ে গেছেন। চেনা যায় না। টাকটা যেন আরও বড় হয়েছে। নাঃ সামনে ও জুলপিতে রূপোলি চুল ঝিলিক মারছে। তা মারুক। কলপ করাতে তাঁর রুচি নেই। কলপ করা মানুষদের মধ্যে কারো কারোকে উনি জানেন। সে মানুষগুলো কপট এবং ভণ্ড। তা বলে সবাইই কি তেমন? তা নিশ্চয়ই নন।

গ্লাসে একটা চুমুক দিলেন। ভাবছিলেন, দেবী যদি ওঁর সঙ্গেই ফিরত, বেশ হতো। অনেক কথা ছিল তাঁর ওর সঙ্গে। যা হবার নয় তা হবার নয়। একটা দীর্ঘশ্বাস পড়ল এইচ. পি.-র। আবার সেই গানটা নিশির মতো তাঁকে ডাকল। মাথার মধ্যে গুঞ্জন তুললো। “আমার বেলা যে যায়, সাঁঝবেলাতে তোমার সুরে সুরে সুর মেলাতে।”

এমন সময়ে দরজাতে কেউ নক করল। সম্ভবত টিকিট-চেকার। ওপাশ থেকে কোচ অ্যাটেড্যান্ট-এর গলা শোনা গেল, স্যার!

ইয়েস। কাম ইন। বললেন, এইচ. পি.।

দরজাটা খুলে গেল। অ্যাটেড্যান্ট বললেন, উনি এসে গেছেন স্যার। আব দু’মিনিট দেরি হলে ট্রেন ফেইল করতেন।

এইচ. পি. উঠে দাঁড়ালেন।

দেবী হেসে বলল, আমি এসেছি।

ভাল। আসবে যে সেটা একটু জানিয়ে আশ্বস্ত করলে ভাল হতো না কি?

আসতে যে পারব তার কোনো ঠিক ছিল না। তারপর মন বলল, হয়ত আপনি ফেরার টিকিটও এক সঙ্গেই কেটেছেন। হয়ত না এলে আপনি দুঃখ পাবেন। কি করে যে এসেছি তা আমিই জানি। মুসলিম দাদা তার প্রিহিস্টরিক মোটর সাইকেলে বসিয়ে চান্দোয়া-টোড়িতে পৌঁছে দিল, সেখান থেকে চাতরা থেকে রাঁচী যাওয়া একটা বাস ধরে রাত্তি রোড-এর বাস স্টপেজ। সেখান থেকে সাইকেল রিকশা করে স্টেশনে। রিজার্ভেশন চার্ট-এ দেখলাম আপনার নাম তো আছেই আমার নামও আছে। তাই উঠে এলাম।

যদি নাম না থাকত, কি করতে?

আনরিজার্ভড সেকেন্ড ক্লাসে চড়ে যেতাম।

বসার জায়গা না পেলে?

দাঁড়িয়ে যেতাম। কতবার গেছি এসেছি। বই পড়তে পড়তে রাত কাবার করে

দিতাম। কত মানুষই তো ওমনি করেই যান, আমার চেয়ে অনেক বিদ্বান, বুদ্ধিমান সব মানুষ।

তারপরই বলল, বাথরুম থেকে একটু পরিষ্কার হয়ে আসি। আজ সারাদিন যা গেছে। দুপুরেও খাওয়া হয় নি। আমাদের কেঁচো কম্পাস্ট-এর পিট-এ একটা মেয়েকে কিং-কোবরাতে কামড়ে দিল।

কী সাংঘাতিক! তারপর?

তারপর কি? বাঁধন দিয়ে মুসলিমদার মোটরসাইকেলের পেছনে তাকে ধরে বসে জঙ্গলের শর্টকাট দিয়ে লাতেহারে হাসপাতালে। তাও আবার ইনজেকশন ছিল না। অনেক খোঁজাখুঁজির পর একটা বেরল...

মেয়েটি বেঁচেছে ত?

তা বেঁচেছে। মেয়ের জাত। কপালে আরও কত কষ্ট আছে সারা জীবন, অত সহজে কি পার পাবে? তবে কষ্টের এখনও শুরুই হয় নি।

মানে?

মানে বিয়ে হয় নি এখনও।

ওঃ।

বললেন, এইচ. পি।

স্যার, ফারস্ট এ সি-তেও খাওয়ার দেয় না? কি খিদে যে পেয়েছে। অন্য ক্লাসে দেয় না। জানি।

নাঃ। কিন্তু তুমি অভুক্ত থাকবে জেনেই সোহনলালবাবুর স্ত্রী তোমার জন্যে সব গরম খাবার দিয়ে দিয়েছেন। চার রকম আচারই আছে।

দেবী, বাচ্চা মেয়ের মতো জিভটাকে টাগরাতে ঠেকিয়ে টাক্ করে একটা শব্দ করল। তারপরই বলল, যাই।

যাচ্ছে কোথায়? তোয়ালে নিয়ে যাও। লিকুইড সোপ তো বাথরুমেই আছে। আর কেক চাও তো আমার সাবান নিয়ে যাও নতুন। ব্যবহার না-করা।

ব্যবহার করলেই বা কী! কিন্তু লাগবে না।

দেবী চলে গেলে এইচ. পি. বটম-আপ করলেন। আরেকটা হুইস্কি ঢাললেন, বড় করে। সোডা মেশালেন। তারপর মনে মনে বললেন, কিংসুক না অস্তু কে যেন বলেছিল, যারা গুনে গুনে হুইস্কি খায়, তারা মানুষ খুন করতে পারে, সুদের কাঁরবার করতে পারে। ঠিকই বলেছিল হয়ত। আজ থেকে না-গুনে হুইস্কি খাবেন এইচ. পি.। কী খুশি যে লাগছিল তাঁর, তা বলার নয়। যেদিন লানডান-এর ওয়াটসন অ্যান্ড ওয়াটসন-এ জয়েন করেছিলেন গ্রে'জ ইনন থেকে ব্যারিস্টার হবার পরে সেদিন যেমন আনন্দ ও উত্তেজনা হয়েছিল আজ যেন ঠিক তেমনই হচ্ছে।

প্রায় মিনিট দশেক পরে ফিরল দেবী ঝকঝকে হয়ে। ক্যুপের আলোতে ওকে দেবীর মতোই দেখাচ্ছিল। শুধু দেবী ত নয়, দেবীশ্রী। মেয়েরা যে এক জন পুরুষের জীবনের সব শূন্যতা কী দীপ্তির সঙ্গে পূরণ করে তা দেবী শেষ মুহূর্তে ট্রেনে এসে ওঠাতে এইচ. পি. যেন প্রথম বার বুঝতে পারলেন।

দেবী বলল, স্যার, আপনাকে এবার বাস্তুহারা করব।

মানে ?

মানে একটু বাইরে যেতে হবে। আমি চেঞ্জ করে নেব। শাড়ি টাড়ি ত আনি নি। যে সালোয়ার-কামিজ পরে এসেছিলাম সেটা আর পরার মতো নেই। সকাল থেকে পরে আছি জিনস্। যা ঘেমেছি না সারাটা দিন। মেয়েদের গরমে বড় কষ্ট। পুরুষেরা সেই কষ্টের কথা কখনও জানবেন না। কাল সকালে ত নাইটি পরে প্লাটফর্মে নামতে পারব না। এই জিনসই পরতে হবে। রাতটা তো কাটাই নাইটি পরে।

এইচ. পি. দ্বিতীয় হুইস্টিটাও শেষ করে বললেন, কতক্ষণ বাস্তুহারা করে রাখবে?

দু-তিন মিনিট। হয়ে গেলেই আমিই দরজা খুলে ডাকব আপনাকে।

বেশ।

বলে, এইচ. পি. দরজা খুলে বাইরে গেলেন কামরার। ভেতর থেকে দরজা লক করার আওয়াজ হলো।

যখন দরজা খুলে ভিতরে ডাকল তাঁকে দেবী তখন কামরাটা সুগন্ধে ম ম করছিল একটি হালকা-বেগুনি রঙা কটন-এর নাইটি পরে আছে দেবী। স্নিভলেস। বুকের, গলার ও ঘাড়ের কাছে লেস এর ফ্রিল দেওয়া।

বাঃ।

এইচ. পি. বললেন।

এটা গত বছরে পূজোর আগে পছন্দ করে কিনেছিলাম। এটা কি রং জানেন? না। কি রঙ?

ফলসা। পড়েননি রবীন্দ্রনাথের কবিতা? “ফলসাবরণ শাড়িটি চরণ ঘিরে।”

তুমি ত সুন্দরই।

এইচ. পি. ভাবছিলেন, ভাবলেন। নাইটি ত বাইরের মানুষদের দেখাবার জন্যে নয়। স্বামীকে অবশ্য জন্মদিনের পোশাকই দেখায় দেবী এবং মানবীরাও।

মুখে বললেন, কথা পরে হবে। আগে খাও।

হ্যাঁ। খাব আজ খুব।

ক্যাসারোল খুলতেই খাঁটি ঘিয়ের রান্নার খুশবু ম ম করে উঠল দেবীর শরীরের সুগন্ধকে পান্না দিয়ে। দেবী নাক কুচকে ঠোঁটের একটা সুন্দর ভঙ্গী করে বলল উ ম্-ম্-ম্-ম্। ডিপ্লীসাস্।

না খেয়েই?

ঘ্রাণেন অর্ধভোজনম্।

তুমি চুপ করে বোসো। অত ছটফট কোরো না। আমি পরিবেশন করছি, তুমি খাও।

বাবাঃ। এত আদর কি সুইবে? আমার বাবা আমাকে এমন করেই খাওয়াতেন ছোটবেলাতে। ভুলেই গেছি এসব।

কেন মা খাওয়াতেন না?

নাঃ। আমার মা...।

নাও খাও পরোটা, দেখি তো, কি কি দিয়েছেন কৃষ্ণা ভাবী? এই যে, মুচমুচে পরোটা, উনি জানেন যে আমি মুচমুচে ভালবাসি, তাই, মটরগুঁটি আর আলুর তরকারি, বেগুন বাসন্তী, পটলের দোলমা। ভিতরে কি সব দিয়েছে, কিসমিস বাদাম পেস্তা এসব। পনীর বাটার মশালা, ধোঁকার ডানলা, আলুবথরা আর আনারসের চাটনি, লেবু, আম, আমলকি আর লঙ্কার আচার। রাবড়ি। পেট ভরবে তো?

দেবী বলল, আপনার প্লেট কই? প্লেট তো একটাই দিয়েছে।

তুমি খেয়ে নাও, চামচ আর কাঁটা নাও, এই। তোমার খাওয়া হয়ে গেলে প্লেটটা ধুয়ে নেব আমি তারপর খাব। যা খাবার দিয়েছে তাতে চার জন খেতে পারে। তুমি শুরু করো, আমি ততক্ষণে আর একটা হইস্কি খাই।

কটা হল?

এটা নিয়ে তিনটে।

চারটির বেশি খেতে দেব না আপনাকে।

এইচ. পি. চুপ করে রইলেন।

বললেন, নাও শুরু করো।

ভাবছিলেন আজ অবধি মা-বাবার মৃত্যুর পরে এমন শাসন করে কেউই তাঁর সঙ্গে কথা বলেনি। তখন, শাসনকে অত্যাচার বলে মনে হতো। আজকে জীবনে অনেক দূর হেঁটে জীবনের সঙ্গে বেলাতে এসেই বুঝলেন যে যেটাকে অত্যাচার মনে করেছিলেন সেটাই আসলে আদরের পরাকাষ্ঠা। স্তব্ধ হয়ে বসে হইস্কিতে চুমুক দিলেন। সোডা কম হয়ে গেছে। বেলটা টিপলেন একবার অ্যাটেন্ড্যান্টকে সোডা আনতে বলবেন বলে। দেবী, সীটের উপরে জোড়াসনে বসে একটা তোয়ালে কোলে ছড়িয়ে কোলের ওপরে ডিশ নিয়ে ওর সুন্দর আঙুলে পরোটা ছিঁড়ে ছিঁড়ে খাচ্ছে। ওর এই ঘরোয়া ফলসা রূপ অ্যাটেন্ড্যান্টও দেখবে এটা ওঁর পছন্দ হলো না। দুটি অনাবৃত সুডৌল উজ্জ্বল বাছ, সুগঠিত দুটি কবুতরী স্তন, যদিও নাইটিমোড়া। তবুও, না, উনি দরজা একটু খুলে দাঁড়িয়ে রইলেন, তারপর ঐভাবেই হাত বাড়িয়ে সোডাটা নিয়ে দরজা লক করে দিলেন।

দেবী কারণটা বুঝলো না। বলল, দারুণ রান্না। কী খিদে যে পেয়েছিল, এখন বুঝছি।

তারপর বলল, খাওয়া হয়ে গেলে আপনার মোবাইল ফোন থেকে ইন্ডিজিৎদাই একটা ফোন করতে পারি?

নিশ্চয়ই! একটা কেন? দশটা করো।

না একটাই করব। মুসলিমদাদা চাঁদোয়া থেকে ফোন করে খবরটা দিয়েছে। কি বলতে কি বলেছে। আমি বললে আশ্বস্ত হবেন। আমি খেয়ে আপনাকে বেড়ে দেব। ডিশটা এই ওয়াশ বেসিনেই ধুতে পারব ত স্যার?

হ্যাঁ হ্যাঁ। তোমার নাইটি পরে বাইরে যেতে হবে না।

দেবী অবাক এবং একটু কৌতূহলের চোখে এইচ. পি.-র মুখে চেয়ে রইল। ঠোঁটের কোণে এক চিলতে হাসি এসেই মিলিয়ে গেল।

ওর খাওয়ার পরে এইচ. পি.-কে ডিশ ধুতে দিল না কিছুতেই। তারপর এইচ. পি.-র কোলের উপরে তোয়ালেটা বিছিয়ে দিয়ে খাবার পরিবেশন করে খাওয়াতে লাগল। এইচ. পি. বললেন, ট্রেনে হার্ট অ্যাটাক হয়ে মারা গেলে কি ভাল হবে? এক জনকে সাপে কামড়াল আর আমাকে কি তোমার হাতেই মরতে হবে? রাতে আমি খুব কম খাই।

এটা তো কলকাতা নয়। আর আপনাকে খাওয়ায় তো বেয়ারা-বাবুচীরা নিশ্চয়ই। ইদ্রিস আলি না কি নাম বলেছিলেন। আমি তো আর ইদ্রিস আলি নই। আমি যা বলব সব শুনতে হবে। আমি তো আপনার চাকরি করি না স্যার যে চাকরি যাবার ভয়ে মরব।

আবারও শুরু হয়ে গেলেন এইচ. পি.। চাকরি খাবার ভয় যে করে না, যে তাঁকে অবহেলায় ধমক দেয়, তেমন একজন মানুষের ভারি অভাব ছিল তাঁর জীবনে। কী যে হবে তিনি জানেন না। কালকের ভোর তাঁর জীবনে কী যে বয়ে আনবে! বড়ই বিপদে পড়লেন তিনি জীবনের সন্ধ্যাকালে এসে।

খাওয়া দাওয়ার পরে দেবী ইন্দ্রজিৎ ও সুমিতার সঙ্গে কথা বলল। তারপর এইচ. পি.-ও বললেন। বললেন, কলকাতাতে গিয়ে ডাইরী দেখে পরের বার কবে আসছেন তা জানাব। ডোনেশন-এর ব্যাপারেও জানাব। ইট ওজ আ প্লেজার মীটিং উ বোথ।

ইন্দ্রজিৎ বললেন, পারলে মেয়েটাকে একটু দেখবেন চ্যাটার্জি সাহেব। বড় ভাল মেয়ে, গুণী মেয়ে, কিন্তু বড় দুঃখী মেয়ে।

থ্যাক্স ড্য। নিশ্চয়ই। ডোন্ট ড্য ওয়ারি প্লিজ।

তারপর সোহনলালবাবুর স্ত্রী কৃষ্ণাজীকে একটা ফোন করে বললেন, ভাবীজী মেরী মাতাজীকি ইয়াদ আয়ি বহুত সাঁলো বাদ। স্রিফ খানাহিতো নেহি ভেজি থী আপনে, পেয়্যার সে ডুবা ছয়ে থে বিলকুল। লিজিয়ে, মেরী কোম্পানি ক্যা বোলতি হ্যায় উ শুনিয়ে।

দেবী বলল, নমস্কে চাচীজী। অ্যায়সা খনা ত ম্যায় কওভি নেহি খায়িথী পহিলে।

কৃষ্ণা ভাবী বললেন, কলকাতাসে যব্ভি আওগে, জরুর আও বেটি মেরী ঘর পর। মুরহমে ভি আও।

মুরহুই ঠিক রহেগা। মেরী কাম কে লিয়ে ত হামারি খুঁটি, তামার, বুণ্ডু, তাজনা ইয়ে সব জাগে মে যনাহি পড়তি হ্যায়।

তব ওর ক্যা, আ যাও। আপনাই ঘর শোচো। যব দিল করতি তব আ যাও।

দেবী বলল, কটা হল? স্যার? এইটা নিয়ে চারটে হবে।

ব্যস। এবার ঘুম। আমারও সত্যি ভীষণই ঘুম পেয়েছে। কিন্তু বললেন না তো কেমন বেড়ালেন? কলকাতায় ফিরে আপনাকে একটা 'সাসানডিরি' উপন্যাস কিনে

দেব। ঐসব অঞ্চলের পটভূমিতে লেখা। আমার দারুণ প্রিয় বই। কত যে গান আছে বইটিতে মুণ্ডাদের! মুণ্ডা মিথোলজি। একটি ঠাসবুনোন প্রেমের কাহিনীর মধ্যে মধ্যে এসবই বুনে দিয়েছেন লেখক।

দিও। ঐসব গানের একটা শোনাও না।

এসব তো নেচে নেচে গাইবার গান।

নেচেই গাও। আমি ছাড়া আর কে দেখবে?

দুষ্টুমিভরা হাসি হেসে দেবী বলল, আসলে আমি এতো ভাল গাই আর নাচি যে শুধুমাত্র এক জনকে দেখানো, Waste of talent।

এইচ. পি. হাসলেন। দেবীর সেঙ্গ অফ হিউমারে প্রীত হলেন।

দেবী উঠল। তারপর হাত দু'টি মাথার পেছনে নিয়ে সামনে ঝুঁকে গান ধরল নিচু গলাতে।

“সোনালেকান দিশুম তাবু, রূপালেকান গামায় তাবু
ছোটোনাগাপুরেহো, মুণ্ডাতুয়া হুডুমসুকুরাসি, লিঙ্গিজোরতানা...

জোমতানকে জোমতানা নুতানকে নুতানা,

ছোটোনাগাপুরেহো, মুণ্ডাতুয়া হুডুমসুকুরাসি লিঙ্গিজোরতানা..

আদা কানতো দানাকোয়াবু মিসিহানকো খোজার খোয়াবু

ছোটোনাগাপুরেহো, মুকুতুয়া হুডুমসুকুরাসি লিঙ্গিজোরতানা..

মুগ্ধ হয়ে চেয়ে রইলেন ফলসা-রজ নাইটি-পরা গান-গাওয়া আর নৃত্যরতা দেবীর দিকে। একটি অল্প বয়সী জ্যাকারান্ডা গাছ যেন বেগুনি ফুলের পসরা নিয়ে চৈত্র পবনে দুলে দুলে গান গাইছে।

গান ও নাচ থামিয়ে দেবী বলল, উফফ্। ভর পেট খেয়ে এমন কোমর ঝুঁকিয়ে কি নাচা যায়?

তা ঠিক। ভরপেট খাওয়ার পরে....

স্বগতোক্তির মতো বললেন এইচ. পি.।

এবারে তা'হলে ঘুম?

তুমি যা বলবে। বিষাদমগ্ন গলাতে বললেন এইচ. পি.।

তারপর একটু দ্বিধা ভরে বললেন, তোমার সঙ্গে আমার অনেক কথা ছিল।

হবে। কাল তো রবিবার। আপনি তো কোর্টে যাবেন না। আমি তো আপনার সঙ্গে আপনার বাড়িতেই যাব। বলবেন কথা সারা দিন ধরে।

রাতে কোথায় যাবে? তোমার মায়ের কাছে?

কোথাওই যাব না। মায়ের কাছে যাব, তবে পরে। কাল থেকে আমি আপনার সঙ্গেই থাকব। আপত্তি আছে কি আপনার?

আমার...মানে....

এইচ. পি. কিছুই না বলতে পেরে থেমে গেলেন।

তুমি তো ওপরে উঠবে। দাঁড়াও সিঁড়িটা লাগিয়ে দিই।

না স্যার। উপরে উঠব না। আমি আপনার হাতে মাথা দিয়ে শোব আজ রাতে,

আপনার পাশে! আমার বাবার হাতে যেমন শুতাম মাথা দিয়ে। আপনি আপত্তি করবেন?

এইচ. পি. কোনো কথা বললেন না।

শুয়ে পড়ুন স্যার। আপনি শুলে তবে না আমি পাশে শোব। ভীষণই ক্লান্ত আমি।

কোন হাতের উপর মাথা দিয়ে শোবে?

আপনি যে হাত বাড়িয়ে দেবেন স্যার।

ডান হাতের উপরে শোও।

ঠিক আছে। আপনি শোন আগে।

তারপর বলল, আলো কি সব নিভিয়ে দেব স্যার?

সব নিভিয়ে দাও। তুমি তো আলো করে রইলেই আমার পাশে। অন্য আলোর কি দরকার?

শব্দ না করে হাসল, দেবী।

আলো সব নিভিয়ে দিয়ে সাদা পায়জামা-পাঞ্জাবী পরা এইচ. পি.-র ডান হাতে মাথা দিয়ে শুয়ে পড়ল দেবী। তার চুল তখনও ভিজে ছিল। এইচ. পি.-র হাতটি দেবীর সুগন্ধি চুলে ভিজে গেল।

এইচ. পি. বললেন, তুমি কি ডিসিশান নিয়ে ফেলেছ?

হ্যাঁ।

কেন? এই ধুমসো-ফ্যাটসোর মধ্যে কী দেখলে তুমি।

খুব নিচু কিন্তু গাঢ় স্বরে দেবী বলল, একজন পুরুষের মধ্যে মেয়েরা যা দেখে। মেধা, অর্থ, সাফল্য, ভালত্ব এবং যশই মেয়েদের কাছে সবচেয়ে বড় পৌরুষ, বিশেষ করে সে সব স্বোপার্জিত যদি হয়, চালাকির দ্বারা না-পাওয়া হয়। শরীরটা যদি এতই দামী হত তবে মেয়েরা পুরুষদের বিয়ে না করে ঘোড়াদের বা যাঁড়দেরই বিয়ে করত। অনেকে তা করেও অবশ্য।

আর কিছু বলবে?

এইচ. পি.-র হাতের ওপরে পাশ ফিরে তাঁর গালের সঙ্গে গাল লাগিয়ে দেবী ফিসফিস করে বলল, আপনার কাছে থাকলে আমি নিরাপদ এবং নিশ্চিত বোধ করব। আপনি আমাকে ফেলে দেবেন না তো স্যার?

না। কোনো দিনও না।

আমাকে একটা গাবলু-গুবলু ছেলে দেবেন?

এইচ. পি.-র গলা ধরে এল। অনেকক্ষণ কথা বলতে পারলেন না। তারপরে ফিসফিস করে, প্রায় স্বগতোক্তি করার মতো করেই উনি বললেন, দেব।

দেবী বলল, সন্ধ্যাবেলাতে দাড়ি কামাননি বুঝি স্যার? আমার গাল জ্বালা করছে। প্রত্যেক দিন দু'বেলাই দাড়ি কামাতে হবে কিন্তু।

এইচ. পি. দেবীকে জড়িয়ে ধরলেন। মুখে কিছুই বললেন না। চলন্ত ট্রেনের

অঙ্ককার কামরাতে শায়ীন ংকজন প্রাগৈতিহাসিক পুরুষের দু'চোখে নিঃশব্দে
আনন্দাশ্রু বইতে লাগল।